



Wink Koiabunier  
Lukman

7  
16-E  
47



M

Ex Bibliotheca  
majori Coll. Rom.  
Societ. Jesu

79.3.28

~~7.16.47~~

~~7.11.43~~









Collegii Romani Societatis 1651  
Biblith. Sec.





Illustrissimo ac Celsissimo Domino,

Domino

CASIMIRO LEONI

S A P I E H A,

Magni Ducatus Litvaniæ

PROCANCELLARIO,

Slonimensi, Lubofzanensi, Volpenfi, &c. &c.

G V B E R N A T O R I.

Domino ac Patrono Gratifissimo.



Istoriã Litvanã, operã  
ac studio Reverendissimi  
Patris Alberti Kojalowicz  
affabrè elucubratã & ab  
ipsis gentis hujus incuna-  
bulis cœptã, perque juventã aduf-  
que virilem ætatẽ diductã, meis vero  
sumptibus nunc demum exscriptã, si

cui alii , quàm Tibi , inclyte Heros , inscriberem , piaculum propè inexpiabile videri posset. Tu etenim ex illa familia nomen ortumque trahis quæ inter Litvanas non solum antiquissima , & , nî fides vetustissimorum Annalium vacillet , vel ipsa Olgerdi tempora anteit , aut certè coæquat ; verum etiam , ob res domi forisque præclarè gestas , audit præclarissima , hujusque operis partem occupat haut postremam. Ex hac viri omni ævo fortissimi ac prudentissimi , maximi Senatores ac bellicosissimi Imperatores , non aliter quam ex equo Trojano , cattervatim prodière , quorum Catalogum texere , nec mei ad præsens est instituti , nec mearum virium. Satis erit unum vel alterum solum recensuisse. Inprimis de Bogdano Palatino Minscen. extat apud scriptorem non incelebrem , omni cedro dignum

dignum Elogium. *Vir inquit ille, benevolentia  
& humanitate, praeipuus ideo in bello felix.* Et ite-  
rum ibidem, de Andrea Palatino Polo-  
cen. ita scribit : *Erat strenuus & fortis, quia nun-  
quam crudelis.* De altero verò Andrea, Pa-  
latino Novograden. magni illius Ioannis  
filio, qui sub Rege Sigismundo I rebel-  
lionem Ruthenicam in ipsa, quod ajunt,  
herba oppressit, dignum memoratu est,  
quod viginti quatuor millia Moschorum  
cum Tartaris devicerit, & ad internecio-  
nem usque deleverit, prout ex antiquis  
monumentis. refert Paprocius nostras.  
Quid memorem Parentem Tuum lauda-  
tissimum ? Is sanè iudicio sapientissimi  
Regis Stephani prae tot reliquis dignior  
habitus, quem Curiae suae Regiae, tan-  
quam fidum Achatem perpetuo addice-  
ret. Post cujus verò Regis excessum, ad  
summos in Republica honores, grada-

tim ascendit, tandemque Dux Exercituum M. D. Litvaniæ post magnum illum Litvaniæ Scipionem Chodkevicium, suffragio totius Reipubl. fuit declaratus. Quam ille nactus Spartam adeò exornavit, ut redivivum crederes in ipso Chodkevicium. Sed ad Te ipsum, inclyte Heros, mea properat Oratio. Tu sanè jure quodam proprio, hujus operis dedicationem Tibi vindicas. Nam ut cætera taceam, quæ Tu in Toga ac Pace hætenus gessisti; qui legationem ad Moscoviæ Principem, gravissimis in Reipubl. negotiis, ea in ætate, quæ, etsi non annis prudentia tamen maturuerat, subiisti, ac laudabiliter absolvesti: qui summos in Reipubl. Magistratus, ea fide atque integritate administrasti, ut quod in Te desideret quisquam, non habeat, quod vero miretur, ac imitetur, plurimum: qui literarum

rarum ac literatorum fautor semper fui-  
sti eximius : promotor verò earundem  
beneficentissimus : qui Academiam Vil-  
nensem bonarum mentium excultricem,  
fecundamque literarum altricem , pro-  
fessione publica Iuris Civilis & Canonici,  
qua hucusque erat destituta, primus ex-  
ornasti, inque ejusdem Doctores magni-  
fica stipendia ex proprio ærario Tuo  
contulisti. Illæ insuper in Sago & bello  
nuper adeò res fortiter gestæ , siparii fi-  
lento involvi neutiquam possunt. Cùm  
enim perruptis fidei ac subjectionis re-  
pagulis, licentiosa Cosacica tempestas, in  
universam Rempubl. Polonam detonare  
cepisset , & jam etiam ipsi Litvaniæ in-  
grueret, Tu inprimis, Heros magnanime,  
imperterrito pectore eam primus exce-  
pisti , Tuique Exercitus robore discussi-  
sti, ac Rempubl. periculosissimo tempore  
servasti.

servasti. Ita ut Tibi Liberatori ac Conservatori Litvaniæ, meritò Litvaniæ debeat Historiam. Accipe ergò Illustrissime Heros serenâ fronte de meis manibus opus præsens Historicum, quod Tibi Author ipse consecratum esse voluit, meque in numerum Clientum Tuorum gratiosè suscipe, benignè fove ac clementer conserva. Dantisci anno 1650, die 1 Iulii.

*Illust<sup>ma</sup> Celsit. Tuæ*

Devotissimus Cliens

GEORGIUS FÖRSTERUS.

A V-



A V T H O R I S  
P R Æ F A T I O

ad eundem

Illustrissimum Dominum

CASIMIRVM LEONEM  
S A P I E H A M.



ILLUSTRISSE DOMINE,

*Quo tempore Litvana hac Historia,  
ex eruditorum censurâ, in apertum pro-  
spectare cœpit, publicam Litvania inco-  
lunitatem magnâ sui parte Tua Celsitudini innixam  
reperit. Quare cum absque Patrono prodire non aude-  
ret, neminem alium ante Celsitudinem Tuam ambire  
potuit: ne videlicet aliunde sibi quæreretur patrocinium,  
quam ubi Publica Rei præsidia advertebat. Profectò  
fato quodam ita Res Litvana agitur; ut inter Dome-  
sticos motus, adversus suprema pericula è Sapiehana  
Domo prima veniant præsidia. Graves olim Arorum*  
\* \* \* *memo-*

## P R Æ F A T I O

*memoria , ex Glinſciana ſactione incubuerat tempeſtas ;  
atque , ſi ad deſtinatam prodicionem Ruſſorum defeſtio  
acceſſiſſet, extrema futura. Verum conſilia rebellium ma-  
ture à Ioanne Sapieha deprehenſa , Regi indicata con-  
trariis artibus oppugnata ; eo ipſo robur amiſerunt quòd  
ante quam ex integro coaluiſſent in lucem fuiſſent pro-  
tracta. His verò ipſis luctuoſis menſibus , quando à  
Morte Vladislai IV Zaporovviana rebellio , Ruſſis ,  
Scythiciſque legionibus ſuccincta , tot agreſtes in exci-  
dium Nobilitatis armauerat ; quanta vaſtitas Litva-  
niam exercuiſſet ? niſi Sapiehana præſidia in tempore  
ſubmiſſa , retardando hoſtium progreſſui præſto adfuiſ-  
ſent. Sub præſenti diſcrimine , multis in ſuam ſolum rem  
intentis , multis nihil ultra verba vacuaque rebus conſi-  
lia promentibus , multis inter ſtipendiorum licitationem  
hærentibus , pauci ſolo Honeſto , germanoque Honeſti  
præmio Famâ contenti , laborantis patriæ curis ſeſe im-  
pendebant : porro inter hoſce paucos Tua Celſitudo mi-  
litem de proprio lectum , ita oportunè biſariam hoſti fre-  
nando objecit : ut & Ruſſiæ albæ ulteriores provincia ,  
& propinquior Poleſia Litvania , integritatem ſuam  
illi ,*

# A V T H O R I S.

*illi , aut ante omnes , aut inter primos , debeant : Privatus hac loquor , sed ex mente , sensuque Reipublica: cujus nomine, hoc ipso 1649 Christi nati anno, ultima Ianuarii die, publica gratia Senatu Equestrique Ordine in Comitibus Cracoviensibus prasente acta sunt ; quod periclitanti in Litvania Reipubl. non manipulis sed integris subsidia tuleris. Atque hac quidem , cumulatius & pro merito narrata illius atatis historia ad posteritatem transmittet : hic tamen obiter attingenda necessario erant ; ut testatum saculis facerem Historiam Litvanam non potuisse à me aliter in publicum mitti quam sub Tue Celsitudinis patrocinio. Necesse enim omnino erat , ut idem esset Historiæ Litvanæ Patronus , qui Rei Litvanæ præcipuus vindex. Quare cum ex publica omnium bonorum gratulatione in confesso sit , à Tua Celsitudine , insigni in patriam pietate , studio incredibili , sumptibus magnificis , Rem Litvanam his luctuosissimis temporibus , maxime promoveri : ut non ad conspectum modo , sed etiam sub peculiare patrocinium Tue Celsitudinis hac Historia Litvana admittatur , singularis erga Patriam , Rerumque ejus incrementa*

*amor*

PRÆFATIO AVTHORIS.

*amor Sapientiano ac præsertim Tuo pectori genuinus,  
facile persuadebit.*

Celsitudinis Tuæ

*Clientis infimus*

ALBERTUS WIŁUK KOJALOWICZ,  
Soc. Iesu.

---

F A C V L T A S.

**E**Go Infra scriptus Soc. Iesu per Provinciam Litvaniæ Præpositus Provincialis, potestate mihi ad id factâ ab Admodum Reverendo P. nostro Vincentio Caraffa Præposito Generali, facultatem concedo, ut Historiæ Litvaniæ pars prior à P. ALBERTO KOJALOWICZ scripta & ab aliquot ejusdem Societatis Iesu Theologis revisa ac approbata typis mandetur. In quorum fidem has literas manu mea & Convento Officii sigillo munitas dedi. Vilnæ 25 August. anno Domini 1649.

*Locus sigilli.*

ANDREAS KLINGER.

HISTO-

# HISTORIÆ LITVANÆ

## PARS PRIOR,

De rebus Litvanorum ante susceptam  
Christianam religionem.

### LIBER I,

*De rebus Litvanorum ante Italorum in  
Litvaniam adventum.*



Historiam Litvanam, singulari *Historia*  
sedulitate parique fide, à Rus- *Litvana*  
sorum atque Crucigerorum *scribenda*  
monumentis erutam, pri- *ocasio.*  
mus ferè vulgaverat Matthias  
Strykowski Osoftevitijs, *Canonicus* Samo-  
gitæ, gente Polonus, vir sua ætate pereru-  
ditus. Longè tamen minore operæ pretio  
id præstitit, quàm vel ipse ex æquo spera-  
bat, vel labor impensus merebatur. Rerum  
enim ab eo comprehensarum notitia, ne-  
que loco ultra terminos, intra quos gestæ  
sunt, neque tempore, ad posteritatem mul-

A

tum

tum propagari poterat. Vtrumque autem evenire, necesse erat; quod liber Polono sermone conscriptus, exterorum quidem usibus planè inutilis esset: domi verò, distractis pridem paucis exemplaribus, brevi interiturus videretur. Optabant itaque non pauci, ad auctoris rerumque ipsarum memoriam in securo reponendam, librum iteratò sub prælo mitti: & quidem latinè loquentem, ut à pluribus posthac intelligeretur. Non omninò votum hoc probabam. Nam quemadmodum latinarum literarum cultus, in patria nostra in dies cumulatius excrescens, meritò exigere videbatur; ut juventuti quispiam scriptor ad manum esset, è quo cum domesticæ Historiæ cognitione, Romanæ linguæ notitiam gustumque, à tenero hauriret: ita non leviter vereri oportebat; ne si candidus nimis interpret integrè universa è patrio sermone reddita latinè vulgaret; auctorem optimè de Litvania meritum, at plerisque locis extra leges Historiæ liberè inter suos proVectum, censuræ eruditi

Lecto-

Lectoris obnoxium faceret. Quare ita aliorum desideriiis faciendum erat satis, ut auctoris opinio integra relinqueretur. Quod quanquam præstitum à me, nullatenus confirmare auserim: tentatum tamen esse, ingenue fateor. Inde verò pronum erit non malevolo Lectori advertere, quid à me exigere debeat, quidve ab illo, cujus nomen non dissimulavi: ut ita utriusque labore, absque alterutrius injuria, si velit, frui possit. Neque enim Historiam novo à me labore concinnatam, sed ex annalibus Matthiæ Strykovii excerptam, ad ordinem legesque literarias, quantum tenue ingenium, & longè minor eruditio, inter alia severiora studia, permittet, redigere aggredior.

Atque ut inde mihi scribendi sit initium, unde rerum scribendarum; profectò fidem, quæ scriptoribus semper inter primas curas, nullibi ferè minùs Historia apud posteros meretur: quàm ubi populorum progressus, ad primam originem ac veluti fontem revocat. Mutatio sedium, atque

*Origo Lit-  
vianorum.*

appellationum, vicissitudine plurium sæculorum implicata, ita sæpè veritatem confundit; ut eam à fabulis expeditam promere, negotium sit omninò insuperabile. Initia enim rerum publicarum intra barbariem plerumque concepta; scriptoribus caruerunt: Maturior deinde earum ætas disciplinis variis ad humanitatem exculta, quidquid inter natales suos humile deprehenderit, ut alienum respuit: solaque ea in veris & suis numerat; quæ altiùs surgunt, magisque ornant. Exteri verò Scriptores alienorum plerumque non admodum curiosi sunt: & quamvis exactiùs quandoque consignent, quidquid cum assumpta scribendi materiâ, gestorum series confudit, in cæteris tamen illam veri speciem sequuntur, quam vulgaris fama obtruserit; multum, ut solet, de falso trahens. Quòd si insuper affectu aliquo stylum ferri permiserint: tota planè, sub odio aut emulatione, veritas disperit. *Dissidia enim animorum, occultâ quadam vi, finitimis ingenerari videntur, quæ armis quoque quiescentibus, stylo obstinatè prosequi,*  
plerif



*plerisque mos est.* Hæ ipsæ fortasse causæ sunt, cur de origine & moribus Litvanorum & pauca prodita, & ex iis multa incerta, pleraque apertè falsa, circumferuntur. Illud tamen apud omnes extra controversiam: Univerſam hanc Sarmatiæ Europææ portionem, quæ Prusſiam, Samogitiam, Curo-niam, Livoniam, Eſthoniam, Litvaniam, Iatvieziam ſeu Subſylvaniam, aliasque aliquas à Venedico mari remotiores terras complectitur, ab illis olim populis habitatam fuiſſe, quibus communis ut ſermo, ita & origo cum Litvanis. Gothos eos alii, Cimbros alii fuiſſe volunt, ex inſulis Gothici Oceani egreſſos. At verò quoniam numeroſiſſimi hi populi mutatis primis ſedibus totâ latè Europâ, ſub diverſo nomine ſæpiùs exundarunt; non eſt planum, quo nomine ab externis ſcriptoribus appellentur ii ipſi, qui noſtratibus dicuntur Pruſſi, Litvani, Samogitæ, Lotavi, Iatvingi, Poloucii, Piecinigi. Mihi inter tot ambages, ubi cardo rei ſolis conjecturis vertitur, delectum inſtituenti, non leve argu-

*Herulorum  
populares  
Litvani.*

mentum è Wolfgango Lazio fuerit, antiquitus eos populos Herulos nuncupatos. Hic, scriptis præterito sæculo commentariis, Septentrionalium populorum mutationes eruditè vestigans, cùm lib. 20, in Herulorum mentionem devenisset, memorat eorum reliquias Italiâ pulsas in Megapolitano territorio confedisse, Verulosque nunc dici. Sermo illis, à reliquis circumjacentibus populis omninè discrepans est; cujus, ut exemplum Lectori scriptor exhiberet, vulgari eorum linguâ sacram Orationem cubitalibus literis executus est. Hanc cùm attentius legerem, eandem omninè magnâ parte esse deprehendi, cum illa, quam inter Litvanos ac Lotavos, usus hodie retinet. Herulis proindè veteribus, Litvaniam, & reliquas ejusdem gentis provincias, sedem atque originem fuisse vix possum ambigere. Accedit, quòd leges & instituta Herulorum, paria sint illis, quæ de Majoribus Litvanorum varii prodiderunt. Vtrisque iidem ferè in religionibus ritus: utrique olim mos propinquos, senio aut morbo spem

bo spem omnem evincente confectos, trucidandi : mancipia, equos, canes, & quidquid in vivis carum habuissent, funerali rogo, unâ cum defunctorum cadaveribus exurendi : aliaque sexcenta. Ipsa vetera Ducum ejus gentis nomina, similibus vocum affinitate, ad commune populorum iisdem terris progressorum genus, legentis memoriam retrahunt. Quis enim Zivibundum, Algimundum, Narimundum audiens, non facilè cogitet Herulum quempiam aut Longobardum nominari ? Hæc porrò nomina Litvaniæ Principum sunt. Populi nimirum Litvanis loco finitimi, origine ac lingua focii, à Sclavinis Duce Lecho Sarmatiam ingressis, sedibus suis moti, atque ab iisdem per convicium ( uti quidam annotarunt ) Sclavonico vocabulo Vandali dicti sunt. Longobardi etiam, quorum primas sedes Lotaviæ finitimas Scriptorum aliqui collocant, à longiore barbæ pilo vulgari Lotavis ac Litvanis sermone *Ilgabarzdaii* nuncupati, à Russis fortè è Sarmatiâ exacti, Germaniam primùm,  
tum

*Vnde Lit-  
vania nomen  
est de  
Littalano  
seniore.*

tum alias Romanorum provincias invaserunt. Heruli denique, variis occasionibus à regione sua avulsi, sæpius imperium Romanum, ipsamque Italiam infestarunt: paulò post ex hostibus socii, inter auxiliares copias recensì, pluribus sæculis stipendia sub Romanis signis meruerunt. Qua autem potissimum occasione, quoque sæculo, aliqua Gothorum aut Cymbrorum, aut (quod propius vero est) Herulorum tribus, Litvani dici cæperint, nihil uspiam certi reperio. Illi primùm ante alios exerrant, qui huic appellationi annos ab Italorum adventu supputant. Placet illis Italos in hæc regiones delatos, seu exilii locum, seu erroris terminum Italiam nuncupasse: quòd, inter barbaras terras, dulce patriæ nomen conservare voluissent: sed paulatim posteris memoriam præteritorum deponentibus, tempus sensim literas permutasse, & Italiam in Litaliam, tandem in Litvaniam transformasse. Alii potiùs, vel à littore in quod primum peregrini exscendissent, vel à littore tubæ nomen ductum contendunt.

Vocum

**V**ocum similitudine illi capiuntur : vernaculo enim sermone Litvania , Litruva seu Littuba dicitur. Certè quanquam multæ Latini sermonis reliquiæ inter Litvanas voces passim occurrant ; imò inflexione ipsâque accentuum varietate , ultra alias Sarmaticas linguas , ad Latinam & Græcam sese acclinent : leve adhuc inde est argumentum, pro adducta suspitione. Livonibus enim seu Lotavis ac Litvanis, similis sermo est ; æquè Latinis Græcisque vocabulis inspersus : cum tamen ad eos nec nominis communio , nec commercia advenarum Italorum pertigerint. Quemadmodum igitur Livoniæ, ita Litvaniæ nomen, Italarum in eas partes adventu antiquius est. Latinæ verò , Græcæque linguæ vestigia , quæ inter hos populos hæserunt , ab ipsis indigenis illata sunt. Post plures illi annos , per Italiam aut Thraciam in castris exactos , cùm majore identidem numero domos repeterent ; ultra opulentas prædas , exteræ linguæ usum ad suos reportabant. *Vetus est , & commune malum : extra pa-*  

B

*triam,*

*Alani à  
Principe  
suo diti  
Litvani.*

*triam, de peregrino aliquid haurire; atque fastidium rerum domesticarum praeferre: Et ut supra vulgus sapere videantur, voces exteras, patriis abolitis, per intervalla substituere.* Ad eos igitur magis animus ac fides propendunt, qui unam aliquam Herulorum tribum, Alanos olim dictam, existimant: sedemque ejus (in ea Litvaniæ ora, quæ Samogitiæ propior Nemenio seu Chrono, Vilia seu Neride, & Duna fluviis intercipitur) Alaniam primum, posterioribus verò annis, Littalianam & Litvaniam à Principe suo Littalano seu Littuone juniore nuncupatum.

*Anno 366.* Valentiniano enim Primo per Orientem imperante, Heruli, Gepidæ, Alani, magnis copiis in varias sese Romani imperii provincias effuderunt: in Germania cum latè cædibus atque igne sævirent, Alani ad Rhenum in Sicambros impeerunt: atque ab iis, repressi, ac propè deleti. Accisis eâ clade Herulorum viribus, cum nec ulterius laceratæ legiones securè promoveri possent; nec loco, quem ceperant, diu consistere: Dux Copiarum Littalanus auctor fuit,

fuit , ut maturo in confinia receptu , quæ supererat,juventutem periculo exemptam, meliori fortunæ servarent. Arreptum est avidè consilium , non tam Ducis auctoritate,quam hostium metu urgente. Fugientibus similiores in Prussiam sese receperunt. Viratâ enim patriâ , quam ingredi sine probro non poterant ; profugis , proxima ex fociorum provinciis Prussia , occurrebat. Ibi Littalanus, magistratu inauspicatò militiæ gesto,more gentis abiit. Nulli nimirum tunc illis domi Principes erant, nulli Iudices , imò nulla in commune societas : sed familias singulas per agrum ac nemora dispersas, propinquior tantum cognatio colligebat. Rumor verò hic de ingenti Alanorum strage, ac desperatus reliqui ex cæde militis reditus ; eos , qui castris inepti , domi manserant , plurimum sollicitos habuit. Circumspiciebant sese : atque inde latera finitimorum injuriis obnoxia ; hinc amissis quos opponerent viris, nulla præsidia videbant. Nihil omninò succurrebat aliud ad communem salutem

*Alanorum  
in Prussiam  
advens.*

præsentius , quàm convasatis omnibus in Prussiam migrare. Nec difficile fuit factu: cùm conclamatum fuisset ad iter , tenuem fortunam ditissimus quisque facillè curru cepit : neque multum impedimentorum erat ex reliqua re familiari ; cujus copia , ultra necessaria armenta , non extendebatur. Suscepta in fidem libenter à Prussis natio finitima : non enim metuebant periculum à populo , religionibus , linguâ , ritibus , origine , socio : quem supra tot publicæ pacis vincula , novum etiam hoc beneficium arctiùs ad concordiam obligabat. Gaudebant accessionem virium non levem factam , eo potissimum tempore , quando finitimi populi sedibus ad Vistulam promotis , arma jam ex propinquo incipiebant Prussiæ intentare. Sed crescentibus deinde per mutua connubia utriusque gentis familiis , multitudo hosti formidabilis ; sibi propè fatalis evasit. Vix in se ipsam per domestica odia non concidit. Vbi primum cultus ager deficere ; mox potentiores , tenuioribus exactis , aliena usurpare , & possessio-



sessionum fines pro cupiditate prolatos, vi invadere: hinc jurgia ac lites; nec alius controversiarum exitus, quam ille, quem absque lege ac Magistratu viventibus, feroces animi primum occupant: nempe per mutuas cædes. Quanquam non tam exitus hic controversiarum erat, quàm fons perpetuus odiorum: cum injurias alii promoveant, alii amoveant cædibus; ipsas deinde cædes, totis mutuo ulciscuntur castris. Status hic rerum omnium perturbatissimus, barbara licet pectora tangebatur: neque etiam illa, ita omnem humanitatem exuerant, ut non sentirent; præsertim, cum quæ in aliis vel detestarentur vel lugerent, eadem in se suisque timere, illi magis cogerentur, qui innocentiores. Cum igitur ex pacis cupiditate, rædium turbarum, animos occupasset; de remediis primum singuli apud se agitare, tandem cum amicis communicare. A privatis in publicos congressus, res derivata, prudentioribus grata accidit, probataque est vehementer. Duplex consilii genus animo suc-

*Veiden-  
tas primus  
Prussorum  
atque Ala-  
notum  
Princeps.*

currebat. Vnum, ut Princeps legeretur, qui singulorum cupiditati legem auctoritate sua poneret; agros limitibus definiret, de controversiis decerneret; jus belli ac pacis summum haberet. Alterum, ut coloniis aliquot ab se dimissis, Respublica populi multitudine, velut corpus sanguinis exundantis imminutione, relevaretur. Neutrum tamen statim perfici potuit. Soluti hæcenus omni legum metu, sub arbitria Magistratus ire, refragabantur: & nemo primus, ad peregrinas sedes per pericula quærendas, paterno agro excedere, volebat. Attamen ad consentiendum tam salubri consilio, vel tempus ipsum feroces animos emollivit; vel necessitas, si quid residuum de duro supererat, perfrègit. Nam qui variis expeditionibus Romani imperii provincias pervagati domi confederant; pacem publicam, velut portum à tot naufragiis, curiosius perquirebant. Adverterant illi, *quietem publicam, communi sub iisdem legibus ac Magistratu, societate consistere: idemque in sua patria factum studiosè cupiebant.*

piebant. Sed qui primus manum operi ad-  
 moveret, nullus erat : tum quòd ratio, qua  
 res adedè insolens perficeretur, non appa-  
 reret ; tùm quòd inter feroces legumque  
 ac imperiorum impatientes populos, de  
 tanti negotiì eventu, desperaretur. Ausus  
 est tamen rem arduam aggredi Veidewu-  
 tas, ætate grandis, familiâ copiosus, tribu  
 Alanus. Fuerat viro à natura, ingenium  
 versatile & audax, atque in agendo dexte-  
 ritas mira : accedebat, quòd diuturnis ex-  
 tra patriam stipendiis, fortitudinisque mi-  
 litaris opinione, & inter suos princeps ha-  
 beretur, & inter hostes clarus. Duo ille  
 potissimum agenda menti præfixerat. Gen-  
 tem ferocem ad humanitatem aliquantum  
 componere, ut faciliior illi esset Principis  
 cum summâ potestate incumbentis patien-  
 tia : tum ita successus temperare, ut si con-  
 silia Principis eligendi populo placuissent,  
 ille Princeps diceretur, qui solus ferre Prin-  
 cipem, reliquos docuisset. Cùm igitur in-  
 ter publica gentis comitia, privatus de  
 præficiendo omnibus uno Duce sermo  
 fuisset

fuiſſet illatus ; & plerique propenſas ſententias ad Rempublicam ſub commune caput redigendam , apertè præſeferrent : petitâ acceptaque dicendi copiâ , ancipites adhuc reliquæ concionis animos , in ſuas partes eum agreſti hac oratione pertraxiſſe traditur. *Niſi* , inquit , *apibus ipſis ſtultiores eſſetis : res , de qua agitis , pridem concordiam apud vos , atque optatos eventus , habuiſſet. Nam quibus res familiaris inter manus eſt , probè ſcitis , tanto apum examini unicum Regem præſſe ; penes quem ſint imperia : reliquis obſequendo intentis. Ille ſolus operas ſingulis diſpenſat , ille ocio torpentes nec laboris ferentes , alveori velut civitate , extorres agit : cætera verò in obſequium prompta , designatis laboribus ſtudioſè inſtant , nec priùs quieſcunt , quàm opus ad numeros abſolutum advertant. Hac , quæ in ſingulos dies , ſub veſtris oculis agi , certi eſtis ; in veſtra commoda prudenti imitatione tranſferte. Renunciate unum Principem , cujus imperio libertas veſtra permittatur. Ille de controverſiſ decernat , injurias caeſque arceat , ſas ac juſtum tueatur , ſecuritati publicæ provideat. Quod ut rectè atque ex officio exequi poſſit , vita mortisque jus ei in omnes*  
*cum*

*cum plena potestate esto.* Mirum quanto ut dicentem silentio, ita cum dicere desiisset, plausu, concio fit profecuta. Comitii totius, in ea quæ suaserat Veidewutas consentientis, vox unica erat. *Num Veidewutas ipse, vellet esse Boioteles*, nimirum, apum Rex? Neque ille novi regni onus detrectare poterat: ne quod dicendo persuaserat, fugiendo suspectum redderet. Integris itaque Comitiiis, summo consensu, primus Prussorum atque Alanorum (qui postea Litvani dicti sunt) Princeps est renunciatus. Initia principatus ad ordinandam aliquam Reip. formam, quantum barbarâ assequi potuit cogitatione, studium advertit. Plebem imprimis vagabundam, nullisque sedibus affixam, per tribus ac cohortes recensuit, & certis villarum agrorumque limitibus circumscripsit. Tum, hactenus actâ tantum ex hostico prædâ vitam & rem familiarem tueri solitos, agri colendi, pecorum alendorum, venationum, aliarumque rusticarum operarum studiis addixit. Leges deinde tulit, quibus vagos

*Ordinatur  
Respublica  
Prussorum  
& Alanorum.*

C

concu-

concubitus severè inhibuit ; perpetua verò conjugia , ad unam thori consortem restrinxit. Familiam tantam cuique permisit, quanta domesticis laboribus sufficeret : eadem necessitate pecorum numerum definivit. Debiles præterea , laboribusque ineptos , ali vetuit : qua in re , ita durior ejus genius humanitatis jura procul cave-  
rat, ut naturæ ipsius oblitus fuerit. Permisit enim filiis , ut parentes , ob ætatem aut morbum, labori jam impares, strangulatione è vivis expungerent : atque ita sese & domum impensis inutilibus expedirent. Istitis legibus Rempubl. novam administrabat. Multum interea dissimulare cogebatur, ne *insolentia imperii (quæ inassueto plusquam gravis est)* ex nimia imperantis severitate, priùs fastidium odiumque contraheret , quàm in consuetudinem usu abivisset. Fortunæ igitur progressus , ipse benevolis alloquiis, & mirâ comitate adjuvabat. Faciliores in dies subditi ad imperata capeSSenda reddebantur ; cùm mutuam benevolentiam, quâ animi emollirentur, ac secum invicem

vicem innecterentur, variis novus Princeps promoveret artibus : potus ex aquâ melle diluto conficiendi rationem invenit ac edocuit : convivium publica, locaque amicis computationibus destinavit : jus hospitii ut sacrosanctum esset, omnique humanitate coleretur, gravissimè cavit. Brevi itaque effectum est, ut per hæc commercia, humanitatis dulcedine agrestes animi illecti, spem non dubiam facerent : tanta jam concordia publicæ fundamenta jacta ; ut & ad constantiam in ferendo imperio satis esset, & rudibus cogitationibus aliquantum caperetur ; esse aliquid, quod privatis cujusque rationibus anteponi deberet, nempe bonum commune : de quo cum ageretur, junctis viribus ac studiis, per vitæ etiam ipsius dispendia, contra quemvis hostem decertare, expetibile atque laude dignum esse, persuasum haberent. Bellum tamen nullum Veidewutas movit : sciebat illud solvendis, quàm firmandis legibus commodius esse ; & efferatos militia frequentia animos, faciliùs armorum defuetudine mitigari. Vitabat castra,

in quibus usu diuturno didicerat , *multitudini in armis sese conspicienti , contumaciorem semper esse contra imperia audaciam*. Vereri etiam non ex vano cogeatur , ne si inchoata consilia , repentè vita defereret : vixdum coalescentis Principatus cursus , morte Principis abrumperetur. Iam enim ille centesimum annum transcenderat , sextum insuper supra decimum ingressus : prolem verò masculam copiosam numerabat ; è qua si vel plures imperium ambirent , vel unus aliquis detrectaret obsequium , molem quam parens eduxerat , filiorum discordiis concisuram facilè pervidebat. Maturè itaque Provincias inter filios partitus , Principatum spontè abdicatum , in maiorem natu , volentibus omnibus , transtulit. Ne tamen aut Rempublicam , inter juvenum manus , omninò defereret ; aut in ordinem redactus , autoritate omni , inter populares excideret : honores callidè auxit, quorum fastidium simulabat. Summum se sacrorum Regem seu Pontificem , antequam Principatu abivisset , creavit : eum  
qui



qui hoc magistratu deinceps fungeretur *Krive Kriveito* dici voluit. Nomen hoc , à Græco sermone derivatum , & sanctum sanctissimum significare , quidam autumant. Sedem Antistiti & sacris, in oppido Romnove fixit : lucum quernum ibidem Diis consecravit. Locus is vastatus deinde ; atque excisus est à Polonis , mortem D. Adalberto supremi sacrificuli jussu illatam ulciscantibus : Oppidum verò eodem loco deinceps excitatum *sacra securis* etiamnum nuncupatur.

Pax Prussiæ fratrum Principum concordia subsistebat : hæc verò parentis , simulque sacrorum præsidis , reverentiâ. Sene deinde fatis concedente , juvenum ambitione atque levitate , respublica universa propè in ruinam impulsâ. E cineribus ferè parentis , filiorum dissidia accensa , innoxium populum , integris exercitibus commissis , miserè exercebant. Maxima belli moles incubuit , in Littalanum seu Lityonem, minimum natu, matre Alanâ aliorum novercâ genitum. Plus ut ferè solet ad

*Litvos seu  
Littalanus  
junior, pri-  
mus Lit-  
vanorum  
Princeps.*



diffensionem valuit odium novercæ, quàm  
 ad concordiam, communis genitoris me-  
 moria. Atque ut proniores sunt vulgo ani-  
 mi, in eam partem, in quam ejusdem natio-  
 nis communione trahitur: non parum mo-  
 menti Litvoni attulit, Alanâ ortum fuisse.  
 Nam præter populum ejus Provinciæ, cui  
 à Patre fuerat præfectus, Alani omnes  
 apertè Litvonis partes sequebantur. Ne  
 tamen diuturno bello populi utriusque vi-  
 res ad internecionem deducerentur: Lit-  
 vos, ut erat mitiore ingenio, primus ad pa-  
 cem fratrum animos tentat: quam cum  
 obstinatè aliis conditionibus negari videret,  
 universam Alanorum gentem, Prussiæ  
 finibus eduxit: atque ad antiquas sedes re-  
 gressus, illas occupavit, quæ ducta ex Prin-  
 cipis hujus appellatione Litvania & Lot-  
 via seu Lotavia, vulgò vocantur. In Samo-  
 gitia verò seu Sudinia, atque eâ parte Prus-  
 siæ, quam Sambiam dicimus, Saimo Lit-  
 vonis frater imperabat. Populis illius pro-  
 vinciciæ aboriginibus, constans semper, cum  
 Litvanis amicitia fuit. Quid deinde toto  
 Litvo-

Anno 373.

Litvonis Principatu actum sit, qui Reip.  
 novæ progressus, quæ cum finitimis bella?  
 nihil uspiam reperio. In ejus tempora in-  
 cidisse videtur insignis clades Poloucio-  
 rum, quos Hungari seu Hunni ab Hugro  
 fluvio, Pannoniam versus tendentes, ad  
 Tanaim fuderunt. Erant Poloucii gens  
 ejusdem cum Prussis, Litvanis, ac Lotavis  
 originis: argumentum ejus rei est, ex reli-  
 quiis quas ad Phinoniæ fluvium Chorelam  
 residuas, intra Moschi imperium, commu-  
 ni cum Litvanis sermone, proximo adhuc  
 sæculo, usas esse, qui viderant testantur.  
 Sedes Polouciolorum à Volgâ fluvio, in Phi-  
 noniam usque excurrebant. De successo-  
 ribus Litvonis, nihil inter scriptores habe-  
 tur. Illud tamen dubio vacuum est, Ala-  
 norum seu Litvanorum copias, fuisse ad-  
 mixtas iis, quibus Gothi, Vandali, Longo-  
 bardi, ac præcipuè Heruli, varias à Septen-  
 trione in Romanum imperium susceperunt  
 expeditiones. Neminem igitur ægrè ha-  
 bere debet, si calamum extra Litvaniam  
 extulero, & leviter ea perstrinxero, quæ  
 ab hoc

*Poloucii ab  
 Hunnis  
 caesi.*

*Anno 383.*

ab hoc ipso sæculo per Herulos primùm, deinde Longobardos, in Italia acciderunt: præsertim, quòd inde semina narrationis sequens liber ducat.

*Herulorum  
extra suam  
Patriam  
bella.*

Ottocharus inprimis seu Odoacer Herulorum Rex, à nepote Romani Imperatoris Augustuli hoste, è Germania evocatus, Ticinum primo impetu aggressus, brevi oppugnatione in potestatem redegit, & Anno 475. Orestem Imperatoris parentem captum, in vincula coniecit. Promotis ulteriùs cum victoriâ armis, Romam occupavit; atque extinctis per Occidentem Romani Imperatoris titulis, primus exterorum Romæ regnavit: sed absque nominis, purpuræque regiæ, usu. Anno regni duodecimo insignibus aliquot victoriis Rugios confecit, Pheleteum Regem cepit, filium ejus Anno 487. Fridericum profligavit. Victus Rugius Theodorici Gothi opem implorat: Herulus semel atque iterum à Gothis profligatus, ex ea Germaniæ parte, quam vectigalem obtinebat, vires reparabat: aliquoties deinde inauspicatò congressus, non ampliùs

plius Fortunam aperto campo credidit, sed intra Ravennam recepit. Hic, bello omni ad unam urbem compulso, cum triennali obsidione neque ad pugnam hostem elicere, neque ad deditionem cogere Gothus potuisset: pacem ea conditione Herulo obtulit, ut pari dignitate uterque in Italia regnaret. Admissa conditio: non diu tamen stetit integra, seu pax, seu Regni societas, inter communis tituli non tam collegas, quam æmulos. Theodoricus enim Ottocharum convivio humaniter in speciem acceptum, submissis percussoribus inter mensas vitæ & regno exiit: inde ad exercitum Herulorum sibi conciliandum versus, faciles eorum animos reperit. Ma- *Anno 493.*  
gna tamen pars Herulorum, ex Italia in Græciam transiit: quod per fœdera permissum esset Byzantino Imperatori, militem inde in auxilia educere. Et quidem imperante Iustiniano singulari operâ Herulorum, Duce Gethero, ad victorias Perficis Bellifarius usus est. Pars alia advocato è patria Duce Date, ad Istrum circa No-

D

rici

*Anno 553.* rici fines confedit. Narſes quoque in To-tila vincendo, Gothiſque per Italiam excidendis Herulorum copiis adjutus eſt: qui cùm recepta Italia, mortuoque Juſtignano, Byzantium revocaretur, Heruli cum Ducibus Aliuto & Philimunto, inde exceſſerunt, ac per Liguriam in Thraciam penetrarunt, ſtipendia apud Imperatorem continuaturi: reliqui deinde electo per

*Anno 559.* tumultum Sylvaldo Duce Valeriam occu-  
parunt. Circa eundem annum Longobardi Alboino Duce è Pannonia egreſſi, vocatis ad prædæ ſocietatem variis Sarmatiæ populis, atque inter eos Gepidis (qui Procopio teſte omnium expeditionum Herulis focii fuerunt) ingenti exercitu Italiam invaſerunt. Continuatum deinde longa ferie in Italia Longobardicum imperium, duo ferè integra ſæcula complexum eſt.

*Anno 551.* Agilulpho regnante, ad Chriſtiana ſacra gens tota tranſiit: tam primorum plerique, Arriani; (ſectam hanc in Germania & Pannonia hauſerant) quàm populus, hucufque Idolorum cultor. Seculum proximum quietè

quiere fermè exactum , diuturna civilia  
 bella exceperunt. Quare cùm ea occasio- *Anno 703.*  
 ne partium miles possessionibus Romanæ  
 Ecclesiæ plures injurias inferret , Step-  
 hanus Pontifex Pipini Gallorum Regis auxi-  
 lia evocavit. Victi à Gallo Longobardi *Anno 754.*  
 pacem cum Romanis non iniquis condi-  
 tionibus impetrarunt. Sed mortuò Ste-  
 phano Pontifice , Longobardis metu Gal-  
 lorum levatis, vetus rediit ingenium. De-  
 siderius Rex cum novis motibus intrica-  
 tam Galliam spatium sibi vexandæ Italiæ  
 relicturam speraret (ut sæpè *facilis est bellum*  
*volenti, ad sumenda arma occasio*) Romanas at-  
 que Pontificis ditiones , novis injuriis di-  
 vexare cæpit. Ad Gallorum igitur auxilia  
 rursus , Stéphani exemplo , Adrianus Pon-  
 tifex confugit. nec defuit Christianæ Rei-  
 publicæ Carolus Magnus : robusto exer-  
 citu Italiam ingressus , non debellavit mo-  
 dò , sed semel ac iterum profligatos , cum  
 nomine excidit Longobardos. *Anno 776.*

## LIBER II,

*De rebus Litvanorum, ab Itolorum in Litvaniam  
adventu, imperante Palemonis familia.*

*Itolorum  
adventus  
in Litva-  
niam.*

**I**Talos quospiam Venedico mari in Cu-  
ronensem sinum, arque deinde ad ostia  
Nemeni delatos, adverso fluvio in Sa-  
mogitiam, & Litvaniam, pēnetrasse; tra-  
dunt constanter omnes, quicunque res Lit-  
vanorum attigerunt. In exiliumne acti,  
commodam sedibus stationem vestigando?  
an vi tempestatum à sociis insulis abrepti  
huc appulerint? ignotum est. Constans  
tamen ejus rei opinio, à majoribus propa-  
gata, firmiorem fidem facit, quàm ut ad fa-  
bulas, absque antiquitatis violatione, mo-  
veri possit. Cæterum, in quæ tempora hæc  
navigatio Itolorum inciderit, quibusve ex  
causis sit suscepta, cum exactiùs scriptores  
explicare incipiunt: universam rerum se-  
riem, plurimùm confundunt. Nam si, quem-  
admodum illis placuit, vel Pompejanarum  
partium navalis Legatus Libo, Victorem

P. H. H. H.

C

Cæsa-



Cæsarem tanto intervallo declinavit ; vel Neronis crudelitatem, Attilæve clades, aliqui vitaturi, è fortunarum naufragio vitam & capita huc usque extulerunt : omninò necesse est plura sæcula, inter Italorum adventum, ac Zivibundi in Litvaniæ principatum, intercessisse. Hunc tamen Principem, tertium à Palæmone aut P. Libone, iidem scriptores numerant ; ad annum instauratæ salutis humanæ, ducentesium supra millesimum..

Quis porrò crediderit tot seculis occupandis trium Principum vitam atque imperium suffecisse ? Supputanti itaque annorum rationes, simulque componenti numerum Principum, persimile vero videtur, Italorum in has regiones adventum, post nonum à Christo nato seculum, contigisse. Ardebat tunc civilibus furiis tota Italia. *Anno 900.* Inde à Berengario, ac Ludovico, de imperii jure, armis decernebatur. Inde, cum Pontifex Româ Ravennam excessisset : Vrbs velut emortuum absque capite cadaver, totusque Reip. Romanæ status, ex-

D 3                      im-po-

Anno 908. impotentis fæminæ Theodoræ nutu, circumagebatur. Vndique alia ex aliis bella, perpetuū surgebant. Facile itaque fieri potuit, ut tot malorum sensu ac tædio, ad deferendæ Patriæ consilia, atque eximendo tot cladibus capiti, suscipiendam peregrinationem aliqui compulsi fuerint. Sive autem fortunam fugientes, sive à victore hoste proscripti, Italia deserta cursum huc direxerunt: non facile mihi persuasero, fortuiti erroris hunc eventum fuisse. Alani fortasse, aut Heruli, (quos eâ tempestate in castris Italicis stipendia fecisse, historia memorant) auctores fuerunt: ut quandoquidem pacis cupiditate patriâ excederent; in eas se regiones converterent, quæ & coloniarum capacissimæ, & bellis liberæ, essent. Quacunque porro ex causa, seu occasio, seu necessitas, tam longinquæ peregrinationis ortum habuerit; illud constanter majorum memoriâ servatum est: advenas Italos, quingentorum capitum Equites fuisse. Natalium prærogativâ, gestisque militaribus muneribus Principes cense-

censebantur ; Palæmon , seu P. Libo , gen-  
 te Columna : Iulianus Dorsprungus ; cui  
 pro gentilitiis ceris Centaurus : Prisper  
 Cæsarinus, Columna : Vrsinus, & Hector; *Vnde hi  
 Itali, &  
 quando, in  
 Lituaniam  
 venerunt.*  
 Rosæ, seu Rosirii. Hinc, & olim inter in-  
 signia Principatus Litvaniæ, Centaurus : &  
 nunc, Columnæ. Non levis certè suspicio  
 est, eos ex Insubria ac Liguria prodiisse.  
 Nam in illis Italiæ regionibus hucusque  
 superesse familias nominum atque insi-  
 gnium similitudine cognatas, perhibetur.  
 Deinde, Berengarius Italis maximè adni-  
 tentibus, regno dejectus, ad reponendam  
 hostibus per mutua damna ignominiam,  
 Hunnos in eam ipsam regionem immisisse  
 legitur: qui post Ticinum urbem regiam *Anno 924.*  
 solo æquatam, universam provinciam bar-  
 bare populati, cum latis novis cladibus,  
 jam ex præteritis malis deferendæ Italiæ  
 consilia agitantes, ad desperationem & fu-  
 gam adegerunt. Isti itaque aut alii, (nihil  
 enim omnino certò, in tam obscurâ re, con-  
 firmare audeo) Venedico seu Balthico ma-  
 ri, per exigui freti angustias Curonensem  
 finum

finum invecti , littus legendo in ostia Nemeni seu Chroni inciderunt : ubi is longo per Russiam Litvaniam & Prussiam cursu collectas aquas, duodecim alveis exonerat. Adverso flumine interiora continentis ingressi, ad ostium Dubissæ amnis, loco commodo, inter amœnam camporum latè à litore excurrentium planitiem , prima coloniæ novæ fundamenta jecerunt. Romano-va tunc dicta est , à posteris Romnove & Romove , Krive kriveiti postea sacrorum apud Litvanos præsidis sedes : Gedimino imperante, ab Equitibus Ordinis Theutonico-  
 nicorum Fratrum , vulgò Crucigerorum, funditus excisa. Inde ulterius progressi , superato Niewiazâ fluvio, ad ea loca penetrarunt , quæ ab Alanis seu Litvanis incolebantur. Excitatis ibi tumultuario opere munitionibus , præsidia imposuerunt , ut incolarum impetus, si forte vim hospitibus novis admoverent , securiùs sustineretur. Humanitate deinde, cæterisque pacis artibus , ad vicinorum animos pertentandos conversi , facilè perfecerunt ; ut æquo se-  
 cum

*Progressus  
 Italicorum in  
 Litvania.*

cum jure , agros ab advenis coli, haud gravatè & absque injuriis paterentur ; omni-  
que belli jure in eos abstinere. Iam cre-  
scebat in dies potentia ; jam valida , jam  
vicinorum cuique bello , par erat : neque  
tamen convalescentes in vicino alienas  
opes , quisquam Litvanorum aut tanquam  
suspectas formidare , aut tanquam hostiles  
oppugnare. Ingenio enim agendique dex-  
teritate ita utebantur Itali , ut res suas do-  
mi satis firmatas haberent , & apud socios  
extra invidiam & suspicionem. Imò exigui  
temporis commercium , advenas atque in-  
colas in unum planè confudit : nam non  
modò communem Rempubicam uterque  
populus esse sibi voluit , sed etiam sub im-  
perium advenarum spontè Litvani conce-  
serunt. Quemadmodum igitur , aliquot  
postea sæculis , Theutones armis Litvo-  
niam ; ac deinde alii Prussiam , sibi asserue-  
runt : sic Itali Litvaniam industriâ singula-  
ri, morumque humanitate. Ita prodigiosâ  
fatorum vicissitudine , cùm Septentriona-  
les gentes Italiam bello & armis lacerant,

E

Itali

*Palæmon  
Italus Dux  
Litvanie  
& Samo-  
gitie.*

Itali humanitate earundem populares, domi suæ expugnant. Occupati enim eorum virtutibus animi Litvanorum non amare modò, ac colere jure hospitii atque societatis exteros, sed honorare etiam cæperant. Mortuo Principi Palæmon communi omnium suffragio subrogatus est. Tantum virtus, etiam apud ignotos & barbaros, admirationis habet. Quid deinceps à suscepto in Litvanos Principatu, auspiciis ejus, domi militiæque fuerit gestum; altum apud scriptores silentium. Illud meritò quis admiraretur? Cur Princeps hic, si Christianus, ad eadem sacra subjectos sibi populos non traduxerit? aut si Ethnicus, quomodo Italus? eo nimirum tempore, quo per universum ferè orbem, nedum per Italiam, à summis ac infimis Christus publicè coleretur. Verùm ut in ulteriore Italia, nemo fortasse aliter, quàm Christiano ritu, superis litabat: ita Provinciæ Alpibus admotæ, & primæ erant ad injuriam, barbaris ex intervallo in Italiam irrupentibus; & ad coluviam variarum superstitionum privatim reti-

retinendam, pertinaces. Idolorum enim cultus sæpius instaurabatur ab iis, quorum familiis Herulorum, Gepidarum, Gothorum aut Longobardorum reliquiæ, initia dederunt. Per hos, hæreditate transscriptæ superstitiones, ad posteros propagabantur. Palæmon itaque inde oriundus, plurium Deorum venerationem, in Litvania non sustulit: quin etiam ex vetere ritu ordinatam, novis insuper religionibus auxit. Ille est, qui primam in Litvania coloniam Romanovam, religionibus servandis, ipsarumque supremo Pontifici, dedicavit: quemadmodum Petrus à Dursbuch, illi ætati, quàm nostræ propior, Livoniensium Equitum Sacerdos, & Historicus, quarto hinc ante seculo editis commentariis, observavit. Palæmonis ætatem attingisse, videtur insignis Iatvingorum clades, à Russis accepta. Populus hic, Litvanis vicinus ac socius, post plura bella fortiter cum Russis peracta, tandem Volodimiri Kijoviensium Ducum fortunatissimi, armis cessit: subactus atque libertate mulctatus, annuo tri-

Anno 970.  
Iatvingo-  
rum clades.

buto imperato. Natus erat Volodimirus parente Suentoslao, qui cum expeditione Thracica Græcos graviter profligasset, eodem victore exercitu, in reditu Piecinigos aggressus; militem, regnum, ac vitam paulò antè amiserat. Dux Piecinigorum Litvanus Cures, formato ex cæsi calvâ crate, illud insculpi jussisse perhibetur. *Aliena quarendo, sua amisit.* Sed nullæ tunc adhuc fortè Russis literæ; quantò magis Piecinigis. Dixisse igitur tantùm ea verba, Cures credendus est. Fortunam parentis correxit Volodimirus, finitimis provinciis ad imperium Russorum adjectis: inter quas, Litvania etiam, ab aliquibus numeratur. Post administratam pluribus annis Republicam, è vivis abscedens Palæmon, tres filios imperio maturos reliquit. Provincias illi, ab excessu parentis in eum modum partiti sunt. Borcus ad ipsa Iuriæ amnis Nemeno illabentis ostia, Iurborco arce excitatâ, in eam Samogitiæ partem (jam enim Samogitia sese Litvaniæ adjunxerat) quæ à Iuria & Nemeno versus Curonensem

*Piecinigi  
Russos pro-  
fligant.*

*Litvania  
à Russis  
subacta.*

*Filii Palæ-  
monis, Du-  
ces Litva-  
niæ, Bor-  
cus, Spera,  
Cunassus  
sen Cunas.*



sem finum protenditur imperium obtinuit. Cunonis seu Cunaſſi principatus , Nemenno, Dubiſſâ, Niewiaza & Viliâ five (patriâ voce) Neride, fluyiis terminabatur. Sedem curiæ in ipſis Viliæ ac Nemeni congregientis faucibus firmavit. Oppidum id , cum caſtello , ad auctoris memoriam Cavanaugh dictum , hucusque inter celebriora Litvaniæ loca eſt. Tertius Spera longiùs aliquantò ad Orientem progreſſus, inter Niewiazam, Swientam, & Szerwentam amnes imperavit : Arcemque ingenti lacui imminentem permuniivit. Locus de auctoris nomine Spera etiamnum vocatur. Iulianus quoque Dorſprungus in colle , naturâ loci commodiſſimo , arcem ad Swientam amnem excitavit , quam vulgari ſermone Wilkomergiam dicimus. alteri deinde caſtello non procul inde fundamenta jecit, & Dziejaltoviam , nimirum DEI poſſeſſionem, dixit , ipſe inde à popularibus Dux Dziejaltovius vocatus. Ad ſupremum imperii juſ, & ætatis judicio, & omnium voluntate ſucceſſerat parenti mortuo Borcuſ :

E 3.

ſed

sed hic quoque absque prole extinctus ,  
 Speræ fratri cessit. Parentatum Principi ex  
 more gentis rogo funerali. Cineribus eo-  
 dem loco cum honore sepultis : Mausolæi  
 vice , statua imposita : illa à posteris , simul  
 cum loco , in sacris habita ; & in tempora  
 usque Iagiellonis Divinis honoribus culta.  
 Auxilia deinde vicinæ Prussiæ contra Po-  
 lonos aliquoties missa ; cùm eam gentem  
 Boleslaus Chrabryarmis tentare cæpisset.  
 Cæterùm Principatus Speræ , domi foris-  
 que fuit quietus ; sed non diuturnus. Ex-  
 tincto fratri Cunassus natu junior , senatus  
 populique suffragiis successit. Quid ille ad  
 memoriam deinceps gesserit , ad posteros  
 non transiit. In vivis adhuc cùm ageret ,  
 ne moriendo odiorum fontem filiis ipsa  
 hæreditate transcriberet ; maturâ princi-  
 patus divisione , occurrit. Kiernusium seu  
 Kiernum , intra Viliam , Niewiazam ac Du-  
 nam fluvios Litvaniæ præfecit : Gimbuto  
 juniiori Samogitiam attribuit.

An. 1040.

Kiernus &  
 Gimbutus

Divisi à patre principatus , nec damna  
 senserunt , nec pericula , Kiernus & Gim-  
 butus

butus Cunassidæ. Vnum esse videbatur imperium ; ubi inter Principes , & subjectos populos summa concordia. Ita his Principibus res Litvanâ non servata modò , sed etiam insigniter cumulata. Finitimis quoque inferre arma ausi. Necessitatem porrò belli attulit, quòd populus familiis auctus, agris ad colonias egeret. Inprimis verò verebatur non ex vano Kiernus , ne si fortè Viliam cum populo agrorum causa transgressus in hostem incidisset, isque irritatus vim propulsaret , aperta in Litvaniam via relinqueretur. Quare excludendo hosti primam coloniam ad fluvii ripam duxit, arcemque situ & præfidiis validam imposuit , Kiernoviam , Litvanis quondam urbem regiam. Locus hic nomen quidem jam inde à conditore tractum ; huc usque retinet : sed quidquid hoc nomine dignum, pridem vetustate abolevit. Cùm transportatus deinde per fluvium populus , & in colonias descriptus, imminentes ripis agros colere cæpisset ; suspecta novorum vicinorum propinquitas Russos , ad injurias & arma,

*Duces, ille,  
Litvania ;  
hic, Sumo-  
gitia.*

*Kiernovia  
olim Lit-  
vania Me-  
tropolis,  
edificatur.*

arma, excivit. Agebatur res latrocinio magis molesto, quàm justî more belli: continuis excursionibus divexabantur coloni: Kiernus & Gimbutus injuriam in speciem dissimulabant; tacitè verò expeditionem in Russiam decernunt. Ne tamen res temerè tentata, adverso eventu plus incommodi inferret, quàm esset id quod ultumibant; in omnes occasiones animo intenduntur. Tandem ipsa rei gerendæ commoditas, in destinatum bellum, suapte proclives, impulit. Polowcii Duce Sekal, semel iterumque instauratis latè populationibus, miserè universam Russiam afflixerant: civiles verò dissensiones mutuis fratrum odiis Iaroslai Ducis Kijoviensis filiorum accensæ; evocatis etiam in mutuam perniciem armis Boleslai Audacis Polonorum Regis pænè confecerant. Non negligenda occasio Kierno & Gimbutò visa: junctis viribus validam è Litvana & Samogitica juventute manum, in Russiam, diversarum cladium sensu aliò averfam, Kiernus duxit, atque primo impetu Braslaviam cepit, quæ  
semper

*Braslaviam  
Russis eri-*

semper deinceps Litvani juris permanfit. *piur, Polocia vastatur.*  
 Inde promotis in Ducatum Polocensem, vicinosque agros, castris : quidquid pagorum Dunâ & Viliâ fluviis intercipitur, igni ac ferro populatus est. Iam opulentâ præ- *An. 1065.*  
 dâ onustum militem reducebat : cùm rei ex sententiâ in hostico gestæ lætitiâ, tristis domi nuntius corruptit. Lotavi finitimi ac socii populi, seu injuriarum præteritarum recordatione provocati, seu etiam prædæ cupiditate, per Ducum militumque absentiam, Litvaniam Dunæ adjacentem, & Samogitiam sinui Curonensi propinquam, vastaverant. Litvanis Ducibus, ut *post victoriâ de Russis parte voluptatem ex domestica clade insolentior moror, ita gravior indignatio.* Victorem itaque exercitum, è vesti- *Lotavia vastatur ac prope exscinditur.*  
 gio quo nuntius deprehenderat, in Lotaviam ducunt. Transmisso Dunâ, universam provinciam cædibus & flammis implent : & quod non prædæ, sed ulciscendi studio res ageretur, tantâ ferociâ nullo in omnes delectu sævitum est, ut gens tota pænè excisa sit. Qui cædibus supererant, non tam

F

com-

commiseratione sævientium,quàm sævien-  
 di fastidio servati , ingenti numero in ser-  
 vitudinem abducti sunt. Hac duplici expe-  
 ditione finitimis partim territitis, partim at-  
 tritis , quietus in longam senectutem Kier-  
 no Principatus stetit. Russi vindictâ ab-  
 stinebant : quodd multiplici bello interea  
 implicatis , vires in plura odia non suffice-  
 rent. *An. 1073.* Poloucii enim crebris prædationibus  
 agrestes vexabant , tumultibusque atque  
 incendiis magnam partem Russiæ imple-  
 bant. Domestica etiam inter cognatos  
 Duces ambitio, perpetuum alebat bellum;  
 non civilibus modò armis, sed etiam exte-  
 rorum potentiâ : hinc Polonis ; inde Po-  
 louciis , in auxilia evocatis. Zaslau benefi-  
 cio Boleslai Audacis Poloni , Dux Kijo-  
 viensis; cùm Vsevoldo Czernichoviæ Duci  
 patrimonium vi ereptum, bello repeteret ;  
*An. 1076.* victor Polouciolorum & rebellium Russo-  
 rum , inter suum peditem securiùs à pugnâ  
 inambulans , ab hoste qui Zaslavianis for-  
 tuitò immixtus hæserat , hastili confossus  
 interiit. Necem Zaslai ampliora diffidia  
 atque

atque inde ingentes clades subsecutæ. Tum *Litviani*  
 primùm respirare visa Russia, cum Polonia *evocantur à*  
 amisso Rege Boleslao, ferrum à cervice *Russis con-*  
 Russorum removit. Odiosa illis jam pri- *tra Po'ones.*  
 dem atque gravis Polonorum potentia  
 erat, florentissimis opibus fulta: eoque  
 periculofior, *quòd non solum vicina, sed per mu-*  
*tuas Russorum discordias, subsidiorum occasione in-*  
*tra viscera Reipublica admissa.* Communi ita-  
 que omnium voluntate, bellum contra Po-  
 loniam decernitur. Trahuntur in societa-  
 tem Poloucii & Litvani. Ingentes copię  
 quadrifariam diviso exercitu, in hostiles  
 agros immittuntur: fit ingens undique  
 strages, cum populabundæ legiones ad  
 Vistulam usque ferro & igne penetrarent.  
 Redibat jam victoriâ prædaque lætus  
 exercitus: & *quòd hostilibus agris egressus, om-*  
*nia securiora putaret, ex latitia liberius miles in ca-*  
*stris agere; ordines, excubias negligere; di-*  
*sciplinam solvere.* Id ubi per idoneos in-  
 tellexit Ladislaus Hermanus, (qui interea  
 exiguas copias hosti non erat ausus obji-  
 cere; sed à longè vestigiis abeuntium in  
 F 2 occa-

*Ceduntur*  
*à Polonis.*

occasionem intentus hærebat) accelerato itinere Russos affecutus, ipso noctis primæ conticinio, somno ex securitate & hilaritate fortiùs oppressos, ingenti cum tumultu invadit, perturbatos cædit, castris exiit, prædamque omnem recipit. Prima ea Litvanis in Poloniam expeditio, alienis auspiciis suscepta, infeliciter cessit: viam autem ad diuturna plurium annorum bella, primum aperuit. Intercessere deinde mutuae Polouciolorum Hitan & Itlar Ducibus, Rusforumque clades: quibus Litvaniæ pax promovebatur. *Ne tamen longa armorum desuetudine, inutilis militia juvenitus redderetur: nova expeditione laceßita est Russia; vocatis ad prædæ societatem Iarvingis. Ab expedito milite Luceorieneses, Vlodimirieneses, Leopolitani agri, igne ac ferro latè vastati: prædaque ingens prosperè abducta. Iam Kiernus annis gravis, neque imperio neque vitæ sufficiebat. Metuebat porrò cautus Princeps, ne discordiarum contagione, quam per vicinam Russiam magno ejus malo serpere videbat, Litvania corripere-*  
*tur.*

An. 1083.

*Russiam  
invadunt  
Litvani.*

An. 1089.



tur. Evenissetque id fortasse, si morte ejus, res ad interregnum devenissent : neque enim hæredem fortunæ suæ filium habebat. Quare convocatis proceribus & magnitudine periculi indicatâ, Zivibundum è Juliani Dorsprungi posteris, juvenem imperio parem, filium sibi adoptat, dataque ei mox in connubium unicâ filiâ Pojatâ, dotis nomine Ducatum Litvaniæ attribuit. E vivis deinde cùm excessisset, magnificâ (quam illa ætas ferebat) pompâ elatus, in edito colle Dziewaltoviæ propinquo, sepultus est. Posita honori ejus statua lignea, quæ deinde divinis cærémoniis per plures annos culta, cùm tempestatibus tandem cessisset, lucus peramænus ibidem succrescens Vestæ dedicatus est. Attributi præterea sacerdotes, qui perpetuum ignem quercu alerent: hi superstitiosos hos ritus, ad Christiana usque tempora perduxerunt.

Ab ulteriore historiæ cursu, insignis error detinet, in quem primi Litvanarum rerum scriptores hîc impegerunt : neque à me dissimulari potest. Non enim tam mi-

*De anno-  
rum &  
temporum  
rationibus.*

nutus est , ut etiam non omninò curiosi Lectoris oculum prætereat. Integrum sequens sæculum alto silentio sepultum , historiæ contextum ingenti hiatu abrumpit. Hunc tamen illi sine sensu prætergressi sunt , licet tanto intervallo parentem à filiis , successoremque proximum à majoribus suis divellere cogerentur. Deinde in sexaginta annos , quatuor Litvaniæ Ducés attribuunt, rectâ ejusdem familiæ à proavo ad pronepotem propagatione , quorum singuli Reipublicæ administrationem cum juvenilibus propè annis susceptam , non nisi exactâ jam ætate absolverint. quod quantum omnem fidem superet , proclive cuique est animadvertere. Illud etiam , & ad fidem , æquè difficile ; & magis ridiculum est. Montuilonis posteros eorundem annorum decursu , per continuam nepotum abnepotumque successionem, ad octavam usque progeniem imperium Novogrodenſe transmisisse. Vtinam verò tam de facili corrigi posset error , quàm advertitur. Divinare quidem possumus plures ejusdem

ejusdem nominis Principes in Litvania regnasse, atque hinc cum unius gesta alteri perperam attribuuntur, confundendorum temporum materiam præbitam. Sed in re à nostra memoriâ tantum remotâ, & vetustate omninè incompertâ, *omnis suspicio scriptorum veterum auctoritate destituta, facilius in historia errores cumularet, quàm corrigeret.* Quare ipse quoque veri incertus, totam annorum supputationem ad Mendogi usque Principatum, suspectam, ut reperi, relinquo. Cum enim præcipuum mihi sit propositum, ea quæ ab aliis consignata inveniri, sub compendium latinè mittere: absque vitio me facere puto; cum temporum feriem ut ab eisdem distinctam accepi, immutatam adjungo.

## LIBER III,

*De rebus Litvanorum obtinente Principatum ,  
familiâ Iuliani Dorsprungi.*

*Zvivun-  
dus Litva-  
nia, Mont-  
wi'o Samo-  
gitie Du-  
ces.*

**Z**ivibundus à morte Kiernusii Princeps renunciatus, Columnis, quibus Palæmoniadæ in ceris utebantur, Centaurum suæ gentis insigne adjunxit; & relictâ Dziewaltovia; sedem Principatus Kiernoviam transtulit. *Facilius ex propinquo in omnes rei gerenda opportunitates excubare poterat, & firmandis Reipublica viribus, juventutem finitimis excursionibus ad justî belli labores exercere. Russia, ipsa propinquitate in aperto erat: hac, ob civiles suorum tumultus, exterorum injuriis facilis credita.*

*Bella inter  
Ruflos &  
Litvanos  
vario even-  
tu.*

Nec tam Principis voluntas, quàm spes prædæ apud egentem tunc populum, pluribus militiam persuasit. Agebatur res mira celeritate: ostensum simul bellum, & illatum est. Ne qua verò mora in fluviis esset, toti exercitui imperatum: ut bini quique milites, utrem ex Vri corio confectum, duobus per fluviis deportandis com-

commodum, secum ferrent. Amissus tamen est aliquoties, his expeditionibus exercitus: & reddentibus vicem Russis, magna pars Litvaniæ de libertate dejecta. Romanus enim Haliciæ ac Volodimiræ Dux, devictis aut in exilium actis reliquis Russiæ regulis, per universam Russiam so- An. 1200.  
 lus rerum potitus, à domesticis bellis ad externa versus, primùm in Iarvingos & Litvanos movit. Cùm victoriis pluribus proxima eorum loca dirioni suæ adjecisset, neque tamen incolas obsequentes quietosque habere posset; eo impotentiae ab indignatione devenit, ut deinceps bello captis Litvanis ad onera & currus, agrosque colendos, equorum & boum vice uteretur. Sed deinde *surgentem fortunam vehementius ad summa urgendo, repente precipitavit.* Delectu per universam Russiam, & occupatos nuper Iarvingorum Litvanorumque agros, magnâ curâ habito, ingentibus copiis Poloniam, non minore voto quàm au- An. 1205.  
 dacia, invaserat: sed ad Zawichwostum Duce Christino Comite Gozdovio Pala-

G tino

*Ruffos à  
Polonis vi-  
dos Litva-  
ni inva-  
dunt: fed  
cadunt à  
Ducibus  
Holhovici-  
sis.*

tino Plocenfi à Polonis fufus, amiffio exer-  
citu inter promifcuas plebeji militis cæ-  
des, interiit. Clades ea Rufforum, fpem  
viamque Litvanis, ex aliena dominatione  
emergendi aperuit. Communicatis confi-  
liis Zivibundus, & Montwilo Gimbutides  
Samogitiæ Dux, decernunt alienam victo-  
riam in fua commoda vertere, atque à re-  
cente ictu jacentem ufque hostem adoriri.  
Iunguntur itaque utriufque gentis vires,  
ingentes copiæ in hoftiles agros immit-  
tuntur: Ducatus Novogrodensis, Luceo-  
riensis, Volodimirienfis igne ac ferro ab-  
fumuntur. Iam latiffimè Ruffiam Litvani  
pervagati opulentam prædam domum re-  
ducebant. Holhovicios Duces res inopina  
ad arma exciverat; fed feroci tam victoriâ  
quàm numero hofti, palàm acie occurrere,  
non funt aufi. Impeditos tantùm per fyl-  
vas paffus, armato milite infederunt, atque  
succifis arborum truncis ita dolum ordi-  
narunt, ut deducto intra infidias hoſte, im-  
pulfæ magna vi ab extremo, mutuo fe ictu  
in cafum arbores protruderent, Litvanos-  
que

que simul protererent. Si quos ab ea strage casus servasset, eos, armati extrema sylvæ observare jussi, opprimerent. Sed non ita fraus acta, ut non patuerit Litvanis: flexo illi paulisper itinere, & periculum superarunt & hostem eluserunt. Vbi artes non successerunt, consilii incertos Russos dolor justus ad apertam vim tentandam subegit. Affecuti abeuntem Litvanum, audacius extrema agmina premunt, carpuntque: cæduntur multi, quos vel itinerum ratio, vel impedimentorum onera longiùs à reliquo exercitu abstraxerant. Tandem cum uterque exercitus in Slonimenses campos fuisset effusus, totis viribus commissæ acies. Primus impetus utrisque non incruentus, ad neutras tamen partes spem inclinavit. Pugnatur acriter: illinc prædæ amor, hinc suorum libertas, diu pari perniciæ, eventu dubio, spiritus & prælium accendebat: donec subsidiariæ Russorum cohortes leviter circumductæ, in nudatam defensoribus Litvanorum à tergo aciem (quod omnes in frontem averfi essent)

● G 2

magno



magno impetu invec̃tæ , pugnam cum fessis recentes instituerunt. Turbati insperata vi Litvani, facilè ordines solverunt, neque diutiùs ancipitem utrinque pugnam sustinuerunt. Versus in fugam exercitus , prædaque omnis recepta. Poterat eâ victoriâ non pax modò, verùm & imperium in Litvaniam Russis stabiliri : sed post cæsum nuper Romanum , Ducum pro Kijovienfi Principatu ambitio , revocatis rursus discordiis, fructum victoriæ intervertit. Repetitis enim interea Litvani per intervalla prædationibus , & amissi anno proximo exercitus damnum insigniter uli sunt , & prædis ingentibus rem suam auxerunt.

An. 1206.

*Litvani à  
Russis pro-  
fugati.*

Rursus externa vis Russos admonuit concordia: Infensis, & suspectis adhuc animis conveniunt in eadem castra , atque civili sanguine calentia arma in Litvaniam vertunt. Dux Kijoviæ Volodimirus Rurikovius exercitum ducebat. Pugnatum est collatis justo bello utrinque aciebus; amissi utrinque plures Ducum : tandem campo Russi victores potiti ; sed proximæ sylvæ ,  
in



in quas Litvani magno impetu se injece-  
rant , neque victoriam , neque cædem fu-  
gientium , explicare multum permiserunt.  
Partâ inde pace , simul & domum & ad re-  
lictâ domi odia reditum est. *Breve enim con-*

*cordia vinculum externus metus : quia non compo-*

*nit, sed differt odia.* Colomanus Andreæ Hun-

garorum Regis filius , nuper paucorum

Russiæ procerum studiis Haliciensi regno

auctus , atque mox inde à Miecislao Mie-

cislaidè depulsus , per injuriam amissa, bel-

lo repetebat. Russicæ illi Hungaricæ, Po-

lonicæque opes ac vires , in auxiliis erant.

Neque æmulis tantum animi ; ut hosti

præcipuum Sarmatiæ robur ducenti soli

occurrant : circumspicere & ipsi externa

præsidia. Polowcii, Litvani, Iatvingi ad so-

cietatem armorum ingentibus promissis

solicitantur, & pertrahuntur. Funestus ejus

belli exitus Colomanum vehementer at-

trivit. Cæperat quidem, sub conflictus ini-

tia , Polonorum præcipuè virtute , spes

Hungaro ad victoriam assurgere : sed cum

immissi à tergo Polowcii , Polonos acriter

*An. 1208.*

*Novi in*

*Russia ci-*

*viles mo-*

*tu. Litva-*

*ni subsidia*

*ferunt Rus-*

*sis contra*

*Hungaros*

*& Polonos.*

instantes , ad ancipitem pugnam feroci insultu distraxissent ; reliqua acies facile à fronte in fugam versa est. Colomanus ipse ex fuga Haliciam evaserat ; admoto deinde victore exercitu muris , captaque per cuniculos arce , vivus in potestatem hostium venit. Aliquot posthac annis , Scythæ gens barbara ab Hyrcano mari Caucasique montibus egressa , ex Oriente Occidentem versus , sedes ac arma transferebat. Primi erant Poloucii, in quorum agros trajecto Volgâ ea proluvies exundavit. Egerunt illi diu pro aris & focis fortiter, neque infeliciter. Sed ejusmodi bellum erat, in quo victoria absolvi aliter non poterat , nisi internecione alterutrius populi : Scythis pro occupandis sedibus, Polouciis pro retinendâ patriâ , summâ vi pertinacique ferociâ connitentibus. Verebantur tamen hi, ne ( quod evenit ) sub multitudine hostium virtus sua tandem concideret, Missâ itaque legatione, auxilia apud Russos quæsierunt. Admissus ad Kijoviensium Ducem legatus Polouciolorum : *Hostes esse qui auxilia*

An. 1211.  
*Scytharum  
 in Russiam  
 eruptio prima.*

*auxilia peterent , non dissimulabat . Sed nunc demum in potestate Russorum esse , aiebat , ne amplius hostes forent : si novo beneficio eternas amicitias inchoare vellent . Meminissent Russi : quoties vel ad domesticam Tyrannorum potentiam frangendam , vel ad Polonam vim sustinendam , Polouci-  
orum operâ usi essent . Suis equidem non adeo rem domi desperatam esse , ut ferendo diutius hosti non sit : finitimorum tamen arma implorare ; quòd rectè intelligerent , non cum suo magis , quàm illorum hoste bellum agi : atque ideò , communibus studiis opibusque , propulsandum . Advertere vellent Russi , Scythas sedibus suis egressos , non Polouci-  
orum prædis invitatos ; ubi ex militari egestate , aut potiùs parsimoniâ , nihil invitanda cupiditati haberetur . Esse aliquid amplius , quò illi , animo ac desiderio , tenderent : Russia , provincia opulenta , illos inhiare : ejus jugulum , per Polouci-  
orum latus , peti . Occurrerent igitur maturè periculo : jungerent vires cum Polouciis : ne his sublati , totum belli onus in solam Russiam decumbat . Barbarum exercitus multitudine ferocem , ad ipsa belli initia , duplicibus copiis faciliùs reprimi posse ; quàm postea , rerum successu violentius provectum ; & velut rupto ag-  
gere*

*Bellum  
Russi contra  
Scythas  
decernunt,  
& infestius  
ter pugn-  
nant.*

*gere summo impetu ruentem.* Æquissima petere visus. Magno itaque apparatu suppetias Russi occupant. Mscillaus Romanides Kijoviæ, Mscillaus Mscillaides Haliciæ Duces, aliique plures, Russiâ cum exercitu egressi ad Protolcos Polouciis junguntur. Inde duodecimis castris in conspectum hostium pervenerunt. Scythæ, ut prima adventantium signa comparuerunt, militem omnem instructâ acie in campum educunt; neque spatium ex itinere respirandi datum: fessos integri magno impetu adorti, pugnare prius, quàm consisterent, cogunt: atque primo propè incursu vinct, cædunt. Russorum quidem, eâ tempestate, tota strages, intra exercitus & aliquot Ducum cædem, vel captivitatem stetit: at Polouciorum populus, multum eâ clade attritus, vim deinde sustinere non potuit: sed subsecutis præliis interneccione deletus est. Tum ferè magnam Europæ partem, quam nunc incolunt Scythæ, occuparunt. Inde postea Bateii & Caydani ductu, annorum aliquot continuis infestationibus,

nibus, ita attrita est Russia; ut amissis præcipuis regulis, in potestatem Scytharum venerit: & imperatum in annos tributum, diu penderit. *Alienis malis, in suarum rerum incrementa, Litvani per ocium usi*, sensim fines in Russiam proferebant. Infestis etiam si- An. 1216.  
 gnis interiorem Provinciam ingressi, ex Expeditiones Litvanorum in Russiam.  
 agrestium prædationibus rem familiarem augebant. Deligebatur expeditionibus tempus, quo validior sæviret hiems; quando scilicet solida glacies quaquaversum planiores sternebat aditus. Ducebat modicas copias Vikindus Montwilonis filius natu minor. Bina, ex iis expeditionibus, infeliciter cessit: cum incautiùs inter diurnam prædationem agunt, ad Polockum, iterumque circa Dunam, à Smolenscensi & Novogrodensi Ducibus, oppressi sunt. Ex utraque clade, fortunæ obirati Zivibundus & Montwilo, consilium de Republica capiunt. *Deprehendunt, exiguas copias per hostiles agros posse quidem leviter circumagi; atque eâ celeritate plurimum damni hosti, antequam se ad periculum recolligat, inferri; at excitis interim ad*

H

arma

*arma hostibus ; resistendo impares , inter impeditos  
 viarum transitus , armatoque milite infessos ; nec  
 præda nec vita tuenda sufficere. Decernitur itaque,  
 ut quàm maximo apparatu bellum instruatur prius,  
 quam inferatur : miles ut selectus sit, neque ita præ-  
 da ut gloria avidus ; utriusque verò in periculis ob-  
 stinate retinens : Dux ut fortis peritusque detur :  
 exercitus ut in eam partem ducatur , quæ Scythicis  
 nuper populationibus attrita , atque propugnatori-  
 bus destituta , facilem vulneri locum ostenderet.*  
 Habiti sunt delectus per Litvaniam , Sa-  
 mogitiam , Curoniam , magnâ diligentîâ.  
 Univerſæ rei Imperator præficitur Erdivilus , senior Montwilonis filius : additi tres  
 Legati militares, Duces fortissimi, consiliis  
 ac manu prompti , Grumpius Columna ,  
 Eyxis Vrsinus, Grawzius Rosa. Erdivilus  
 selecto milite Ducibusque instructus , &  
 suo ingenio rebus gerendis aptus , & suo-  
 rum consiliis atque exhortationibus ple-  
 nus, exercitum in Russiam duxit. Etsi verò  
 non vexandis colonis , sed proferendæ di-  
 tionis expeditio suscepta erat : tamen tan-  
 tus miles , commeatus & prædæ necessi-  
 tate,

An. 1217.

Erdivilus  
 Montwilo-  
 niades pri-  
 mus Dux  
 Litvanie  
 Novogro-  
 denſis.

tate, absque agrestium injuriis duci non potuit. Mox à transitu Viliæ, legiones ad prædam dimissæ, hostem trepidatione implerunt: eâdem operâ, miles prædæ dulcedine delinitus, promptior in reliqua redditus. Promotis castris, & exercitu per Nemenum transportato; antequam ulterius bellum continuaretur, locus munitioni excitandæ quæsitus. Ventum erat ad editum collem situ peropportunum; exustæ à Tartaris arcis rudera. Loco nomen Novogrodecum. Eum Erdivilus sedi figendæ & civitati instaurandæ delectum, permuniri jubet: tùm ut commodiùs circumjacentem inde Russiam infestaret, tùm ut si quâ vis repentina ingrueret, recipiendo militi locus in propinquo esset. In consilio deinde certatum quænam Russiæ pars ad primos impetus destinanda foret. Vicit eorum sententia, quibus placebat profundiora Russiæ tantisper vitare, quoad minore periculo res Litvana firmaretur, per eas oras quæ Iatvingis Litvanorum fociis, finitimæ essent. Ita enim, si quis eventus auxilia po-

stularet, tùm ex Iatvezya, tùm ex propinquâ Litvaniâ, expeditiora futura erant. Flexo igitur ad occidentem modicè itinere, Subsylvaniam versus arma Erdivilus vertit. Legitima itineris ratio erat: diviso trifariam exercitu, legiones binæ ad pugnam instructæ præcedebant, ne ex insperato hostis militem extra ordines nactus, aliquid damni inferret: sequebantur deinde tres legiones, prædationibus destinatæ; quæ in utramque partem laxatis excursionibus, igni & ferro sævirent; commeatumque pro toto exercitu conquirerent: clauderat ultimum agmen præcipuum militis robur, impedimentis & toti aciei præsidium. Nihil ullibi morarum objectum est; non exercitus hostilis obvius, non locus, quem oppugnatione tentare opus foret. Munitiora enim totius regionis oppida, à Tartaris nuper excisa, expeditam Erdivilo præbebant victoriam. Ita Grodna, Brestia, Drohyczynum, & reliqua loca solo adventu occupata: & tumultuario opere, ac præsidiis impositis munita. Quia tamen

*semper*



*semper firminus imperium est, cujus non omne jus à vi ortum ducit; sed aliquid à subditorum voluntate habet* : antequam extremam vim circumjectis incolis inferret; pacem Erdivilus eâ conditione obtulit, ut quos victores metuerent, Dominos æquo jure pati mallent. Itum à Russis sub Litvani imperium, necessitate magis quàm electione : exciso enim Scythicis bellis omni nobilitatis flore, non vires modò sed & spes tanti hostis excutiendi, reliquam plebem destituerat. Mitior visa ea servitus, quàm ut ejus avertendæ causâ, extrema subire mallent: præsertim quòd & Christiana sacra intacta sibi relinquerentur; & qui ante liberi fuissent, eodem jure patrimonialia sua possidere permitterentur; denique quòd contra Tartaros, Litvanis opibus pro Russia bellum gerendum promitteretur. Firmatâ pace, & dominatione inter incolas, Erdivilus ad expeditionis socios, Duces militesque præcipuos, ornandos conversus, amplissimis possessionibus in novo Principatu eosdem auxit: reliquum castrense vulgus per op-

pida coloniasque descripsit. Campejo seu Strumpio Gastoldorum auctori, ii agri attributi, quos nunc Osmianense territorium includit : Eyxio Vrsino Monividum, aut ut alii volunt Dowoynarum in Litvania familiæ Principi, Eyszyszki: Grauzæ, Grauziszki. Ipse Erdivilus primus è Litvanis Dux Novogrodensis, imperio suo complexus est ea omnia, quæ Viliam inter & Perepecium fluvios, à Litvania Mozyrum usque extenduntur : Novogrodiam, Brestiam, Grodnam, Subsylvaniam. Felices Erdivili in Russia progressus, securiorem Samogitis ac Litvanis pacem reddebant: nisi quodd novus è Livonia hostis interea emerferit. Germani ex ordine militari, fratrum vulgè Ensisferorum post subactos diuturno bello Lotavos, Samogitiæ imminere cæperant : repulsi sunt ea vice feliciter à Montwilone, filioque ejus Vikindo. Auxilia deinde Prussis à Zivibundo contra Conradum Mazoviæ Ducem suppeditata : quâ expeditione Culmigeria Conrado erepta, Mazovia latè vastata, Plociaque civitas prima-

An. 1218.

*Bell' cum  
Litvonien-  
sibus Crui-  
cigeris ini-  
tia.*

primaria exusta. Ab auxiliorum Prussicorum curâ, propioris atque ferè domestici periculi insperatus metus Zivibundum avocavit. Caidanus Ultravolgensium Scytharum regulus, nuper Batei in expeditione Russicâ socius, nunc in imperio successor, cum in devictas à se nuper Russiæ provincias, ab Erdivilo principatum usurpari intellexisset; Legatione missâ, tributum sibi pendi imperat: si detrectaret, bellum denunciat. Ex inopinato nuntio, indignatio simul ac metus, inter pacis bellicque consilia incertum responsi aliquandiu Erdivilum tenuit. Tum, *seu ut spatium deliberando in subita re raperet; seu ne prius iram, quam arma ostenderet; dissimulato responso, per amicitia speciem, legationis Principem officiosè accipit.* Captus humanitate barbarus, vix sensit justò diutius se ad regiam detineri: nihil rebelle, aut hostile suspicatus subesse, ubi omnia ad benevolentia imaginem composita, ultra tributi spem, servitutis etiam fidem apud ignarum consiliorum afferebant. At Erdivilo indignum omninò visum, Principis ti-

*Scythæ tributum exigentes profigati.*

pis titulos armis nuper acquisitos; servitu-  
 tis notâ aspergere; si ipsa dati tributi famâ  
 precario jure à se usurpari imperium profi-  
 teretur, quod tamen hominum nemini præ-  
 terquam sibi deberet. Quare totus in belli  
 cogitationem incubuit: militem ex præfi-  
 diis detractum, ad certum diem adesse ju-  
 bet: Vikindum fratrem Samogitiæ jam  
 Ducem, Zivibundum Litvaniæ, de peri-  
 culo monet: sed inprimis cum Russis trans-  
 igit. *Gratulari sibi, aiebat, occasionem oblatam;*  
*quâ testatum palam faceret, quàm non vanus Lit-*  
*vanas vires, Russis contra Scythas nuper spon-*  
*disset. Se etsi in provincias armis occupatas, sum-*  
*mo jure pro libitu uti potuisset, ita tamen hæcenus*  
*imperium temperasse, ut nihil cupiditate aut irâ*  
*agendo, justi Principis desiderium potuerit Russis*  
*explere. Facturum verò modò, ut sicut hucusque*  
*Principem legitimum in se non desiderassent; ita*  
*Russum in Litvano ampliùs non requirerent: post-*  
*eaquam libertatem Russia carior sibi, quàm Rus-*  
*sis Principibus ostenderit; eo ipso studio, quo ean-*  
*dem contra Scythas defendendam susciperet. Si ideò*  
*ad arma eos vocaret, ut sua contra barbaros domi-*  
natio

natio firmaretur ; et si hinc quoque nulla justa subditis cunctatio ; tamen plurimum de obsequendi promptitudine demere posset , odium novæ dominationis : at sibi nihil aliud , præter libertatem Russia, cordi esse , vel inde Russi intelligerent ; quòd bellum aggrederetur. Firmandi enim sui Principatus consiliis , longè oportuniora fuisse , fœdera , & ( quam dedecore aliquo emptam ) cum tam valido hoste pacem. eos enim qui regnandi tantum libidine aguntur modicè illa macula angit , sine qua regnare non possunt. Cum his rationibus animos subditorum Erdivilus pertentasset ; & , jam Russia novi Ducis auspiciis , & spe Litvanorum Samogiticorumque subsidiorum ad nomen libertatis assurgeret ; jam legiones auxiliares à fratre atque avo missæ in procinctu essent : personatam hospitalitatem repentè exuit. Legatis imperiosè vocatis , tributum negat ; bellum indicit , & Regulo , donorum loco , sagittas duas perferendas tradit : Legatos ab se ita dimissos , lentis itineribus ad fines deduci jubet. Caidanus è diuturniore legatorum morâ suspicatus, inermem legationem pro-

*Scythis tributum per-  
tentibus  
Erdivilus  
duas sagittas mittit.*

craftinationibus eludi; ut auctoritatem armis adderet; & ad imperata, vi admotâ, perurgeret, trajicit Borysthenem; positisque ad Pripecii ostia castris, plures legiones ad agrorum populationem dimittit. Erdivilus verò, cum Litvanis Samogiticisque copiis, lecto præterea quàm expeditissimo ex Novogrodensibus & Slonimensibus milite., occultis per sylvas itineribus ad hostem progressus, nihil de tam propinquo Litvano cogitantem, sed minas inter & furias ob spretam legationem, barbarum occupat. Inprimis suos itinere fessos, modicâ quiete intra sylvas recreat: deinde quantum tenebræ & angustiae pati poterant, aciem instruit: sub ipsam tandem auroram, ingenti clamore ac impetu, castra invadit. Circa ingressum castrorum, non pugna erat sed cædes; è somno & insolito tumultu attoniti, inermes cadebantur. Verùm ubi remotiores à periculo, terroris excutiendi spatium acceperunt; res est ad cruentam pugnam deducta. Victor denique Litvanus castris barbarum ex-

git:

git : plurimi hostium in prælio cæsi , sed longè plures in fuga , aut ferro , aut Borysthenis Pripeciique vorticibus hausti , perierunt. Victoriæ ejus præcipuus fructus fuit , Russorum erga Litvanum Principem *major ultra reverentiam benevolentia , atque inde constantior fides*. Mortuus per idem tempus Vikindus Samogitiæ Dux , hæredem Erdivilum fratrem reliquerat : sed is , tum *quòd quemadmodum unam animam dissecto corpori , ita unum principem dissitis rebus publicis sufficere non posse existimaret* ; tum ut gratiam iis , quæ miserat nuper , auxiliis referret , omni Samogitiæ jure Zivibundo cessit. Neque multò post morbo è vivis abreptus est : vir meritò ante omnes Litvaniæ Heroes numerandus.

Erdivilo defuncto , principatum Novogrodiaë excepit Michael seu Mingailo : hic antecessoris successibus excitatus , fortunam rebus Litvanis aspirantem , insigni Provinciâ adjectâ , promovit. Polocenses Russi reipublicæ suæ administrationem ab uno Principe ad populum transtulerant:

An. 1219.  
Mingailo  
Novogro-  
dia Dux.

Polocensis  
Reip. forma.

occafio illis rerum novandarum fuit bello Scythico amiffi in prælio Duces legitimi. Advenæ enim Græci, facrorum apud Rufos præfides, populo perfuaferant : *ne libertatem, quam hostium beneficio naâti effent, fuâ ignaviâ perditum irent, sub quaſito Principe. Sequerentur potiùs magiſtros Gracos, ut religionum ceremoniis, ita publica rei gerenda formâ. Civitatem ſuam ipſi adminiſtrarent ; lectis è numero ſuo civibus : qui jus cæteris dicerent.* Triginta igitur ſenes, cum poteſtate Reipublicæ præfecti à plebe ſunt : ad comitia in forum publicum æris campani ſonitu convocabantur ; ubi de ſummâ rerum, ex communi conſilio, publicè decernebatur. Ad triginta vulgaria milliaria imperium civitatis jam extenderant : atque ( *ut humana menti nihil unquam ſatis eſt* ) in vicinos etiam ferro imperium proferre conati ; injuriis ſociorum, hoſtes & bellum ſibi conſciverunt. Proximi inſtantibus patebant Mingailonis ſubditi : horum vexationem ut ulciſceretur, bellum parabat Mingailo ; ſed occupant Polocenfes, priùs cum exercitu ſub oppidum Horodziec



rodziec progressi. Occurrit Mingailo : atque impotentem plebem , solâ ferè multitudine ferocem , armorum autem rudem , audacter aggressus ; eodem impetu , & campo pellit, & castris exiit. Inde fugientium tergo insistens victoriam urget : ne reficiendis viribus , aut necessariis ad oppugnationem tenendam comparandis, spatium relinqueret ; eodem ipso die , victorem exercitum Polociæ muris, quo bellum omne secum hostes ex fugâ detulerant, applicat. Capta urbs deditione, pacem simul cum servitutē accepit : mulctati libertate, quâ ad vicinorum injurias abusi fuerant. Non diu ejus victoriæ voluptate fruitus Mingailo, hoc ipso anno è vitâ abiit, Skirmundo & Ginvilone hæredibus relictis : quorum ille , ætatis suffragio , avitum in Novogrodenfes Principatum occupavit ; hic paternum in Polocenses. Crescentis ita per Russiam Litvanæ fortunæ progressus, ægrè Russorum Duces habebat. Indignabantur vectigalem nuper populum, quique præ egestate, tributî nomine quod

*Polocia capitur à Litvanis.*

*Skirmundus Novogrodenfis Litvanie & Ginvile Polocia Duces.*

Russis penderet , vix apud se reperiret , præter agrestia quædam opera , nunc totius Russiæ imperio imminere : unde , haud dubiè , res ad vim spectabat . Et quidem pridem indignatio in apertum bellum prorupisset : nisi validior interea Polonus hostis , mentem & vires Russorum à cogitatione Litvanæ expeditionis avertisset .

An. 1220. Mscislaus nihilominùs Romanides , qui nuper Polouciis victis in potestatem Scytharum venerat , è carcere regressus ; cùm Principatum Kijoviensem , per suam absentiam , à Volodimiro occupatùm recuperare non posset : ne domi suæ exul & privatus agere cogeretur ; Volodimiri ipsius consilio & opibus , Litvanos Novogrodiæ possessione depellere conatus est . Skirmundus ut periculum maturè averteret , à Zivibundo copias petit & impetrat : neque enim Novogrodenfibus fidere audebat , quos *popularium suorum amor , faciles ad prodicionem reddere posset* . Missus à Zivibundo Kukovoitis filius cum delectâ Litvanorum Samogitarumque manu . Iam Mscislaus,

*Bellum  
Skirmundi  
cum Russis,  
& victoria.*

flaus , circa Brestiam , agrorum populatione agrestiumque cædibus , bello præludebat ; cùm ad Skirmundi venientis famam legiones ex agris in castra contrahere cogitur. Ad amnem Iasialdam magno utrinque ardore prælium commissum est : fusus Mscislaus , amisso exercitu , è clade & campo ægrè vitam ( fugâ ) extulit Luceoriam. *Pinscum*  
 Skirmundus verò ejusdem victoriæ impetu *Liviani*  
*Russis adi-*  
 tu Pinscum & Turoviam de Russis cepit : *munt.*  
 triumpho & detractis hosti agris lætus , Kukovoitem , militemque ejus amplissimis donariis honoratum remisit Zivibundo. Iam is super extremæ senectutis debilitatem , morbo etiam confectus exstinguebatur : cùm , primùm victi hostis nuncio ; tùm victoris filii spectaculo , abiturum corpore spiritum aliquantùm recreasset : vitâ functus ; opportunè Principatu cessit filio , quem jam triumphalem viderat.

Kukovoitis paterno Principatu potitus , *An. 1221.*  
 altâ ipse pace usus est , undique ferè sociis *Kukovoitis*  
 populis cinctus. Ab Occidente Prussi , ab *Livanie*  
 Oriente Ginvilo Dux Polocensis frater , à *& Samogitie Dux.*  
 meri-

meridie Iatvingi, Skirmundusque Dux Novogrodenfis. Solus Septentrio metu non vacabat : sed ad illius lateris securitatem satis erat, quòd Germani & Lotavi domestico in Livonia bello implicati, ad vexandam Litvaniam ocium non haberent. Quare cùm res domi securæ essent, ampliores suppetias Skirmundo in Russiam transmittabat. Balaklai, Ultravolgensium Scytharum novus regulus, fortasse ad delendam acceptæ ante aliquot annos cladis memoriam, bellum contra Skirmundum moliebatur : ne autem legitima causa defuisse videretur legatos qui tributum de Russiâ exigèrent, præmisit. Skirmundus contractis quàm primùm ingentibus copiis, cùm Russos & Litvanos suos Cisvilienses, missosque à Kukovoite Ultravilienses in armis haberet, legatos lautissimo convivio accipit : post longam comestationem, abituris, nares atque auriculas singulis præcidi jubet, atque ita deformatos regulo renunciare. *Desinerent tandem Scythæ apud Litvanos de tributo agere.* Si quid juris in partem

*Skirmundus Scythas profligat.*

tem Russiæ, Litvano *subjectam haberent, armis illud non legationibus posthac assererent. Scirent ad id genus legationum, Litvanos alia, quam quæ nunc dedissent, responsa habere non posse.* Exarsit ad tam insignem contumeliam impotens barbarus, & ingentibus copiis, Russiam aggressus, populationibus Koidanoviam usque pertigerat, progressurus igne ac ferro ulteriùs, nisi Skirmundus maturè exercitum objecisset. Pugnatum est acriter, fugati tandem Scythæ, ipseque regulus occisus. Skirmundus eâ victoriâ minimè contentus, exercitum ulteriùs ducit: illo præcipuè consilio, ut pluribus Russicis civitatibus à Scythico jugo liberatis, longiùs à se hostem submoveret. Neque destituit consilia eventus, Mozyrum, Starodubum, Czernichoviam, Karaczoviam, totamque planè Severiam hostili ditioni detraxit. Tum inter filios Lubartum & Pissimundum eas regiones partitus; Troynato minimo, Cifviliensis Litvaniæ Novogrodix & Subsylvaniae principatum testamento attribuit. Polociæ interea imperitabat Bory-

*Mozyrum  
& totam  
Severiam  
Litvani oc-  
cupant fu-  
gatis Scy-  
this.*

K fus

*Borysus  
Ginvi'eni-  
des Dux  
Polocensis.*

fus Ginvilonides. Firmaverat ille res suas  
 non mediocriter inter finitimos, novâ affi-  
 nitate, è connubio cum filia Ducis Twe-  
 riæ. Domi etiam religionis similitudine  
 multum conciliaverat subditos : primus  
 enim ille è Litvanis principibus, sacra Chri-  
 stiana suscepit. Ne quâ verò inter agrestes  
 de limitibus discordiâ, se inviro cum Lit-  
 vanis bellum conflaretur; pactis fæderi-  
 bus, Berezina fluvius, ad discernendam  
 Polociam à Litvania, destinatus : cujus rei  
 memoriam hucusque conservat, colonia  
 tum ad ripam fluvii locata, & de auctoris  
 nomine Borysovia dicta. Tentatus bello à  
 Smolenscensibus & Pleseoviensibus Rus-  
 sis, utrosque feliciter rejecit. Polocensibus  
 infracta ab avo libertatis jura, in integrum  
 restituit. Quod vitæ supererat, inter sacel-  
 la & aras acturus videbatur; ita totas opes  
 ac studium ad templa Superis exstruenda  
 verterat. Vltiores conatus in ipso ætatis  
 flore, mors abruptit. Monumentum Chri-  
 stianæ in eo pietatis, nunc etiam ostendi-  
 tur, ingens saxum, è mediis Dunæ vorti-  
 cibus

cibus eminens , quina ~~†~~ cruce signatum , cum rudi hac , sed solidæ ac excultæ pietatis , inscriptione. *Miserere Domine mancipio tuo, Boryso Ginvilonis filio.* In eorundem Principum ætatem incidisse videtur , prima insignis clades Livonicorum Germanorum à Litvanis & Samogitis accepta. Post subactam Livoniam ; Curonibus ( qui , tunc Litvani juris erant ) arma intulerant : & quia religionis Christianæ propagandæ specie , bellum pro aliquorum cupiditate susceptum erat ; prætenfa causæ pietas , non equites modò , sed sacerdotes etiam ab aris ad arma contra Ethnicos evocaverat. Avigenus de Coloniâ Agrippinâ , Archiepiscopus , ipse non solùm exercitui aderat , sed etiam cum Imperatoriâ autoritate præerat. Ex subitâ tempestate consternatio , ingenti numero Curones , Samogitas , Litvanos excivit. Quanti enim periculi res esset , ad ipsa statim initia totis viribus hostem surgentem non rejicere , Lotaviæ finitimæ in servitutem subactæ misera conditio satis explicabat. Tantumque

*An. 1225.  
Livonienses  
Germani à  
Samogitis  
& Litva-  
nis fundum-  
tur.*

ea cogitatio ad audaciam & fortitudinem apud imperitum vulgus valuit : ut tumultuariæ illius multitudinis cæco impetu, veteranus Christianorum miles in primo congressu sit oppressus , ipseque Archiepiscopus cæsus. Kukovoite circa eosdem annos mortuo Principatum in Litvania vetere Ultraviliensi & Samogitiâ obtinuit Vtenes filius. Is parentis sepulti honori statuam pedestrem in edito ad Swientam amnem colle dedicavit : Lucus nunc ibi est : antiquitus inditum nomen, & sepulti Principis memoriam retinet ; Kukovoitis vulgò dictus. Multa deinde Vtenicum Livonicis equitibus prælia : cùm isti Samogitiam Curoniamque frequentibus incursionibus infestarent , & Dunæ ripis castella ac præsidia imponerent. Iidem à Conrado Mazoviæ Duce & Christino Culmensi Episcopo in Dobryniam evocati , ut quâ felicitate Lotavos in Livonia subegerant ; eâdem è Dobrynia ; Mazoviam & Poloniam contra Prussos propugnarent ; à Prussis & Litvanis , cum duos integros dies prælium tenuisset,

*Vtenes Lit-  
vania &  
Samogitiæ  
Dux.*

*Livonien-  
ses Cruci-  
geri in Do-  
bryniam  
evocati.*

*An. 1227.*



nuisset, internecione deleti sunt: quinque tantum cladi superfuere. His omni stationis Dobrynenfis spe depulsis; occasio Conrado data est ad alios Equites professionis à Livonica diversæ, è Germania evocandos; quos, cum vulgo, posthac Crucigeros vocabo. Anno subsequente, bellum è Curoniâ in Livoniam Vtenes transtulit: hætenus domi tantum Livonibus arma objicere soliti, hostiles terras invadere jussi. Ingens è Curonibus & Samogitis coactus exercitus, latissimè totam Livoniam populationibus peragravit. Ita hostem ad sua tuenda advocatum, à Samogitiæ infestatione, Vtenes arcuit. In Litvania verò de nomine suo coloniam Vcianam excitavit, arcemque addidit: nomen oppido nunc etiam idem est, sed arcis in propinquo olim sitæ vix vestigia. Ulteriori cis Viliam Litvaniæ pro Skirmundo parente nuper vitâ functo Troynatus præerat. Sed vix dum inchoati principatus auspicia, bellum acre excepit. Kurdas Scytharum regulus, Balaklai parentis, superiore

*Crucigeri  
in Prussiam  
ex Germania à  
Polonis evocati.*

*Vtenes Livoniam  
populatur.*

*Troynatus  
cum Scythis bellum  
& victoria.*

riore expeditione à Litvanis in acie occisi, seu corrigere seu ulcisci fortunam, ardebat. Ut certior porrò vindicta foret, summa ope bellum parabat: majore itaque, quàm unquam factum esset, è tota Scythia lecto exercitu, Ultravolgenses, Nahayscenses, Casanenses, Crimenses, ingenti numero contraxit copias. Neque Troynatus ad arma segnior, parentis & animum & successum æmulatur. *Accipere se, aiebat, omen, quòd filios eadem causa rursus in campum educret, qua nuper parentes secum commisisset. Spem enim inde affulgere, futurum, ut qui regnorum & odiorum avitorum heredes essent, forent etiam eventuum.* Inprimis autem Litvanum militem recenset, tum fratres Lubartum & Pissimundum cum auxiliis è Russia Septentrionali evocat. Duces etiam Russos ad bellum contra communem hostem pertraxit. Suentoslaum Kijoviensem, Simeonem Drucensem, Davidem Luceoriensem & Wolyniensem. Vtenem quoque de periculo monuit, sed is proprio cum Livonibus implicatus bello, aut parum aut nihil in præsi-

præsidium contulit. Contractis in unum copiis dubius diu hæsit Troynatus, quò duceret. Scythicæ legiones variè sparsæ; Russiam latè vastabant: hinc ancipiti periculo animus consilii incertus in diversa lacerabatur. *Divideret copias? sed vires attenuabantur, qua etiam unita, tam valido hosti vix pares futura essent. Toto exercitu contra aliquod prædatorum agmen iret? sed multiplex periculum, aquali necessitate difficilem reddebat electionem. Duceret contra ipsa pratoriana castra? sed quomodo inultus transiret hostem, intra ipsa planè viscera, tam securè grassantem.* Obdurato tandem animo ad ignes quos undique è villarum oppidorumque incendiis tolli videbat; antequam à populatione agrorum hostes revocarentur, totis viribus ipsa castra adoriri constituit. *In radice erat præscindenda simul tota arbor: ne dividendo, augetetur labor & periculum.* Devitatis itaque illis legionibus, quæ per agros circumvolitabant, occulto itinere, quàm celerrimo agmine ad ipsa hostilia castra pervenit. Confederat Kurdas in Mozyrensis agris ad amnem Oku-  
niow-

niowkam : inde legionibus aliquot prædatum dimissis , præcipuum exercitus robur in castris habebat. Monitus in propinquo visa hostium signa , ne castris se continendo , bellum non inferre , sed propulsare videretur , militem etsi absentibus legionibus valdè accisum , juvenili ferociâ in campum educit. Simul acies in conspectum & in pugnam coiverunt ; tantus utrinque ardor. Hinc vindictæ libido , prædæque cupiditas : hinc libertatis patriæque studium , obstinaverat in omnia animos. Acerrima proinde ac diuturna fuit dimicatio : & quidem quamdiu cohærebat sibi Scythica acies , tamdiu victoria neutrò inclinaverat : at ubi à Litvano rupta , fecit vitium ; turbatis ordinibus facilè in fugam effusa est. Parum tamen præsidii victis à fuga erat , quòd fluvii à tergo objecti aut arcerent , aut vorticibus involverent fugientes. Occubuerunt eo prælio Drucius Dux Michael , Andreas Luceorienfis princeps , & Pifimundus ac Lubartus fratres Troynati. Quare Troynatus ne quid in Septentrionali

nali parte Ruffiæ à morte Ducum novare-  
 tur, Scythici belli reliquias & Principatus  
 adminiftrationem filio *Algimundo* com-  
 mittit: ipfe cum modicis copiis eò fefti-  
 nat, initiaque tumultuum occupat, & cæ-  
 forum fratrum poffeffiones hæreditatis ju-  
 re Principatui adjungit. Regreffus inde in  
 Litvaniam, vitâ exceffit. Nec Algimundo  
 diuturna dominatio, etfi quietior quàm  
 Troynato. Semina fequentis belli Ruffici  
 jecerat, cum Davidis Luceoriæ Ducis mo-  
 tas de finibus Subfylvaniæ controversias,  
 armis compressiffet: fed exemptus maturè  
 vivis, fimul cum Principatu, imminenti  
 belli negotium Ringoldo tranfcripfit. Ne-  
 que impar erat incumbenti moli Ringol-  
 dus. Vtene enim Litvaniæ ac Subfylvaniæ

*Algimundus Dux  
 Novogrodenfis Lit-  
 vaniæ.*

*Ringoldus  
 ejus fucces-  
 for.*

Duce per idem tempus mortuo, Suintoro-  
 go principi propè infanti tutor lectus;  
 provinciis, quæ tutelæ nomine acceffe-  
 rant, potentiam infigniter auxerat. Polo-  
 ciam interea *Bafilus Rechuoldus* obtine-  
 bat. Diuturno ille feſe bello intricaverat;  
 cum agrorum partem, quam Plefcovienſes

*Bafilus  
 Rechuoldus  
 Dux Polo-  
 cenſis Pleſ-  
 coviam ex-  
 pugnat.*

L de

de Polocensibus ceperant ; armis repetit. Tandem hostes vicit , agros recepit , urbi captæ tributum in annos imperavit. Filia ejus Praxedis ( Poroscovia vulgò ) à Russis inter Divas Virgines , religiosè colitur : nam posteaquam inter Vestales ad templum Salvatoris vulgò Spar aliquantum Polociæ egisset ; fama est, Romanam ab ea peregrinationem susceptam , & in urbe septennio sanctè exacto morruam, tunc magnæ virtutis opinionem reliquisse : deinceps verò ad annum 1273 à Gregorio X Divarum numero additam. Filius verò Hlebus parentis successor , ætate immatura vitâ functus , cùm prolem nullam reliquisset , plenam Polocensibus libertatem fecit. Ita Respublica eorum rursus ad populum translata est : & Litvanorum Principum dominio expedita. Kijoviam interim, cùm propinquâ, Russiâ, Scythico imperio paruisse, Russi ipsi sunt auctores : qui sub Scythâ Principe Kijoviæ dominationem obtinente , plurium Russiæ Ducum à Christianis religionibus defectionem , atque

*Polocensibus libertas restituta.*

*An. 1235.*

que Michaelis Chernichoviensium Principis cum familiari aulico Theodoro , ob fidei in Christum constantiam , necati cædem circa ea tempora consignarunt. At mihi certius est ; longè ante ea accidisse , quia Bateio Scytharum Principe imperante acta esse scribuntur.

## L I B E R I V ,

*De rebus Litvanorum obtinente rursus Principatum familiâ Palæmonis.*

**P**rimus est Litvanorum Principum Ringoldus , Gimbuto Palæmonis nepotegenitus, qui *Magni Ducis* titulos assumpsit. Non vanum nomen , si Provinciarum quas obtinebat amplitudinem spectes : imò nescias , an non Principatus magnitudine minus ? Ingentem novi tituli invidiam, Litvaniæ utriusque, Samogitiæ, Curoniæ, Subsylvania, Novogrodiæ, Mozyriæ, ac Pinski, Severiæ, Czernichoviæ, possessione magis, quàm possidendi jure implebat. Legitimus enim hæres Suintorogus tutelæ

*Ringoldus  
Magnus  
Dux Lit-  
vaniæ, Sa-  
mogit. No-  
vograd.  
Subsylvan.  
Czernicho-  
viæ, Seve-  
riæ.*

L 2

specie

specie ad privatam ferè vitam redactus, cogeatur debitum sibi principatum expectare, quamdiu fraudis & injuriæ hæredes ex Ringoldo superessent. Ringoldus certè, quòd diu dissimulare non poterat, maluit maturè palam profiteri: post interversam privatim pupilli hæreditatem, titulos etiam in se publicè transtulit: quòd nec opum nec honorum cupiditati temperare, impotens sui animus, nosset. Facinus hoc principis, domi, nec probari permittebat tenerior ex pupilli injuria affectus, nec omninò reprobari, surgentis ex injuria privata Rēipublicæ species: *hanc, cum incauti cives amare caperunt, facinus Principis displicere desuit.* Apparebat enim tùm maturatione: atque virilis Principatus constitutio, gerendis rebus planè valida: posteaquam ex tot provinciis sub communi Principe, una Respublica coaluit. Magis proinde apud populum, quàm apud Senatum causa Principis odio laborabat: *ille justius magis anxius simplexque arbiter, omnia damnabat quæ iniusta; huic jura privata ad publicum commodum*  
*nimiùm*



*nimiùm inflectenti , fas frangere non omninò turpè videbatur. Res tota quemadmodum domi pro varia in virtutem vel rempublicam inclinatione ancipites affectus laudesque aut vituperia reperit : ita foris certum hostem excivit. Residuæ è præteritis simultatibus iræ , averfarumque à Russia provinciarum memoria & dolor, Russos Litvanorum fortunæ infestos pridem habebat: plùs tamen hæcenus valuerat metus , quàm odium : hinc tamdiu ad professas inimicitias non descendebatur. Vsurpatorum tandem à Ringoldo M. Ducis titulorum invidia apertum bellum accendit. Suentoslaus Kijoviæ Dux ( quodd è vetere Russicæ Reipublicæ formâ , is cum suprema potestate universæ Russiæ præesset , qui Kijoviæ rerum potiretur ) ad se inprimis pertinere ratus Ringoldi ausibus ire obviam , & ipse summâ vi bellum moliri , & alios Duces in consiliorum factique societatem omni arte pertrahere. Indignum , aiebat , sub Russorum Principum conspectu , Ethnicâ Litvanorum servitute , nobilissimas Russia Provincias misère premi :*

*Russi Ringoldo bello movens Duce Suentoslaui Kijovienfium Principe.*

Et tamen nec barbarorum potentiam plus , quàm invidiam , apud hostes reperire ; nec Christianorum calamitates , aliquid ultra querelas , apud socios Et populares . Quod si usu ipso jam tolerabile fortasse redditum , ( etsi immeritò ) quispiam credere posset : illud verò quomodo ferendum ? Barbarum eò audacia progredi , ut universa Russiæ imperium vel cogitatione ipsa usurpet . Quid animo constitutum agrè celet , satis ab invito proditum esse fastuosi tituli insolentiâ . Quid enim dubitarent eum tituli sui magnitudinem reliquis Russiæ ditionibus implere tentaturum , qui eundem , ab occupato patrimonio pupilli suæ fidei commissi , nuper inchoasset ? Propterea illum certè tam ambitiosè Magni Ducis nomen invasisse , ut occupanda de integro Russiæ , Et sibi Et posteris necessitatem faceret : nisi semel assumptos titulos , aut turpiter deserere , aut re vacuos stultè conservare mallerent . Certè apud viros suarum rerum atque honesti non omnino incurios , omnia ea satis momenti habere , Et ad fœdera ( si tamen aliqua supersunt , longè ante à Litvano non violata ) infringenda , Et ad bellum extremis etiam fortunarum impendiis pertinacissimè urgendum . Quid quid verò alii , de ea re , apud se constituerint ; sibi  
obstina-

*obstinatum jam esse ; arma palàm huic Russia hosti inferre. Prolatam à Suentoslao belli facem, absque cunctatione plures secuti : inter primos Leo Volodimirienfis, & Demetrius Drucensis, Duces. Kurdas quoque Scytharum Ultravolgensium regulus ex nuperæ cladis recordatione, suoptè ingenio in ultionem pronus, ut privata damna minoribus impendiis ulcisceretur, aliquot militum millia in subsidium Russis misit : quòd tamen meminisset, ex aquo hostem esse, eum quem juvabat, atque eum quem aggrediebatur, destinato consilio tantum praesidiarii militis dedit, quantum ad Litvanorum perniciem sufficeret, neque Russorum potentiam aleret. Russicis itaque Scythicisque copiis succinctus Suentoslaus, infecta signa provinciis Litvaniæ intulit; atque ut omne bellum ad ipsam Principatus regiam redigeret, Novogrodecum versus tendebat. Ex itinere latissimè agros miles populatus, quâ Nemèno defluente non arcebatur, omnia cædibus ac ignibus repleverat. Ad Mohilnam primùm Litvano exercitu objecto, agrorum vastationes*  
*stitit*

stitit Ringoldus. Atque ut temporis illius ratio (ubi non tam astu aut ingenio quàm viribus de summa rei transigebatur) non ferebat longas in bellis moras : vix castra coierant , miles ad pugnam utrinque in campum eodem die eductus est. Inde ingens Russorum acies ; Scythico equite per alas firmata : hinc mediocres Litvanorum copiæ ; in præsidio verò Russicarum legionum fides & arma , quia contra populares suos , non ex vano suspecta. Pugnatum est pertinacibus utrinque animis in vesperum : jam nox , inchoatum cum sole pænè prælium , dubio adhuc Marte , diremptura incumbebat ; cùm veteranus Ringoldi miles extremâ indignatione actus , totis simul viribus ad victoriam adnititur , & hostem vestigio movet ; motam semel loco aciem , facilè deinde in fugam egit. Duces belli alii elapsos , alii promiscuâ cæde absumptos in campo mansisse tradunt. Exercitu fuso , castra victori militi in prædam permissa : nec amplius Ringoldus vel iram vel fortunam in victos extendere voluit , pace conten-

*Funduntur  
Russi à  
Ringoldo.*

contentus. Videbat enim Russos, ex recenti strage quietis magis patientes; non facile iterum arma invidiæ aut odio permiffuros. Victoriâ Russicâ exceperunt motus Livonici: irrumpentes in Samogitiam Equites Ensiferi aliquoties repressi; *An. 1238.* atque ut defuissent alii ex voto eventus; satis erat nihil de Samogitia ad validum jam tum hostem perdidisse. Insuper Livonicis annalibus proditum reperio: exercitum ingentem Equitum cum auxiliis Germanicis fufum: Duces belli Volquinum Magistrum, Baronem à Dannenberch, Equitem Germanum Hasseldorf militari gloriâ celeberrimum, cum quadraginta octo Ordinis fratribus, cæsos. Post rempublicam inter arma fortiter administratam, non diu pace partâ domi frui potuit Ringoldus, Novogrodeci morbo extinctus. Suintorogo hinc paterni principatus repetendi spes affulgere visa: neque deerant rebus novandis apta partium studia; si Dux cæpisset. Sed juvenis ætatis vel ingenii mollioris vitio; necdum audendo par, timidi-  
M                      diora

diora consilia fecutus est : concessâ nuper in possessionem Samogitiâ , contentus ; lite, de Litvania, abstinuit.

*Mendogus  
Primus &  
ultimus  
Litviano-  
rum Rex.*

Mendogus itaque ; cui apud alios Mendolfo nomen, suffectus Ringoldo, ipsa initia principatus, quem parens pupilli nepotis injuriâ pepererat , cædibus ac sanguine cognatorum funestavit. Ita , *crescente potentia Principum, succrescebant sensim & scelera* ; per quæ dominandi cupiditas amplius se promovere conabatur. Quosunque è propinquis infestos suis rebus suspicio obtrusisset ; ferro aut veneno submovit. Nepotum tamen cæde abstinuit : non quidem , quòd minùs suspectos haberet ; sed quòd ad tanti sceleris destinationem , mens nondum tragicis facinoribus satis obfirmata , ipsâ naturæ Verecundiâ, trepidaret. Tres erant juvenes ; belli pacisque artibus impigri, & agendo maturi : Arduidus , Vikundus , & Cieuciwilo aut Theophilus. Hos ut , honoris specie longiùs à curia ablegatos , vel suis fraudibus faciliores haberet , vel à rerum novandarum occasionibus amoveret ;  
ad

*An. 1240.*

ad exercitum proficisci jubet ; & finitimorum infestationibus juvenilia studia bellis assuefacere. *Incautus ( ut solent , nimium suspicaces )* Princeps ; *fortunam suam , quâ præcipuè firmare voluit , hac prope prodidit.* Juvenes enim re feliciter inter hostes confectâ , insignium in Russia civitatum potiti ; cum jus imperandi degustassent , patrum jugum non tulerunt. Druciam & Smolensciæ partem Arduidus , Vitepsciam Vikundus , Polociam Theophilus obtinebant : ut subditos Christianos magis sibi conciliatos redderent , sacra Christiana publicè professi. Hæc Mendogo belli movendi causa : & primi inter Litvanos civilis dissidii , atque propè amissæ Reipublicæ semina. Nam juvenes , paucarum civitatum opibus , non satis contra validum hostem securi ; cum finitimorum auxilia implorant , patrum oppugnando , vix patriam non perdiderunt. Vikundus Rigam missus , Livonien-  
sium ac Prussicorum Equitum animos , suo fratrumque nomine sollicitabat. Auxilii lati præmium spondebatur , Iatwiezyæ & Sa-

*Mendogi  
bellum cum  
Nepotibus  
& Russis.*

mogitiæ portio media, perpetuo jure Equitum ordinis transcribenda. Quod si eventus felix conatum promovisset, cæso aut depulso Litvaniâ Mendogo, quidquid in bellum impensum esset, ex Litvaniæ ærario refundendum promittebatur. Primum belli impetum Mendogus in Theophilum verterat, quem in primis finium propinquitas objiciebat. Oppugnata aliquoties Polocia: sed præsidium è Russis ac Livoniensi milite, & urbi tuendæ, & hosti, accisis viribus, repellendo, suffecit. Neque poterat diutiùs obsidionem Mendogus urgere exercitum alio contra novum hostem ducere coactus: diversâ enim parte conflatum expectatione majus periculum domum revocabat. Daniel Romanovicius Dux Kijoviæ, Basilius Haliciæ, aliique Russi Duces, honesto ad famam titulo, exules Principes juvandi, re verâ Russicarum ditionum recuperandarum spe, grave Litvanis bellum intulerant. Ad gentem Ethnicam Christianis regnis quibus undique cincta esset, plurimum infestam,

com-



communi ope excidendam passim currebatur : causæ pietas Polonos etiam ad arma excivisset, nisi eos aliæ curæ domi quietos tenuissent. Scythicarum enim infestationum metu, si miles extra fines regni mitteretur, non è republica fore Boleslao Pudico visum. Ancipiti planè periculo, & vix unquam majore res Litvana conflictata, conspirantibus ab omni parte hostibus: quibus, si Polonus accessisset; nescio an non fatalis is Reipublicæ ictus fuisset. Iam victor Russus Slonimum, Wolkoviscum, Msciboviam secundo cursu ceperat: & vastatis latè agris, trepidationem Novogrodecum versùs urgebat. Mendogus ad subitam vim, nec consilio, nec viribus, satis comparatus; ut impetu primo quacunque arte retardato, spatium providendi daretur; legatos mittit: pacem supplex petit; obsidem fæderum, Volstinicum seu Voyfielcum filium, legatis adjungit. Ferox recentibus successibus Daniel, pacis nomen non ferebat. Repulsa itaque est legatio. Non pro-

*Russi Litvaniam invadunt.*

*Legatos Livianorum rejiciunt.*

sum, ut armatus legatos audiret. Frustra legationibus tempus extrahi, cum copia sub signis ferro rem transigerent. Pacem quam hostis peteret, non ex ipsius submissione, sed ex ulteriore belli progressu se pensaturum. Subsisterent igitur Volkovisci: cum victorem exercitum illac in hyberna reducturus esset: tum, si quid adhuc integrum de Russia Mendogo superfuerit; de eo, per otium à bello, commodius cum Legatis acturum. Remissis ergo Volkoviscum legatis, obside Woyfielko Slonimum relegato, infesto exercitu Novogrodecum versùs progressus est. Regionem universam fædè populatus, pluribusque locis in potestatem redactis, ab urbis ipsius obsidione, quam spe longiorem futuram præviderat, hyeme imminente abstinuit. Tum primùm legati auditi, & fædera icta conditionibus, quas maximè tolerare poterat Mendogus, magnâ Russiæ portione mulctatus. Compositis in eum modum Russiæ rebus, quas satis securas reddebant novi contra Danielelem Kijoviæ Ducem à Scythis motus, angebat animum Litvaniæ cura. Theophilus Nepos, post defensam  
Polo-

*Mendogi  
fædera cum  
Russis.*

*An. 1245.*

Polociam , Archiepiscopi Rigensis & Magistri Livoniæ opibus , res suas validè firmaverat: quorum gratiâ , à ritu Græco nuper Polociæ suscepto , ad Romanam religionem transiit : ab eo facto , facillimam deinceps , & fidem & benevolentiam apud Equites Livonicos habuit. Post mutuas inter Livoniæ Magistrum Theodorum , & Mendogum in Curonia clades , Theophilus Livonicis auxiliis Polocensibusque copiis instructus , bello patrum in ipsa Litvaniâ petiit : ubi , cùm nullus miles opponeretur , effuso liberè in prædas exercitu , per universam Litvaniam ferro ac igni bacchatus, ingentem prædam absque prælio aut periculo Polociam eduxit. Similes agrorum vastationes pari successu deinde repetiit. In Semigallia quoque Samogitas auxilia ei provinciæ ferentes , à Magistro Equitum insignem cladem accepisse , è Livonicis commentariis habetur. Tandem cùm frequens fama esset , majore mole Litvanicam expeditionem Livonicis armis ab Theophilo instaurari, Mendogum

*Bella ejusdem cum Livonicis.*

*An. 1247.*

*An. 1250.*

Mendógus amplissimis donis promissisque Magistrum Livoniæ , Andream de Stukland à proposito bello deducere conatus est. At Magister *omnem pacis mentionem respuere : nefas ducere , amicitias cum Ethnicis ; ad quos bello petendos , Sacramento sui tenerentur . Si Princeps Litvania , Christianis sacris initiaretur , fœderum paciscendorum rationem non omninò difficilem fore . Susciperet quamprimùm religionem Christianam : donationem provinciarum à Nepotibus factam , ratam haberet , atque jus , si quod in easdem provincias haberet , Ordini Equitum consignaret . Se verò perfecturum , ut Mendogo inter Principes Christianos ritè annumerato , tituli regales à summo Pontifice tribuerentur . Ita pacem constantem inter Equites , & Litvaniam firmari posse . Duræ nimis Mendogo conditiones visæ . Post aliquot agros latrocinii more direptos , ante tentatam* *justi pralii aleam , ad avitas religiones ejurandas se cogi . Quid verò istos imperaturos , si bello vicissent ? Satis adhuc Litvano ad arma virium esse . Quid igitur tanquam perditis rebus tam audacter imperarent ei , quem necdum acie experti essent ? Nimis apertè sano sibi illudi , cùm tituli ampliarentur ,*

*Mendógus  
fœdera  
init cum  
Livonibus,  
baptizatur,  
& Rex  
Litvania  
renunciatur.*

*tur, provincia detraherentur.* Sed quia vis hosti in promptu erat, indignatus fortunæ, cessit tempori: neque dolore amittendarum provinciarum adduci potuit, ut de summa rei prælio decerneret. Legatis igitur præsentibus Christiana sacra palam suscepit: Iatwiezyæ, Samogitiæ, Curoniæ, & Veizensium agrorum donationem, traditis de more literis perpetuam esse voluit. Missi deinde Romam, qui Principis sui nomine, supremo Christianorum Pontifici solitam venerationem dependere, & regios titulos ac diadema peterent. Accepta legatio perhonorificè ab Innocentio IV: missum diadema per Heindericum (seu Henricum) Armacanum, postea Culmensensem, Præsulem; qui simul cum Archiepiscopo Rigensi, sacro fonte cum sexcentis primorum ablutum, in campis Novogrodenfis, (neque enim Novogrodeci tam amplæ ædes haberi poterant) solennibus cærimoniis novum Regem inauguravit. Sacrorum per Litvaniam Pontifex designatus Vitus, religiosum institutum, ordinem-

N que

*An. 1254.* *Primus in Litvania Episcopus, Vitis.* que D. Dominici, sub S. Hyacinthi magisterio secutus. Omnibus ex ordine procuratis, jam in tuto pax putabatur: subsequens enim quietis exterior species, pacis securitate, plurimum finitimis imponebat.

At Mendogus sacra quidem metu nuper suscepta, palam præseferre: privatis vero ad Ethnicas aras sacrificiis impie eadem violare. Vbi deinde periculo abeunte, timor magis resedisset, dolore actorum acrius urgeri. sub regio titulo principatus undique mancus, hinc Russiâ detracta, inde Samogitiâ, Curoniâ, Iatwieziâ amissis, seipso minor, vehementius displicere. quidquid nuper metu aut simulatione egisset, penitus odisse. Ceteris affectibus tandem in furorem degenerantibus, parum ad insaniam erat Christianam religionem palam ejurare: sanguine ac cædibus actorum memoriam obliterare, vastitatem latè per finitimos circumferre, ferro ac igne quaquaversum in Christianos grassari, ardebat. Sed quò primùm repentinus sese exereret, nondum constituerat: visum tantisper iram in

*Mendogus religionem Christianam deserit & Christianas provincias infestat.*

in Ruffos & Livones diffimulare. Primas *An. 1255.*  
effudit furias in Poloniam : Lublinensem  
tractum populationibus peragravit: urbem  
ipsam arcemque captam diruit ac exussit,  
onustum prædâ militem domum reduxit.  
Exiguâ deinde quiete interjectâ , triginta  
millium exercitu Masoviam aggressus, uni-  
versam crudeliter vastavit , & Plociam ar-  
cem exussit. Prædâ ingenti captivisque in-  
de in Litvaniam cum exiguo equitum præ-  
sidio dimissis , infesta signa in propinquam  
Prussiam ex insperato intulit. Arcibus lo-  
cisque munitioribus Equites Crucigeri se-  
se continebant : ingentes enim copiæ Lit-  
vanæ , repenti per agros effusæ , omnem  
cogendi in castra exercitus usum ademe-  
rant. Pagi ac oppida nuper exædificata  
flammis absumebantur : in templa potissi-  
mum, & sacrorum præsides barbarè sævie-  
batur , nullusque omnindè Christianis ca-  
ptivus ad vitam servabatur: quòd Rex hoc  
genus prædæ execratus, palàm edixisset, ne  
quis Christiano vitam relinqueret. His  
Prussorum stragibus irritatam non exfatu-

N 2

ratam

ratam Christiani sanguinis rabiem, sensim in Livones exacuebat : quorum armis vexatam nuper à Nepotibus Litvaniam minerat. Aliquot ergo pòst annis bipartito agmine invadit Curoniam : ubi paulò ante Magistrum Livoniæ Borhardum, cum paucis iter visitandis proximis arcibus ingressum, Samogitæ ex insidiis propè oppresserant, ni ferro viam fugæ per confertos aperuisset. Ad hostem ancipiti bello distinendum, quatuor expedita millia Mendogus vastationibus destinat: reliquas copias Kariszovini arcis in confinio Prusfiæ oppugnationi admovet. Sustinuit diu & oppugnationes & obsidionem, impostum loco præsidium : *spes subsidiorum tuebatur constantiam.* Nam Magister Livoniæ Burgardus Horsnusen, cum exercitu è Prusfia, Livonia, & Danicis auxiliis conflato, propediem affuturus erat. Festinanti interim in hostem Magistro, Curones prædationibus vexati nunciant, Litvanam legionem haud procul inde abesse, prædâ & captivis impeditam. Opem supplices implorant:



rant : se etiam magno numero adfuturos in armis spondent , modò spes à Magistro fieret, fore ut conjuges liberique , Litvanæ captivitati erepti, suis ex fide redderentur. Responsum est à Crucigeris : *aliis se legibus militiam ducere. Prædam omnem de hoste captam, victorū esse debere. Si quid inter ipsam hostilium castrorum direptionem de propriis rebus fortuna Curonibus obtulisset ; non gravatè se , id apud eos-* Curones , vulgò Cur- *dem relicturos. Cetera omnia, quæ apud hostem es-* landi , ad *sent , victori militi cedere debere , scirent. Aspera* Litvanos à *hæc responsio , ex afflictæ jam conditionis tole-* Crucigeris *rantiâ affectum impotentes barbaros , faciliè ad in-* deficiunt. *dignationem perpulit. Secessione itaque factâ partes Christianas destituunt ; atque inhumanitatis odio ; inimicitiarum ac injuriarum acceptarum immemores , hosti sese conjungunt. Pugnatum deinde auctis hinc, imminutis illinc viribus : atque ea pugna Livonicus exercitus fædè profligatus est. Magister ipse Livoniæ & Marschalcus Prusifiæ Henricus Botel cum centum quinquaginta Equitibus Ordinis , vulgò Fratribus, occubuerunt : cæsorū è promiscuo mili-*

te capitum multitudo non est sub numero. Insignem ad memoriam eventum eo prælio contigisse traditur. Pulsa loco Litvanicorum equitum cohors in fugam sese conjecerat : cum ultimum ex ea cohorte ordinem Gerebrardus Saxo Eques adeptus , caput unius gladio dejecisset ; truncum cadaver ad plura stadia in effuso cursu immotum , neque fugientium ordinem , neque equum deseruit. Exustis deinde in Curonia , Karzovino atque Heisburgo arcibus ; exercitus in Samogitiam , mox in Prussiam ductus. Ibi post Sambienfes agros pervastatos , Regiomontum urbs à Bohemorum Rege Ottacaro non multò antè condita, obsidione cincta. Sed quòd selecti militis præsidio teneretur ; infelicitè tentatâ oppugnatione, non levis clades accepta est : amissi fortissimi quique , qui per pontem Pregelo fluvio impositum , pertinacius se contra adversa tela , portæ urbanæ inferebant. Ne tamen recuperatâ per eam expeditionem Samogitiâ & Curoniâ vastatâ Sambiâ, frustra Prussiam tentasse

tasse Mendogus videretur , per universam provinciam popularium animos ad defectionem sollicitavit ; submissisque auxiliis Samogiticis , conflavit post aliquot annos intra Prussiam bellum. Ita Crucigeris domestico bello implicatis ulciscendi ratio adempta. Electis enim inter se Ducibus, religionem Christianam Prussi ejurarunt, Prussi à religione Christiana & à Crucigeris deficiunt. atque condito , ante ferias D. Matthæi, die , per universam provinciam templa diruerunt ; sacrorum præfides, quos nancisci poterant , tormentis confecerunt ; nihil omninò, quod ex sacris Christianis, furori repentino ad injuriam patere poterat , non profanatum reliquerunt. Digna proinde Christianis principibus res visa , ut collatâ in commune ope , ferocia barbarorum reprimeretur. Auxilia magnâ mole è Germaniâ potissimum contracta ; miles probè armatus, Duces bello experti : nihil ad excidium colonum Prussiæ ac Samogitiæ, desiderari videbatur. Ergo ut per Nactenses agros hostilem terram ingressi sunt, sedem belli inter ipsa viscera fixuri , castris locum

locum media in Prussia capiunt vexando undequaque hosti opportunum. Permunitis ibi tumultuarii operis vallo & fossa castris, ad impedimentorum custodiam paucas cohortes reliquerunt, totis ipsi copiis contra hostem, quem castris quoque sese continere rumor erat, profecti. Barbari de viribus & consiliis hostium per speculatores moniti, verebantur primam armati militis audaciam, præsertim quòd suis armorum genus & pugnae ratio levis in usu esset. Aliquâ ergo victoriâ prima gaudia hostibus præripienda atque ita feroces spiritus atterendos censent: *remissiores eorum*

*Christiani  
à Prussis  
Ethnicis  
profligati.*

*impetum futurum, si ante pugnam aliquo adverso eventu timere prius, quam audere didicissent.*

Quare ne in venientem ferociter contra se hostem fortuitò incurrerent, flexo ad partem notis sibi per sylvas callibus itinere, castra quibus exiguum in præsidio militem sciebant, magno imperu adoriuntur. Capta ea primo insultu, præsidiumque cæsum. A præda iussus sibi temperare miles, & quamdiu ab illo successu erectior manebat

nebat ad victoriam animus, cruentis adhuc gladiis, ardenteque spiritu in hostem ire, ubi & plus belli esset, & summa victoriæ. Vt primùm signa imminentium à tergo barbarorum, in quos à fronte Germani intenti erant, in conspectum venerunt, ex insperato illo eventu castrorum captorum suspicio, atque hinc trepidatio: tum, collatis signis, atrox prælium. Pertinacia pugnantium in aliquot horas dubiam utrinque victoriæ spem sustinuit: tandem Christiani profligati. Nobilissimus quisque aut captus, aut cæsus. E præcipuis captivis forte lectus Hirschus nobilis Magdeburgensis, qui inter triumphos, barbaro ritu ad Deorum venerationem equo insidens armatus, vivus exultus est. Miserabili huic fato clementiâ aliquorum, quos ante amicè coluerat, bis exemptus fuerat: cùm tertio tandem eadem fors cecidisset, respuit vitam quam barbaræ miserationi deberet. Alter exercitus Germanicus duce, Comite Barboigienfi, Sambiam & Samogitiæ confinia populabatur: hic quoque à

O Prussis

Prussis oppressus est , ipsis D. Agnetis feriis: Dux ipse in potestatem hostium amisso exercitu venit. Harum victoriarum successu Helzberga , Krutzburgum , Regionum , Bartensteinium arces atque oppida Crucigeris sunt adempta. Nec Livonia interim à bello immunis erat ; affligebatur assiduo per legatos Mendogi : pugnatum quoque ibi est ad Lenuardum arcem Dunæ ripis imminentem quo eventu ; proditum non reperio. Mendogus ipse ut expeditior in alios esset , fœdera cum Russis instauravit ; per quæ societas armorum contra Polonos inter Russos & Litvanos constituta. Eodem statim anno ad expeditionem Mazoviticam Suarmirus Ducis Kijoviæ nepos , Mendogo se comitem adjunxit. Mendogus auxiliis Russicis auctus , occultis per ingentes sylvas itineribus , silentique agmine in Mazoviam insperatus penetrat : Semovitum Ducem filiumque ejus Conradum per æstivos calores securè in Iazdovia villa cum universo comitatu agentem opprimit. Cesserat ex forte captivus

*Mazovia  
à Litvanis  
vastatur.*

yus Semovitus Suarmiroy, Conradus Mendogoy : atque hic quidem à Litvano liberaliter habitus , numerato à suis lytro , principatui paterno restitutus est ; at Semovitus miserè interiit , statim à Russo barbarè trucidatus. Inde legiones ad prædam vastationemque agrorum dimissæ. Amissis Ducibus Mazovitæ , non tam unius alicujus imperio aut consilio , quàm tumultu ipso, ut in subitis evenit, agrestes ac nobiles in unum collecti , vim hostium sistere sunt conati : sed multitudini cesserunt , victi ac deleti. Fædior deinde vastatio, totâ Mazoviâ & magna Cujaviæ parte subsecuta : præda atque exercitus, absque damno, domum reductus. Anno subsequente Mendogus per hyemem Livoniam infestavit : 4 Non. Februarii Parnaviam captam *An. 1263.* diruit, & ad Dunamundam cum hoste conflavit. Æstate deinde proximâ rursus militem Mazoviæ immisit : hic cum nec hostem ad pugnam elicere posset , neque ex præteritis populationibus aliquid in ea provincia superesset, Vistulam trajecit. In-

tacti fuerunt hæcenus Loviciensæ agri ;  
 ingens proinde ex illis præda abacta , reli-  
 quis igni aut ferro absumptis. Gravis om-  
 nino ea tempesta toties rediens non Ma-  
 zovitis modo , sed & Polonis , esse cæpe-  
 rat. *Diviso in plures Principes Poloniae regno ;  
 difficilis concordia erat :* hinc Litvanorum in  
 propinquo potentia crescens , magis for-  
 midabilis. Neque facile res Christiano-  
 rum respirassent , nisi surgentem Ethnico-  
 rum fortunam domesticæ factiones abru-  
 pissent. Obierat per idem tempus Men-  
 dogo conjunx : ad ordinandam muliebrem  
 familiam , & procuranda defunctæ justa ,  
 evocata in curiam aderat Doumandi Za-  
 nalscenæ Ducis uxor , Reginae soror. Rex  
 jure hospitii ad flagitium per vim abusus ,  
 violatâ fæminæ pudicitiam in conjugium  
 eandem retinuit. Impatiens injuriæ Dou-  
 mandus opum suarum imbecillitate , ul-  
 tionis cupiditatem ab aperta vi tempera-  
 re , atque adeo dissimulare ; interim Rei-  
 publicæ causa , procerum animos pertente-  
 re , atque à Principe avertere : ac potissi-  
 mum

*Civilium  
 per Litva-  
 niam mo-  
 tum occa-  
 sio, & cæ-  
 des Men-  
 dogi.*



mum cum Troynato Samogitiæ Duce  
 Mendogi ex sorore nepote, secreta confi-  
 lia agitare. *Auderet tandem ipse, quod nemo  
 non optaret. Liberata à gravi Tyranno Litvania  
 nomen, ille sibi assereret, ad quem maximè pertine-  
 ret. Oblivisceretur in eo evertendo jura sangui-  
 nis: apud quem nullum jus esset inviolatum. Fra-  
 trum suorum exilio, litaret sanguine parricida  
 Mendogi. Nunquam eum magis patere posse,  
 quam cum pratorianis legionibus in Mazoviam  
 expeditis, ipse se nudasset suis praesidiis. Si vi opus  
 foret: adesse Troynato Samogiticum exercitum sa-  
 tis addictum: se quoque in tempore cum Novogro-  
 densibus copiis non defuturum. Non diu solli-  
 citationem tulit Troynati animus, suoptè  
 ingenio in ambitionem pronus. Destina-  
 tis consiliis, ipse eventus viam aperuit.  
 Turbatum enim interea aliquid fuerat à  
 Duce Natbrawscio ad Borysthenem: con-  
 tra illum jussus à Mendogo cum exercitu  
 ire Dowmandus; Troynatum monet ma-  
 turè, ne occasionem gerendi elabi patia-  
 tur: nunc demum tempus agendo esse,  
 cùm militem sub signis haberet. Condicto*

itaque die , Troynatus è Samogitia , Doumandus è Russia exercitum occultè deducunt , atque intempestâ nocte regiam invadunt. Occupatis portarum custodibus, percussores in cubiculum immissi , Principem in lecto confecerunt. Cæsi cum parente duo jam maturi regno filii , Ruclius ac Repicas.

*Troyna-  
tus M. L.  
Dux, &c.*

Nunc primùm , nova ad Principatum via , tentata est. Hactenus enim Principi vitâ functq , eum in Rep. suffici mos erat, cui juris hæreditarii præjudicium , subditorumque studium suffragarentur : at jam quæsitus nuper est principatus per injurias nepotis pupilli: nunc verò etiam principis cæde. Ita per calcata , non honesti modò , sed & sanguinis jura , ad Dominationem properari cæptum est. Troynatus certè scelere avi trucidati, & occupatæ armis reipublicæ , posteris notior, quàm rebus gestis ; brevem Dominationem prope ratâ cæde non verso anno absolvit ; eodem dejectus passu, quo ascenderat. Quâ crudelitate in Christianos futurus erat , si superi

superi vitam commodassent, satis argumenti dedit, cum principatus inaugurationem à Mazoviæ vastitate orsus est. Ex-<sup>An. 1264.</sup>sti Czervinscum usque pagi: Orszymovium arx excisa: adulti ferro, igne pueri absumpti: fæminæ ad servitutem servatæ, aliæque à feroce victore in victos calamitates. Livoniam quoque ab eo vastatam, circa Parnaviam, Livones narrant. *Suspecta tamen omnia domi erant Tyranno: nec ex vano timebat, scelera in alios patrata, in se reditura. Quales enim in se eos speraret: quos exemplis suis fidem dedocuisset?* Ad stabiliendas itaque in omnem spem contra quosvis æmulos res, Polociâ Theophilum consobrinum evocavit. Hic ubi venit, post mutuam utrinque de sublato communi hoste gratulationem, in speciem quidem consilia de Republica cum Troynato communicare: clam verò nova in eundem cum suis moliri. Ambitione propriâ satis inquietus, Russorum adhortationibus validè agitabatur. *Illerè Litvaniam sacris Christianis nuper initiatam, impio Ethnici Principis jugo premi pateretur?* Cur  
non

*Theophilus  
contra  
Troynatum  
conspirat.*

*non cederet Russorum studiis ? cur sperneret beneficium Volstinici legitimi Litvanorum Principis, jus omne Principatus integrè sibi transcribentis ?* Volstinicius enim parentis sui Mendogi à Religione Christiana defectionem detestatus, ad Russos (ubi obses olim aliquandiu egit) profugerat. Ibi multa rerum vicissitudine, animo ad humana hæc contemnenda inclinato, rigidioris instituti vitam professus sub Gregorii Polonini disciplina, Haliciæ vixit. Inde seu aliâ causâ, seu parentis Regis, populariumque suorum ad Christiana sacra traducendorum spe, rursus in Litvaniam transiit; atque haud procul Novogrodeco ad ripam Nemeni monasterio extructo, cum pluribus ejusdem vitæ sociis religiosè: atque inter multas procerum sollicitationes, constanter agere cæperat. Ad nuncium, Patris fratrumque à Troynato cæsorum, ne eadem ipse clade involveretur, Pinscum evasit. *Pulsabat vindictæ cupido animum, brevi exercitio nondum ad humanos affectus satis obduratum.* Sed omnibus præfidiis in eo vitæ genere destituto, nulla ferè

ferè ulciscendi per se ratio suppetebat. *Theophilum igitur sollicitare : ei tanquam Christiano Principi , paternum in Litvaniam jus transferre : orare ne tot Troynati scelera , inulta pateretur : ut Mendogo parenti suo, occisoris sanguine inferias daret.* Nondum omninè aut Theo-

*Theophilo  
sublato  
Troynatus  
etiam occi-  
ditur.*

philus consentiebat, aut consilia maturuerant : conspiratio vix inchoata Polocensis cujusdam , qui Theophilo è domesticis erat , fraude , prodita & à Principe tempestivè oppressa. Theophilus hospitii securitate apud fratrem incautiùs agens , trucidatus est : Polocia immisso exercitu occupata , atque in provinciam Litvaniæ redacta. Firmatam jam tot suorum cædibus dominationem Troynatus putabat , atque potiore æmulo sublato, satis ad cæteros in officio continendos provisum. Verùm *quid Tyrannis inter scelera securum ?* Quatuor prætoriani milites , Mendogo olim fidissimi , securè ad balneum euntem adorti, necdum expleto Principatus anno , confecerunt. Ipsi , seu ne cui patratae cædis pænas luere cogerentur , seu ut ex securo dispicerent,

P

quomo-

*Pericula  
Litvanie.*

quomodo id factum proceres haberet , indeque ulteriora rationum suarum consilia caperent : ad Volstinicum Pinsci agentem profugerunt. Præsens planè rei Litvanæ naufragium, inter subita mala deprehensæ, ab omnibus expectabatur. Inde velut decumano fluctu imminentibus extrinsecus hostibus jactabatur : inde per dissidia domestica laxatis compagibus vitium facere per se cæperat , ac propè solvi. Sollicitos hic metus tenebat proceres ; neque modus , quo obviam discrimini iretur , erat in expedito. *Factionum capita, quæ casorum Principum odia vel amores , velut abditum ignem in flammæ mox erupturum , animo malè tegebant ; nullam pacis spem apud gnaros rerum præferebant. Provincias amplas tanquam truncum capite corpus , atque emortuum absque uno Principe, cadaver , diffuere necesse erat. Non pauci erant qui sanguinis conjunctione , aut veteris juris prætensione ad Principatum aspirabant : horum ambitioni si tota res permitteretur , brevi esset futurum , ut Republicâ carerent : aut enim civilibus armis discerpta miserè interiret ; aut ei in spoliis cede-*

cederet, qui plus potentia, quàm virtutis aut dignitatis, in dimicationem attulisset. Crescebat malum: neque remedium à tempore sperari poterat. *Vnica inter tot precipitia, ad concordiam & salutem publicam via ostendebatur; ambitiosa diverforum studia maturè extinguere,* Comitia ad eligendum novum Principem indicta. eo Principe renunciato, quem communibus suffragiis Senatus jussisset. Kiernoviam itaque indicta comitia, & magnâ procerum frequentiâ celebrata. Litvani omnes in Volstinicum sententiis suis inclinabant. Id verò Samogitæ & Iatvingi ne audire quidem; sub cujusvis potiùs imperium concessuri, quàm Volstinici: causæ in speciem aliunde petebantur, in re erant, suspicio & metus: ne Volstinicus, Princeps renunciatus, non tam imperium administraret, quàm ultionem Mendogi parentis: ad cujus cædem Samogitæ & Iatvingi, operam suam Troynatò nupèr commodaverant. Ingens totis comitiis utrinque tumultus, ac propè mutua vis. Novogrodenfes, alique juris Litvani, sed Ruslicarum familiarum proceres, *Reipublicæ causâ,*

*neutrarum se partium esse testabantur ; illi Principi cum obsequio accessuros , quem utriusque gentis concordia dedisset . Si tamen pacis ineunda rationem optimam , apud Senatum liberè proferre fraudi sibi futurum non esset : securè auctores fore , ut externum aliquem Principem , qui liberum ab omni factione animum ad imperium adferret , suis votis quærerent . Esse Regi Russia Danieli filium , imperio maturum adolescentem : esse etiam in proximo , ejusdem ex sorore nepotem Ducem Luceorientem ac Drohicensē Suarmirum , rei bellica gnarum & studiosum , expeditionum Litvanarum contra Polonos , Mendogo comitem . Neque Samogitæ aut Latvingi consilium improbabant : soli Litvani summâ contentione obnitebantur . Non dubitare se , ajebant , quòd Russi procures , de Republica ex fide agerent : ab eo enim tempore , quo Novogrodecum cum aliis Russia provincijs Litvanie adjectum est , non imperio tantum sed voluntate etiam ac studiis ad Litvanos transfusse , ac sibi permixtos sub iisdem legibus & Principe , pro unius gentis civibus se gerere : Etsi verò non privatis rationibus ad id consilii descendissent ; consilium tamen illorum pro solis Russis & contra Rem-  
publi-*



publicam communem, apertè esse. Quid enim Kijovienses, Halicienses, alique, illato toties contra fœdera repentè bello, magnis viribus in Litvaniam tentassent? quid aliud Litvani hætenus, omni ope propulsare essent conati? quàm hoc ipsum, quod nunc per otium tam speciosè à Novogrodensibus proceribus suaderetur; tam securè à Samogitis admitteretur? nempe Russi Principis in Litvaniam & Samogitiâ imperium. Certè ab eo tempore, quo Ringoldus Dux Novogrodensis gente Litvanus ac Palamoniades, titulos Magni Ducis Litvanie invasisset, & curiam Kiernoviam Novogrodecum transtulisset, Litvaniam non tam principatum, quàm Novogrodensis Ducis provinciam esse. Quid verò futurum crederetur; si Russus Princeps imperaret? Quidquid proinde Samogita & Iatvingi censerent, sibi certum omninò esse, non ferre Principem ex ea gente, quam majores sui armis quasitam Litvania subiectam reliquissent. Servaturos se omni studio majorum hereditatem, Litvanum Russia imperantem: Suarmirum Russum amicum & socium habere se malle, quàm Principem. Posse quidem Russum aquâ conditione fœdera cum Litvanis colere: at ubi jus & dominationem in eos obtinisset,

nuiſſet , facile genium patriæ ſtudiis innutritum ,  
rediturum. Nullum difficilius altiusque, quàm pa-  
tria amorem habere. Perfregit ea res Samogi-  
tarum atque Iatvingorum mentes , & in  
Volſtinicum vel invitas inclinavit : ex quo-  
rum concordia Ruſſorum deinceps conſi-  
lia ſuapte conciderunt , præſertim quòd  
vehementiùs illa promoverè , non omnino  
ſecurum eſſet , ſuſpicionem novandarum  
rerum vitantibus. Plenis itaque comitiis  
Dux eſt reſignatus Volſtinicus. Miſſi Pin-  
ſcum legati, qui Volſtinico Monacho, pro-  
cerum & populi ſtudia , prolixè explica-  
rent , atque ad paterni principatus hæredi-  
tatem capeſſendam invitarent. Volſtinicus  
preces legatorum , quòd ſuſceptæ ſemel  
vitæ rationibus adverſarentur , conſtanter  
initio repulit. Sed cùm urgerent illi ſoli-  
citè , & perituræ diſcordiis patriæ commi-  
ſerationem ſæpiùs ob oculos producerent,  
non ſuffecit propoſito conſtantia , ceſſit-  
que legatis. Cùm Novogrodecum Pinſco  
perveniret , comitatus aulicus è circumja-  
cente nobilitate adlectus eſt : inde matu-  
rato

*Volſtinicum  
Monachus  
M. Dux  
Litvan.  
Samogit.  
Novogrod.  
renunciavit.*

rato Kiernoviam itinere, antequam proceres abiissent, venit : exceptus multâ honoris atque gaudii significatione, & solitis ritibus Magnus Litvaniæ Dux inauguratus est. Adduci deinceps nunquam potuit, ut omnem vitæ privatim actæ memoriam abjiceret, supra purpuram, monasticæ professionis argumentum, vestem nigram deferre solitus. Verùm *quia ultra vestem, Philosophia ipsius non processerat; atque adeo, ex ea vita Christiana parte, nihil omnino in mentem transmiserat : cum vili illa lacerâ, animum cruentum atque vindictæ cupidum, ad Principatum attulit.* Vix rebus satis firmatis, impatiens moræ ferocia in novæ potentiæ fundamenta cædis paternæ ultionem jecit. Procerum plurimi criminationibus variis, aut apertâ vi,  
*Volstinici mores, & bella.*  
 oppressi : cæteri ejusdem quidam causæ conscientiam Principis suspicionibus & odio obnoxii; sed sociorum casu cautiores facti, maturo exilio iram ipsius præverterunt : bona profugorum ærario Principis addicta. Cum Suarmiro, veterem parentis amico, fædera Volstinicus impensè coluit,  
 quod

quoddam Litvanis copiis ad Polonicas expeditiones transeuntibus, ditiones ejus peropportunæ essent. Auspiciam amicitiae fuit, junctis viribus suscepta in Poloniam incurfio, quâ Sendomiria; Ilzam usque vastata est: ab alia etiam parte continuis Latvingorum prædationibus Lublinenses agri & tota Mazovia infestabatur. Boleslaus Pudicus inter Polonos Cracoviæ & Sendomiriæ tunc rerum potiebatur; vir bello impiger neque infortunatus: sed nunquam hostem intra fines suos occupare poterat. Latvingi enim prædatorum instituto, repentinè irruebant, miraue celeritate agris pervastatis, antequam ab incolis ad arma concurreretur, cum præda in sylvas se recipiebant. Consilium ex necessitate natum, fugitivum hostem, domi suæ totâ vi adoriri. Bellum itaque omne in ipsam Iatwizyam Polonus transferre statuit: & fanè opportuna tunc satis debellando Iatwizya erat, cum Litvani domesticis motibus distracti, auxilio sociis in tempore adesse non possent. Univerfam nobilitatem Polonam

*Iatwizyi  
sen Iazyges  
Litvanorum  
socii à  
Polonis ex-  
scinduntur.*

nam Boleslaus ad arma evocatam sub Zavichuosto recensuit : inde exercitum totum sub signo continuò duxit , neque permisit comeatus aut prædæ causâ ordinibus quenquam excedere. Sciebat enim hostem suo ingenio pugnacissimum, neque unquam aut referre pedem , aut pugnam quovis loco , etiam iniquo , detrectare , solitum ; Polono nunc primum intrare Iatwiezyæ fines auso , non diu ocium à prælio permitturum. Et certè , cùm vix sensisse adventum Polonorum Iatvingi putarentur, repentè Boleslao sub ipsam auroram ab excubiis nunciatur , ingentes hostium copias citato agmine advolare , atque recta in castra Polona ferri. Ducebat eum exercitum præfectus militiæ Comatus : tanta verò erat ferocia militi , ut eodem impetu quo venerat ; ab itinere in vallum Polonum , contemptim rueret. Eductæ à Boleslao properè in campum copiæ , atque quantum subita vis ferebat, vix explicandi ordines spatium erat : & quia statim pro vallo ad manum planè res venerat , cæco

Q

omnino,

omnino , diuque dubio Marte , in multas horas , totâ vi prælium gladiis agebatur. Primus Polonis ad victoriâ passus fuit, cædes Comati : is enim cum inter primos prælium voce & manu urgens, Ducis simul militisque officium fortiter exequeretur, factò à pluribus simul imperu , confossus interiit. Ita *sapè viri unius fato, bellorum fortuna agitur.* Nox inde jam cæteri faciliùs vinci, & acies in cladem , non tamen in fugam, inclinare. Nemo enim loco cedere : sed tantùm cadentibus multis, ordines fatiscere ; & viam ad victoriâ aperire. Quare ut campum integrè obtineret Polonus, internecone omnes delendi erant. Iatvingi: cùm quisque aut è vestigio quod semel ceperat , quoad concideret à vulneribus, depugnaret ; aut in locum jacentis comilitonis, inter confertos Polonos gradum obstinatè promoveret. Itaque unico eo prælio prorsus debellatum est. Proceribus atque omni equestri ordine , acie deletis , universum Iatvingorum nomen excisum: agrestes coloni , pars in proximam Litvaniem

*Iatvingorum in bello singularis fortitudo.*

niam diffugerunt ; pars ad sacra Christiana à victore compulsi , ditioni Polonæ accefferunt. Subsylvania nunc ea regio dicitur : coloniis Polonicis , Russicis , Litvanisque frequens ; prout aliqua sui parte propior illis gentibus est. Eodem anno Litvani & Samogitæ Sambienfibus Prussis auxilia tulerunt. E Vellavia oppido , Pregeli ripis imminente , Equites Crucigeri proximos Sambiæ agros obtrinebant : remotiores , frequenti excursionem , infestos reddiderant. Ad ejus oppidi oppugnationem copiæ admotæ , pulsati muri arietibus. Sed vim omnem fortitudo præfidiariorum , & industria machinarum Magistri, Henrici Tupodel , eludebat : frustra proinde id incæptum Litvanis fuit : præcipuis belli ducibus amissis , re infecta ab oppugnatione desitum est. Ductus deinde exercitus in Lubavienses agros , ubi hostem aperto campo , cum copiis confedis , nunciabatur. Pugnatum ibi prælio acriter , victoremque Litvanum evasisse auctor est Dursbuch. Addit idem , magnam eâ victoriâ

Q<sup>2</sup>

stragem

*Litvani  
Prussis auxilia  
ferunt.*

stragem editam : Helmericum Magistrum, Theodoricum magnum Prussiæ Marschalcum , cum quadraginta ejus ordinis fratribus cæsos : quorum animi , lampadum ardentium instar in sublime abeuntes , ab aliquibus de nocte sunt visi. Atque ut hic successus aliquantùm recreaverat Volstinicum , ita accepta nuper à Polonis plaga altè infederat. Provincia amissa ; gens cujus forti operâ tot bellis Litvani usi essent excisa ; ultionis cupiditate animi quietem stimulabant. Collata igitur cum Suarmiro ope ingentibus copiis expeditionem in Sendomirienses agros suscipit. Effusæ ad prædam legiones per universam Sendomiriam latissimè ferro ac igne grassabantur. In subita trepidatione autoritas Boleslai expectari non poterat : privato seu consilio seu tumultu , armata equitum Polonorum & plebis promiscuæ multitudo confluxerat : hæc contra palantes hostium manipulos progreditur ; atque ut Litvanas Russasque cohortes effusim per agros prædam agentes , priusquam in unum coirent, separa-

*Sendomiriam invadunt & fugantur.  
An. 1265.*



separatim adepta est; cædit. Inde ad castra oppugnanda victor exercitus signa vertit: sed Volstinicus & Suarmirus amissis inter prædationem præcipuis legionibus, cum reliquo milite vim in castris expectare non ausi, maturè in tutiora se receperant loca. Boleslaus ad nuncium rei benè gestæ animo erectior, justam in Suarmirum indignationem ulteriùs proseguì statuit. Favere videbatur suscipiendis consiliis præfens Ruffiæ status, mortuo Daniele Rege Ducum ambitione ac discordiis plenus turbarum. Habito itaque per eam partem Poloniae, quæ sibi parebat, delectu: confectisque inde validis copiis, Petrum Palatinum Cracoviensem Ducem præficit, atque infestis signis Suarmiri ditiones invadere imperat. Petrus dierum aliquot itinere per hostiles agros progressus, obvia ferè tantum totis simul legionibus proterebat: nam quòd hostem in omnia intentum fraudibusque militaribus probatum haberet, non permittebat laxatis vastationibus cohortes à castris divelli, ne qua rei gerendæ

*An. 1266.  
Suarmirum  
juvant contra  
Polonos,  
& cadunt.*

Q<sub>3</sub>

occafio

occasio Russo daretur. Suarmirus ubi Polonum, neque contemptim palantem per agros, neque castris temerè locum capientem, ad insidias nancisci potuisset, castra aperto campo opposuit. Nihil primo die utrinque tentatum : postero (qui D. D. Gervasio & Protasio sacer erat) uterque exercitus ad pugnam eductus : cùm exstructæ acies intra teli jactum constitissent prælium missilibus inchoatum. Erat expeditus Suarmiro è Russis, Litvanis, ac Scythis miles, qui strenuè rem arcu & sagittis agebat : quare Petrus equites suos tota vi coortos, arcuum usum hosti adimere, atque ad hastas & gladios prælium deducere imperat. Tanto impetu in hostem itum est, ut impressionem factam repentè senserint, neque tulerint Russi : mox inclinari acies, & turbari. Suarmirus, cùm semel iterumque pugnam restituere tentasset, re desperatâ, ipse quoque frenum fugæ permisit : Ducis exemplo toto campo effunditur exercitus, cædes deinde fugientium non pugna subsecuta. Victor Polonus castris direptis,

direptis , lectisque spoliis universam deinde regionem securè igni ac ferro pervagatus est. Attrivit ea clades vehementer Suarmiri opes: imò totam exinde Russiam Boleslai fortunæ metus , in plures annos quietam tenuit. Litvani tamen nihilo quietiores ex sociorum consternatione: eodem ipso anno subita excursione Mazoviam latè populantur: neque Conrado & Boleslao Ducibus ad resistendum animus, aut vires: arcium tantùm præsidio suam & reliquæ nobilitatis fortunam tuebantur. At Volstinicus quodd Polonicis Mazoviticisque expeditionibus nihil ultra prædam per tanta intervalla quæri videret ; eò potiùs curam advertit , unde ditiones augeri poterant, & fines proferri. In Russiam itaque inter intestina odia & factiones , externorum injuriis opportunam , arma transtulit: & jam detractis aliquot arcibus , Volodimiræ totique Voliniæ imminebat. Leo Dux Volodimirienfis à morte parentis Regis Danielis , nec dum pacatis per Russiam rebus , non satis ad vim tanti hostis validus,

*Mazovia  
vastatur à  
Litvanis.*

*Volstinicus  
in bello contra  
Russos  
amicitiæ  
specie circumventus;  
occiditur.*

duſ, dolo & ſcelere bellum omne à ſe aver-  
tit. *Præſeferebat ille nihil negaturum ſe Volſtinico,*  
*juſ quamquam dubium in Volyniam urgenti: ſed*  
*poſitis armis, negotium iſtud faciliùs poſſe transigi*  
*contendebat. Permitteretur modò res, arbitrio pro-*  
*cerum utriuſque gentis; quidquid illi ratum habuiſ-*  
*ſent; ſe in quaſcunque conditiones, pacis publicæ*  
*ſtudio, libenter conceſſurum.* Succellit perſona  
homini callido. Tantùm enim ea animi  
promptitudine, Suarmiro præcipuè adni-  
tente, apud Litvanum profecit; ut is exer-  
citus omnem dimiſerit, atque ad condi-  
ctum diem, cum exiguis copiis, ac propè  
ſolo aulico comitatu, Vrouſcum venerit.  
Leo qui alia omnia, quàm quæ promiſerat,  
animo deſtinaverat; Volodimiræ hæſit:  
Suarmirum autem fratrem, & patrum  
Haliciæ Ducem Baſilium, doli omnis igna-  
ros Vrouſcum dimiſit; Volſtinicum ut Vo-  
lodimiriam invitarent. *Commodiùs, ajebat,*  
*poſſe tot Duces, cum ſuo comitatu in ea*  
*urbe convenire, & ipſo hoſpitii jure amicitiam*  
*conſtantiùs ſtabiliri. Suspecta erat Volſtinico*  
*condictæ diei extractio, & inſolita in hoſte*  
*humani-*

*humanitas* : sed quòd in Basilio & Suarmiro , cum quibus ante semper amicissimè egerat , nihil fraudis subesse certus esset , fidei eorum & precibus se permisit. Volodimiræ , à Leone & Romano Principibus , humanissimè acceptus , benevolentiae ipsius aestimatione ; reliquum suspicionum , quæ præfagæ menti identidem sese ingerbant , excussit. Postero ab adventu die , princeps Senatûs Russi , Markoltus Niemcin , convivium Ducibus & Proceribus magnificum dedit : læta omnia atque officiorum plena. Iam Volstinicus , sub noctem è convivio digressus , in monasterio D. Michaelis , qui locus hospitio erat , dimisso omni comitatu , cum paucis cubiculo præfectis , ad quietem securè componebatur. Supervenit interea Leo , Volstinicum familiariter inclamat ; ad ulteriora pocula amicè invitat. Litvanus officii causâ , ex interiore cubiculo inermis , ac penè discinctus , Russo occurrit : sed jam mutatam personatæ amicitiae scenam , reperit. Circumsistunt repente satellites. Dux

R

ebrie-

ebrietate , & destinati sceleris conscientia ,  
 amens ; crudelitatem Mendogi parentis in  
 Russiam, cupiditatem ipsius Volstinici, quâ  
 in sui patrimonii arces nuper involasset, ex-  
 probrat : tum subitâ periculi imagine atto-  
 niti , ac vix dum quid rerum ageretur cre-  
 dentis , caput valido gladii ictu medium  
 discindit. Reliqui comites , quos è proximo  
 tumultus auditus ad arma exciverat ,  
 trucidati , bona direpta , procures Litvani  
 ex hospitiiis extracti , atque in carceres de-  
 trusi. Cognitum reliquis Ducibus, ac præ-  
 fertim Basilio & Suarmiro scelus , magnam  
 indignationem movit : jus hospitii scelere  
 violatum , fidem suam proditam , Russici  
 nominis indignam labem , quisque pro se,  
 querebantur. Verùm tota ea indignatio,  
 ultra querelas & verba progressa non est:  
 quanquam ut se ab ejus sceleris societate,  
 quàm alienissimos palàm testarentur : ma-  
 gnifico deinde apparatu, regiisque sumpti-  
 bus occisi corpus ad funus extulerint.

## LIBER V,

*De rebus Litvanorum obtinente rursus Principatum familiâ Iuliani Dorsprungi.*

**V**Niverſa Palæmoniâ gente per Litvaniam, continuis funeribus exhaustâ, ſolus ex ea ſuperfuerat Volſtinicus. Quare ab ejus morte, reſtitutus eſt Principatus Iuliani Dorsprungi poſteris, ipſâ quadam Litvanæ fortunæ neceſſitate. Vivebat enim adhuc Suintorogus Vtenides, annorum nonaginta ſex vetulus. Puer ille olim è parentis teſtamento ceſſerat Ringoldi patrui curæ, ab eodem paterno principatu, per tutelæ ſpeciem, exutus. Adultus deinde acceperat à Ringoldo præfecturam Samogitiæ. ex eo ille loco, alienam fortunam tantum ſpectare, neque ſuam vicem indignari. Inter varias Principum factiones & cædes, ipſe ſolus ut jure principatui proximus, ita quietiore ingenio ab omni ambitione remotiſſimus, extra invidiam & ſuſpicionem agebat: cujus *humilem fortunam,*

*Suintorogus  
Vtenides  
M. Lit.  
Dux.*

R 2 non

*non ambitioso animo junctam, prouius erat partibus, contemnere, quam subvereri. Augebat securitatem, quod nullam ferè Reip. partem attingeret: hinc vacuam curis & periculis vitam, diutius produxit. In hunc igitur, quanquam magno jam natu senem, Proceres animo inclinari; eum votis designare: præcipuè quod familiam filio, nepotibus, & pronepote adulto, firmam haberet. Atque, ut inter aduersa superstitiosiores hominibus mentes sunt, religioni jam ducere, si eum negligerent, cui ad imperium jus potissimum esset. Quis sciret, num intestina, quibus flagraret Respublica, odia, & frequentata Principum cades, non à Superis immitterentur, in vindictam erepti per injuriam Suitorogo Principatus. Consultum etiam Reip. fore, si post tot civiles motus, atrocesque jactationes, in ejus Principis humeros ad respirandum reclinaretur: cui affectus, & natura moderatio & annorum gravitas composuissent. Sensisse satis jam Principes eos, quibus cupiditates per aetatem necdum deferbuissent. Maturatum itaque est cum comitiis Kiernoviam: ne diuturnitate interregni, factiones & ambitio, vires cum tempore sumerent:*



rent : sed neque inter ipsa comitia sententis multum variatum est. Omnium consensu M. Lit. Dux renunciatus Suintorogus ; nequicquam decrepitam senectutem obtendens, communibus studiis cessit. Exiguo illo , annorum aliquot , quo cum imperio præfuit, tempore, domi quietas perpetuò habuit res. A Prussia initio non exiguum impendere discrimen nunciabatur.

Ottocarus Bohemiæ Rex, cum ingentibus <sup>Prussorum</sup> è Bohemiâ , Silesiâ & Germaniâ copiis , in <sup>populi à</sup> Prussiam venerat ; eo consilio , ut bellum <sup>Crucigeris,</sup> omne, quod jam cum Prussis Equites Crucigeri propè confecerant , magnâ vi in Samogitiam transferret. Sed per tempestuosam hyemem , exundantes fluvii & lacus, itinera omninò præcluserant. Ita ea expeditio frustra Bohemo suscepta fuit. Prussorum tamen nomen universum , paucis exceptis populis, ad officium reductum. Nadrovitæ acie victi , non è pugnae modò loco , sed ædibus etiam & agris natalibus profugerunt. exilium servituti prælatum est : *tanta vel in agresti populo libertatis aestimatio.*

R 3

quan-

quanquam vix exilium dici potuerit , in Litvaniam , ejusdem originis gentem, cum re familiari & liberis commigratio. Eandem fortunam experti Skalovitarum primores, Surbanta, Suisdeta, & Surdeta, desperatis rebus opes & populum , in ulte-

*An. 1269.* riorem Litvaniam transportarunt. Enatum

interim erat turbarum aliquid per Poloniam. Inter equestrem Ordinem & Zemi-

*Cujavia à  
Litvanis  
vastata.*

flaum Principem, qui Cujaviæ ac Lenciciæ imperitabat , similtates exortæ , pænè ad vim processerant. Cognita ea discordia

Litvanis , promptissimum quemque juvenum ad prædam evocavit. Collectus expeditè exercitus , Cujaviam vastationi de-

stinat: itum est ed per Mazoviæ & Prussiæ confinia : vastati impunè agri : ingens om-

nino pecorum atque captivorum copia prosperè abducta. Neque Samogitis ab

alterâ parte ocium. Reliquiarum Prussicarum atrox fortuna, atque inde commiseratio ; & si illæ funditus excinderentur, propinqui nimis futuri hostis metus , bellum

*Samogitiæ  
Prussiarum  
reliquias  
bello tuerantur.*

accendebant. Poiezanos inprimis omni

ope

ope tuendos, Samogitæ fuscipiunt. Neque deerat primis conatibus successus : casa aliquot locis Crucigerorum præsidia, Poiezanianæ Commendator , ut vocant , & Helvicus à Goltbach Contor Christburgensis, capti. Crescenti malo majore irâ & totâ vi , Conradus à Triburg Prussiæ Magister obviam ire ; omnibus simul copiis, Poiezanorum agros vastare : incolas , igni ac ferro affligere. Debellatæ opes populi ; non tamen animorum pertinacia fracta : ne victi hostile jugum in servitute ferrent, patriâ omnes excefferunt. Accepti benignè à Litvanis focii populi , & per Grødneses agros descripti : primæ verò eorum sedes, tunc ex hostili populatione desertæ , nunc etiam inter profundas sylvas raros habent habitatores. Sola jam è Prussis supererat Sudovia , bello à Crucigeris necdum tentata : hæc, post subactos reliquos populares , in dies infesta Crucigerorum signa affutura prospectabat : quare averfuri à finibus suis bellum , hostilium agrorum infestatione domi suæ hostem distinere statuit.

*An. 1270.*

In

In Culmenſes agros prima excuſſio facta : & quia non tam prædæ cupiditas , quàm merus in audaciam verſus , militem armaverat , magna ſtrages , delectu nullo , latè edebatur. Miſſus à Magiſtro qui hoſtiles conatus reprimeret Hermanus Schonenburgi vir per multa prælia fortitudine & prudentiâ probatus , exiguis copiis rem ex voto confecit : excuſſiones ſtitit ; & hoſtem in cumulo adeptus , cecidit. Sudovitæ , primo hoc eventu , de victoriâ , non de ſpè aut odiis deturbati , majore deinde irâ & vi , bellum aggrediuntur : auxilia à Litvanis & Samogitis conquirunt. Stumanus tum pro Principe , Samogitiæ præerat : hic ( privatone erga Sudovitas ſtudio , an principis nutu , non reperio ) cum aliquot Litvanorum legionibus & quatuor Samogitarum millibus , bellum pro ſociis contra Crucigeros exeunte jam æſtate ſuſcepit. Repentinâ in primis vaſtatione , Culmigeriam igne , proximas provincias terrore implet. deinde cum diſtractus hoſtis , non ſatis certus eſſet , unde potius ancipitem illam

*Stumanus  
Samogitiæ  
Gubernator  
Pruſſiam  
vaſtat.*

lam tempestatem propulsaret , Stumanus exercitum Plovisto arci improvise applicuit , pertinax oppugnatio brevi ad deditionem præfidiarios compulit. Litvanus enim veritus , ne si gravioribus propositis conditionibus supplices rejecisset , ex diuturniore circa eundem locum morâ , periculi aliquid, aut certè agendis rebus impediementi enasceretur : omnia in integro reliquit ; duos tantùm obsidum vice pactus, qui viarum peritissimi forent. Horum deinde ductu , occultis per Christianorum agros itineribus , quâ minimè timebatur, repentinus erumpebat : ita Lipanoviæ, Radini , & Veishausi suburbana ædificia exusta : Turnicia, Graudentum, Marienverderum, Satirinum, Christburgum, aliaque regionis ejus oppida, & arces funditus dirutæ : ex præda denique & captivorum multitudine clades æstimatione major illata.

In Livonia quoque per proximam hyemem res prosperè gestæ : vastatis latè in continente agris, per insulas Livonici sinus prædationes tentatæ.

*Livonia à  
Litvanis  
vexata.*

S

non

non securos modò aditus , per adstrictas solidâ glacie aquas ; sed etiam commodum pugnae campum in tanta planitie, intraverat. Inter Oziliam, quæ septem miliaribus à Livonicâ ripâ, avulsa est insula, in glacie exercitus concurrisse scriptores memorant. Hæc dissimulatione fortè magis & tacitis auspiciis, quàm mandato Suintorogi extragerebantur : ad bella enim illi , & natura, solitò mitior , ingenium non dederat , & ætas jam deerat. Domi, ut quietas semper habuit res , ita relinquere voluit : maturè itaque habito Senatusconsulto , filium Giermondum , jam ferè sexagenarium successorem sibi destinavit. Neque multum deinde superstes egit. Novogrodeci eodem ipso anno , morbonè an solis annis deficientem vitam, spiritus destituit.

*Giermondus M. D.  
Livanie.*

Giermondus Suintorogo solitis ritibus suffectus , primos sui principatus menses rebus domi componendis exegit. Ante omnia parenti defuncto ut præscripserat ipse , iusta legitimè persolvit. Cum enim viveret Suintorogus , fortè inter venationes in-

nes inciderat in locum peramænum , quo Vilna amnis planitiem altis montibus subiectam , & pineto hinc inde confitam decurrens , Viliæ illabitur. Amænitas situs , cùm ad primum conspectum senis animum occupasset , petiit à Giermondo , ne alibi pro defuncti exuviis , aut rogo ; aut sepulchro , aream quæreret ; utque is campus cremandis Principibus , humandisque eorum cineribus , facer perpetuè in posterum esset. Executus est universa Giermundus ex fide : campum latè excisis arboribus perpuratum , ipse ritè dedicavit : relictus in proximo lucus , Fulminis vulgò Perku-ni , tempestatum præsidis Numini ; ut religionibus ipsis locus deinceps frequentior populo fieret : erecta præterea sacerdotia , copiosis redditibus attributis. Officium sacerdotum erat , ad præscriptos ritus , ignem perpetuum quercu & pinu alere : qui si aliquo casu fortè extingueretur , neglectæ aut non ritè procuratæ religiones ipsius sacerdotis exustione expiabantur. Locus is Suintoroha ( id est , Sancta area , ) dictus ,

S 2

&amp; no-

& nomen & ritus illos profanos ad Iage-  
lonis usque principatum retinuit. His ita  
ordine peractis, Principis defuncti corpus,  
militari habitu à proceribus ad rogam elat-  
um est : editiore pyræ loco, haud longè à  
Principe, locata arma, quibus à tyrocinio  
usque militari usus fuerat, gladius, hasta,  
pharetra cum arcu & sagittis : inferiore  
loco falcones, paria bina canum venatico-  
rum, servus & equus, qui viventi maximè  
in deliciis : hæc universa, cum subjectus  
ignis corripuisset; tum sublatâ simul com-  
ploratione, proceres urforum & panthera-  
rum resectos ungues, extremi obsequii vi-  
ce in flammâ jactare. Nam de altera vita,  
quam habituri à morte essent mortales,  
redituque animarum ad sua corpora, cum  
DEUS quispiam, illis ignotus, ad jus dicen-  
dum in altissimum montem universum  
mortale genus, evocaturus è tumulis esset,  
apud veteres illos Litvanos, rerum Divi-  
narum penitus rudes, quanquam barbarè  
& superstitiosè, tamen aliquid credebatur.  
Existimabant igitur mortuos olim ungui-  
bus

*Superstitio  
vetus Lit-  
vanorum,  
in creman-  
dis corpori-  
bus defun-  
ctorum.*



bus illis opus habituros , cùm præruptus ,  
 altusque mons , per difficiles aditus , singu-  
 lis superandus esset. Curatis ita sacris ,  
 præscriptisque ceremoniis , quibus dein-  
 cept Principum vitâ functorum corpora  
 eodem loco cremarentur , ad rem civilem  
 curas advertit. Domi omnia erant secura : *Fædus cum*  
 sed neque ab hostibus multum periculi ; *Polono &*  
 quanquam non parum suspicionum : *Crucigeris,*  
 Livones & Prussos *bellum con-*  
 Crucigeros , Polonos et- *tra Russos.*  
 iam , tot prædationibus nuper vexatos , non  
 putabatur quieturos. Hos , non tam pacis  
 studio , quàm ut totis viribus simul Rus-  
 sum aggrederetur , oblati fæderibus ad  
 amicitiam Giermondus pertraxit. Leonem  
 enim solum sibi maximè ad bellum desti-  
 nabat , occisi ab eo inter hospitales mensas  
 ante aliquot annos Ducis Litvaniæ , me-  
 mor. Vix ferebat indignationem , quòd  
 tanta Litvani nominis injuria , ob parentis  
 sui ignaviam , hæcenus inulta & secura ,  
 Russo stetisset. Proximo igitur anno , ma-  
 gnis copiis Volyniam invasit : vastata atro-  
 citer quaquaversus provincia est ; & præda  
 S 3 omnis,

*Volynia va-*  
*stata à Lit-*  
*vanis.*

omnis, absque prælio, in Litvaniam abducta. Reversus ab ea expeditione, pacis artibus intendere cæperat, & Colonias per agros describere: quo tempore Giervatis oppido fundamenta jacta. Verum & domesticam quietem, & firmatas fædere cum Polonis amicitias, factiosa quorundam consilia interturbarunt. Paulus Cracoviensis Pontifex, ut privatas offensas de Boleslao Pudico ulcisceretur, arma Litvanorum occultè per intervalla, in agros Polonos, evocabat. Exortis fortè inter Boleslaum & ordinem equestrem dissidiis, res ad secessionem & arma deducta erat: factioni princeps, Vladislaus Dux Opoliensium, absens lectus: fugatâ deinde, ac cæsa rebellis nobilitatè, partes Boleslai insigniter creverant. Tum verò *Pauli animus pridem Principi iniquus, fortunam ejus magis non ferre: sed, & metuere, & odisse; & quod ipse sibi, suoque odio, ad vim non sufficeret, alienis armis, suis fraudibus, eam vexare.* Litvanæ copix sedibus suis excitæ, Lublinenses agros infestis excursionibus securè populabantur: quodd eque-

stris

stris ordo victoriâ Principis ad Bugicinum  
 attritus, resistere aut non posset, aut non  
 posse se fingeret, ut suis damnis, invidiam  
 Principis augeret. Neque tamen omnino  
 inultum Litvanis istud violatorum fæde-  
 rum flagitium abiit. sub idem tempus, Sub-  
 sylvana eorum ditio, à Mazoviis & Cuj-  
 viis vastata est. Per Prussiam quoque præ-  
 dæ actæ: sed Prussorum res, secundis ali-  
 quot contra Crucigeros expeditionibus  
 rursus non leviter firmatæ, levia prædatio-  
 num damna vix sentiebant: præsertim quod  
 Litvana & Samogitica auxilia, in gravio-  
 res impetus præsto essent. Vix igitur bel-  
 lum illud à Crucigeris aliter confici posse  
 videbatur, quàm si & totæ simul vires ad-  
 moverentur, & externa præsidia consilio  
 aliquo, hosti detraherentur. Henricus, Prus-  
 sicis Equitibus Magister erat: fædus ille  
 inprimis cum Giermundo renovat, ut ju-  
 risjurandi religione, à bello Prussico Lit-  
 vani & Samogitæ excluderentur. Et Prin-  
 ceeps quidem, hac ipsâ de causa, nihil publi-  
 cè passus est Prussis adversus Crucigeros

An. 1274.  
 Samogitæ  
 timentur  
 Prussos &  
 cedunt  
 Crucigeros.

con-

conferri : efficere tamen non potuit , quin privatorum opibus , clam per Samogitiam lectus exercitus , detractis signis per turmas in Prussiam abiret. Vastatâ Culmigeriâ confederant Prussi Sudovienſes , cum Samogiticis præſidiis , ad Lubaviam : ſed venientibus totâ mole Crucigeris , aperta vi concurrere non auſi , tumultuariâ ut videbatur fugâ , caſtris impedimentisque deſertis , in proximas ſylvas ſeſe abdiderunt.

*Stratagemâ  
contra Cruci-  
geros.*

Equites Crucigeri incruentâ victoriâ læti, mox ſolutis ordinibus ad prædam diſcurrere, caſtra diripere, contemptim ad veſtiganda extrema hoſtium agmina effundi, atque prorſus tanquam omni periculo deſuncti agere. Pruſſi & Samogitæ , qui ad captandam inſidiis occaſionem, inter latebras ex fuga non longè à caſtris hæſerant, hoſtem & itinere feſſum , & victoriâ ſecurum, inter prædas cuncta negligenter agere, à ſpeculatoribus edocti, repente inſtructâ acie è ſylvis cooriuntur , atque prædabundos occupant, cædunt. Magna tum clades Crucigeris illata : amiſſus exercitus,

Duces

Duces belli Henricus Magister & Theodoricus Mareschalcus, in acie cæsi. Atrox hujus pugnae eventus evocaverat Christianos Principes ad arma magno apparatu capienda. Rex Bohemiæ, Marchio Brandenburgicus, Lantgravius Turingiæ, Dux Brunsviciorum, cum ingentibus copiis in Prussiam venerant: sed quòd exeunte jam autumno is exercitus fuisset contractus; hyemis verò initia solitò magis tempestuosa, latè per agros pluviis exundassent, ne laceffito quidem Litvano, ab armis discessit. Marchio tamen, ne frustra tantum iter suscepisse videretur, oppidum condidit, quod etiamnum Brandenburgum vocatur. Hoc ipso anno, Livones memorant à Samogitis & Litvanis ad Ofiliam in glacie cum Magistro Livoniæ Ottone pugnatum: & Magistrum, cum quinquaginta Ordinis ejus fratribus cæsum. Pari eventu successor ejus Andreas Vestphalus cum bellum prosequitur à Litvanis profligatus occubuit. Neque multò post in Litvania Giermondus vivere desiit. *Expeditio Christianorum Principum contra Litvanos.*

T novia.

*An. 1275.**Giliginus  
M. Lit.  
Dux Tra-  
bus Samo-  
gitia.*

noviæ comitiis, natu major Giermondi filius Giliginus, Princeps Litvaniæ renunciatus est: fratri ejus Trabo Samogitia attributa, eâ conditione ut Magno Litvaniæ Duci subesset. Magister curiæ, utrumque ad concordiam, & gloriæ quam à Majoribus suis accepissent bello & pace æmulationem, breviter è Reipublicæ voto hortatus, gladium & scipionem Giligino porrexit. Rudis hic inaugurandi tunc mos erat, quo Principi suprema domi forisque potestas à Republica fiebat. Triennium non superavit Giligini principatus: nullâ fermè re memorabilis, præter aliquot Poloniæ vastationes: quanquam neque hæ à singulis scriptoribus omnes memorantur.

*An. 1277.*

Illâ inter alias magis insignis, & ipsis Polonis authoribus comperta, quâ Litvanæ copiæ Mazoviam, Culmigeriam, Cujaviam populatæ, atque iterum in Lencicienses agros excursionem instauratâ ad quadraginta captivorum millia abegisse dicuntur. Vix fidem numerus invenit: ingentis tamen cladis exaggeratum hoc argumentum est.

Annus

Annus sequens Giligino fatalis fuit : fuf-  
 fectus ei filius Romundus, eundem annum  
 Princeps egressus non est. Apud scriptores  
 frequentem famam reperio, quinque filios  
 ex Romundo superstites relictos : propius  
 tamen vero est, quod à paucis traditum;  
 eum absque liberis decessisse. Illi enim qui  
 inter filios ejus censentur, ejus jam ætatis  
 erant, ut Troidenus nātu ultimus vivente  
 adhuc Romundo Imperator, exercitus du-  
 ceret. Ægrè certè persuaderi potest, intra  
 tam breve à morte Suintorogi tempus,  
 (quod vix decennium assequitur) abnepo-  
 tes ejus non adolescere tantum, sed &  
 rempublicam administrare potuisse. Troi-  
 denus, seu filius seu consobrinus Principis,  
 privatis opibus triginta millium exercitum  
 è Litvania & Prussia conscriptum, Giligi-  
 no ipso vivente duxit : & tertiâ copiarum  
 parte Mazoviam depopulatus est, reliquis  
 duabus Culmensem provinciam. Vbi per-  
 tinaci oppugnatione Bergeloviâ potitus,  
 exciso Crucigerorum præsidio arcem pe-  
 nitus delevit. Excedente hostilibus agris

*Romundus  
Magnus  
Litvania  
Dux;  
intra an-  
num mo-  
rui.*

Troideno, cum ingente præda; iisdem pæ-  
 nē vestigiis novus hostis ingressus, rursus  
 igni & ferro omnia infesta reddidit. Sco-  
 mandus Samogitico & Sudavitico milite  
 easdem provincias invasit: Lubaviam &  
 Culmigeriam civitates spoliatas, exussit:  
 Cujaviam latè pervastavit. Neque multò  
 post, iterum exigua è levi Litvanico equi-  
 tatu manus in Lencicienses agros immissa,  
 Lenciciam urbem ex inopinato adoritur,  
 atque primo ferè impetu occupat. Sed  
 quòd ad prædam non ad pugnam venisset,  
 antequam vicini incolæ ad arma concur-  
 rerent, eadem celeritate, spoliatâ urbe, ho-  
 stico excessit. Eodem anno res strènuè in  
 Livonia aperto campo acta. Septimo no-  
 nas Martii magnis animis & pertinciâ pu-  
 gnatum est: hostes eo prælio non victo-  
 riam modò, sed & Duces amiserunt. Cæsi,  
 Magister Livoniæ Ernestus, Gilardus Co-  
 mes, atque ex ipso Crucigerorum ordine  
 sexaginta septem equites.

*Livones ad  
 Dinembur-  
 gum cæsi.  
 An. 1279.*

Eodem prælio, cum Henricus à Tyzen-  
 hauzen Signifer occubisset, Prætorianum  
 signum,



fignum, cum imagine virginis Deiparæ Livonum Patronæ, in potestatem Litvanorum venit. Tentaverat quidem restituere rem Elchardus Revaliensium Præfectus, contractis è fuga reliquiis, hostem aggressus: sed is quoque profligatus accepto vulnere amissoque equo, vix vitam è campo extulit. Belli ejus occasionem dedit, arx Dinemburgum: quam arcem ad Dunæ ripam exstruere Livones molientes, omni ope à suscepto opere deicere contendebant Litvani.

Mortuo deinde Romundo, Trabus Samogitiæ Dux gubernandæ Litvaniæ ad-motus est: Principisne electi, an solo Gu-  
Trabus  
Magnus  
Litvaniæ  
Dux.  
 bernatoris in exiguum tempus titulo? non conveniunt scriptores. Certè ego non video, cur tutelæ nomine Trabum Litvaniæ præficere opus fuerit, si annis & ingenio maturi ad rem civilem Principes, ex superstitibus Romundi filiis præsto erant; nisi fortè metu tubarum, quas ambitio inter fratres excitare facilè poterat, summa rerum avo delata sit: ut si fortè ejus arbitrio

T 3

patri-

patrimonium partiri inter se nollent, contumaces in dissensionem spiritus, supremæ potestatis reverentiâ opprimerentur. Sed enim nihil ejusmodi à Trabo legimus actum, quod tamen maximè fieri oportuisset, si hac solâ de causa, à proceribus ad imperium fuisset evocatus. Certè neglectum ab eo id officii, aut certè ob angustias temporis intermissum, credere non possum: res enim illa tota, non tempore, sed festinatione, indigebat. Trabum igitur omnino Magnum Ducem fuisse, illud etiam pro argumento est, quòd majorum suorum more, media in Litvania coloniam excitavit, de nomine suo, Trabos: Neque plura in principatu egit: vel quòd naturâ quietus esset, annisque gravis; vel quòd antequam aliquid agere potuisset, nondum integrè exacto principatus anno, apparatus animo volventem, mors occupaverit. Leoni tantùm Kijoviensium Duci, in Polonos bellum moventi, auxilia miserat: quanquam eventu infausto. Boleslao Pudio successerat nuper Lescus Niger. Rus-

*Litvani  
auxilia  
Russis fer-  
rentes à Po-  
lonis fun-  
duntur.*

*An. 1280.*

sus (ut *initia principatuum*, *hostibus plerumque ad bella avidè arripiuntur*, quia novandis rebus *opportuna*) novi Polonorum Principis fortunam bello experiri voluit. Iam Lublinensibus agris pervastatis, Sendomirienses populabatur. Exiguæ interea valde Varsio Castellano Cracoviensi copiae in expedito: aggredi tamen hostem, quâ posset ratione, à Lesco iussus, temerario fortassis consilio, sed ad vulgus (*apud quod ex eventu sententiis pondus accedit*) satis forti; validæ hostium aciei, aperto campo sese objecit. Leo quodd paucitatem hostium contemneret, plenus omninò victoriæ fiduciâ, sive ut totam victi hostis laudem ad suos Russos pertraheret, sive alio quovis consilio, primam in acie stationem Russis attribuit, ubi & bellum & victoriam sperabat: Litvanis & Scythis, non tam ad subsidia, quàm ad spectaculum, ut rebatur retrò collocatis. Poloni magna vi anteriores ordines aggressi, primo ferè conflictu loco moverunt: hinc proximis Russorum labare animi; & fronte aciei retrocedente, non gradum

dum obfirmare proximi, sed consternari, abjectisque gravioribus armis, in fugam apertè verti. Litvanæ & Scythicæ cohortes, quæ in ultimo agmine constiterant, primùm sustinere cedentes, mox perruptis cedentium impetu ordinibus, aliquantùm turbari ac propè in communem fugam rapi. Instaurant tamen, restitutâ utcunque acie, pugnam: sed cùm inde à victore Polono fortiter urgeri, hinc à sociis quorum maximè causa ageretur, destitui cæperunt; ipsi quoque in fugam sunt effusi, Russorum fortunam secuti, quorum auspiciis pugnaverant. Litvani procures, domi principe, foris exercitu amisso, solliciti: ad curandam maturè Rempubicam, comitia Kiernoviam indixerunt. Aderant inter alios si-  
ve nepotes, si-ve (quod, ut vero propius, malim asserere) filii Trabi, Narimundus, Holfza, Daumondus, Giedrus & Troidenus. Postremi hujus apud omnes amor, ancipiti expectatione fatigabat Magni Ducis electionem. Vir indole regiâ, ætate validâ, partis etiam sæpiùs de hoste victo-  
riis,

*Comitia in  
Litvania  
ad eligen-  
dum no-  
vum Prin-  
cipem.*

riis , ut ante non mediocres de se spes , ita hic studia motusque animorum magnos concitaverat. Quisque pro se eum Principem designare ; eum privato voto dicere. Et quanquam pro Narimundo , ultra alia, ætatis ipsius iudicium inclinaret, in ea præsertim republica , in qua studiosè servatus hactenus erat mos, primos è liberis, in imperia parentum sufficere : sed virtutis æstimatione , cuncta Troideni gratiæ cessura videbantur. Illud tamen ab ea sententia universos dejecit : *quòd Republicâ per crebram Principum intra paucos annos mutationem non leviter labefactatâ, si quid dissidiorum exoriretur, nihil mediocre timendum restaret : sed quodcunque tandem futurum esset, discrimen ; extremum foret.* Iam verò , etsi Narimundus , caterique Principes , repulsa dolorem Reipublica utilitatibus commodarent : *ferox & ambitiosum Daumondo ingenium nequaquam quieturum. Retenturum illum ex offensa odiorum igniculos : futurum facile ut tempore non sopirentur sed gliscerent ; ambitione fomitem ministrante ; denique per utrosque affectus mente agitata , aut ipsum per se quasitâ occasione immane*  
V *aliquid*

aliquid ausurum , aut si successus & vires odiis defuerint, Narimundum & alios fratres contra Principem & Remp. concitaturum. Quare remotis omnibus studiis, Narimundum natu maximum plenis comitiis Magnum Litvaniæ Ducem renunciarunt : & mox Magister curiæ , quo tunc magistratu Monivodus fungebatur , ex senatus equitumque sententia, porrecto de more stricto ense, titulos & jus eidem detulit.

*Narimundus Magnus Litvaniæ Dux.*

Narimundus, quamprimum Republicam attigit , antequam ad externa curas protenderet ; ad propiora, nimirum domestica, sese convertit. Post persoluta parenti iusta , præcipuum ei opus erat, ita patrimonium inter fratres partiri , ne odiorum semina jaceret. Nec poterat opportunè differri. *Ea enim qua alicui debita sunt , perinde ferè dilata , ac negata ledunt : nisi quòd negata repentè animum dolore invadant ; dilata sensim suspicionibus sese accumulantiibus exulcerent : illa ad vim precipitent , hac ad fraudes & odia, in occasiones ex arte intendenda , deducant.* Metuebat etiam illud Narimundus , ne si quid è Republica

publica decrevisset, quod asperius fortasse fratribus videretur, unicus ipse cum sua sententia sub totâ invidiâ laboraret. Nihil itaque Senatu inconsulto propriâ auctoritate egit, certus, consilia sua, auctorum numero, emollire. Nam quæ solus pro supremo jure jussisset, ea querendi materiam & fratribus & subditis præbere potuissent.

*Plerumque enim Principum acta, ad privatos tantum affectus referendo, criminamur; neque difficilis est ad istiusmodi querelas auditor: at quorum senatus ipse auctor est, ea tanquam publicis utilitatibus dedicata, ac sacrosancta, privatis sermonibus suspicionibusque, non adeò prompti temeramus.*

Erant equidem amplæ provinciæ, quæ reliquis Principibus attribui in patrimonium poterant: sed nolebat Narimundus potentiam eorum ad ambitionem & defectiones, hostium propinquitate sollicitari. Non erat fortè, quod in fratribus ut suspectum metueretur; *cavebat tamen Princeps etiam ea, quæ periculosa futura erant, si illi suspecti aliquando esse inciperent.* Nihil enim periculosius à Principe per alios, præsertim ambitioni obnoxios, admini-

*Fratribus  
patrimo-  
nium parti-  
tur.*

*stratur, quàm quod hosti magis propinquum: ad  
 latus atque sub oculis Principis, factiones facile eva-  
 nescent: à curia verò ablegata, satis ad incrementa  
 sua habent, quòd facilius lateant; in immensum  
 verò surgunt, cum à propinquo hoste subsidia spera-  
 re possunt.* Advertebat præterea Magni Du-  
 cis potentiam exhauriri, cum inter liberos  
 Principis defuncti, patrimonii nomine,  
 provinciæ distraherentur: ita enim fore  
 necesse erat, ut ad multos derivatis reipu-  
 blicæ opibus, ipsoque fonte absumpto,  
 penes Magnum Ducem nihil ultra vacuos  
 titulos relinqueretur. Quare publico sena-  
 tus edicto, in ipsa interiore Litvania pos-  
 sessiones fratribus assignavit; non alio ju-  
 re, quàm quod ceteris proceribus ac equi-  
 tibus in sua patrimonia esset, obtinendas:  
 atque ut omninò privatam rem, familiarum  
 è Magnis Ducibus propagatarum, à publi-  
 ca secerneret; novum insigne pro Duce &  
 republica assumpsit, diversum ab eo quo  
 ceteri ejusdem gentis Duces uterentur. Ab  
 eo itaque primum tempore, Centauri lo-  
 co, Eques armatus stricto ense hostem per-  
 sequens



sequens vulgò Pogonia in ceris Magni Ducis usurpari cœpit : quanquam alii memorant, à Mendogo Rege idem stemma usurpari solitum ; adjectis binis in clypeo crucibus, ad indicium susceptæ Christianæ religionis. Obtigit in ea patrimonii fortitione Holsæ tractus orientem versùs, à Vilna circa Korablum ad multa passuum millia excurrens , deinceps Ducatus Olsanensis dictus : propagati ab eo Holsanenses Duces , superiore seculo , in Paulo Episcopo Vilnensi defecerunt. Giedro ampla item ditio Septentrionem versus attributa : nobilissima ab eo Giedroiciorum Ducum familia ortum ducit; in quâ hæredum copioso numero , veterem illam potentiam & Ducalem titulum , ad equestrem frugalitatem deducta, nostrâ ætate videmus. Daumondo Vcianensis Ducatus datus : arcem Suir ab eo conditam, Ducibusque Suirscis nomen & sanguinem derivatum, aliqui memorant. Troidenum solum, pacis bellicque socium, apud se detinuit Princeps : eo fortasse consilio , ut cùm ipse liberis careret,

*Stemma  
M. Ducis  
Lituanie.*

eum reipublicæ maturè admooveret , quem sibi successorem à Senatu & populo tacitè designari, non ex vano, prudens alienorum votorum æstimator , suspicabatur. Non ignorabat quidem Daumondum quidvis acturum , ne successione excidat : sed malebat fratris ambitionem , quàm vota publica ab eventu destitui. Quare illa ipsa negotiorum cum Troideno communicatione , ejusdem potentiam ad futuras Reipublica spes , contra fraternas factiones , firmabat. Ita rebus domi compositis , & curiæ Ducalis sede, Kiernoviam Novogrodeço translata , ad rem bellicam cogitationes intendit. Iam frequenti Principum vicissitudine Principatus propè in annum magistratum abierat : hinc res bellica plurimum labare ; cùm inter ipsos apparatus aut initia belli, capita & Senatui & castris, morte subtraherentur : atque ea fortè de causa , nihil majore mole contra Polonos pro recuperanda Iatviezya totis sedecim annis actum. Nunc primùm Narimundus cum Troideno eam provinciam sedulò susceperunt ; non excursionibus hostem vexaturi ;

*Iatviezyam  
à Polono  
olim ere-  
ptam recu-  
perant Lit-  
vani.*

xaturi ; verùm Polonis exactis , antiquum  
 in eam jus Litvaniæ asserturi. Ductus in An. 1281,  
 provinciam exercitus , nihil ferè negotii  
 reperit. Reliquiæ Iatvingorum vetere odio  
 à Polonis suapte aversæ, cùm primum exer-  
 citum conspexerunt , à sacris Christianis  
 & Polono desciverunt , atque Litvano ac-  
 cesserunt. Coloniis deinde Polonicis &  
 Mazoviticis insperato impetu captis , uni-  
 versa regio brevi in potestatem redacta  
 est : præsidia opportunis locis posita , quâ  
 hostis propior : ad ripam præcipuè Bubræ Raigrodum  
in Subsyl-  
vania, à  
Litvanis  
ædifica-  
tum.  
 Raigrodum à Troideno colonia ducta ,  
 quæ arx , contra Mazovitas & Prussos vi-  
 cinos, incolis esset. Gratus navatæ operæ  
 Narimundus ; omnem deinde eam regio-  
 nem Troideno attribuit. *Facere beneficium  
videbatur Princeps, cùm tamen ferè acciperet. In-  
 tererat enim vehementer Reipublica , in tanta ho-  
 stium propinquitate, Ducem armis impigrum atque  
 ad omnia intentum præsentem esse , & qui privatis  
 opibus sese tueri posset ; ne semper tantillo bello uni-  
 versa Litvania implicaretur. Casus præterea  
 ita tulit, ut ea res Narimundo ipsi esset per-*  
 oppor-

opportuna , cùm à belli Podlachici curâ flagitium domesticum averteret. Daumondo fortè Vcianæ Duci obierat conjunx: ad funebrem pompam frequentes pro more convenerant proceres; inter ceteros Narimundi uxor , defunctæ soror , & pro se forori parentatura , & pro marito (qui domi morbo detinebatur) mærentem domestico luctu , Doumandum fratrem salutatura. Persolutis ritè justis , hospitibus honorificè dimissis , Principis solius conjugem violentè detinuit , in defunctæ torum substituturus. Et sua & conjugis injuriâ Narimundus dolere , indignari , minari : at alteri insana libidine mens , sceleri contumaciam jungere ; atque post proculcatum fas ; pericula , vel non videre , vel contemnere. Hinc Principi necessitas armorum & fraternali belli. Vciana obsidione cincta ; eò enim sese , aperto campo diffusus , uxorius imperator , ad scelera quàm ad bella audacior , abdidit. At verò quia à muris etiam , non diuturnum præsidium sperari poterat ; & aut oppugnationi , aut ob angustos

*Daumondi  
scelus in  
Narimundum,  
bello  
vindictam.*

stos commeatus , fami cedendum videbat ;  
animos suorum ad constantiam obfirmare  
nititur proximorum auxiliorum spe : ipse  
rebus desperatis , tanquam mox ad solven-  
dam obsidionem cum milite adfuturus ,  
noctis beneficio ex arce dimissus , per ob-  
sidentium castra evasit. Plešcoviam dein-  
de delatus , non infeliciter contra Livones  
Plešcoviensium arma tractasse memoratur :  
exilii ejus memoriam Plešcovia etiam nunc  
obtinet , eâ munitionis parte , quæ ab au-  
ctore paries Doumandi dicitur. Oppida-  
ni cum aliquot dies oppugnationem , Du-  
cis & præsidiorum expectatione , fortiter  
sustinuissent ; suspicati ex morâ , quod in  
re erat , Narimundo se dediderunt. Eo-  
dem anno è Samogitia miles Prussis Su-  
doviensibus auxilio missus : ubi junctis  
Prussorum & Samogitarum viribus , ma-  
gna clades Crucigerorum agris illata est :  
neque solum quæ in aperto ad prædam  
vel iram erant , igni aut ferro absumpta ;  
sed arces & oppida , pleraque capta at-  
que everſa , Christiburgum , Marienver-  
X derum,

derum , Santirum , Plemencia , Graudentum.

*Troidennus  
Magnus  
Litvanicæ  
Dux, à  
Daumondo  
bello peti-  
tus.*

Idem annus mortuo Narimundo Troidenum Principem Litvaniæ dedit, pridem jam communibus studiis expetitur, quòd bellica laude, fratribus, quos ætate sequebatur, longè præstaret. A puero enim castris addictus, cum annis armorum studium promovit; adultus, multis expeditionibus non militares modò, sed & imperatorias artes probaverat, & parando & gerendo bello. Animi quidem impotentior, ac præsertim cum irâ agebatur; hinc & in victos & in fontes, potestate ad crudelitatem abuti solitus: ingens profectò in principe vitium: sed apud feroces populos, sub virtutis nomine, si non amorem, admirationem saltem habebat & reverentiam. Daumondus apud Plešcovienses exul, ex Narimundana mortis nuncio, inimicitias cum principe extinctas credere, & jam reditum in patriam adeoque ipsius Principatus occupandi spes animo volvere: at cum Troidenum Magnum Ducem comitiis creatum intellexisset; tùm verò, quàm  
jucun-

jucundè nuper spei suæ, cogitatione collu-  
ferat ; ita nunc invidiâ & indignatione fu-  
rere , vim & bellum parare. Collecto è  
Plescoviensibus exercitu , Polociam inpri-  
mis invasit , propinquitate suis conatibus  
opportunam : urbe per Russorum prodi-  
tionem potitus , facilè universam provin-  
ciam subegit. Iam ultra Plescovienses co-  
pias, Polocensi milite & opibus auctus, va-  
lidior ad-urgendum bellum, Litvaniamque  
tentandam erat : sed *primis perturbationibus  
ipsa morâ confidentibus , animus non aequè ut ante  
ad arma expeditus. ut ferè difficilis est illis constan-  
tia , quibus ardua , impetu non consilio aggredi mos  
est.* Tum primùm periculi speciem sence-  
riùs circumspicere & æstimare : belli im-  
paribus viribus suscepti exitum pertime-  
scere : cogitare secum , Polociam facilè sibi ces-  
sisse , quòd securis rebus , aut nullis prasidiis teneba-  
tur , aut Russo obnoxiiis : *Vtteriùs si progredetur ,  
nihil non benè munitum , nihil non bello paratum ,  
inventurum : omnia sibi & Russis infesta , Troideno  
addicta.* Quid verò si interim Polocenses , quâ le-  
vitare scelus admiserunt, eadè sceleri veniam apud

*Dasmondi  
contra Troiden-  
dum con-  
silia.*

*legitimum Principem quarerent, atque à se desciscerent? Plescorvienses nondum quidem opera sua panitere: sed quis eosdem illis animos certò audeat polliceri, cùm (ut incerta belli alea est) aliquid cladis acceperint, cùm arma, cùm exercitus validos ab adverso conspexerint? Illosne pertinaciùs pro exulis fortuna pugnaturos crederet, quàm Litvanos pro Principe & Patria? multùm ad audaciam, nec minus ad victoriam momenti sæpè habere, causam pugnae. Abstinere itaque armis, non tamen odiis constituit: & vi in fraudes versa, ambitionem & iras securiùs ex occulto urgere. Neque difficile fuit, pacis specie & modestâ culpæ confessione, fratri imponere: ut speraverat; non veniam modò, sed & Polocensis ditionis possessionem, haud ægrè obtinuit. Inde Daumondus in momenta agendi intentus, rebus suis, quietus prospiciebat: quâ posset arte, Troidenum evertere, & Principatum paterno fraterno-  
 Ap. 1282. que jure, sibi asserere. Troidenus verò ut rebatur, pace domi constituta, militem in Poloniam misit. Quatuordecem millium exercitus erat, è Litvanis & Iatvingorum reli-*



reliquiis lectus : hic divisis trifariam coppiis, totam omnino Lublinensem oram pervastavit. Lescus Niger Poloniæ Princeps Cracoviæ interim jus subditis dicebat : ad subitam trepidationem, forensibus illis negotiis relictis, tumultuario delectu sex milium manum contra Litvanos rapit. Sed hi, aliquot ante diebus prædam & exercitum per Narviam transportatum in profundiores sylvas jam subduxerant. Re cognitâ Lescus planè desperare. *Quo enim duceret exercitum? in sylvas? nimirum ubi hosti omnia opportuna, quia perspecta; sibi verò ignota & periculosa. Qua deinde parte hostem perplexis calibus vestigaret? Atque ut assequeretur fugientem, quâ ratione militem aperto campo assuetum, inter sylvas in aciem explicaret? imò quomodo tam exiguas copias molesto ac festinato itinere propè confectas, tam iniquo loco, tanta multitudini objiceret?* Istiusmodi curis fesso cum fortè somnus obrepfisset, visus est sibi videre Divum Michaelem seridè imperantem : cunctari desineret, & hostem audacter insequeretur. Paret Lescus, exercitum somnii divinitus

*Litvani à  
Lescò Poloniæ Rege  
funduntur.*

immissi enarratione ad spem victoriæ erectum , arma expedire jubet ; & paucorum dierum comœatu sumpto, signa in hostem ferre. Neque procul aberant Litvani , Polonum sibi instare omninò ignari : ex securitatis opinione non excubiæ illis solitæ ; non cohortes , firmandæ à tergo in itinere aciei destinatæ ; nihil denique ex disciplina militari ; atque aded vix castrorum species. Hinc ut comparuerunt imminentium Polonorum inter sylvas signa , trepidare : credere , non absque valido exercitu hostem eousque prosequi ausum : tum collecto à ~~repentinis~~ affectibus spiritu , latvignis præcipuè adhortantibus , antequam è sylvis in campum , quem Litvani infederant , Polonus plena acie intraret , totis simul copiis in venientem effunduntur. Non poterant Poloni omnes cohortes explicare, quòd angusti inter sylvas transitus, non permetterent totum militem simul campo immittere : coacti igitur simplici quâ venerant acie decernere ; quàm maximo impetu in cornua invehuntur , ut iis qui sequeban-

quebantur spatium in frontem erumpendi relinqueretur. Cum atrox utrinque pugna ad primos congressus arderet, effusis omnibus ad prælium, captivi inter impedimenta absque præsidio relictæ, ut suorum signa agnoverunt, insolito quodam motu agi; se invicem adhortari. *Pueris & fæminis lachrymas ac vota relinquerent. Si viri essent, non expectarent otiosi suorum incertam victoriam; quam certam reddere possent, audendo. Si vincere fortè hostem non possent; hoc præmii loco ducerent, eum ad sui cadem irritare. Cui enim servarent turpem hanc vitam, barbaro obnoxiam, & servituti destinatam? an ad suorum cladem, novos captivos, novam dolorum materiam spectandam? Irent potius & aut morerentur, aut vincerent cum suis. Eximerent se tot malis aut vincendo, aut occumbendo. Mox promptiores quique juvenum, se aliosque vinculis expediunt, fæminis inter spem & timorem vota ad superos cumulantibus: tum correptis quæcunque casus & desperatio obtulerant telis, armantur: multis canes sponte dominos nuper in servitutem secuti, vel inter ceteram prædam*

*Captivi  
Poloni à  
tergo Lit-  
vanos ado-  
runt.*

prædam abducti, pro armis, atque satellitio fuere. *Vbi in subitâ illâ inchoatæ libertatis specie se circumspexerunt, horrorque ex futurorum cogitatione frigidus per artus decurrisset, tum sublato ab omnibus simul ingenti clamore, in audaciam accensi, magno impetu, tanquam furibundi, Litvanorum aversam aciem adoriuntur.* Turbati in sperato eventu Litvani atque quis novus hostis esset ignari, non diu, inter anceps à fronte & tergo malum, vim sustinuerunt: Superùm irâ portentâ non hostes sibi immisos multi credidere, quando tantâ rabie canes ipsos (insolitum hætenus pugnæ genus) in se ferri videbant. Iatvingorum paucæ cohortes erant; sed quibus, ab animo, non à numero fortitudo: hæ pertinacissimè locum tenuerunt, donec penitus delerentur. Litvani magnâ parte inter primam pugnam amissâ, cum reliquo exercitu cædi se victorum eripuerunt: multi fame deinde inter sylvas enecti; atque adeo etiam qui supererant tot malis, vix aliqui in Litvaniam regredi ausi, poenarum scilicet metu, quas gravissimas ex Trojedeni

*Litvanifugientes ex acie, domi à Principe puniebantur.*

deni edicto magistratus in fugitivos statuebant.

Domi etiam res haud nihilo funestiores. *Troidenus Princeps trucidatur à Daumando.* Olfa & Giedrus fratres Principis, vitâ functi. Additum his, scelere Daumandi, tertium funus longè acerbius. Sex percussores, rusticorum supplicantium habitu, submissi; cùm Principem è balneo redeuntem paucisque comitatum, medium intercepissent; inclinantem se atque humaniter, quid injuriarum à quopiam accepissent, & an se vindice opus haberent, inquirentem; impactis capiti baculis interfecerunt. Orbatu Principe Reipublicæ status, amisso nupera expeditione veterano milite, patentes planè aditus ad vim & Principatum Daumando aperuerant. Promovebat ejus consilia, quòd Laurus Troideni filius jam ante post rerum civilium tractationem abdicatam claustro se inclusisset: supererant quidem defuncto Principi nepotes; Ginvilus ex Giedro, Algimundus & Mindovus ex Olfa; quibus imperium deferri poterat: sed ab eo consilio, & ipsos juvenes & senatum,

Y

tum,

tum, facilè ostenso bello deterreri posse sibi persuadebat. Lecto igitur quantocytus è Russis valido exercitu, movit in Litvaniem, aut solo belli terrore voluntates Procerum in se inclinaturus: aut si aliud illi comitiis habitis statuissent, armis Principatum occupaturus. Graviter Laurum (Rimundus à popularibus dicebatur) affecerat audita cædes parentis: ubi deinde intellexit etiam Principatum in sceleris præmium à scelesto fratricida repeti, tum verò dolor in iram exardescere: tantaque ea indignatio fuit, ut mox ab accepto nuncio, deserto claustro, Reipublicæ se redderet, & Ducem bello, contra perduellem patruum, offerret. Proceres & suaptè ex defuncti Principis reverentia Lauro addicti; & à Daumando tot sceleribus infami averfi: sed de belli eventu anxii; inter utraque consilia quem sequerentur incerti, animo pendebant. Causæ inde æquitas; sed Dux juvenis, animo quàm rerum experientia promptior, ab aris & sacellis repentè miles & Dux: illinc flagitium & perduellio; sed

*Laurus  
Daumandus  
profigit & occi-  
dit.*

fed imperator , qui inter arma & pericula ætatem exegiffet. Attamen ut cuique majora in Daumandum odia , & Troidenum Laurumque studia , ex Litvania , Samogitia & Novogrodenfi terra , armati libentes confluerunt. Recensas copias Laurus ftatim contra hoftem duxit ; *quamdiu prima ferverent studia , de fumma rei aperto pralio decertaturus : ne vel factioforum sermonibus ardor fuorum reftingueretur , vel dilatâ pugnâ spacium arcibus oppugnandis daretur , quarum deinde oppugnatione bellum diutiùs trahi neceffe foret.* Commiffo prælio Laurus campum obtinuit , ipfe hac parte victoriæ maximè lætus , quòd cum Daumando fortuitò (uterque fuis aderat) congreffus , eum parenti inferias , & fuo dolori victimam mactaffet. Reliqui exercitus in fuga cædem, nox abruptit: poftero die lectis fpoliis , victor miles in Polocenfes agros ductus, atque eodem victoriæ curfu , facilè quæ superiore anno Daumandus occupaverat, recepta. Dimiffo tandem exercitu , Kiernoviam , quo ad comitia habenda conventus indictus fuerat ,

Y 2.

Laurus

*Laurus ab ordinibus Princeps electus sui loco Vitem substituit.*

Laurus maturavit. Acceptus magnâ omnium ordinum gratulatione : ubi in Senatum venit , ne sententiæ quidem ex ordine dici , aut ab uno quopiam nomine Reipublicæ gratiæ Principi agi poterant. Cum enim in communi omnium voto nemo postremus esse vellet , omnes simul inclamarunt. *Silerent mortalium sententia, quandoquidem superum dono Principem haberent.* Occuparet fortunatus Principatum , quem fortiter defendisset ; gemino jam titulo suum , paternâ hereditate & proprio merito. Se non eo consilio ad comitia convenisse ; ut Magnum Ducem legerent ; sed ut illi qui jam Dux suus esset , fidem debitam , solenni sacramento, pro solito more obstringerent. Ad hæc Laurus : *Quidquid hætenus egisset, non plausu sed excusatione opus habere : quod nimirum mancipatam supremi Numinis obsequio mentem , ad ejuratas pridem curas, rursus applicare ausus fuisset. Quia tamen non suscepta vita tadio, aut studio novarum rerum , id attentasset , non omnino severos facti sui iudices apud posteritatem sperare. Donaturos , qui hac olim audirent , multum filio : quem justus dolor in paterna cadis auctorem , eo usque , etiam extra orbitam,*



orbitam, egisset. At si ulterius progressus, principatum occuparet: enimverò neque apud superos violati sacramenti flagitium, neque inter homines inconstantia ac levitatis probra evitaturum. Quare si vel recentis beneficii memoriâ, vel hereditarii juris prajudicio, apud Rempublicam sibi agere permetteretur, illud unicum orare, ut eum Principem vellet, in quem ipse jus suum, si quod esset, transferret: simulque Vitenem, Curia olim apud Troide-num, Magistrum, designat; palàm sanctè testatus, obstinatum sibi omninò esse, ad inchoatam disciplina religiose philosophiam rursus regredi. Perculit inopinata oratio plerosque: omnes simul per omnia sacra obtestari, ne patriæ, quam fervasset, curas projiceret. Perstitit Laurus constanter in sententia; addens. Curas patria à se non abjici, sed in humeros tanto oneri non impares transferri: atque ea ipsa de causa nolle se auctorem esse, ut ex consobrinis suis aliquis per atatem ei honori invalidis, ad Principatum assumeretur. Rogare verò iterùm, ut si gratiam navata bello opera erga se testari vellet, ne amplius animum aliò destinatum non profuturis conatibus fatigarent: si Reipublica curâ tangerentur; ne alteri

Y 3

quàm

*quàm Viteni Principatum traderent.* Post longam studiorum concertationem, cum tandem, cautè immobilior Laurus, de sententiâ dejici nullatenus potuisset: Vitenes, Lauro auctore, omnium consensu, Magnus Dux renunciatus, atque inauguratus est. Nullam deinceps unquam Laurus Reipublicæ partem attigit: haud procul Novogrodeco ad ripas Nemeni fluvii inter Monachos constanter in ultimum diem susceptam vitæ rationem tenuit: soror ejus vel à parente vel certe à fratre elocata, nupsit Boleslao Mazoviæ Duci. Cum enim nulla fœdera sufficerent, ad constantem cum Litvanis pacem: affinitatum inter Principes contractarum respectu, quietem aliquam ab assiduis Litvanorum infestationibus sperabat.

## LIBER VI,

*De rebus Litvanorum, Principatu ad Cæsarini  
Columnæ posteros translato.*

**V**itenes, inter Eiragolios (qui Samo-<sup>Vitenis fa-</sup>  
gitæ populus est) à Cæsarino Co-<sup>milia.</sup>  
lumnâ genus, quemadmodum pleri-  
que ejus regionis procerum, ducebat. Iam  
inde à puero, ita vitam ejus fata tempera-  
bant, ut non alibi, quàm sub Reipublicæ  
oculis, id est omnium judiciis, adolesceret:  
quodd à superis ad Principatum, per qua-  
tuor jam sæcula in sua familia conserva-  
rum, destinaretur. Ex illa enim dōmo, cūm  
perpetuū duodecim Magni Duces in Lit-  
vaniâ imperassent; ne deficientibus tan-  
dem viris, Principatus aliò averteretur, fæ-  
minæ etiam ratio habita est. Trineptis hæc  
Vitenis erat, Anna *Stephani* I Polonorum  
Regis conjunx, prius Poloniæ Regina re-  
nunciata, quàm sponsa, Principatum viro  
dedit. Interruperat deinde hunc veluti sa-  
crum quendam, Litvaniæ Principum ordi-  
nem,

nem, Henricus Valeſius : ſed rediit mox Reſpublica, ad probatas jam ſibi tot ſæculis manus, ſummo omnium bono. Reſtiterunt rurfus Litvaniæ ſuos Principes, *Sigismundus* III Poloniæ Rex, IV Litvaniæ Dux, ex Catharina Vitenis trinepte, Annæ ſore, Ioannis I Suecorum Regis filius; & *Vladiflaus* Polonorum Rex ejus nominis Quartus, Litvanorum Dux Magnus, verè *Secundus* : in ipſo felicitatis, ac pacis publicæ curſu, magno Reipublicæ dolore, neque minore damno, nuper Merecii in Litvania mortuus. *Cafimirus* Polonorum Rex ejus nominis IV, Litvanorum Dux Magnus Tertius : cui Reſpubl. ingentibus periculis pænè oppreſſa, ita regnum detulit, ut ad virtutem Vitenio, Iagelonioque ſanguine propagatam, velut ad ſolitum in afflictis rebus aſylum, ſuperis impellentibus properaſſe videatur : in uno & Vladiflai fratris & Sigifmundi parentis trophæa, imo compendium Veterum Heroum, inventura. Verùm à tantæ ſpei felicitatiſque ſpectaculo, ad ipſa ejus injitia oculus avocandus

candus est. Redibat fortè aliquando à bello Prussico Troidenus, & Vitenem puerum inter pares conspicatus ; indolem decoro ore non vulgare quidpiam (*ut fermè magna fortuna , sola etiam rudimenta angusta esse solent*) spirantem , curiosius demirari : tum oculatâ quadam vi agente , spes futuras , quas ipse ignoraret , arctiùs animo complecti. Bonâ deinde parentum veniâ , in familiam Troideni , puer Vitenes translatus est : ubi cum interna animi vis , in dies majoribus se indiciis exereret, adolescens cubiculo præfectus , vir tandem Magister Curiaë , vulgò Mareschalcus creatus est. Troideno & Principi , & multò ante , percarus ; confiliorum pænè arbiter, expeditionum socius : denique Lauro auctore , successor. Initia principatus à bello sumpfit : fortasse quòd gloriæ militaris opinionem ad vulgus confirmare vellet. Nam *subita illa fortuna multo* An. 1283.  
*favore populi , contra aliorum procerum factiones , indigebat : neque erat ad favorem expeditior via , quàm per bellicos plausus. Ferax praterea seditio-*  
*num , otium est : jam verò cum externi belli specie,*

Z

Et flu-

Et studia partium aliò distrahuntur , Et Principi  
 illo prætectu militem alenti potentia , absque suspi-  
 cione , est in promptu : tum certè non multum ad  
 factiones , seditiosis vacat. Suspecta erat meritò Vi-  
 teni Fortuna sua ; quia repentè summa Et tamen  
 quieta : sciebat illam invidiâ carere non posse , nec  
 invidiam turbarum occasione , præsertim quòd ne-  
 que incentor seditioni aut præfensio , neque Dux  
 bello defuturus esset ; quamdiu , ipso imperante ,  
 Troideni nepotes privati agerent. Sed hæc Vi-  
 tenes secum tantum agitare , longè verò  
 alias ab iis , belli suscipiendi causas , in pu-  
 blicum spargere : illam præcipuè , quâ nul-  
 la alia popularior , ut accepta anno supe-  
 riore , in Iatviezya clades Polono repone-  
 retur. Majoribus solito copiis bellum ag-  
 gressus Polonorum agros invasit ; & per  
 Lukoviam populabundo exercitu in Sen-  
 domiriam transit. In utraque provincia ,  
 Polonis in oppida se recipientibus utique  
 sua & vastari passis , impunè igne ac ferro  
 ingentem vastitatem per agros & villas  
 circumtulit : & jam cæsis plurimis , quibus  
 senio vel pueritiâ invalida ætas erat , sex  
 millia

*Vicenis ex-  
 peditis in  
 Poloniam.*

millia mortalium præter aliam prædam  
 abigebat. Perlatus ingentis cladis rumor  
 Cracoviam, ubi tunc comitia habebantur,  
 Lescum ad arma ocys corripienda exci-  
 vit: dimissis in Sendomiriam mandatis,  
 uti equites oppidani & rusticani, bello ha-  
 biles, proximis itineribus sibi occurre-  
 rent; ipse recta cum eis quos præsentès è  
 proceribus aut equestri ordine Cracoviæ  
 habebat, aut ex vicinia opportunè rapere  
 poterat, citato agmine hostem insequitur.

Vbi non longè ab eo se abesse intellexit,  
 armatos qui tumultuariè confluxerant re-  
 censet, signa, Duces assignat: atque ad pu-  
 gnâ & victoriæ spem, erigit. *Eundem esse  
 hostem, quem superiore anno, ne uno quidem de  
 suis desiderato, vicissent: nomina alia, hunc diver-  
 sum militem, non verò aut vires novas, aut plus  
 animi, in bellum attulisse. En quomodo latebras  
 sylvarum beneficio quarerent; priusquam Polo-  
 num in armis ab adverso conspexissent: omnino non  
 pugna, sed cade tantum opus futurum, cum iis qui  
 tam maturè fugerent. Ad populationes & repen-  
 tinas incursiones comparatos, prædari tantum, non*

*Lesci in  
 Lituanos  
 expeditio.*

acie decernere gnaros ; impedimentis insuper implicitos , ex praterita fortuna memoriâ timidos , expediti ac victoris exercitus molem nequaquam laturos. Irent itaque animosè , eriperent barbarorum servituti subditos suos , amicos , conjuges , liberos , quorum jam miserabiles voces panè exaudirent. Non desore superos tam justa causa : eandem illis pugnandi causam , qua superiore anno ; eosdem proinde superos adjutores habituram , eosdem eventus. Ut verò majorem divina opis fiduciam ( cui maxima audendi vis ) excitaret , singulos ante pugnam , susceptis Pœnitentiæ & Eucharistiæ mysteriis Christiano ritu muniri iussit : ipseque Princeps exemplo suo invitavit. Litvanis , ne illa etiam populatio funesta , ut ante accideret , universa cautiùs administrabantur : præsertim , quòd necdum Lukoviensibus agris excessissent , unde paucarum horarum itinere hostem à castris abesse , non ignorabant. Ad proximas ergò sylvas , cohortes & impedimenta , subducunt , aut præsidii alicujus specie , aut consilii securius capiendi causâ. Non poterant certè ibi diu , aut vestigantem omnia hostem

*Poloni ad  
invadendos  
Lituanos se  
comparant.*



hostem effugere; aut sustinere obsidentem pertinaciter. Sed neque castra, prædâ captivis & debilibus gravia, fugam ita maturare, ut magnis itineribus instanti hosti horarum aliquot intervallo subtraherentur. Si projectis impedimentis, expedito agmine in patriam se contulissent, potuissent omni periculo defungi: tum quòd ipsis longè levior equitatus, & celeritate melior; tum quòd Polono castris occupatis, ac prædâ omni receptâ fugacem hostem per sylvas sequi, non omnino securum fuisset. At verò stabat ante oculos ingens probrum, nec tam dolor amittendæ prædæ, quàm timor ac verecundia popularium. Quantum enim ignominia, non prædam modo omnem, sed commilitones, qui cursum in morbo ferre non possent, turpi ante pugnam fugâ, in hostium manibus deferere? Signa igitur in hostem convertere obstinatè decernunt: instanti obviam ire, & maculam superioris anni, si non victoriâ saltem insigni audacia eluere prædam omnem in unum comportant, captivos sol-

*Polonorum  
cum Litva-  
nis pugna,  
& victoria.*

citè vinciunt, præsidium castris relinquunt, aciem ut fieri poterat, intra sylvas instruunt. Iam Poloni ad pugnam comparati, in campo capacissimâ planitie antè sylvas exporrecto, aderant: neque Litvani desperatione animos accedente, moram tulere; mox instructis legionibus, citato cursu, è sylvis erumpunt; atque rectâ in hostem, cæco impetu feruntur Poloni, præsertim oppidani agrestesque & qui belandi (ut accidit, cum miles tumultu legitur) rudes, admirari audaciam: tum & trepidare, quòd quibus fugientibus se instare hætenus existimassent, eos repente tantis animis in arma ruentes, conspicerent. Lescus, veritus ne subita illa ex desperatione vis, consternatos suos vestigio dejiceret, ac vixdum inchoatâ pugna aciem totam loco moveret, Zegotam Palatinum Cracoviensem, cum unâ legione veteranorum, & aulico suo equite, incurrentibus Litvanis objecit. Sustinuit Zegota fortiter imperum: ita spatium cæteris (Lescus ubique annitente) recipiendi animos, & pudore metum excutiendi,

tiendi, datum est. Sensim interea Litvanis, qui initio pugnam orsi erant, primus ardor remittere. Id verò ubi Lescus sensit, ultima signa progredi jubet, & primam legionem instaurato impetu in hostem se erigere: moti eo pacto, qui in anterioribus ordinibus pugnabant Litvani, aliquantùm cessere; planè tum integris, qui ad præsidia constiterant, tempus erat ut succederent fessis, & prælium restituerent: sed hi ut primos inclinari viderunt, statim & ipsi in fugam effusi sunt. Cæsa eo prælio in campo aliquot Litvanorum millia, neque pauci in fuga perierunt: præda omnis recepta, multi deinde inter sylvas palantes ab agrestibus trucidati. Vtriusque tamen anni victoriâ damnum compensari non potuisse scribitur, quod iisdem annis à Litvano acceperat Polonia; Lukoviensi territorio, & Sendomiriensi atque Lublinensi Provinciis, planè vastatis ac exustis. Inter ea verò dum Litvani hostem extra inauspicatò lacessunt, Crucigeri Equites debellatis integrè Prussi nominis populis Litvaniam

*Pelussa  
Lituanus,  
Prussos con-  
tra Litva-  
niam con-  
citat.*

niam infestare caperunt : vel commoditate belli in hostico gerendi ; vel , nisi me conjectura fallit , Pelussa instigante. Hic enim è Magnis Litvaniæ Ducibus ortus, Stroinati Daumandive filius, aut ob factiones proscriptus aut aliâ de causâ inter Crucigeros circa ea ferè tempora exulabat : & Principatu in alienam domum derivato ; ipse M. Ducis titulos , privata autoritate extra patriam usurpabat. Habebat alios quoque ex proceribus suæ fortunæ socios, Stumandum & Girdilonem viros & gestis in Litvania magistratibus, & splendore familiæ claros : qui eodem religionis Christianæ causâ transierant. Cum igitur Litvani medio Autumno in Sendomiriensem illam expeditionem intenti essent ; Crucigeri primâ hyeme Nemenogelu adstricto, per glaciem faciles transitus præbente, Duce Magistro Conrado de Tierburg in Litvaniam irruperunt. Bifariam agmen divisum est. Pars Bissenam arcem , extractâ in meridiem ab aurora oppugnatione , captam exussit : altera viciniam circumjacen-  
tem

*Litvania à  
Crucigeris  
vastatur.*

tem depopulata est : in reditu tamen insignem jacturam passi sunt ; nam glacie Nemeni , necdum satis solidâ , sub onere fatiscente , magna pars exercitus & prædæ , vorticibus est hausta. Transmisso quietè vere , cum æstate rursus novi motus. Stummandus qui nuper in Prussiam profugerat , cum Prussico milite Grodnensem insperatò tractum invasit. Capta est arx Grodna cruentâ expugnatione : & præsidio exciso , munitio omnis diruta , aut exusta : equitatus duorum ferè millium ad populationes inde dimissus , ingentem omnis generis prædam ex agris abegit. Litvanæ etiam aliquot cohortes interea per confinia Poloniæ prædabantur : cùm redirent in locum hoste infessum deductæ , pænè jam domi internecone perierunt. Auctores cladis fuerunt Numo & Dersco Bartenfii , Prussi nominis magnates , qui è Prussia profugi tùm apud Litvanos exulabant , & novâ illa Litvanorum proditione , veniam apud Crucigeros , præteriti flagitii sperabant. Circa sequentis anni initia , fortuna

A a

Litva-

An. 1285. Litvanis nihilò quietior : non tamen ita immitis , ut nuper : Æmulatione fortasse rei à Stumando ex voto Crucigerorum confectæ , Girdilo (hic quoque è Litvania nuper profugus) à Magistro exercitum obtinuerat , operam suam contra Litvanos pollicitus : ducebat tacitum agmen angustis per sylvam callibus , ut insperatus Oncaimo arcis superveniret. Sed monitum de hostium adventu Grodnensis arcis præsidium , in ipso itinere interceptum hostem , vix cladis nuncio superstite , cecidit. Samogitia ab hoste libera fuit : domestico autem malo vehementer afflicta. Insolitum vermium genus , per agros ingenti copiâ exortum , cancris aut scorpiis simile , magnam in populo stragem fecit : quicumque à bestiola ictum acceperisset , ultra triduum non vixit , neque medicamentum ullum præsentissimæ morti obviare poterat. Idem malum per Prussiam & Curlandiam grassatum est. Maturâ jam æstate Litvanis deinceps tantum ocii fuit ut etiam alienis expeditionibus sufficerent. Evocati à Conrado

*Samogitia  
clades , à  
venenatis  
vermibus.*

rado Cirnenſis Mazoviæ Duce , Goſtini-  
 num Ladislao Cujavienſi interceperunt;  
 atque præſidio partim caſo , partim cum  
 cætera prædâ abacto , arcem exſpoliatam  
 Conrado tradiderunt. At verò, ut nunquam  
*Litviani ſuppeditas Ducis Ma-*  
*zoviæ ferunt: & max Ma-*  
*zoviam invadunt.*  
*periculo vacat , hoſte in auxilia uti , quòd brevem*  
*illam armorum ſocietatem in rem ſuam occultè or-*  
*dinare ſoleat, & rebus per amicitia occaſionem per-*  
*ſpectis , ſecuriùs deinde inimicitias exercere :* ita  
 Conrado evenit. Litvani qui Mazoviæ ul-  
 terioris populationibus aliquot annos ab-  
 ſtinuerant , cum liberè nuper per eam Pro-  
 vinciam ſub ſociorum titulo Goſtininum  
 transmitterentur, opulentiâ regionis, quam  
 pax alta reſtituerat , ad prædam ; prædæ  
 amore ad bellum illecti ; vix deductis do-  
 mum Goſtinenſibus ſpoliis , auctis viribus  
 in Conradi ipſius ditiones redierunt , re-  
 pentè è ſociis hoſtes. Sochaczovia & Plo-  
 cia eo impetu occupatæ : prædia & quid-  
 quid per agros ad prædam abduci non po-  
 tuit, igni vel ferro, penitus abſumpta. Te-  
 nuit deinde quietos domi , accepta , quæ  
 ſequitur , clades ingens. E tota Litvania

A a 2

præci-

An. 1286.

*Præcipui  
Litvano-  
rum Ma-  
gnates, à  
Pelussa in  
convivio op-  
pressi.*

præcipui Procerum aderant, ad solennes nuptialis convivii epulas, à quopiam Principum invitati: nunciatur interea à suis exuli Pelussæ, quæ res erat: posse nimirum ab eo, totam penè Litvaniam in uno prædio aut capi, aut si malit excindi. Modò cum milite, insperatus superveniret: certè non defore inter ipsos Litvanos, qui partes ejus strenuè acturi essent. Non difficile ad fidem consilium visum, & Alberto de Misnia Præfecto Regiomontano, à Pelussa communicatum, auctoritatem reperit. Non indigebat res magno exercitu: exiguus miles sed promptus, expeditus & audax, neque in consilium Ducis nimium curiosus, susceptorus erat. Nesciri enim omnino, quid ageretur, à vulgari milite oportebat: ne ad comitatum Pelussæ res sermone vulgata, incideret in aliquem, qui futuræ cladis commiseratione, aut horrore motus, populares suos præmoneret. Ducendus deinde miles ita erat, ut ne ququam hostem fines transisse, priùs sentiret, quàm negotio confecto: cujus tota moles,



moles, non tam in illorum copiis, quàm in Litvanorum securitate augendâ, consistebat. Paucos itaque omnino expeditionis comites deligere visum; cum quibus & sylvas angustis tramitibus penetrare, & hostem fallere, promptius esset futurum: præsertim quòd in ebrios ac semisopitos vim parantibus multitudine nequaquam opus esset. Viginti tantum Equites à Crucigeris accepti, animo & manu promptissimi, Ducibus Martino Golin, & Conrado Tuwil, reliqui è comitibus Pelussæ expeditiores, numerum expleverunt. Ducebat exiguam cohortem notis callibus Pelussa; nequaquam pro tantillo suorum numero, cladem hosti animo ferens. Intempestâ planè nocte, ebrietate & somno oppressos convivatores, intempestivus hospes aggressus est. Excitavit quidem tumultus plerosque, ne in lectis conficerentur; multique arma corripuerant: sed neque armis aut repellendo vulnere, semisopiti ac ebrii sufficebant; neque consilio, ex periculi, quodnam & unde esset, ignoratione. Præ-

A a 3 ter in-

ter ingentem familiæ numerum, variaque  
 diversæ conditionis ignota capita, soli Du-  
 ces ac proceres præcipui septuaginta cæsi:  
 sponsus ipse cum sponsa omnesque Sena-  
 toriæ sœminæ, cum ingenti prædâ Regio-  
 montum asportatæ. Ita unum illud ferale  
 convivium, omnes pene Litvaniæ familias,  
 morte aut captivitate suorum funestavit:  
 & uno in loco universa Litvania expilata;  
 cum opulentissimus quisque, ut tum res  
 erat, cum conjugibus & liberis, totas in  
 ostentationem opes secum ed convexisset.  
 Vt tamen respiravit aliquantum ab ea cla-  
 de Litvania; Vitenes habitis per omnes  
 ditiones delectibus, exercitum alterum in  
 Dobrynios, alterum in Crucigeros desti-  
 navit. Vtrobique Resp. ex voto gesta. In  
 Dobryniâ cum populus die festo univer-  
 sus ad sacras ædes ex agris confluxisset;  
 urbs repentina incursione capta est. cædi  
 & prædationi quod supererat, flammis de-  
 letum: tum per viciniam populationibus  
 latè grassatus miles, novem millia captivo-  
 rum eduxit. Cum Crucigeris verò aperto  
 campo

An. 1287.  
 Dobrynia à  
 Litvanis  
 vastatur,  
 Crucigeri  
 ceduntur.

campo collatæ acies : ubi Magister ordinis Bulhardus Harem cum triginta ejusdem ordinis equitibus occubuit ; Litvanus victor abiit. Expectatione deinde belli, quod à Polono in Litvanos magna vi parari nunciabatur, excursionibus ad finitimos temperatum est : ne vel aliò intentos, aliunde tempestas involveret ; vel sparsis fatigatisve viribus, sustinendæ tantæ moli non essent. Lescus enim Cracoviensium Princeps, finitimis Principibus, atque aded fratribus auxilia se ferre velle ; & Cujaviæ, Dobrynæ, Mazoviæ injurias ulcisci, palàm ferebat : indictum erat, in eam rem sacrum autoritate summi Pontificis contra Litvanos bellum : neque è Polonia modò, sed è Silesia atque Bohemiâ, vicinisque Provinciis ingens armorum confluxerat multitudo. Verùm tota tandem tempestas, cùm Litvanos aliquamdiu sollicitos tenuisset, dolo Lesci in Mazoviam nihil tale suspicantem detonuit. Defunctus jam (ut videbatur) eo periculo Vitenes, verebatur adhuc ne fortè frater-

*Lesci Cracoviensis  
apparuit  
in Litvaniam.*

fraterno calientia sanguine arma , in se improvisè converterentur , quare quieto sub signis milite , intra fines substitit. At verò cum DEI vindicis irâ Sendomiriam , Sirdiam & Cracoviam miserè à Tartaris vastari , & Lescum cum conjuge in Hungariam ægrè evasisse à speculatoribus renunciaretur , tum primum securitatem ab ea parte plenam credere. Dimisso reliquo exercitu, ne in cassum omnino illi tanti delectus abirent, octo millium expeditissimo equite Sambiam , Crucigerorum Provinciam , invasit : neque Crucigeri aut castris aut acie congredi ausi ; ex arcibus duntaxat intenti , si quos prædandi immoderatus ardor , aut commeatus necessitas , longius ab exercitu temerè extulisset. Vastati sunt latè agri , cæsi agrestes , præda abacta , non pluribus quàm octuaginta octo suis desideratis, qui audaciùs paulò palati, Henrici à Dobin insidias incurrerunt. Damnum eâ vice Sambiæ illatum , & proximum , & alios deinceps annos , infestos Litvanis reddidit ; Crucigeris omni ope Litvaniam vexare

*Sambiam  
in Prussia  
Litvani popu-  
larentur.*

*An. 1290.*

vexare contendentibus. Rarò justì belli, frequentius extemporaneâ prædandi quadam ratione, res per multum tempus utrinque administrata est; neque paucæ aut modicæ, ultrò citroque, eo bellandi modo illatæ clades. Meneho imprimis Magister Prussiæ circa medium Aprilem, ab obsidione Colaini, quæ prima in Litvania arx Prussiam versùs ad Nemenum erat, bello initium dedit. Quingenti equites è castris ad vicinorum agrorum populationem dimissi, duorum verò millium pedites oppugnationem arcis pertinaciter urgebant. Centum viginti equitum in arce præsidium erat Duce Surmino viro impigro, & periculorum patiente: fortiter illi quidem insultus hostiles satis diu tulerunt, neque incruentam oppugnationem hosti fecerant; cùm ille aperto campo magis ad vulnera pateret: sed quia pauci in præsidio erant, carpentibus hostibus multifariam exiguas, atque ægrè in totam simul muri coronam suffecturas vires, magis ipsi sentiebant damnum: & jam, cùm duodecim soli ex

*Litvania  
infectatur à  
Crucigeris.*

B b

propu-

propugnatoribus absque vulnere essent, summa rei ad periculum venerat, nisi error hostium desperatæ fortunæ vices permittasset. Sub noctem fortè redibat ex agris hostilis eques, successu, & prædâ lætus, neque sine tumultu; auditæ à longè equorum, hominumque confusæ voces, & sonitus venientium, speciem exercitus advenantis, ut erat, fecerunt: pedestres copiæ, quæ tunc extremis planè viribus in muros assaultum apparabant, fato quodam sui equitis oblitæ, Litvanum ad solvendam obsidionem magno exercitu properare ratæ, hostem adesse inclamant, & per tumultuariam fugam desertâ oppugnatione in naves diffugiunt. Agnito deinde errore ad obsidionem redeunt: at Surminus spatio oblato in rem suam usus, jam præsidium cum præcipua suppellectile ex arce deduxerat: hostis arce vacuâ potitus, & munitione omni dirutâ, ulterius progredi ausus non est. Paulò post Ernelio Ragnetanus Præfectus, cum delectis Crucigeri Ordinis viris, adverso Nemeno in Litvaniam navigabat,

gabat, & jam Colainum arcem rursus ab Surmino instauratam, prætervectus fuerat: seu occasionem gerendi captaturus, seu quod veteres scriptores addunt, Viennensis cujuspiam Crucigeri gratiâ, hostiles terras videre cupientis. Surminus & odio communi, & dolore nuperi damni, indignissimè ferre, sub oculis inultum hostem tam securè vagari: sed nihil ipse aperta vi tentare potuit, cùm & ille extra teli jactum cursum teneret, & nulla sibi in littore majora navigia essent. Convocat tamen præsidium, & multis hortatur, ut si quâ arte hosti nocumentum adferre quis posset, auderet ingenio, cùm copia utendi viribus deesset. Erat inter reliquos Nodam, ætate juvenis, animo audax, corpore robustissimus, miles: ille Duci operam spondet, modò cæteri se impigrè sequerentur, effecturum certò, ut non pugnae modò, sed & victoriæ copiam haberent. Rectà itaque per agros & sylvas hostem adversa aquâ & tortuoso amne lentè navigantem antegressus, quâ valles, & arbuta densiora littori

*Navis  
Crucigerorum  
insigni  
stratagemate  
capta.*

imminebant , militem armatum in insidiis locat , ipse habitu toto fæminam Polonam mentitus , ubi navis in conspectum venit , ad lachrymas composita voce Polonico sermone ploratum sustulit. *Si Christiani essent , si Polonorum socii , misererentur Christiana , Polona mulieris . Esse sibi in Polonia multas opes & clientelas : superos proinde omnes testari , futurum ut non paniteret eos auxilii , si quod misera tulissent . Sed ut hac quoque deessent , per communia sacra & religiones obtestari , ne se Christianam eò loci unde nullo negotio ab iis eripi posset , desererent ; vel fame miserandum in modum perituram , vel si in barbarorum manus rursus incidisset , extrema quæque in pudicitia , & vita passuram .* Addit vocis lachrymas & gestus , qui & fortunam aptè fingerent , & commiserationem vehementiùs urgerent . Nihil doli , aut periculi suspicabantur Crucigeri , littora latè arboribus obsita , regionem incolis desertam suadebant : sed nec mulier clamatura tanta voce videbatur , nisi in propinquo hostes nullos agere , certa esset . Appellunt igitur ad littus , & cum personatam illam mulierem



rem ad navim admittere parant , Nodam saltu repentè in aquas delatus , socios in-clamat, navimque apprehensam obfirmato contra omnium remorum vim vestigio, tamdiu detinet donec milites ab infidiis concurrerent,& navi potiti universos conficerent. Eodem anno ex Oncaimi præsidio , cùm in hostiles agros incautiùs excurreret , à Ludovico Lubentelle viginti quinque cæsi. Ab alia verò parte Iezbuto vir præcipuæ inter Litvanos nobilitatis, post vastata quædam Poloniæ confinia, ab Henrico Sutswert Præfecto Balgensi , qui inter Eleam & Narviam fluvios cum mille ducentis equitibus vias infederat , fusus, prædam omnem & magnam partem è quingentis equitibus, quos solos habebat, amisit. Quies deinde utrinque ab armis subsecuta, non pactis mutuo induciis, sed ob autumnales tempestates : quare vix diuturnior ipso autumno. Ineunte deinde

Februario Bertoldus Brunhaim Regiomontanus Præfectus , quingentos super mille equites , in Iunigediæ agros duxit.

*An. 1291.  
Litvania à  
Crucigeris  
infestat.*

Colainum arx diffugientibus metu præfidiariis capta est, atque exusta; vastatis deinde agris, præter aliam prædam septies centena capita in servitutem abacta. Erat ille locus excursionibus Crucigerorum valdè obnoxius: ad subitos igitur incurfantium impetus arcendos, præsidium ibi Vitenes communicare, primo vere, jubet. Ægrè patiebatur Bertoldus tam opportunum passum sibi eripi: invecus ergo cum exercitu in operas, opus omnino disturbare conabatur, sed quòd hoc ipsum ante suspicari Litvani expeditum ad occasionem militem in proximo posuissent, facillè rejectus est. Aliò itaque inde vim convertit: Mederabum undè sæpiùs erumpentes præfidiarii infesta omnia in propinquis Prussiæ agris reddere, nec pauca damna inferre soliti erant, insperato impetu occupavit, pluresque Christianos ibidem carceri addictos, libertati asseruit. Majoribus deinde copiis inter quas, è solo Crucigerorum ordine mille equites erant, ipse Magister Meneho Litvaniam ingressus, Pastonoviorum  
& Ger-

& Gerfoviorum agros funesta populatio-  
 ne in cineres planè redegit. Eum ingenti  
 cum præda abeuntem affecutus Iezbuto,  
 extremum agmen premebat, cui fortè præ-  
 erat Henricus Sutswert. Hunc conspicat-  
 us Iezbuto, simulque superioris ignomi-  
 niæ memoriâ accensus, tota vi ipse in ho-  
 stem invehitur, & gladium humero adigit:  
 à vulnerato jam Henrico, hastili medius  
 confossus, cum primus in terram rueret  
 averso gladii ictu instantis victoris digi-  
 tum abscidit. Iam concurrentibus Duci-  
 bus ardere prælium cæperat: jam fortissi-  
 mus quisque ad tutandum extremum ag-  
 men à fronte decurrere; sed cum & Litva-  
 ni amisso Duce cederent, & Crucigeri  
 (quodd insidiarum metu à castris avelli me-  
 tuerent) non instarent; pugna utrinque  
 absque clade & victoriâ dirempta est: præ-  
 da verò omnis, spectante, & fremente Lit-  
 vano, abducta in Prussiam. Exeunte dein-  
 de Iunio, idem Henricus mille quingento-  
 rum equitum legione per Iunigediæ agros  
 prædas egit, ipsaque arce ita potitus est.

*Iezbuto  
 Litvanns  
 Dux casu.*

*Iunigedia à  
 Ragnetanis  
 capitur,  
 stragemen-  
 te.*

Cate-

Cæteris circa iter ad insidias dispositis, unam tantum Ragnetanam cohortem ad ipsam præsidii portam rectà contendere jubet. Præfidiarii indignam rem æstimantes, contra exiguam illam manum muris se tueri, maturè in venientem hostem decurrunt: atque jam effuso cursu impavidi insidias prætervecti erant. Tum primum hostis magno impetu confurgit: voces & rela undique erant. Pauci quos primùm sublati clamor retrò statim egit, evaserunt: reliqui, quos audacia longiùs provexerat, cœuntibus utrinque cohortibus intercepti, & cæsi. Inde populabundus miles Oncaimū ductus arcem oppugnavit, & viciniam exussit. Cum hæc ad Prusfiæ limites gererentur, Vitenes, vel auctore, vel conscio ipso Boleslao Mazoviæ Duce, per subjectas ei ditiones exercitum, absque cujusque injuria, in Polonos duxit: totamque Cujaviam incredibili celeritate, antequam Poloni ad arma concurrerent, planè populatus, opulentam prædam abegit. Apud solum Dursbüchium reperiō,

hac

• *Vitenes va-  
stat Cujaviam.*

hac etiam expeditione , magna vi pugnatum esse , cum Ladislaus & Casimirus Polonorum Duces , Magisterque Prussiæ Meneho , abeuntem Litvanum secuti essent : sed multitudini hostium tumultuariam Polonorum paucitatem cecidisse , Crucigerorumque auxiliares copias multis in prælio Germanorum amissis , fusas , fugatasque. Intentus proinde in ulciscendi opportunitates Meneho , refeito, auctoque exercitu, totis omninè simul viribus , Litvaniam intrare constituerat, igne & ferro quàm profundissimè grassaturus : & jam fines inter sylvas transgressus , propediem erat legiones infestas ad agrorum vastationem dimissurus. Vitenes quòd in arcendum aperto campo hostem non satis vires collectas haberet, arte rem suam cæpit agere: dispositis per opportuna sylvæ loca armatis , cùm Prussorum reliquiis (quos suapte Crucigerorum dominationi infensos , auctis criminatione variâ odiis , faciles ad prodicionem repererat) condicit , ut inchoata per suos à fronte pugna , ipsi à lateribus in

C c                      hostem

An. 1292.

*Crucigeros  
ab infestatione Lit-  
vanie re-  
jicit.*

hostem inveherentur. Monitus de prodictione Meneho , ante destinatum pugnae diem , vix se periculo eripuit , exercitu in Prussiam ægrè recepto. Neque ferè amplius quidquam eo anno utrinque actum : nam & Crucigeris erat metus ex suspitione , ne quid à Prussis capto per absentiam militis tempore domi novaretur : & Litvanis commodius visum ; expectare donec in Prussiâ aliquid turbarum erumperet : nam injecta nuper à Vitene libertatis mentio , & cupiditatem ejus facilè inter Prussos moverat , & sacrorum Christianorum odium : quod deinde sermonibus popularium fovebatur , atque inde rebellandi studia gliscebant. Quare Conradus Stange Ragnetanus Præfectus , cum intellexisset Litvanum in vicinia sub Ingedino armari , ne qua daretur Prussis occasio ad propinqua castra transfugiendi , sub initium rebellionis collectum militem subito est aggressus , & non paucis casis universos dissipavit. Tempore deinde ipso ( *ferè enim populo breves affectus sunt* ) evanescentibus in-

bus inter Prussos rebellandi studiis , soluti  
 eâ curâ Crucigeri , ad externa bella rursus  
 redierunt. Cum bis Menehō ipse in Lit- *An. 1293.*  
 vanos duxisset , à Iunigedo , & Vistâ archi-  
 bus rejectus , in urbana duntaxat ædificia  
 flammis defæviit. Missi à Vitene , qui ab- *Skaloviam*  
 euntem hostem ita sequerentur , ut vitatâ *in Prussia*  
 quâ exercitus redibat viâ , flexoque ad par- *Litvani*  
 tem agmine , improvise præsidium aliquod *vano even-*  
 occuparent. Consilium id erat Prussi cu- *tu tentant.*  
 juspiam , qui nuper ad Vitenem transierat:  
 hic , ne auctor suspectam rem faceret, ipse  
 aut focium, aut Ducem se ei facinori offer-  
 re ; miles daretur, instare. Absolvebat præ-  
 terea omni metu spem , quòd ex redeuntis  
 exercitus sui , post vastatos hostium fines,  
 famâ , præsidia Crucigerorum finitima , so-  
 lutiore curâ agere putarentur. Longè ta-  
 men ultra vorum eventus hæsit. Skaloviti-  
 cum oppidum, & arx ad subitam illam vim  
 destinata fuerant. Et quidem facilè primo  
 impetu cæsi sunt , quos ignaros omnium,  
 armatis venientibus casus objecit ; cecidit-  
 que ibi Ludovicus Osse, primæ apud suum

ordinem nobilitatis : cæterum non potuit negotium tantâ celeritate expediri , ut in-  
 vectus toto cursu miles , portis non exclu-  
 deretur. Instabant tamen Litvani , & eo  
 quo venerant impetu, de viâ in muros sub-  
 ire nitebantur ; atque jam pænè munitio-  
 nes capiebantur , quamdiu *ex primâ periculi*  
*specie , turbati prædialiis animi , non satis ( ut in*  
*subitis solet ) quid agendum viderent*. Sed sen-  
 sim tandem ad audaciam redeunte consi-  
 lio , Conrado maximè & Alberto de Inda-  
 gin allaborantibus , Litvani qui primo im-  
 petu in muros evaserant , loco ægrè sub-  
 moti , & arx quamquam cruentâ satis di-  
 micatione , retenta. Litvanus , potiundæ  
 arcis spe dejectus, ad prædam militem ver-  
 tit : oppidum exustum, & agri vastati. Me-  
 liore deinde longè successu reposuit vicem  
 Litvanis, Conradus Strange : nam ad Octa-  
 vum Calend. Augusti, simili arte Mingedi-  
 num in Litvania arcem occupavit : cæso  
 præsidio omni , imbellem sexum atque è  
 vicinia agrestem turbam, cum reliqua præ-  
 da captivam eduxit. Ad eum nuncium Vi-  
 tenes

*Prussiam*  
*Vicines per*  
*tres menses*  
*vastas &*  
*tandem fu-*  
*gatur.*



tenes copias quas ingentes in aliam expeditionem fortè comparatas habebat, citato agmine rapit. Sed jam Crucigeri confecto negotio maturè excefferant: sequi tamen ille abeuntem, domi suæ hostem vestigare; & cum nuspiam exercitum aut castra reperiret, quaquaversum populabundis legionibus vagari. Trium ferè mensium spatium per universam Prussiam cædes ac flammæ circumtulit. Crucigeri interea libero campo congregati ferocienti multitudini non ausi, occasionem gerendi observare: in reditu tandem, cum inter angustias, quas ingens turba & præda impeditiores reddebat,prehendissent, interneccione pænè Litvanos delerunt, paucos cum Vitene ipso, amisso reliquo exercitu, sylvæ & fuga servarunt. Toto deinceps anno vehementer Litvania Crucigerorum armis, maximè Ludovico Libentelle, per intervalla excursionses instaurante, divexata est. E Pistoviensi tractu pecora omnia abacta, multisque mortalium cæsis, septuaginta tantum capita in servitutem abducta.

*An. 1294.  
Crucigeri  
sepius Lit-  
vaniam af-  
fligunt.*

Romnove oppidum, sacrorum & summi eorum Præsidis inter Litvanos sedes, caput & penitus excisum. Vaykenſe, & Pogradienſe, apud Samogitas territorium, cædibus & prædis exhaustum, in plures annos vix incolas habuit. Denique qui inter Narwiam, & Nemenum fluvios Litvani nominis populi confederant, sub moleſto hoſte, perpetuoque bello, nunc primum laborare cæperunt: eo demum ſequentibus ſexennalis belli malis compulſi ſunt, ut & tributum Crucigeris penderent, & ſolicitati deinceps ad ſocietatem belli à popularibus, neque arma contra hoſtes reſumere auderent, neque excuſuris Litvanis liberum permittere tranſitum. Mirari proinde fatiſ nequeo, quid conſilii fuerit Viteni, quodd is (quaſi ſenſus tanti vulneris ad eum non perveniſſet) viſus ſit eam Reipublicæ partem, aut omninò negligere, aut vix curare; ſtudio univerſo in alia conſumpto. Nam per idem ſerè tempus, tanquam ſi omnia domi in ſecuro ab hoſte haberet, cum expeditis mille octingentis equiti-

*Viteneſ Poloniam invadit, Lenciam occupat.*

equitibus per confinia Mazoviæ in Lencienſem provinciam penetravit. Dies for-  
 tē ſolennibus feriis celebris agebatur, qua-  
 re ingens eo agreſtium, nobiliumque mul-  
 tudo, è vicinis pagis ad ſacra confluxe-  
 rat. Improviſò, & ſtatim ab itinere, Vite-  
 nes oppido potitus, ad templum negotium  
 & panē periculum repent : nam ruentem  
 temerē militem incluſa templo multitudo  
 conſternatione in audaciam verſa, pertina-  
 ciſſimē rejiciebat ; conjeſtis in ſubeuntes,  
 quæ caſus iraque dabant telis : ſed ſuccen-  
 ſis in coronam vicinis ædibus, & fumo ac  
 flamma plerique exanimatis, tandem tem-  
 plum crudelitati diripientium ceſſit. Du-  
 ctus inde ad vicinorum agrorum prædas  
 miles, ingentem cladem, quamquam brevi  
 ſpatio intulit. Caſimirus interea Lenci-  
 enſium Dux tumultuariam contra ſubi-  
 tum hoſtem armat manum, aſſecutus haud  
 procul Sohaczovia Litvanos, fortiter ma-  
 gis quàm feliciter ſigna confert. Illud, non  
 dubito, totam rem præcipiſſe ; quòd  
 contemptâ hoſtium paucitate, non ſatis  
 omnia

*Casimirum  
 Ducem  
 Lencien-  
 ſium edũ.*

omnia ante ex ordine ad pugnam prospexisset : ratus solo tumultuarii militis impetu , paucos prædatores opprimi posse. Itaque & ipse, magis jam miles, quàm Dux, in confertum hostem ruere , & cum semel impetus ad votum cessisset , iterùm hostilem aciem conari perrumpere ; *sed inconsultum sæpe est, nimia audaciâ diu fortunam irritare ;* cæsus tandem ab hostibus, exercitum quoque perdidit. Nam amisso Duce, facilè miles fusus. Paucos fuga cladi extulit ; quod qui hostem evasissent , in Bzuram illati , plerique aquis non ubique vadosis haurirentur. Sub pugnæ tempus non pauci captivorum diffugerunt ; tantam tamen multitudinem, eâ vice eductam constans apud scriptores fama est , ut ad triginta sex millium numerum ascenderit , cedentibus in singulos militum viginti capitibus. Hyems successit , & cùm aliquandiu temperatum esset utrinque ab armis , Crucigeri instauratis excursionibus aliquot præsidia in Litvanâ occuparunt. Magister ipse exeunte jam hyeme Gerfoviam & Pastoviam latè popu-

*Triginta  
sex captivo-  
rum millia  
abducit.*

*An. 1295.*

populatus , arcibus binis exustis , cùm ad tertiam plùs negotii , quàm tempus ferret, reperisset ; ne advolante cum suis Vitene ; rem periculo permetteret ; oppugnatione relictâ , prædam in Prussiam dimisit : ipse militem in Mazoviam duxit , ubi Vizmàm cùm expugnasset , funditus excidit. Nam quamquam tunc Mazoviis & Crucigeris fœdera publicè essent , Boleslaus tamen Dux , Polonis Crucigerisque privatim infensus , præsidium Litvanum eo loco alebat. Polonorum inde Prussorumque agris ingentia sæpè capto tempore damna , è propinquo inferebantur. Latuerat diu fraus: quòd enim neminem , inter prædatorium agmen , nisi Litvanum agrestes unquam conspicerent, opinio erat ex Litvaniâ ipsâ, toties excursiones repentinas instaurari. Re deinde vulgatâ ; Boleslaus de injuriâ querentibus respondit. *Se Litvanorum aliquot cohortibus ad suorum præsidia , non ad sociorum injurias uti. Si quid fortè illi attentassent , id quia se invito omnino atque inscio contigisset, fœderibus qua sibi cum Crucigeris intercederent , fraudi*

*Præsidium  
Litvanum  
Vizna in  
Mazovia à  
Prussis dele-  
tur.*

D d

esse

*esse non debere. Curaturum porrò, ut ne quid deinceps simile ab suo stipendiario milite socii paterentur. At cum nihil ultra verba præstaret, & neque præsidium de arce deduceret, neque injurias prohiberet, vi admotâ à Crucigeris negotium transactum est. Boleslaus nequicquam interea violata fœdera criminari. Per Æstatem nihil fermè majore mole gestum: paucissimo tantum milite excursiones utrinque tentatæ, & quoddam facillè mireris, simul, ac velut è condicto. Crucigeri ultimis Iulii diebus in Grodnenses agros intenderant, tentaturi quod occasio commodasset: centum quinquaginta militum manus erat, ductu quinque ejus ordinis equitum. Destinaverant illi missis equis, naves conscendere; & tacitè sub ipsa mœnia exposito milite præsidium insperato adoriri. Fortasse profecissent aliquid, nisi cùm è via oblatum in ripa pagum spoliant: intempestivâ prædatione, consilia prodendo; eventum corrupissent. Elapsis enim inter eum tumultum aliquot agrestibus, & in arcem delatis, præfidiarii hostem eumque*

*Mutue  
Prussorum  
& Lituanorum  
excursiones.*

que exiguum in fluvio esse moniti , armati  
 naves conscendunt, & in venientes magnâ  
 vi incurrunt ; editâ inde strage , accepta-  
 que, (desideratis nimirum septuaginta) vi-  
 ctoriâ tandem potiuntur. Rejecti ita inde  
 Crucigeri , Iunigerdam versùs cursum di-  
 rexerunt : sed cùm fortè naves inter bre-  
 via hæssissent ; Litvani è propinquo convo-  
 lant ; & pars navibus , pars vadando impe-  
 ditum hostem adoriuntur : captæ naves,  
 & fortissimis virorum cæsis , reliqui ægrè  
 se fugâ salvarunt ; ducibus omnibus , uno  
 excepto,amissis. Feliciùs Ludovico Liben-  
 tele expeditio cessit : nam & Kimelos ar-  
 cem sæpiùs antè magnâ mole , sed irritò  
 conatu oppugnatam in Litvania cepit , &  
 Grodnenses signa secum conferre ausos  
 cecidit. Non ex integro tamen ejus suc-  
 cessus voluptate , fruitus est. Domum re-  
 versus Skaloviæ suburbana ædificia à Lit-  
 vanis vicissim exusta ; Ragnetam etiam  
 (cujus præfecturam administrabat) adhuc  
 fumantem & per universam eam insulam  
 pecora omnia prorsus abacta,reperit. Præ-

D d 2                    lusum

An. 1296.  
*Vitenis in  
 Prussiam  
 & Livoniam expe-  
 ditio.*

lufum est his tanquam velitationibus futuro anno, quo Vitenes totius exercitus robore bellum gessit. Culmensis imprimis Provinciam in Prussia & Golubrenses agros, latissimè populatus, ingentem inde prædam eduxit. Livoniam deindè invasit: sed nihil ferè ibi memorabile gestum, quòd mox exercitum reducere coactus esset in Litvaniam. Hostem enim domi magnis viribus grassari fama erat; atque hinc in exercitu de suis timor, cumque unum ab altero in dies magis cresceret (nam *ut fama timorem, ita timor famam auget*) signum receptui datum est. Cæterùm & Balgenfis Præfectus Sigfridus per Grodnenses agros prædis tumultuariè actis, cum ducentis captivis jam è Litvaniâ abierat, & Henricus Sutsfert, à Bertoldo Regiomontano præfecto ad ipsam arcem obsidendam missus, gravi clade accepta priùs victoriæ desperatione, quàm Vitenis redeuntis timore, ad excedendum finibus coactus est: tamen ut fugientis specie iter maturaret, neque permetteret de via militem prædis immorari,



rari , non parum contulerat fama propè diem è Livonia exercitus affuturi. Reverso è Livonia Vitene , domesticæ inter Rigen- ses & Magistrum Crucigerorum turbæ ex- ortæ, initia prima biennali bello dederunt. Expugnatis Ethnicis jam Equestris illius ordinis *opes* , & cum opibus cupiditas magis cre- verant , quàm ut quenquam in Livonia pari secum jure ferrè possent. Fodicabat impri- mis cupidos dominandi animos, Reipubli- cæ Rigenfis status, liber & opulentus: quæ urbs ejus regionis & prima & præcipua est; populo commerciisque frequens. Qui eam olim condiderunt , Lubecenses erant: primi in illa littora è Lubecensi portu , vel errore delati, vel vi fluctuum projecti com- mercia & sacra Christiana intulerunt. Cùm deindè ab indigenis Lotavis bello preme- rentur , ne armorum sollicitudine à com- merciis impedirentur , Archiepiscopi sui curâ evocatos è Germania equites , vulgò *Fratres Ensisferos*, postea *Crucigeros* dictos, bar- baris objecerunt. Devictis ac penitùs sub- jectis per eos incolis , ipsi libertatem suam

*An. 1297.  
Dissidia in-  
ter Cruci-  
geros &  
Rigam in  
Livonia.*

D d 3

ut opti-

ut optimo jure sibi debitam, ita toto conatu retinebant. Contra, Crucigeri niti: vi atque artibus dominationem urbis ambire. Obfistebat quidem conatibus eorum, Ioannes Quirinus Præsul Rigenfis, sed illo demum capto, atque in carcerem coniecto, proculcata omnis æquitas, rem ad apertum bellum deduxit. Rigenfibus quidem nec spes, nec vires pares: quia tamen suum cuique jus, pacem & modum facere non posse videbant; necessitate ipsâ; arma & illi corripuerunt. Hinc in Litvania in spem apud plerosque ventum erat; Livoniæ statum intestina discordiâ graviter laborantem dissolvi posse; si vis externa ad-moveretur. Agere ergo aliqui Primorum cum Vitene, ne maturam occasionem elabi fineret; sed bellum totis simul opibus Crucigeris inferret. Plebs etiam, milesque mirari; *cur Princeps inter civilia negotia solidum annum jam traheret: cum ad proferendam dominationis cogitationem, tanta opportunitas invitaret? An nesciret, Patrum memoriâ magnam Russiæ partem tum occupatam, cum Russi Duces domesticis*

*sticis discordiis distraeti, singuli impares hosti essent?*  
At verò cautus Princeps, ut non ignorabat discordias hostium peropportunas sibi esse; ita satis perspiciebat opportuniore co anno in rem suam fore quiescenti, quàm bel-  
lanti. *Recentes enim in quavis Republica discordia, tanquam vulnus corporis, facillè curam admittunt, nec nisi cum tempore virus ac vires sumunt.*

Itaque inter quietem intentus in eventum bello Livonico abstinuit, ut discordias hostium promoveret: nam *quemadmodum externus timor concordia vinculum est*; ita quies ac securitas, *dissensionum fomes*. Sed neque in Polonos aut Prussiam, quidquam interea movit: seu quòd nesciret, quàm diuturnum Rigense illud bellum futurum esset; time-  
retque, ne (ut *sapè repenti inter suos convenit*) pace rursus inter se factâ, militem quem in castris expeditum haberent, contra communem hostem in Litvaniam, se absente, immitterent: seu quòd (atque id magis crediderim) in futuri belli casus vires in integro conservatas vellet. Nam quanquam suâ sponte Vitenes in Livoniam non movisset;

An. 1298.

*Litvani à  
Rigenſibus  
contra Cru-  
cigeros evo-  
cavuntur : eo-  
rumque ibi-  
dem geſta.*

viſſet ; ſpes tamen erat , fore ut à Rigenſibus , qui tanto bello per ſe impares eſſent, grandibus ſtipendiis ad ſocietatem armorum ſolicitaretur. Factum ut ſperabat ſequente anno : oblatâ ſtipendiorum pollicitatione exercitus juſtus conſcribitur, qui biſariam dividendis viribus ſufficeret. Legio una ad Novomlini oppugnationem, & vicinorum, circum circa agrorum direptionem, Rigenſibus attributa. Robur autem exercitus, ipſe Vitenes ſub Carcum admovit, acta oppugnationo ſtrenuè, ſuperatæ tandem vi munitiones, capta arx : reliquâ turba cæſâ, quatuor ſoli equites præſidio Præfecti, cum delectis captivis, ſervati. Inde ad prædationem victores dimiſſi, latiffimè vaſtitatem circumtulērunt ; agris pagisque igni ac ferro fædatis. Haud procul Livonico ſinu populabundos Bruno Magiſter aſſecutus, magno imperu ad Treidenum amnem prædâ jam plenos invadit. In arcto ab initio fortuna Viteni erat : fortaiſſe quòd ( ut inter prædas contingit ) exercitu uti ad manum non poſſet, ſparſis per agros cohortibus.

Cæſis

Cæsis octingentis Litvanis ; & tribus captivorum millibus ereptis jam victoria & spes non dubiè videbantur ad Crucigeros inclinari , & Litvanus in fugam. Sed *desperatis rebus sæpè pro remedio fuerit , locum fuga defuisse.* Cum à tergo mare , à latere Treidenus amnis arcerent ; ab alio latere & fronte premerent hostes : effugiendi desperatio , pugnandi necessitatem fecit. Surgit nova animis audacia , instauratur magnâ contentione prælium : tantusque repentinus ille ardor fuit , ut vincentis propè hostis impetum , simul & stiterit & fregerit, atque eodem deinde conatu in fugam impulerit. Fusæ Crucigerorum copiæ ; millia aliquot cæde absumpta : Magister ipse cum viginti ferè sui ordinis equitibus , in prælio cæsus. Iunius mensis tunc decurrebat & planè bello tempus : sed *onustus prædâ miles , vix via sufficiens , nedum bello gerendo ,* domum reducendus erat. Reductus igitur quacunque transfiret, ignem ac ferrum trahens. Iussi nihilominus , qui Novomlyni oppugnationem inchoaverant, opus pertinaciter

E e

naciter urgere. Quatuor millia simul cum  
 Rigensi milite in iis castris erant, neque  
 segniter obsessis instabant. Sed pænè per-  
 actam rem Bertoldus Brunhaim Præfectus  
 Regiomontanus cum auxiliis Prussicis in  
 Livoniam missus restituit in integrum: re-  
 cente exercitu exhaustos molestâ oppu-  
 gnatione Litvanos aggressus, vicit fugavit-  
 que: cæsi plures; plerique fluvio in quem  
 fugientibus incurrere necesse erat, hausti.  
 Paulò post Vitenes, seu quoddã vereretur ne  
 afflictæ suâ victoriâ Livonum res, auxiliis  
 Prussicis contra Rigam reficerentur, &  
 propterea domestici tumultus famâ, à Li-  
 vonici belli cogitatione Prussos abstrahere  
 vellet: seu ut acceptam legionis ad No-  
 vomlynum cæsæ cladem redderet, leves  
 aliquot prædatorias cohortes in Prussiam  
 immisit. Et quidem initiis ejus excursio-  
 nis, non infauti progressus erant. Ultra  
 cætera damna hosti illata, Strasburgum  
 oppidum ipsis D. Michaelis feriis exeunte  
 Septembri direptum est, magnâ inter po-  
 pulum, qui frequens ad templa confluxe-  
 rat,

*Prussia à  
 Litvanis  
 infestatur.*

rat, editâ cæde. Multa ibi insolenter atque sacrilegè in Christianas religiones tentata, fædâ sacrorum vasorum violatione : sed ut raro post ejusmodi scelera tardat pana : in ipso reditu vindicem contempti Numinis iram Sacrilegi prædatores experti sunt : à Præfecto Culmenfis Provinciæ, Conrado Sak universi prorsus cæsi. Prosperiore longè *An. 1299.* fortuna usi sunt sequente anno sexcenti equites. Cunno Brandeburgensis Præfectus justis copiis Litvaniam ingressus, finitimorum præsidiorum Iunigerdæ & Pistæ ædes extra vallum fitas exusserat : inde, auctum validâ Ragnetanorum manu exercitum, in interiora navibus deportabat. Occurrere secundo & flumine & imperu Litvani ; atque uno è suis duntaxat desiderato, hostem ab eo cursu averterunt. Cùm hæc navalis concertatio in Nemenò institueretur, sexcenti equites in Prussiam irruerunt, & vastatis de viâ agris, trepidatione viciniam impleverunt ; ignaris agrestibus quod & quantis viribus, imperum hostis daturus esset. Monitus de hoste Cun-

E e 2

no, &

no, & fuspicatus Natangiam (hæc enim in proximo erat) ab eo peti, rapit ab itinere citatum agmen, captoque ad infidias ſtruendas oportune loco, tranſiturum illac, operitur. Oppreſſi fuiſſent proculdubio Litvani; ſi incautiùs rem agentes, infidiis ſe iis induiſſent: ſed fraudem mature per vigiles ſubodorati, tamdiu profundioribus ſylvis arma occultarunt; donec Cunnoratus eos jam exceſſiſſe, atque adeo omnia ab hoſte tuta, exercitum dimiſiſſet. Tum primùm Litvani è latibus coorti, ſecurè per agros effundi: atque univerſam provinciam miſerè vaſtare. Cæſis plurimis, prædaque aliâ pleni, ducenta tantum & viginti capita in ſervitutem eduxerunt. Continuata etiam ſequenti anno in Livoniam Pruſſiamque expeditiones: & inſtauratis identidem levibus excuſſionibus, utriuſque provinciæ equites magis exagitati, quàm attriti. Aliquot cohortes expediti militis iis occaſionibus Litvani amiſerunt; quas Præfectus Brandeburgicus inter anguſtias deprehenſas ita cecidit, ut  
tres

An. 1300.



tres soli ad nuncium cladis, cladem vix  
 evaserint. Secutis deinceps inter Rigam &  
 Livonicos equites inducis, à Livoniâ tem-  
 peratum: quod novi per id tempus in Po-  
 loniâ, post exactum nuper regno Ladi-  
 slaum Lokietek, exorti tumultus, facilito-  
 rem ibi prædationem pollicerentur. Sex  
 millia igitur in Dobryniâ insperato im-  
 petu immissa, universam Provinciam planè  
 vastarunt. Communis sociorum clades,  
 involvisset etiam Culmensès agros, nisi  
 Drweça solito magis aucto alveo difficiles  
 transitus, onusto jam prædâ militi, reddi-  
 disse. Tumultuaria Polonorum manus,  
 abeuntem Litvanum affecuta quidem fue-  
 rat, & spe recuperandæ prædæ, ab itinere  
 in ultima agmina animosius invec-ta: sed  
 cum robur ibi ipsum exercitûs reperisset,  
 & impedimenta omnia in frontem aciei  
 subducta; non ausa collatis signis ad ju-  
 stum prælium fortunam deducere, rece-  
 ptui cecinit. Accendit levis hic successus,  
 majoris prædæ cupiditatem: quam, ut semper mi-  
 liti, ita maxime in secundis eventibus moderari per-

*E Livoniâ  
 in Polo-  
 niâ arma  
 Litvans  
 vertunt,  
 Dobryniâ  
 vastant.*

*An, 1301.*

*Culmenſes  
agros infe-  
ſtans, &  
proſugan-  
tur.*

*difficile eſt.* Quia verò integer exercitus in Culmenſem agrum transportari opportu-  
nè non poterat, Ducum hortatu promptiſ-  
ſimi quique ac fortiffimi equites, operam  
pro exercitu ſuſcipiunt. Delecti è toto  
numero centum, qui fluvium tranſierunt;  
atque tantillo numero, medios in hoſtes  
ſe immittere auſi: vaſtaverunt aliquantum  
agros, priùs quàm è vicinis præſidiis mili-  
tem Crucigeri in campum rapuiſſent: his  
deinde confluentibus ſædè proſligati, cùm  
ſeptuaginta amiſſis reliqui agrè evaſiſſent,  
ad ſuos delati, magnâ trepidatione caſtra  
impleverunt. Certè, tantùm in urgendo  
itinere properatum, tumultuatùmque eſt  
per caſtra: ut res, ab effuſâ fugâ, nihilo  
differret. Hinc deinde accidit, ut cùm per  
Narviam tumultuariè trajicitur, magna mi-  
litis & prædæ pars vorticeibus hauſta pe-  
rierit. Neque meliorem eventum alteri Lit-  
vanorum manipulo Lubaviæ exſpoliatio  
attulit. Quinquaginta equites (poſt vaſta-  
tos agros, agreſtiumque plurimos, quos  
inermes ſubita viſ occupaverat, cæſos)  
prædam

prædam & captivos securi domum ducebant; hi à Crucigeris ex itinere circumventi, pœnas temerariæ seu audaciæ seu cupiditatis luerunt; commilitonibus quindecim & non exiguâ parte prædæ, amissa. Litvanis Crucigerorum agros infestantibus, neque ipsi quieverunt. Conradus Magister ingenti exercitu Samogitiam aggressus, Kariszovianum agrum latè depopulatus est. Exigua tamen in homines edita strages; quòd incolæ, ædibus ad hostiles injurias relictis, se & quidquid cariùs amarent, silvis profundioribus abdidissent. Eodem anno Onkaimum arx proditione perditâ. Draico erat arci Præfectus, Christianis sacris suaptè pridem antè addictus. Hic, quòd hac religione superos colere, inter suos fas non esset, ad hostem transire destinat: sed priùs insigni proditione eundem demereri. Internuncio itaque Pinnone filio, communicata cum Volrado Ragnerano Præfecto consilia; condictus dies: Draico rùm ipse nocturnis excubiis præerat, cùm Volradus per tenebras exercitum

*Crucigeri  
vicissim  
Litvaniam  
infestant.*

citum arcis admoveat : apertis portis , acceptus intra arcem ; militem , omnemque ætatem bello habilem , penitus excidit ; pueris ac fæminis in servitutem redactis.

Vnicus Sudagonis filius, ingentis ut fortunæ, ita & animi juvenis, cum accepto gravi vulnere , neque amplius se tueri , neque pertinacius pugnando , hostem ad cædem sui irritare , potuisset , captus & servatus.

Proditor cum universa familia Ragnetam translatus ; Christiana, ut sponderat, facra suscepit.

An. 1302.

*Bellum inter Polonos & Russos, quibus Litvani suppetias ferunt, atque funduntur.*

Belli deinde Polonici cum Russis societas , à Prussicis Livonicisque expeditionibus Litvanum avertit. Lublinum quod septem & quinquaginta ante annis Poloni amiserant, armis apud Russos repetebant. Magnis utrinque viribus id bellum procuratum gestumque : præsertim à Russis, qui Scythas & Litvanos inter auxilia adsciverant. Commisso prælio Polonu superior fuit. Nam cum Lunæ instar diductis in cornua latè utrinque alis , mediam aciem Russi extenuassent , Polonus totâ vi in unum cuneum collectâ, facillimè

gravio-

graviore equite medios ordines perrupit,  
 viamque ad victoriam aperuit. Neque am-  
 plius Russi aut prælium restituere; aut re-  
 sistendo, victoriam morari: effusi in fu-  
 gam, cæduntur à victore Polono. Pluri-  
 mis tunc saluti fuit Lublinum in proximo  
 fuisse: quanquam & hoc cladi, quam tan-  
 tisper distulit, avertendæ non suffecerit.  
 Aucto enim intra vallum milite, cùm com-  
 meatus pro numero non esset, neque in-  
 ferri, intento in omnia hoste, posset: tam-  
 diu obsidione victor urbem fatigavit, do-  
 nec fames deditionem extorsit. Non exi- *An. 1303.*  
 guam ejus cladis partem, ad Litvanos per-  
 tinuisse, non vana suspicio est; quòd an-  
 num deinde integrum reparandis quiete  
 viribus, impenderint. Sed abruptere breve  
 otium novi è Prussia motus. Vernerus Co- *An. 1304.*  
 mes de Honenberg, & Adolphus de Wen- *Bellum*  
 timel, alique Rhenanæ militiæ Proceres, *Prussorum*  
 in Prussiam fortè venerant. Accessione ho- *contra Lit-*  
 rum auxiliorum Conradus Magister ere- *vianos.*  
 ctus, duplici exercitu Litvaniam aggredi-  
 tur, & Grodnenses agros quàm latè pate-  
 F f                      bant

bant vastissimè populatur. Regiomontanus quoque Præfectus Everardus de Wirneberg Onkaimo arce, quam à Prussis nuper everfam Litvani instauraverant, rursus Suirtilonis proditioe potitus, præsidium excidit & munitionem solo æquavit. Inde in circumjacentes agros debacchatus, ingentem cladem edidit, cum ipse vix triginta è suorum numero desiderasset. Sequente anno cum ad comitia utrumque ordinem Vitenes evocasset, Sambienfis Præsulis Præfectus Philippus de Hollandia, per ducum nobilitatisque absentiam gerendi occasione captatâ, finitimis agrestibus vastitatem intulit. Vbi hostem adesse, & flammis in agros vicosque sævire nunciatum est: Princeps ipse, levem mille quingentorum militum equitatum ad reprimendos ultteriores progressus citato agmine rapit. Iam Prusli finibus excefferant, cum insperatus Vitenes à tergo securos adoritur: prælium tunc totum intra extremos cœuntium ordines stetit: nam seu aliâ quavis de causâ, seu quòd ignota utrinque

An. 1305.

*Vitenes  
Crucigeros  
predatores  
insequitur.*

que exercitûs multitudo , suspectum pugnae eventum ducibus redderet, cæsis hinc & inde aliquot , à graviore conflictu cessatum est. Circa idem tempus in Livonia ad Dubnam pugnatum traditur : sed neque causæ , neque eventus pugnae , memorantur. Reverso è Prussia Principi , acceptus de domesticis per Poloniam tumultibus nuncius , Polonicae expeditionis animum ingessit. Collectis ad Grodnam copiis iustus conficitur exercitus : & Mazoviis, vel suapte conniventibus ; vel , quod etiam simile vero est, ignorantibus (occultis enim ac propè inviis itineribus per Mazoviæ ditionis sylvas ducebatur) in Poloniae majoris agros erumpit. Subito impetu Calisium & Stavisinum civitates occupatæ, non senserunt hostem, nisi cum flammis, & ferro, intra mœnia sæviretur. Agri circumjacentes latissimè vastantur , ingens pecorum hominumque præda abigitur. Cùm hæc in Polonia à Litvanis geruntur, nemine aut vim repellente aut abeuntes infestare auso : Conradus Magister ex Polonæ

*Reversus ex Prussia in Poloniam movit.*  
An. 1306.

F f 2                      cladis

*Proffi ab-  
sente Vitene  
Grodnam  
adoriuntur.*

cladis nuncio suspicatus, quod res erat, Grodnense præsidium cum reliquis copiis in Poloniam, eductum, Alberto Indagini commendat, ut arcem Grodnam oppidumque defensoribus vacuum insperatè adortus, in potestatem redigat. Iam è proximo arci imminebant hostes, insidiarum non malè cessurarum spe, læti: cùm coorta insolita tempestas consilia disturbavit. Vehemens pluvia, nebula crassior, & tetris nubibus propè in noctem versa lux, non armorum modò usum, sed & conspectum mutuum, eripuerant: deinde inter continua tonitrua, turbinem, & effusæ pluriæ sonitum, nec duces iussa dare, neque miles exaudire poterat. Desperatâ itaque arcis oppugnatione, quam neque inchoare permittebat tempestas, neque differre timor periculi, quod creari poterat, si paucitas suorum hosti patuisset: oppidum tumultuariè aggrediuntur. Cives aut cæsi aut capti, quibus primus irruentium impetus fugam antevertit: reliquis in arcem fugâ elapsis; ædibus spoliatis flammæ injectæ.

Major



Major ea strages fuit , quàm pro numero hostium : nam ultra trecentos stipendiarios & aliquot Crucigeri Ordinis equites non ascendebat : præda verò tanta quantam pauci avehere poterant. Sed Præfectus Regiomontanus Everardus , his nequaquam contentus , illud imprimis dolebat, eodem

- impetu arcem non fuisse occupatam : ratusque pronum futurum ex ipsis exusti oppidi sedibus eam expugnare, si majores copię admoventur ; cum sex millium legione , & centum ordinis equitibus , ipse illam expeditionem suscepit . At jam ante Vitenes præsidium arci submiserat , fortissimos quosque & similibus casibus exercitatos : qui hostiles conatus , si quid fortè *Prussi ab oppugnatione Grednæ rejiciuntur.* moliri pergerent, fortiter reprimerent. Primum insultum in muros Crucigeri sollicitè apparabant , rati exiguo præsidio totas defensionis vires intra mania tantùm collectas esse : sed præsidarii eruptione factâ , ab oppugnatione ad apertam pugnam hostem averterunt. Acta res utrinque diu & pertinaciter , gladiis , collatoque pede :

F f 3                      donec

donec Litvani in portas rejicerentur. Receptis deinde aliquantum viribus, novo ardore in pugnam itum, repulsique Prussi in castra. Tenuit ea vincendi vicissitudo utrique parti fatis cruenta, ab ortu solis in meridiem ipsam. Tandem cæsis hinc & inde audacioribus, non sine suâ clade arcis oppugnationem Prussi deseruerunt. Per idem tempus rem ut factu admirabilem, ita memoratu non indignam in aulâ ipsius Principis contigisse, traditur. In communem carcerem disparibus ex causis detrusi fortè fuerant, Litvanus & Russus: Christianus hic, ille Ethnicus. E fortuito colloquio in controversum de religionibus sermonem utroque dilapso; suadet Russus Litvano, Christiana ut sacra suscipiat: id si superis ritè voveret, & voto damnatus cereum se ingentem in Ecclesiâ locaturum, anathematis vice sponderet, futurum omnino contestatur, ut divinâ ope è carcere liberaretur. Sequitur consilium Russi Litvanus, & vix jusjurandum absolverat, cùm & catenis suaptè confractis pedes in

*Voto Christianæ religionis conceptq, divinitus è carcere liberatur.*

des in fugam cæperunt expediri, & carceris januæ sponte fugitivo patuere. Initium proximi anni, si validius gelu habuisset *An. 1307.* magnæ per Litvaniam stragi opportunam viam aperuisset. Recens exercitus, Duce *Expeditiones Prussorum contra Lituanos.* Ioanne Comite à Spanheim, è nobilissimis Germaniæ equitibus confectus, in Prusiam venerat: huic mille quadringenti Ordinis equites vires suas conjunxerant; focii ducesque, hospitibus Germanis in Litvaniam futuri. Consilium utrisque erat munitionum oppugnatione vires non terere: sed integro milite ad profundiora Provinciæ penetrare, & latissimè per ea quorum oppugnatio non esset in difficili, ferro flammisque grassari. Destituit hoc consilium eventus. Infirma enim glacies necdum ferendo transeuntis exercitus oneri sufficere poterat: itaque quodd transitus difficillimos reperissent, infectis rebus ab inchoata expeditione rediere. Primis postea mensibus æstivis, iterumque exeunte jam æstate, Puteba oppidum Iuriæ amni imminens, à Ragnetanis exustum est; civibus

*Vetus Lit-  
vanorum  
mos impo-  
nendi præ-  
sidia arci-  
bus.*

vibus aut captis aut cæsis ; paucis, qui spa-  
tium evadendi in arcem habuere , servatis.  
Nec multò post Bissenense præsidium, cum  
exacto stipendio ab arce deduceretur , in  
via cæsum est. Mos erat Principi ex uni-  
verso equestri ordine certos per vices de-  
ligere, & in finitimas hostibus arces præsi-  
dio destinare. Qui deinde submissis à Prin-  
cipe post paucos menses aliis, domum abi-  
rent , evocandi rursus in eandem statio-  
nem , cum vertente ordine ad eorum no-  
mina idem munus rediisset. Ea tunc erat  
legitima præsidiorum inter Litvanos ratio,  
exercendæ ad res bellicas *juventuti, qua otio  
facile animos audaciamque militarem solvit* , ac-  
commodata. Observatum itaque tempus  
quo octuaginta sex equites è Bissena arce  
deducerentur, Ragnetanis rei gerendæ oc-  
casionem dedit. Nam in securos ex insidiis  
composito agmine coorti , universos ferè  
cecidere. Carszoviensem deinde Samogi-  
tiæ agrum, tum eo ipso anno, tum sequen-  
tibus , ita Prussica arma infestum reddide-  
runt : ut paucis post annis incolæ despera-  
tas res

tas res in Litvaniam transferre sint compulsi. Ita desertæ propugnationibus arces Stroveita & Biverunita hosti & flammis cessere : & paulò ante Puteba arx à Spudone Præfecto prodita est. Vir hic nobilitate inter Litvanos celebris, solo Christianæ religionis desiderio cum parente ac prole universaque familia , in Crucigerorum jus suaptè concessit. Prussis finitimos Samogitiæ agros infestantibus , Litvani cum assiduo ac ferè domestico hoste , ita rem bellicam administrabant , ut domi vexati, nihilo segniùs ad externa intenderent. In Polonia Calissiam & Siradium per Octobrem populati cum vindex nullibi occurreret , præda pleni , integroque exercitu , absque pugna reversi sunt. Eodem anno in Russia Polociam expugnatam Russis authoribus accepimus : nihil illi memorant à quonam semina hujus belli jacta , cum jam longè ante , eam civitatem cum universa provincia Litvani juris factam , apud scriptores in plano sit. Samogitiæ sive ut bellum à se Prussicum in Prussiam avert-

An. 1308.  
Samogitarum  
expeditio in  
Prussiam.

G g                      rent,

rent, sive ad hostem muris populationibus vexandum Sambienfes agros latissimè vastarunt. Quinque millium exercitus erat, Ducibus Monstone & Sudargo: satis certè etiam aperto campo, cum hostem adventare nunciaretur. Sed miles prædæ servandæ, quàm hostis delendi cupidior, nolebat certam fortunam in dubios eventus

*An. 1309.* conjicere: itaque antequam hostis castra castris conferret; citato agmine, præda omnis evecta. Novi deinde per Crucigeros concitati motus, Litvanis primùm otii, tandem etiam belli opportunitatem præbuerunt. In Livonia sedatæ nuper cum Rigensibus lites, rursus Equitum Livonicorum injuriis recruduerant. Prussi verò subactâ jam planè universâ Prussiâ, captisque latè de Samogitia agris, ad Pomeraniam, Cujaviam, Michaloviam aliasque provincias Polono detrahendas animum adjece-  
*Livoniae & Prussiae inrbæ.*  
 rant. quo ipso tempore Magni in eo ordine Magistri fedes, Venetiis Mariæburgum translata est. *Ita semper ab externis praesidiis plus periculorum, quàm commadi! Socios se memine-*  
*runt,*

runt, quamdiu, nondum firmatis viribus, justus timor gliscentem sub pectore cupiditatem premit, & ad reverentiam componit. At ubi per communis hostis damna, sub titulo sociorum res suas stabiliverunt: mox ex confidentiâ virium, societatem aspernari; & cupiditate retrò acti in hostibus illos numerare, quibus grati esse nolunt. Neque difficilis deinde est armorum prætensio; ubi belli causa, semper in promptu est, cupiditas. His itaque ex causis Crucigeros in Polonica & Rigenfia bella intentis, Litvani annuo otio utcunque ab armis respirarunt. Ab ea quiete An. 1310. Gualczute Principis filius in Livoniam duxit, totamque latè populatus, ingentes prædas abegit. Ipse deinde Princeps Vitenes exeunte hyeme Prussiam adortus, per Sambiam & Natangiam ferro & flammis An. 1311. vastissimè sæviit: exustis agris, cæsis agrestibus quingenti tantum è præcipuis in servitutem abducti. Non ausi Crucigeri, aut prædas agenti occurrere, aut abeuntem sequi, datâ operâ tamdiu quieverant, quamdiu Viteni miles in armis erat. Cæterum Mutue inter Lituanos & Prussos armorum vastationes. ut primùm ille exercitum dimisit, bifariam

ditiones Litvanas invaserunt : pars cum Regiomontano Præfecto , Friderico de Vildemburg , per Pograndienses Samogitiæ agros ; pars cum Ottone à Bergen, circa Grodnam , in Litvania grassati ; plurimam prædam eduxerunt. Vitenes tum ex nupero successu, tum ex novis damnis, audaciâ simul & irâ ferocior, neque spem, neque dolorem temperare : sed furere & arma rursus bellumque apparare. E selecto milite quatuor millium copię recensæ : his ita per Aprilem Varmienfes agros afflixit ut post immanem editam vastitatem totâ omnino provinciâ nihil superesset, præter semiustulatas Elsbergæ & Varmiæ arces : vici , oppida , templa , exusta universa , & solo æquata. Iam Litvanus onustum præda militem in Bartenfes agros eduxerat ; ubi patente campo curandis corporibus confedit. Hic dum per ocium reliqua præda recenseretur, fortè spectantibus captivis, prolatum est argenteum vas sacrosancto Dei Incarnati Corpori asservando, Christiano ritu sacrum. Exhorruere Christiana

*Vitenes  
Prussiam  
vastat : de-  
inde ob  
blasphemias  
voces &  
facta à Deo  
punitur.*



stiana pectora profanatorum sacrorum, & reverentia & dolore. At Ethnicus ipsa sacra mysteria, in terram cum indignatione effundere, conspuere, pedibus proterere, totque ac tantas contumelias, sacrilegis insuper jocis onerare. Vrgere acriter captivos, *Qualem Deum colerent? eum scilicet, qui neque sibi, neque suis ab injuria vindicandis satis virium haberet.* Non diu violatum impie Numen, tanta sacrilegia inulta tulit. Sub vesperum hæc agebantur: postera verò diei aurora, meritas exegit pænas. Ad primam lucem cincti undique Litvani à Crucigeris, Duce Henrico de Plock, post consumptam in primos impetus ferociam, cæsis fortissimis Germanorum sexaginta, cum in ancipitem ab omni parte pugnam non se satis expedire possent, solutis ordinibus in fugam effunduntur. Edita ingens strages in tumultuariè fugientes: qui cædi superfuerunt, aut aquis aut fame inter nemora consumpti. Vitenes ipse graviter capite saucius, amissis castris & exercitu, solis duobus comitibus ægrè hostem, & fugæ

*Litvania  
& Samogitia  
vastata.*

pericula evasit. Vexata deinceps audaciùs excursionibus Crucigerorum Litvania, pariter & Samogitia. Pograndienses agri à Mansfeldio Brandeburgensi præfecto impunè vastati, spectantibus suorum cladem è propinquo, Manstone, Sudargo & Maffio: nam neque sola castrorum ostentatione hostem arcere poterant, neque exiguas copias aperto campo credere. Abeuntium ultima agmina per intervalla carpebant: eo fortassis consilio, ut cum levibus præliis hostem in itinere implicant, confluentibus interea Litvanis & Samogitis vires ad justam pugnam exæquarentur. Sed Crucigeri nihil cunctati, citato agmine prædam præ se agentes maturè excesserunt. Tentatæ postea Grodna & Bissena; hæc vi, illa proditione. Et proditio quidem ipsius auctoris indicio elusa, vix in caput Crucigerorum, malum non vertit: nam nisi agrestis captus, Vitenem cum armato milite in proximo latere edocuisset, Prussi trajecto Nemeni ipsi se insidiis induissent, quas Grodnæ moliebantur. Oppugnatio Bissenæ for-

*Grodna &  
Bissena  
defensæ.*

næ fortiter ab Oppidanis rejecta , hostem  
 magna militis parte malè mulctatum, re in-  
 fectâ, abire compulit. Quoniam verò præ- *An. 1313.*  
 cipuæ Litvanorum arces Nemen, aliisque  
 fluviis imminebant , autor Crucigeris fuit  
 Vernerus Ragnetanus , uti deinceps nava-  
 libus potiùs operis oppugnarentur : aper-  
 tiores enim accessus inde promittebat, un-  
 dè latera aquis obversa plerumque incu-  
 riosius munita observarat. *Navali ap-  
 paratu Cru-  
 cigeri Lit-  
 vatos op-  
 pugnant.* *2*  
 Ædificatæ ita-  
 que naves , atque inter eas una magnitudi-  
 ne & forma propugnaculo similis , pinnis  
 loricaque instructa : undè & succedentem  
 ripis aggerique militem à missilium injuriis  
 tueri, & tela in hostem ab adverso stantem  
 retorquere ex alto pronius esset. Itum im-  
 primis cum eâ machinâ , atque universo  
 classis apparatu, sub lunigedam ; ubi gran-  
 dior illa navis vi tempestatis ripæ arcis im-  
 pacta , penè sponte in potestatem præfi-  
 diariorum venisset, nisi aliarum navium ac-  
 cursu pronique fluminis auxilio erepta pe-  
 riculo servataque fuisset. Vitene de toto  
 negotio monitus instare omninò suos ju-  
 bet,

*A Surmi-  
no profli-  
gantur.*

bet, neque abſistere niſi confecta re, & univerſo navali apparatu exuſto. Surminus vir apud ſuos primæ autoritatis, bellicarumque artium peritus inter paucos, toti operi præſcitur. Ille centum minoribus navibus hoſtem ſecundo flumine navigantem aſſequitur: pugnatur utrinque obſtinatè: plurimum pugnæ, & laboris erat, ad illam grandioſiorem machinam, jaculatorum peritiſſimis inſtructam: ſed ipſa quoque, cùm præciſis anchoris in vada prono flumine impulſa, fatiſcere cæpiſſet; capta atque exuſta eſt. Surminus victor ad Principem rediit, publicè lætitiā, mærorem privatim ferens: quòd in ea victoria Gaſtoldum fratrem, cum præcipuiſ quibuſque amiſiſſet. Per æſtatem hæc contigerant: hyeme proxima Henricus Pruſſiæ Mæreſchalcus Mednicenſe territorium, iteratis excuſſionibus depopulatus eſt: ubi ſi Litvano ad audaciā numerus, & vires, in proximo fuiſſent, caſtra certò Pruſſi perdidiffent. *Quinque enim ſoli milites, vilitatis inter nocturnas tenebras excubiis, ad ipſos*

*An. 1314.*

*Quinque  
Litvano-  
rum audacia inſignis.*

ipſos pæne Duces penetrarant : hi, paucorum edita clade, raptaque, quam ferre pauci poſſent, prædâ ; incolumes ad ſuos delati, ingenti Crucigeros terrore replerunt : quamdiu lux, plus terroris fuiſſe, quàm periculi, non oſtendit. Non multò poſt Henricus, rurfus populabundo exercitu Novogrodecum uſque ferro & igne penetravit : ſpoliatâ, exuſtaque civitate, ad arcis oppugnationem, univerſum exercitus robur convertit : ſed amiſſis, inter primos aſſultus, præcipuis, deferere opus inſtitutum cogitur. Cùm verò ille Novogrodeco interceptiendo intendit, *Clades Prufforum Novogrodecum oppugnantium.* Davides Grodnenſis gubernator, caſtra Henrici haud longè inde poſita, commeatu prædaque omni abunde inſtructa, diripuit. Exinde Pruffi commeatus inopia extremè laborare : nihil enim per agros nupera vaſtatione deſolatos levandæ neceſſitati reperiri poterat : undecim dierum itinere, cùm fame conflictati, aperta itinera ne in hoſtem inciderent devitando, plerique inter ſylvas miſerrimè perierunt. Porro ut hic annus,

H h                      domi

*An. 1315.  
Vitenis ul-  
timæ in  
Prussiam  
expeditio-  
nes.*

domi utcunque hostem reprimendo trans-  
missus : ita sequens in hosticum belli se-  
dem transtulit. Medio Augusto à Samogi-  
tis Ragnetanum & Scaloviticum , territo-  
ria vastata : miles Prussicus qui è præfidiis  
sistendæ prædationi decurrerat , in arces  
compulsus : fruges messi propè maturæ ,  
ab equitibus protritæ : præda ingens , ab-  
acta. Ex cedentibus istis è Prussia copiis ;  
recentem exercitum , ad Christimemeli  
oppugnationem , Vitenes duxit : quassati  
arietibus muri ; defensores incredibili te-  
lorum immissorum copiâ aut confecti , aut  
fauciati ; præsidium quod è Sambia adven-  
tabat interceptum , ac deletum ; planè jam  
desperatam obsessorum rem fecerant. Er-  
gò Vitenes acriùs instare , & quia deditio-  
nem extorquere non poterat , congestis in  
fossas fomentis , concipiendæ , alendæque  
flammæ aptis , arcem conari succendere.  
At vulgatâ interea famâ , adventantis cum  
magno exercitu Magistri Prussiae , spem oc-  
cupandæ arcis abruptit. Abeuntem Magi-  
ster non affecutus , in finitimos Litvaniæ  
agros

agros defœvit : Vitenes etiam configere non ausus, ne impunè omninò hostis grafaretur, diversis itineribus in Prussiam regressus, similem vastitatem Crucigeris re-fudit. Neque multò post ab ea expeditio-ne reversus, ætate, bellorum curâ, variis-que eventibus confectus, cum annos duos & viginti imperasset, occubuit. Funestus hic satis annus Litvanis, morte Principis, fame insuper ac peste, populum graviter afflixit.

## L I B E R VII,

*De rebus Litvanorum sub Gedimino & Iaromuta Principibus.*

**G**ediminum stabulo Præfectum Viteni Gediminus Vitenis filius parenti in Principatu succedit. fuisse, & per cædem sui Principis ad summos fasces evasisse illi memorant: quibus rem minùs perspectam fecit, tam locorum quàm temporis majus intervallum. Nam, ut rivus fonti propior, aquam fert principio non degenerem; at ulterius progressus, hinc indè attractis sordibus sensim à puritate desciscit:

H h 2

*scit : ita ferè fama , quo magis à loco , ac tempore rerum gestarum recedit , plus de falso secum trahit.*  
Certè verustissimi annales, Gediminum vivo adhuc parente Reipublicæ curam , atque administrationem suscepisse , habent. Quare fabulæ illi de Gedimino , apud exteros inde opinor occasionem datam: quòd Pelussam primorum Principum hæredem, quanquam è Litvania jam ejectum , Magni tamen Ducis titulos pertinaciter usurpantem , Crucigerorumque armis Patriæ suæ perquam infestum , atque ut rebus suis commiserationem facilè inveniret Gediminum Vitenis stabularii filium per contemptum vocantem , Gediminus ipse , vel Vitenes ejus parens , olim Stabulo apud suos Principes Præfectus , prælio victum, confecisset. Russis certè scriptoribus , qui & Litvani nominis hanc maculam non facile in hoste dissimulassent , & ætatis suæ res pænè sub oculis actas , è vicino spectarunt , atque ex fide posteris memoratas reliquerunt , constans narratio est. Gediminum filium parenti suo Viteni omnium ordinum



dinum voluntate , suffragiisque suffectum  
 esse. Initia ille Principatus illato à Prussis  
 Livonibusque bello , non turbulenta mo-  
 dò , sed & funesta habuit. Nam sive quòd  
 rebus domi componendis implicitus , in  
 externos se motus nondum expedire pos-  
 set ; sive quòd majori mole bellum in ani-  
 mo designasset ; hosti militem aperto cam-  
 po non opposuit : quamvis eodem tempo-  
 re , inde Prussi Iurburgo & Caunâ arcibus  
 potiti , præsidii cæsis , ingentes undique  
 prædas abigerent ; inde Livones , totam  
 eam Samogitiæ oram , quæ nunc Curlan-  
 dia vocatur Litvanis detraxissent. Obtine-  
 bat tum Caunam modico præsidio , nobi-  
 litate & militari gloriâ celebris Gastoldus ,  
 jussus à Principe hostem inde quâ posset  
 arte morari ac sustinere. Verùm neque mæ- *Danna à*  
 nia neque præsidium vim oppugnationis *Crœigeris*  
 pertulit : ipse etiam Gastoldus in potesta- *Litvanie*  
 tem hostium venit , ingenti per Gedimi- *illatâ.*  
 num annumerato lytro , suis deinde reddi-  
 tus. Vrsit in sequentem annum Prussus vi- *An. 1316.*  
 ctoriam , immisso per varias vias , diversif-

H h 3

que

que vicibus , populabundo milite. Tum  
 Christimemelanum præsidium in insidias  
 pertractum, deletumque est : Pastovienses,  
 Mednicenses , Pograndenses agri vastati.  
 Plurima pars ejus cladis non possessiones  
 modò , sed ipsam etiam familiam Sudargi  
 confecit: cum insperatus hostis, conjugem,  
 filios , totamque domesticæ familiæ tur-  
 bam in prædio occupasset. Ipsam verò mo-  
 lem belli contra Gediminum arcem Magi-  
 ster verterat : ratus admota repentè vi , fa-  
 cile paucorum præfidiariorum pertinaciam  
 perfringi posse : verùm ad excitati ignis ab  
 arce signum, cum admoniti de periculo vi-  
 cini ad arma concurrerent , arcis oppugna-  
 tionem deferere coactus est. Iam non lon-  
 gè cum exercitu aberat Gediminus , Iur-  
 borgum inter & Caunam castris colloca-  
 tis. *Ardentibus hinc inde hostili flammâ vicis con-*  
*spectus fumus , fodicabat dolorem , & dolor auda-*  
*ciam ministrabat : sed plus valuit apud providum*  
*ducem , virium conscientia. Leves enim tantum*  
*ferè copię ad manum erant : robur autem exerci-*  
*tus, cum Novogrodensibus Polocensibusque auxiliis,*  
*in dies*

*Gediminus  
 Crucigeros  
 profligat, &  
 Samogi-  
 tiam eis  
 eripit.*

*in dies expectabatur. Itaque cunctatione, exspectata cladis sensu surgens furor, temperandus erat; neque omnia temere, neque nihil otiosè audendum. Carpebat per intervalla ab insidiis hostem, ita cautè ne quis casus in pralium, summam rei protruderet. At ubi universæ coiverunt copiae, tum aperto campo per Samogitiam progressus, castra hosti ad Zeymilam amnem objecit. Quatuor Samogitarum millia hosti sub ignis erant: ab his Prussus plus interea periculi metuere, quàm antè præsidii sperasset: nam nuper subactis, animus semper plus de vetere odio, quàm de recente amicitia habet: quare nunquam sine periculo illis creditur, præsertim si soli partem copiarum expleant. Neque deerant non levia suspectæ fidei indicia: ex agris palàm, clam è castris magno numero transibatur ad Litvanum: consilia per transfugas indicabantur. Incertus itaque rei Henricus de Plock Mareschalcus Prussorum, neque in partem prælii adsciscere Samogitas audebat, meritò suspectos; neque exauctorare apertè, certò hostiles vires aucturos; si læsis ea exauctoratione, plana trans-*

transeundi ad Litvanos prætenſio daretur. Defunctum ſe omni periculo rebatur, ſi diſſimulata ſuſpicionem, productos in aciem ita inter ſuos collocaret, ut extra pugnandi neceſſitatem conſiſterent, certus omnino cum ſolis Pruſſis prælii aleam ſubire: brevi tamen cohortatione omnes ad rem animoſè gerendam incitat. Fortitudinem videbatur à Samogitis exigere, donis militariſus, & libertate promiſſa: ceterum contentus omninò futurus, ſi ocioſi eventum ſpectaſſent. Gediminus verò ita aciem inſtruxit, ut Ruſſorum cohortes parte latera, parte extremam aciem firmarent: Litvani in medio conſiſterent: Tartari frontem occuparent. Incurrentibus magno impetu in primos ordines Crucigeris, Tartari, quibus ſtataria atque obfirmata in veſtigio pugna in uſu non eſt, in choros gyroſque more gentis effuſi, vim haſtatorum eluſerunt. Ita equitatus hoſtilis repentino eventu turbatus, ac pæne ſolutis ordinibus, in mediam Litvanorum aciem, cui Gediminus cum Gaſtoldo aderant, illatus, anceps

ancēps periculum subiit : præsertim quodd  
ab utraque parte interim continuis gyris,  
tūm incurfantes in latera Tartari, tūm emi-  
nūs jaculis , ingentem equorum stragem  
ederent. Pugnatum ab utrisque acriter: in-  
certa victoria , quam animi viresque exæ-  
quatæ dubiam faciebant , diutiūs pugnam  
tenuisset ; ni Samogitæ qui inter hostilia  
signa quieti hæctenus constiterant, in aver-  
sam fessorum aciem integri irruissent. Hoc  
eventu confusos Prussos , pronum erat in  
fugam impellere : verūm in fuga etiam ni-  
hil opis repertum : cum instante victore  
exercitu, Tartari celeritate equorum itine-  
ra fugientibus præcluderent : plurimos  
ferrum in fuga confecit , multi aquis ab-  
sumpti : reliquæ , quæ sylvarum beneficio  
vitam servaverant , ab aggreſtibus canum  
indicio conquiritæ , cædem non evaserunt.  
Victoriam hanc secuta Samogitiæ pars il-  
la, quæ nuper Litvano decesserat ; à Prussis  
defecit. Paucorum annorum quiete inter-  
jectâ , recrudescens rursus bellum, diverso  
prælii genere , sed non minore Prussorum

An. 1319.  
Crucigeri. è  
Litvania  
predas a-  
gentes de-  
lentur.

I i clade

clade terminatum est. Circa ipsas Augusti Calendas , Mednicenses agros ingentibus copiis ingressi, dimissis effusè in populationem maturæ messis cohortibus Litvanum ad tentandam aperti prælii aleam deducere conabantur : atque ea de causâ à populatoribus res audaciùs multò administrabatur. Sed (qui tandem plerumque audaciæ exitus esse solet) incautiùs agentes, in infidias pertracti , atque omnino oppressi sunt. Imminutis ea clade viribus totis castris secuta trepidatio , excedere maturè hostico Prussum coegit. At victores Litvani id ipsum futurum , suspicati , jam angustias sylvarum infederant , succisis ab utroque latere arboribus, aggestisque truncis, ne qua evadendi via hosti pateret. Inter has angustias universi, cum ipso copiarum Duce Henrico de Plock Prussiæ Mareschalco deleti , aut capti sunt. Gediminus victor , & attritum incommodis Prusfici belli exercitum novâ præda recrearet ; rectà inde in Mazoviam Dobryniâque movit , circa medium Septembrem : ubi

utram-

*Mazoviam  
& Dobry-  
niâ Lit-  
vani va-  
stant.*

utramque hanc Provinciam effusis populationibus pervagatus, cum nusquam arma ulla comparerent, onustum spoliis militem sine prælio in patriam reduxit. Subsecutæ deinceps biennales induciæ Magistro ordinis Carolo à Trevir procurante : five quòd auctam continuatis successibus Litvanorum audaciam ocio interjecto remittere vellet ; (*efficacissima enim aliàs est conficiendis rebus ratio, felicitum eventuum continuatio :*) five quòd interea totis viribus Pomerniam Polono ereptum iret. Hinc Gedimino spatium datum arma curasque vertendi in eam Litvaniæ oram, quæ Russiam habet proximam. Illo enim hætenus in Prussos intento, plerique Russorum Duces obsequia detrectare, & Ducis supremi reverentiam excutere ; alii etiam fœdera violare & Novogrodenfium agros armis infestare aucti. Primus belli impetus in Volyniæ confinia effusus : Volodimiria, Volodimiri Ducis sedes, obsidione cinctæ. Oppugnabatur arx, civitasque simul, pertinaci fatis conatu : sustinere nihilominus vim oppidani,

*Gediminus  
in eo anno  
Cyrucigeris  
fœdere ad  
domandam  
Russiam  
arma convertit.*

*Volodimir  
ria Dux  
profigatur  
atque occi-  
ditur.*

spe adfuturorum auxiliorum. Adfuit opportunè cum exercitu popularium, Scythicisque subsidiis, hostem à muris rejecturus Volodimirus. Dimissâ urbis oppugnatione miles in venientem hostem ire iussus : collata sub ipsis muris signa : inter solos equites qui primi congressi fuerant vertebatur pugna ; & jam Litvanus inferior esse cæperat, quòd Scythæ solitis in latera incurfantes gyris, ordines continuò interturbarent, neque constare sibi aciem permetterent. Iussus igitur quantocius Samogitarum peditatus inter pugnantium equitum ordines sese insinuare: sic firmata acies atque in vestigium connixa, ut sese toto nisu promovit, hostiles ordines quibus nulli in promptu pedites erant, perrupit atque inprimis Scytharum legionem loco submovit. Effusis in fugam Scythis neque Volynii diu campum retinuerunt. Eos, cum Volodimirus obsecratione à fuga arceri non posset, extremâ audaciâ prælium restituere conatus, contra ipsam vincentis exercitus molem cum paucis sese objecit: ubi



ubi inter Ducis militisque officia pertinacius rebus desperatis succurrens, promiscuâ cæde involutus, occubuit. Victoriâ non urbis modò, sed universæ provinciæ deditio subsecuta est. Deditis Litvani Magistratus, ac præsidia imposita: capita gentis jurejurando adacta, cum populo ac provincia in Litvaniæ jus transiverunt. Inde legiones contra Leonem Luceoriensem Ducem ductæ: verum ille ut nuper ad injurias pronior, cum per absentiam Gedimini Drohicinum & Brestiam de Litvanis caperet; ita nunc bello segnior, militi quem sub signis habebat non fidere: Volodymiri nuperâ fortuna territus, de sua dubitare: vereri ne pares faceret idem exitus; quibus belli occasio eadem fuisset. Itaque ante tentatam belli aleam, maturè aufugit in Severiam. Gediminus absque prælio Luceoriâ & proximis munitionibus potitus, receptisque Drohicino & Brestia, provinciam recenter hosti detractam atque Litvanæ ditioni additam sub præidiis præfectisque Litvanis reliquit. Ipse dimisso

*Luceoria  
civitas &  
provincia  
capitur.*

exercitu in hyberna, five ut partæ provinciae res, uti in speciem præferebat, rectiùs componeret, five quoddam re verâ agebatur, ut è propinquo in novi belli apparatus præsens incumberet, Brestiae hyemavit.

An. 1320. Abiit hyems inter armorum, commeatusque omnis, præparationes: primo vere Brestiam universus miles convenire jussus: tandem suspensis expectatione Russis, quod se nova belli vis effunderet, contractæ cōpiæ & Volodymirenses, Luceoriensesque agros, tanquam sociorum possessionem, absque cujusquam injuria transgressæ ad Owniczam applicuerunt. Arx ea fuit Stanislai Kijoviensium Ducis, qui è vetere Russorum instituto, supremus Russiæ Princeps, & vocabulo genti usitato Monarcha dicebatur. Non diu oppugnationi sustinendæ suffecit Ownicza; assultu in coronam facto, capta. Plus deinde negotii ad Zitomirum repertum: quod non exiguam Russæ nobilitatis partem repentini bellorum metusque contraxerat: sed is quoque locus cessit sponte deditionem offerenti-

*Kijoviensium Ducis  
arces expru-  
erant.*

rentibus : admissa deditio , à cæde temperatum , præsidia Russorum deducta, Litvana imposita. Inde Kijoviam versùs in interiora Russiæ castra promota : legionibus latè terrorem sensumque belli , ferro ac igni circumferentibus. Tum primùm agnovērunt Russi, non prædam ex agris, sed imperium Litvanis eo bello quæri : cùm à victore hoste ipsum gentis atque imperii caput , Kijoviam peti viderunt. Iam plerisque Ducum , ac præsertim è Severia , ingentis periculi facies ad arma exciverat ; occurrerant Olha Peresslaviensium , Romanus Branscensium , & exul Luceorientium Leo, Duces ; ultra domesticas popularium copias ; Scythicis auxiliis instructi. Quia verò hostem Kijoviam versùs , expeditio- nem maturare, fama vulgaverat ; ad sextum ab ea urbe milliare , Piernæ ripam plenis castris infederunt ; eo consilio , ut si vel à via fessum, vel prædæ aviditate distractum Litvanum nancisci possent, obruerent. At Gediminus de viribus, consiliis, castrisque Russorum per exploratores monitus copias

*Russorum  
communis  
expeditio  
contra Ge-  
dimum.*

pias universas à prædando maturè retraxerat, atque instructa acie progrediebatur; nimirum, ne inter hostiles terras repentina pugnandi necessitas, imparatos occuparet.

*Duces Russiæ cum Litvano confidunt & prostigantur.*

Pænè simul & castra & signa collata: simul in conspectum & pugnam utrinque legiones coivere. Accendebat Russis animos indignatio, quòd cum ea gente, quam olim vectigalem habuissent de imperio decernere cogerentur. Stanislaus ante omnes, suam maximè rem eo prælio verti præfatus, ceteris ad subsidia relictis, ipse sibi, suisque primas configendi partes arripuit. Gediminus antequam in conspectum hostium venisset, jam suos in prælium animaverat. *Satis erat memorasse sua auspicia, militumque virtutem tot victoriis probatam. Circumspicerent modò arma manusque quibus se Duce tot hostium sanguinem fortunatè hausissent: & abundè ominum habituros ad certam victoriæ spem. Non Prussorum legiones ferro & armis graves, ac panè infractas, ab adverso stare; quas tamen toties protrivissent: sed Russos; superiorum victoriarum malè consistentes reliquias, emorientis imperii ultimos*

*mos at enervés conatus. Impelli tantum parum debere, ut suapte corruant.* Primi pugnantium affectus, sine ingenti utrinque damno, inter missilia tela desævierunt. Consertis verò signis, atque ad manum gladiosque reductâ, pertinax cruentaque pugna & damnis & animis partes exæquatas diu tenuit: prima Litvanorum equitum legio sub fatigatione deficere cæperat, & jam propè fugam circumspectare; ni in tempore cum subsidiariis cohortibus Gediminus accurrisset. Cùm fessis, integri substituti, ab sua parte atrox prælium instaurant: Gediminus priorem legionem prælio sensim subductam, in transversum Rusorum latus summo impetu ire jubet; & certè sive quòd exiguum illud respirium vires confirmasset, sive quòd prioris culpæ conscientia, cum verecundiâ animos auxisset, tantâ vi, quod jussi erant, præstiterunt; ut à quibus fugæ initium pæne factum erat, ab iis victoria sit inchoata. Perrupti ordines; moti vestigio Kijovienses; & jam cum loco animorum etiam multum

K k

Russis

Russis decesserat. Accenditur itaque rursus prælium ; à subsidiariis Russorum cohortibus ; Ducibus , Olha Pereflaviensi , & Leone Luceorienti ; at dum Duces inconsultius in confertos invehuntur ; obruti multitudine , non dubiam Litvanis victoriam fecerunt. Iam auxiliares copię amissis Ducibus rem fegnius ac confuse agere ; jam media acies , ante loco mora , multum inclinare : Stanisslaus denique ipse & Romanus Duces, exemplo suo reliquum militem in fugam apertam pertraxerunt. Fugientium cædem nox abruptit. Curatis per noctem corporibus , lectisque cum aurora sequentis diei incuriosè spoliis , ne morâ ipsâ rei gerendæ occasio intercideret , eodem die ad Kijoviæ oppugnationem legiones ductæ. Quanquam verò recenti consternatione, nondum sibi Russorum animi essent restituti , haud difficile tamen fuit, primos conatus Litvanorum retundere ; tum quòd ipsa urbs populosissima habilibus ad arma viris abundaret, tum quòd reliquus è clade miles , eò delatus , præsidario-

*Kijovia ob-  
fidetur &  
capitur.*

diariorum numerum auxisset. Stitisset proculdubio urbs illa cursum victoriæ Litvanæ, si Stanislaus contracto undique milite, supplementisque sociorum, speciem aliquam, si non instaurandi belli, saltem aliquarum suppetiarum ostentasset. At cum Kijovienfes contra terrores atque deditio- nis sollicitationem animo obfirmati, Litva- num armis manumque pertinaciter à muris rejiciunt, atque victoriam Gedimini quâ possunt, morantur: Stanislaus in Reza- niam usque, turpi fugâ delatus, amisso exercitu & regno, spem quoque jam abje- cerat. Desperatio Principis, animos ob- fessorum perfregit. *Cui enim tandem pugna- rent? Principine desertori? an Reipublica despe- rata? Sed & odio desertoris Principis, victor ho- stis placere caperat: & Rempubicam aliquam sub victore malebant, deditioe servare; quam perti- naci pugna totam perdere.* Itaque communi consilio arcis atque urbis deditio spontè facta est. Ordines universi è civitate pro- gressi victorem Gediminum, Kijoviæ at- que Ruffiæ Magnum Ducem salutant: &

*Gediminus  
Magnus  
Ruffia  
Dux à vi-  
ctis Ruffis  
salutatur.*

K k 2

provin-

provinciam ditioni ejus, jurejurando dato, addicunt. Gediminus post paucorum dierum quietem quibus interea arces proximæ Bialogrodecum, Slepovorum, Kanjovia, Czerkassii in jura victoris concesserunt, in Severiam movit. Ibi Bransko & Peresslavia (duarum Provinciarum hæc capita sunt) potitus: occupatâ eo bello, Kijoviâ, Volyniâ, & magna Severiæ parte, ditionis Litvanæ terminos Putivilum usque protulit. Atque is demum Kijovienfis per Russiam Monarchiæ, quæ triginta annis supra quadringentos, inter varios successus eventusque stetit, exitus fuit, cum Kijovia in jus Litvani Ducis transivisset. Magna inde diuturnis controversiis sumpta deinceps inter Polonos & Litvanos materia: Polonis veterum sub Boleslao Audace victoriarum, novarumque affinitatum præjudicio, Kijoviam & Volyniam vendicantibus. At quanquam Boleslaus devictis olim Russis Kijoviam subegerit, vectigalemque eam gentem fecerit: nemo tamen hæcenus Poloniæ Regum, aut titulos Ducis.



cis Kijoviæ assumpferat, aut legitimos  
 Principes ea ditione exegerat, aut devictos  
 populos in formam provinciæ redegerat:  
 Russi etiam subsecutis bellis omne obse-  
 quium erga Polonos jam pridem excusse-  
 rant. Primus exterorum Kijoviæ Gedimi-  
 nus imperavit: ejusque præfecturam pro  
 se Mindopho Holsano Duci demandavit:  
 eo consilio, quod nuper Christiana sacra  
 Russorum ritû suscepisset. Metuebat, ne  
*in novis Magistratibus ab hoste victore datis, odio-*  
*sum imperium, odiosius redderetur religionum di-*  
*versitate. Nam quamdiu inter victos victoresque,*  
*juncta sub uno Principe fœdera; ipsa horum nomi-*  
*num oblivio commerciorum diuturnitate non fir-*  
*maverit: tamdiu etiam levissima occasiones pro*  
*magnis motibus sufficiunt.* Devictâ pacataque  
 Russiâ, Kiernoviæ Gediminus triumphum  
 egit: post habitum Diis, more patrio, ho-  
 norem, exercitum stipendiis donisque mi-  
 litaribus auctum, dimisit. Inde ad pacis ar-  
 tes versus, quod de Prussicâ fœdere super-  
 erat temporis, ita inter venandi studia ad  
 recreandas præteriti belli curas dispensa-  
 bat:

*Mindophus Kijoviae pro Gedimino Præfectus.*

*An. 1321.*

*Gediminus  
Trokos con-  
dit.*

bat : ut ordinandæ interea Reipublicæ , & civitatibus condendis, intenderet. Trokos imprimis haud procul Kiernoviâ è singulari venationum successu sumpto omine, condidit : atque ut ipsâ curiæ præsentia civitas faciliùs incrementa fumeret, eodem Principatus Litvaniæ sedem , Kiernoviâ transtulit. Melioribus deinde auspiciis ad confluentis Viliæ Vilnæque ripas alterius urbis fundamenta jecit. Haud procul à Suintoroha (ubi Principum funeribus aream lucosque Diis dicaverat olim Germundus) exactum è profundioribus sylvis & abruptis montium , sylvestrem bovem , (Vrum vocamus) proprio telo ipse Princeps in edito monte confecerat. Iessum diurnæ venationis labore , & confectæ bestię eventu recreatum, cùm proxima nocte in Suintoroha campo pernoctantem arctior somnus oppressisset , videre sibi visus est in eo ipso montis vertice, in quo feram illam occiderat, grandem stare lupum , aut ferro solido ductum , aut ferrata lamina undique munitum : in quo centum alii inclusi lupi , ingenti

*Vilnæ, Metropolis  
Litvaniæ,  
fundandæ  
occafio.*

genti ululatu circumjacentes latè campos  
 sylvasque implerent. Experfectus non vul-  
 gare aliquid in eo viso suspicari. Sive quodd  
 genius aliquis altior, eam cogitationem  
 objectaret; sive quodd, *ubi fata destinata à*  
*Supremo Numine telam ordiri incipiunt, suus cui-*  
*que animus sibi genius est*: sive etiam ex more  
 gentis, cui (ut ceteris *Ethnicis*) omnia, reli-  
 gionum plena habebantur. Insolentia somnii,  
 & quodd loco sacro dormienti obvenisset;  
 maximè religioni erat. Consulti mox, qui  
 in proximo agebant pontifices, uti arcana  
 panderent. Lizdeyco tum inter illos, sum-  
 mus Pontifex, seu voce patria Krive Kri-  
 veyto, sacris præerat. Hic olim infans in-  
 ter sylvas in aquilæ nido vel ut alii tra-  
 dunt, de arbore cum cunis pendens, à Vi-  
 tene ipso inter venandum repertus, ejus-  
 que mandato ad Deorum altaria educatus,  
 & à puero patriorum sacrorum scientiâ  
 imbutus, optimus arcanorum interpres  
 tunc censebatur. *Ille Principem bono animo*  
*esse jubet. Quod ipsi Principi, quod Reipublica*  
*Litvana auspicio eveniret, sequeretur feliciter*  
 Deos

Deos monentes : *lupum ferreum portendere arcem  
& urbem , quam in eo loco esset conditurus . Eam  
urbem gentis atque universarum Litvania subje-  
ctarum provinciarum caput futuram ; sedem Prin-  
cipum , qui rerum à se gestarum famâ , varias orbis  
regiones impleturi essent .* Paruit Princeps Pon-  
tifici , & superùm , ut putabat , mente , legi-  
timè consilium expediendi . Cæremoniis  
omnibus ritè persolutis , arci locum desi-  
gnat , montis editi caput ; in quo Vrum  
nuper occiderat . Aream Suintoroha nun-  
cupatam , quam ad radicem ejusdem mon-  
tis Vilna fluvijs flexuoso sinu ambit , agge-  
ribus palis ac loricâ permuniri jubet , reli-  
quum spatium urbanis ædificiis relinqui-  
tur . Opinione citiùs res peracta . Operis  
undique jussu Principis contractis , supe-  
rior inferiorque arces , ut mos muniendi  
eâ ætate ferebat , excitatæ . Civitas publi-  
cis sacris ac profanis , privatisque Princi-  
pum & promiscuæ plebis ædibus , ita citò  
excrevit : ut vel ipsa initia urbis , non va-  
num Pontificis fuisse augurium confirma-  
rent . In prima jam herbâ , surgentis fortunæ  
spes ,

*Vilna urbs,  
& arces , à  
Gedimino  
condita.*

spes , non obscurè cernebantur. Certè ad ætatem nostram , ita omni ornamentorum genere cumulata pervenit ; ut cum amplissimis urbibus , in certamen deduci meritò possit. Amplitudine , opibus , incolarum multitudine , peregrinorum varietate ac frequentia , templorum majestate, Vniversitate literaria , commerciorum copia , ceterisque urbium ornamentis , inter Sarmaticas nobilissima , Sedes Principum , Iudiciorum, Literarum & Commerciorum, rei sacrae ac civilis caput. Nulla laus illi deest, nisi sola quam deesse omnino necesse erat, apud eam gentem, cui Libertas & Pax non muris & vallo , sed civium virtute , securitatem suam integram tuetur. Ipsa incuriosa munitio contemptum hostium spirat.

His erat intentus Gediminus , cum no-  
vorum motuum curæ subiverunt. Exeunte  
biennali fædere , Prussi Equites ingentem  
Litvaniæ cladem moliebantur. Ultra Livo-  
nici Prussique exercitus robur , cui pro  
Magistro Prussiae præerat Fridericus à Wil-  
denburg : aderant auxilia Silesia , Bohe-  
mica,

*An. 1322.  
Bellum factum Ger-  
manorum  
& Crucige-  
torum con-  
tra Litva-  
nos.*

micā, Austriaca, Germanica cum Duce Vratislaviensi Bernardo, Duce Suevorum, duobus Rheni Palatinis, Comitibus Iuliacensis & aliorum filiis, aliisque Germaniæ Principibus. Vulgato enim per Christianas Provincias Summi Pontificis edicto, quo pænarum noxis debitarum veniâ proposita, in sacrum contra Ethnicos bellum Christiani evocabantur, ingentes undique militum concursus in Prussiam fiebant. His igitur copiis fines Prussiæ egressus hostis, Samogitiam miserrimè divexavit. Quàm late excurrunt territoria Vaikenſe, Rossianum, Eyragolanum & Clogense, universa solo æquata. Post exfatiatos cædibus animos cum residente irâ, pudor subiret armatos, prædatorum more, in imbellem vulgum agrestesque casas sævire, & nihil justo bello tentare: ad Bistenæ arcis oppugnationem legiones à populationibus contractæ. Magno ardore inter primos insultus, utrinque res administrata. Exhaustis fortè missilibus, aut quoddam propinquo nulli usui essent: cum ferocissimi quique viribus, atque

armo-

*Bistena archi-  
tecto even-  
tu oppugnata-  
int.*

armorum arte hostes , pertinaciter continuisque ordinibus , muro succederent, vix tandem rudibus contis detrudi potuerunt. Nox atrocissimum certamen diremit. Servata quidem adhuc ea die arx fuit, sed animi præfidiariorum omninò jam expugnati: nam si eadem vi oppugnatio, proximâ luce instauraretur , sustinendo se non suffecturos haud dubiè videbant. Missis itaque in castra hostium tribus ex Equestri ordine obsidibus, spem deditiois ostendunt. *Non esse opus tantâ contentione , in qua fortissimis quibusque pereundum foret : transigi rem posse absque tot dispendiis. Si pergeretur in oppugnatione continuandâ , per extrema etiam pericula se arcem propugnatos : si paucorum dierum spatium ab armis quiesceretur , a quibus conditionibus deditioem sponte facturos. Paucos porrò illos dies , non alio consilio petere , quàm ne destinatâ deditioe , periculum vitæ ac fortunarum , quod ab hoste vitarent , domi apud Principem reperirent. Constare sibi Principi suo , non esse tantum aut virium in expedito , aut animi ; ut de suppetiis arci ferendis cogitet : proinde nihilo pejorem statum oppugnantium futurum*

L I 2 ~~~~~ inter-

interea, si spatium daretur, Principi de suo periculo significandi. Non dubitare autem dedendæ arcis ab eo veniam se impetraturos; cuius defensio tam desperata haberetur. Creditum est à Prussis; at Samogitæ exactis illis diebus, seu verecundiâ suscepti consilii, seu timore Principis, nihil minus cogitare, quàm deditionem. Instaurata ab hoste oppugnatio: Præfidariis verò tuendæ & dedendæ arcis desperatio, in mortem obfirmaverat animos. Hinc cùm nemo pericula declinat, sed quisque, ubi atrocissimus Mars audacissimè rem gerit: post depulsos sæpiùs feliciter oppugnantium conatus, Prussum spe potiundæ arcis emovit. Ita dilationibus, agendi tempus momentaque intercidunt. Fama quoque jam vulgaverat Gediminum magnis copiis in suppetias arci adventare. At Gediminus tutiore consilio usus, ut hostem à Samogitia averteret, rectà in Livoniam duxit, majoribusque longè damnis eam Provinciam afflixit. Derpatum, Kirempam, aliasque arces solo æquavit, & populabundis legionibus Revaliam usque penetravit. Cæso-

rum

*Gediminus  
Livoniam  
invadit.*



rum tria, captivorum millia quinque numerata sunt. Initium hyemis quietum ab hoste fuit. Erat quidem in promptu Prussis copiosa externi militis manus, Ducibus Comite Kumererg & Domino ab Eckerburg: at insolens frigoris immanitas intra hyberna Prussica inertes hærere cogebat. Tanta enim hyemis vehementia fuisse perhibetur: ut sylvæ quoque agrestes consumpto omni nativo humore exaruerint, atque in multos annos ingentis gelu memoriam, emortua absque foliis specie, transmiserint. Dum hostis sub gelida aurâ *An. 1323.* torpet, mansit suus Litvano calor, ejusmodi tempestatibus magis assueto. Missi in *Plescovien-* Livoniam qui *ses Russi à* Plescoviensibus Russis sub *Litvanis* fidio essent, contra Danos è *contra Da-* maritima *nos juven-* Livoniæ circa Revaliam orâ, cui imperabant *imr.* Russiam infestantes. Acta res est strenue à Davide Grodnensi Gubernatore. Quidquid inter Livonicum sinum, & Dunam fluvium interjacet, ferro ac igni vastatum: ultra reliquam prædam captivorum millia quinque educta. Solutis deinde per Apr-

*Sambia in  
Prussia va-  
statuà Lit-  
vanis : de-  
inde Ma-  
zovia &  
Dobrynia.*

lem nivibus, quod impedita exundantibus aquis itinera essent, nihil omnino suspicante hoste ad Memelum cohortes admotæ, ipsa arce potiri non potuerunt. Quare in oppidum & circumjacentes vicos sævitum est : & septingenti captivi educti. Pari successu ad Kalendas Augusti per Sambiam & Vilaviense territorium institutæ vastationes. Affecutus abeuntes cum præda fuerat Præfectus Taplawic, sed collatis temerè signis infelicitè pugnavit ; cæsus cum exercitu. Eodem anno Mazovia atque finitima illi Dobrynia excursionibus divexata. Dobryniæ certè tanta strages illata est, ut Ladislaus Dux, provinciam, cum tuendo non esset, deferere sit coactus, eamque Regno Poloniæ perpetuo jure addicere. Addidit quoque huic consilio non leve momentum metus novi belli : nam Prusli ereptis nuper agris non contenti, ad Dobryniam occupandam sese convertebant. Interim Litvanos inter & Prussos nihil majore mole actum. Quodd enim invalida hyems glaciem ad onera ferenda non fatis

*An. 1324.  
Mituæ  
Litvanorum  
&  
Crucigerorum  
expeditiones.*

fatis firmasset, Germanicæ copiæ, ducibus Ioanne ac Philippo Comitibus de Spenheim & Petro à Rosenberg Bohemo, ex Prussicis hybernis in Litvaniam transportari non poterant. Itaque privatis parvisque opibus, magis tumultuatum, quam bellatum; inter mutuas excursions, & nullo graviore eventu insignes. Prædia tantum Davidis Grödnensis Gubernatoris atque suburbanæ ad Gediminum ædes repente impetu exustæ, & aliquot equitum turmæ interceptæ. Conati quidem fuerant Lityani Christimelum insperato insultu occupare: sed proditis consiliis, cum in præparatum hostem incidissent, non sine clade rejecti sunt. Memorabile nihilominus ibi virtutis suæ argumentum dederunt: in insidias pertracti, ac rebus jam desperatis, cum Ducem audaciùs proVectum amisissent, conglobato agmine in media se hostium tela immiserunt, neque prius campo excefferunt, quam cæsi Ducis cadavere per extrema pericula & plurimis commilitonum desideratis, potiti essent.

Cum

*Gediminus  
ad fœdera  
& sacra  
Christiana  
per legatos  
Summi  
Pontificis,  
invitat.*

Cum hæc circa Prussiæ fines geruntur, Livonia in spem perpetuæ pacis erecta ab armis aliquantum quievit. Fridericus Rigensis Præsul, seu ob suppeditata sæpiùs auxilia privatim Gedimino obnoxius, seu afflictæ bellis Livoniæ misertus, inter Livonicos ordines & Litvaniam perpetua stabilire fœdera nitebatur. Adhibita est in eam rem Summi Pontificis Ioannis eo nomine vigesimi secundi auctoritas: tum ut Livones supremæ potestatis auctoritate ad pacis consilia cogeret, tum ut Litvanum honorificæ legationis officio ad sacra Christiana pertraheret. Actum est utrinque gnaviter per Legatos Bartholomæum Episcopum Electuensem & Bernardum Abbatem Divi Theophredi. Verùm Gedimino tam à sacris, quàm à fœderibus Christianis alienior animus, susceptas consiliorum rationes omninò confudit. Missus ab eo Legatus ad publica Livoniæ comitia, disertè professus est, Principi suo certum esse, nunquam avita sacra deferere, neque fœdera admittere quæ religionis mutatio-  
ne con-

ne constarent. Quàm vera Legatus referret, eventus comprobavit: cùm sub idem ferè tempus bifariam diviso exercitu Christianæ Provinciæ gravissimè vastarentur. Pars Livoniam populata est; altera Mazoviam: qua tempestate Pultoviam civitatem, cum triginta supra centum pagis, & triginta templis exustam, atque quatuor captivorum millia educta, Scriptoribus constans narratio est. Sub ancipiti interim curâ laborabat Polonus, dubius quòd arma verteret. *Bellum Litvanum & Prussicum* An. 1325. consilia discerpebant: hostis ibi repentinis irruptionibus molestior; hîc Provinciarum eripiendarum cupiditate gravior. Si conjunctas vires in alterutrum latus flexisset; alterum nudare metuebat: si copias partiretur: res plena periculi apparebat, Prussos, Pomeranicis, Saxonis, Brandenburgicis, Bohemicis auxiliis prævalidos, accisis partitione copiarum viribus aggredi. Bellum etiam Litvanum, si in hosticum transferretur, neque paucis neque majoribus copiis rectè administrari poterat. Per ingentes enim sylvas hostis quarendus esset; ubi inter viarum angustias, omnia insidiis struendis com-

M m                      modissi-

Occasione pe-  
tenda Gedimi-  
nini fi-  
lia, ad con-  
jugium  
Principis  
Poloniæ.

modissima; incolis locorum gnaris, gerenda rei plures occasiones praberent: quibus implicati Poloni, neque pauci facile contra vim sufficerent; neque multi, suâ mole à se distracti, mutua ferre subsidia possent. Fœderibus itaque rem ab alterutra parte stabilire visum est. neque diu sententiis certatum, quinam ad fœdera qui ad arma destinandi essent? Plerumque enim, qui è propinquo imminet, ferro & extremo ausu quantociùs submoventi sunt: remotiores verò amicitia specie, faciliùs in quiete continentur. Missi Legati in Litvaniam, qui Aldonam Gedimini filiam, Casimiro Poloniæ Principi, in connubium peterent: accepta est amicè à Litvano legatio, pacta mutua fœdera: & affinitate Principum, pax populorum roborata. Dotis vice viginti quatuor millia Poloni nominis captivorum donata. Hinc suas spes Polonus ulteriùs projicere: & ad perpetuæ pacis nomen, finitimarum provinciarum agros, seu hostili ferro pervastatos, seu ipso continuarum excursionum metu desertos repetere, ac securiùs colere. Ladislao deinde contra Valdemarum Brandenburgicum Marchionem

An. 1326.  
Litvani pro  
Polono con-  
tra Bran-  
denburgenses  
movens.

nem bellum moventi , subsidia Gediminus tulit. Vastata est ea expeditione hostilis regio latissimè , præsertim quâ Litvana legio ethnicâ barbarie in sacra æque ac profana absque delectu religionumque reverentia desævit. Dux legionis Davides, foris, bello fortunatissimus ; domi, summis honoribus & Principis affinitate, (cujus filiam in connubio habebat) primus : cùm populabundo agmine Mazoviam in reditu divexaret , memorabili Equitis cujuspiam audaciâ interiit. Dignus Heros meliore fato. Ea illi semper fuerat tractandæ rei bellicæ , seu peritia seu fatalis quædam felicitas : ut nullam ferè hæctenus expeditionem susceperit , quam non magnis successibus conclusisset. *Præcipua illi bellandi vincendique momenta, incredibili celeritate constabant.* Terror finitimorum ; at præcipuè Mazoviæ infestus. Nam cum Mazoviæ vicinam Præfecturam Grodnensem pro Principe administraret , frequentibus populationibus totam jam propè exhauserat. Ut tantas patriæ suæ injurias & novas averteret

*Davidis  
Litvani  
Ducis laudes  
& ca-*

M m 2

& ve-

*Insigne fa-  
cinus Equi-  
tis Masfo-  
vite pro  
Patria.*

& veteres ulcisceretur, Andreas Eques Mazovius : cū per speciem socii militis ordinibus Litvanis immixtus ad latus Davidis penetrasset , valido ictu repentē eum confecit. Ipse verò inter primam propinquiorum consternationem , adacto celeriter toto nisu in cursum equo , & tela & manus insequentium incolumis evasit. Hæc iste pro patria memorando certè inter posteros , certaturoque cum veterum Scævolis exemplo. Admirabilius illud Christianæ fortitudinis pro virtute facinus , quam in debiliore sexu. Vestalis Virgo à Litvano milite capta ad flagitium coge-  
batur : ubi preces & lachrymæ , unicum hujus sexus telum , consumptæ sunt ; neque tamen barbari pectoris libidinem extinxerunt ; ut sæpè in subitis ingeniosa pietas est , promittit militi , modò se inviolatam relinqueret , non vulgare secretum edituram ; artem nempe , quâ facile cujusvis teli ictum absque vulnere ferre posset : ne verò putaret, ad probrum avertendum, verba tantum sibi dari , paratam se , ait , proprii capitis

*Stratagema  
insigne pu-  
dicitiae de-  
fense.*



capitis periculo fidem dictis facere: simulque nudato collo ad ictum militem invitat; ne dubitaret gladio collum petere, & quàm vera sibi promitteret ferro ipse experiri. Stringit miles gladium, & cùm primo ictu teneræ Virginis caput à collo dejecisset, intellexit quàm probè Christiana Virgo calleret artem, non vitæ sed castitatis in integro servandæ. Inescatus priore successu & opulenta è Germaniâ prædâ Gediminus, majoribus è Lityania ac Samogitia copiis proximo anno in Marchionem Brandeburgensem instaurari expeditionem jubet. Imperator exercitui datus Olgerdus Principis filius: qui jam magnis passibus per militarem gloriam ad parentis fortunam ante reliquos fratres nitebatur. Positis ille castris ad caput regionis, Francofordiam urbem Oderæ imminentem, universam provinciam vastissimè populatus est: prædamque omnis generis ac incolumem militem centum ferè milliarium itinere reduxit. His exercebatur miles; mox in castra Ladislai Polonorum Regis tra-

An. 1327.

*Olgerdus  
filius Ged-  
mini contra  
Brandebur-  
gicum ducit.*

An. 1328.

*Gediminius**Ladislao**Polono con-**tra Cruci-**geros du-**centi adest.**Crucigeri**Litvianiam**invadunt.*

gis traducendus : Iam enim in Polonia, consumptis omnibus pacis consiliis, bellum contra Prussos maturuerat ; cuius necessitatem fecerunt Crucigeri, cum veteres injurias novis cumularent. Adfuit in tempore Ladislao, ipse Gediminius, copias inter filios suos, velut inter Legatos partitus. Vbi post vastatos Culmenfes agros, fugatos ad Drwecam Crucigeros, spoliataque exustam omnem propè Prussiam, ingentes prædas aliquoties in Litvianiam eduxisset, tandem universam belli molem in se avertit. Nam quòd junctis Polonorum ac Litvanorum in communem hostem viribus non essent Crucigeri ferendo : Ladislaum inprimis annuarum induciarum specie à societate belli abstraxerunt ; tum odia viresque omnes cupidi vindictæ animi, in Litvianiam ac Samogitiam effuderunt. Prima, velut hostia impotenti ferociæ, deleta Velona arx, loco à natura permunito ad Nemenum sita. Magnis viribus, ac pertinaciter oppugnatio ejus tentata est, neque minus feliciter aliquoties rejecta :

rejecta : ita ut non exigua cum strage suorum repulsus , obsidionem solvere fuerit coactus , Theodoricus Comes ab Aldenburg , qui tum pro Magistro Ordinis , universæ Prussiæ Mareschalcus præerat. Rediit ille quidem rursus novis succinctus copiis , cum quibus è Bavaria Henricus Dux advenerat : at prioris cladis memor , nihil tum apertâ vi , nihil impetu agerè. Excitatis tantum tumultuario opere , ab utroque arcis latere munitionibus , impositoque valido præsidio , quasi per ocium arctius obsessos è propinquo premere : commeatum omnem avertere , atque aded fame deditiorem urgere. Gediminus ut obsidionem Velonæ solveret Fridburgum & Beierum magnâ vi adortus , in viginti dies continuam oppugnationem produxit. Multam stragem succedentes vallo Litvani acceperunt , ab insolenti hætenus armorum genere. Fistulas enim ferreas , quæ pulvere pyrio & globis oneratæ , conceptam intra pulverem flammam evomendo , magno simul impetu vehementique cum fragore globum

globum in adversos ejicerent : jam tum ad Prussorum usum pervenisse , memorant nostrates. Ingeniosum hujus sæculi inventum, sed quod omnem veteris militiæ gloriam insigniter prodegit : nam quis sibi virtuti ac fortitudini antiquæ locus, ubi inter fortissimos quosque, imbellis manus pænè per ocium infinitas spargit cædes ? Ad gladium, vel hastam, manumque, res deducta, virum probare debet : at inter fistularum ejusmodi usum, casus necem dispensat ; quam vir fortis neque vitare, neque ulcisci possit ; quod à qua manu veniat, nesciat.

*Gediminus  
in oppugna-  
tione arcis  
occiditur.*

Hoc teli genere, Gediminus trajectus, cum oppugnationem ferventiùs instruit ac urget, inter ordines exanimatus concidit. Mox tota pugnantium facies in funebrem pompam versa ; cum pars luctu, Reipublicæ damnum ; omnes, militari cantu triumphos ac victorias Ducis celebrarent. Deinde integris castris velut ad triumphum comitantibus Vilnam deductus, ac solenni ritu elatus crematusque est, in campo Suintoroha. Erat Gedimino præter aliquot filias,

lias, (quarum unam Casimiro Poloniae Principi, alteram Venceslao Mazoviae Duci in matrimonium elocarat) numerosa satis proles mascula: atque hinc futurorum motuum non levis fomes. Quare ut discordiarum materies maturè subtraheretur, *Gedimini filii.* Montivido, Kiernoviam & Slonimum; Narimundo, Pinscum, Mozyrum, partemque Volodimirensis provinciae; Olgerdo, Krevum & quidquid inde Berezynam usque porrigitur; Kieystuto, Samogitiam, Trocenses praeterea, Grodnenses, Caunenses, Lidenfes, Vpitenfes agros, ac Subsylvaniam: Coryato, Novogrodecum, Volkoviscum; Lubarto, Volodimiriam & Volyniam; Iawnuto, Vilnam gentis caput, Osmianam, Vilkomiriam, Brassaviam: quem *An. 1329. Iawnutus haeres Principatus à Patre designatus.* etiam supremum Principem designaverat. Id verò ceteros fratres aegrè habere: juvenem non ætatis jure, aut virtutis suffragio; sed solo inconsulti paterni amoris præjudicio sibi anteferri. Ne tamen repenti affectus in apertum prorumperent, irritatam æmulatione indignationem recens erga pa-

N n

rentem

rentem observantiæ memoria premebat. Publicis comitiis, palàm profitentur; in ejus se potestate futuros, quem parens sibi successorem dixisset: atque ita plenīs comitiis, communique consensu fratrum ac Ordinum, Iawnutus natu minor Magnus Litvaniæ Dux renunciatur. Actum exinde in Senatu de belli cum Crucigeris gerendi rationibus: conclusumque, ut Iawnuto Rempublicam domi administrante; penes Kieystutum ac Olgerdum, viros bello exercitatissimos, armorum jus supremum esset. Verùm *aspiranti ad suprema, omnis gradus suprema minor, auget non implet cupiditatem: parvus quisque sibi videtur, cum altiores, quem odit, videt.* Dissimulata malè tantisper æmulatione, citò in apertam conspirationem excrevit: Kieystuto ac Olgerdo in ea consilia occultè abeuntibus, ut Iawnuto Principatus abrogaretur. Atque cùm Olgerdus, seu spontè tergiversaretur, seu Vitepsco tam citò adesse ad conditum diem non posset: Kieystutus Trocis è propinquo in omnia intentus, die vigesima secunda Novembris

Exiit  
Principatu  
Iawnutus.

vembris immisso tacite Vilnam milite,  
 utraque arce sub matutinum crepusculum  
 potitus est. Evaferat inter primum tumultum  
 excitatus à somno Iawnutus, & per  
 muros elapsus, seminudus in fugam abiverat;  
 sed per Kieystutianos equites è sylvis  
 retractus. Neque multò post Olgerdus,  
 cum milite supervenit. Hic verò nova inter  
 duos fratres, plena officii contentio;  
 ex qua non difficile sit suspicari, tertium  
 non regnandi cupiditate, sed sola æmulatione,  
 imperio motum. Neuter Principatum illi  
 creptum, sibi usurpare; uterque parendi,  
 non imperandi partes eligere: deferre  
 Kieystutus Olgerdo tanquam seniori;  
 Olgerdus Kieystuto, qui suo periculo  
 alium loco depulisset. Convenit tandem  
 inter utrumque: ut Olgerdus titulos Magni  
 Ducis assumeret; cetera ex æquo dividerentur:  
 hostes soli, communes utrique essent.  
 Iawnuto verò è custodiâ eliberato, Zaslaviensis  
 Ducatus est attributus: qui deinceps ejus  
 posteris ad solas fæminas redactis; per  
 maternam hæreditatem in

Hleboviciorum possessionem tranſiit. Neque ulli domi majores inde motus ſubſecuti; ſive quòd ſawnuto non eſſet ad res novandas ingenium; ſive quòd reliqui Proceres ac fratres, in Olgerdum proniore animo eſſent. Neque minus ad quietem profuit metus potentiae, quã paulo ante ipſi proceres Olgerdum ac Kieyſtutum ſuccinxerant, legionibus eorum imperio permiſſis.

## L I B E R VIII,

*De rebus Litvanorum ſub Olgerdo Principe.*

An. 1330.

Olgerdus

M. Dux

Litvania

bellum contra Pruffos indicit.

**O**lgerdus, ut res ſuas domi firmare poſſet; ad externum bellum curas omnium initio Principatus avertit. Erepta nuper Samogitia non exigua pars, vaſtati toties Litvania agri, in ipſis pene patria viſceribus munitiones excitata; Princeps recenter bello amiſſus, ne impunè hoſti abirent: totis comitiis urgere, rogare, imperare. Bellum ſe, ajebat, & Principem Litvania & filium caſi Gedimini, edicere: ſequerentur fratres; ſequerentur Proceres; quò dolor

aut



*aut Principi aut parenti debitus duceret.* Magno consensu bellum omnes jusserunt : & vix ullum unquam , aut majore mole à Litvanis, aut majoribus Prussiæ damnis, gestum est. Ne quid verò interea damni Respublica pateretur, ab ea, quæ Livoniam attingit parte : Vitepscensibus , Polocensibus, Vilkomirienfibus , Braslavienfibus , Dryiensibus , ea cura demandata est : qui non fines modò tutati sunt, sed Curlandiam quoque pervastarunt. Statim è comitiis Olgerdus & Kieystutus Caunam cum prætorianis legionibus movere. Principum properatio, cæteris morarum prætextus rescidit : paucos intra dies quaterdena militum millia convenere. His copiis Prussiam ingressus Olgerdus , ita rem totam instruebat : ne quâ , vel temerè pabulatum progressi, insidiis se induerent ; vel pauci ad populationes missi , inter prædam , repentinâ vi obruerentur ; vel inter munitiorum locorum oppugnationem morâ injectâ , hosti spatium colligendi vires daretur. Semper itaque acie instructa progredi : & quacunque

se verteret ; totâ simul exercitûs mole, omnia obtere : vitatis arcibus atque oppidis , ferrum ac ignem , per totam Prusiam circumferre : prædam non integram circumducere , sed partitim sæpiùs in Litvaniam expedire : ne captivis castra onerarentur ; promiscuis cædibus , inter sexum ætatemque non discernere. Nullibi pugnatum est , hoste vitam & fortunarum reliquias murorum præfidiis tueri contentò : Litvanq; tantum per aperta exercitum circumducente. Solus Insterborgensis Præfectus , Everardus Sortz cum trecentis equitibus , & quingentis peditibus, quos è Saxonia in præsidii Regiomontani supplementa ducebat , ex itinere deprehensus, in pugnandi necessitatem incurrit, delerisque est. Quidquid verò inter Regiomontum, finum Baltici , Elbingam , Mariæburgum , Elsbergam clauditur , Sambia , Natangia , Varmia & pars Pomeraniæ , velut unum bustum in cineres fumumque abierat. Spectabant ex arcibus calamitatis suæ argumenta in altum surgentia Crucigeri : & quam

quam tempestatem insidiis aut vi avertere non poterant, induciarum tandem postulatione stitere. Promissa est pax petentibus in biennium : neque tamen exercitus ex hostico prius deductus est ; quam pars Samogitiæ à Crucigeris occupata, & ad Velonam excitatæ arces, Litvanis traderentur. Redimente libenter pacem iis conditionibus Theodorico ab Aldenburg (qui, pro Magistro, Prussiæ tum præerat) Olgerdus victorem atque opimâ prædâ onustum militem domum reduxit. Vltus ibi feliciter cædem parentis, pacatisque ab ea parte provinciis, in Russiam, quæ Litvanæ ditioni suberat, animum intendit. Tartari enim è Taurica Chersonesso olim, cum Batejo duce egressi, post universam propè Russiam partim vastatam, partim occupatam, eos campos cis & trans Borysthenem infederant, quos nunc *desertos*, populari nomine vocamus. Inde & Podoliæ per impositos Baskakos, seu Præfectos imperabant : & de Volyniensibus Kijoviensibusque agris, infestis incursionibus prædas agebant.

*Fædus Olgerdi cum Prussis.*

*An. 1331. Olgerdi contra Scythas in Russiam felicis expeditio.*

agebant. Hos perdomare Olgerdus statuit: præsertim cùm ultiores Russorum provinciæ Scythicæ Asiæ propiores, jugum Scythicum excutere feliciter interea cæpissent. Victorem itaque Prussico bello exercitum, postquàm modicâ quiete recreasset, versùs Borysthenem duxit. Iam Kanioviam & Czyrkassos transgressus ad locum vulgò Siniawoda penetraverat: cum hostes in conspectum se, latissimo campo, dederunt. Trifariam partiti exercitum; ingentem multitudinem ducebant tres Reguli, Katlubach Soltan, Kaczybey Giercy, & Dimeyter Soltan. Constat non obscure comparatos in prælium ire; neque moram pugnæ facturos. Quare Olgerdus quoque signa consistere jubet, & simul aciem expedit. Exercitum universum in quinque legiones dividit, acie in arcus speciem instructâ, latera quantum potest ducit; frontem ita firmat, ut laxatis inter cohortes spatiis vacua intervalla interciperentur. *Initium victoria erat, rectè ordines instruxisse.* Nam Scythæ, neque cum lunatâ acie

*Tartari ab  
Olgerdo  
profligantur  
in Russia.*

acie solito more circumcursando congregi poterant ; neque diducta latera , contento cursu circumvenire : deinde sagittæ uno totius exercitûs impetu missæ , ferè in vacua milite loca ab alto redierunt. At verò deductâ re ad manum & gladios atque hastas , non diu hostis locum obtinuit : cum frontem Litvani ac Russi aperuissent , turbata media acies , facilè totam exercitûs Scythici molem in fugam traxit. Tres Reguli, in pugna cæsi : promiscua fugientium cædes , amplissimos campos , cadaveribus latè instravit. Profecutus Olgerdus victoriam , cum exercitu Borysthenem transiit. Pulsi sunt ea expeditione Tartari omnibus iis agris , qui Kijoviâ Oczakoviam usque , & Putivilo ad ostia Tanais protenduntur : arces Tarhovicia , Bialocerkuja, Suinigrodum , & aliæ , ereptæ. Reversus inde reliquias Scytharum per Podoliam sine negotio vel delevit vel profligavit. Qui maturâ fugâ cædem evaserunt , in Dobrucensibus campis ad Danubium ( quâ in Thraciam è Russia iter est ) confederunt : horum

O o                      posteri,

*E Podolia  
exacti Tar-  
tari.*

posterius, nunc etiam, & Slavonicam linguam, & majorum suorum, Podolicis sedibus à Litvanis depulso-  
rum memoriam, retinent. Podoliam Scythis perpurgatam Olgerdus attribuit nepotibus, Coriathi fratris filiis, Alexandro, Constantino, Theodoro & Georgio: quorum operam, eo bello, insignem expertus erat. Adjecit exercitus partem, tuendæ contra hostes provinciae, necessariam. Illi quod ab hoste ocium haberent, regionem munierunt Bekotâ & Smotricâ arcibus excitatis. Tradunt etiam Scriptores munitissimâ in rupe miraculum munitionum Cămenecum iisdem autoribus constituisse: ubi vallum non ars, aggestâ terrâ, sed solidâ rupe, natura in altum eduxit. Paulò post, Georgio ad Valachiam & Moldaviam cum imperio obtinendam evocato, atque mox Sochaczoviae per venenum extincto: Theodoro ad paternum Novogrodensem in Litvania Principatum regresso; universa Podolia, sub Alexandro & Constantino Ducibus, mansit. Scythico bello confecto, Moschoviticum

An. 1332.

*Moschoviti-  
ci belli oc-  
casu.*

viticum successit : ita Olgerdo recentis  
 Principatûs anni , non fastis sed bellis &  
 victoriis supputandi erant. Dux Moscho-  
 viæ Demetrius Semeczka , eâdem tempe-  
 state , supremum Scytharum per Europam  
 & Asiâ Imperatorem , Mamai Temnik ,  
 tanta clade ceciderat : ut tredecim leucas  
 cæsorû cadaveribus implevisse , memore-  
 tur. Ille itaque excusso jugo Scythico  
 (sub quo toros centum & quinquaginta  
 annos hæserant Russi, jura atque Principes  
 è Taurica accipere soliti) plura animo de-  
 stinare : ad imperium universæ Russiæ aspi-  
 rare : Severiam , Volyniam , Kijoviam , Vi-  
 tepsciam , Polociam , & quidquid Russi  
 olim nominis tunc sub Litvano jure erat,  
 cupiditate atque adeo spe complecti. Vi-  
 tepsci agebat Olgerdus , cùm legatus à  
 Moscho venit. Plena erat fastu & barbarie  
 legatio : non tam enim bellum indicebat ,  
 quàm extrema quæque minabatur legatus.  
 Ignem & gladium manu ferens : *Hæc* , aje-  
 bat , *munera à suo Duce Vilna inter Paschales fe-*  
*rias expectaret : cùm vertente anno , subactâ uni-*

*versâ Litvaniâ , eò victricia signa Moschus inferret. Quare si maturè tanti Principis iram avertere mallet ; Russiâ cederet , Litvaniam Moschovia Duci subjiceret ; tributum, servitutis pretium, mox numeraret. Nihil ad hæc impotenter Olgerdus : ne inter precipites affectus consilii locus perviret. Detineri honoris specie legatum jubet ; ipse verò, maturè cum Kieystuto fratre , (qui fortè aderat) re collatâ , bellum incredibili simul celeritate & confiliorum silentio expedit. Ex universâ Litvaniâ, Samogitiâ ac Russiâ , cum milite exciti Duces , atque inprimis Principis fratres ; ubi ad præscriptum mediæ quadragesimæ diem, circa Vitepscum comparuere ; castra in Moschoviam movit. Præibant exercitum, agrestium operarum millia aliquot ; his imperatum ; ut viam, quæ rectâ Moscuam tenderet , per sylvas atque paludes aperirent, sternerentque ; adjecto duorum millium equite , qui contra subitos ab hoste impetus , laborantibus subsidio esset. Exploratores quoque in omnem partem dimissi , maturè undique vestigabant ; quidnam*

*Expedi-  
tio  
Olgerdi in  
Moscho-  
viam.*



nam ab hoste ; vel sciretur , vel ageretur. Ab ignibus omnique vastitatis genere, temperare omnino jussi : neque plus injuriæ incolarum ulli inferre permissum , quàm sine quâ necessarij commeatus constare non possent. Vbi Mozaiscum amplam civitatem in proximo esse à speculatoribus renunciatum est : Olgerdus militem modicâ quiete recreatum , & instructâ rectè acie, in apertam publicamque viam sub signis eduxit. Tum primum legato ( hætenus ignaro , quid secum ageretur , aut quò locorum avectus esset ) ad se vocato , fomitem succensum tradit ; adjectis hisce mandatis. *Perferret suo Principi literarum munera-* Moscho-  
*que loco fomitem accensum. Diceret : levare se Du-* rum Duci  
*cem Moschum labore Vilnam usque pergendi ;* *fomitem*  
*Et priorem Moscua affuturum , quàm ignis fomitem* *accensum*  
*hunc exederet. Perfecturum mox , ut allisâ ad pa-* *mittit.*  
*latium Demetrii hastâ , illud altè inscriptum relin-*  
*queret : non illum Imperatorem esse , qui bellandi*  
*momenta in annos differendo , occasionibus quaren-*  
*dis indormit : sed eum qui ipsam occasionum egesta-*  
*tem , in belligerandi commoditates vertit.* Octo

adhuc supra decem milliaria supererant, inter castra & Moscuam : tantâ tamen celeritate , id viæ , propè cursu, miles confecit ; ut legatus, sequentem exercitum, paucis tantùm horis antecesserit. Illâ ipsa nocte , quam Christo post mortem surgenti dicatam , majoribus cæremoniis Christiana religio in singulos annos colit : cùm Dux ad nocturna sacra templum ingrederetur ; legatus occurrit, mandata exponit, hostem se Mozaïsci reliquisse nunciat. Quid reliquis fuerit in tam subiti periculi famâ consternationis, promptum est suspicari. Princeps certè , sive quòd *attonitam mentem ad consilia movere non poterat* ; sive quòd temerariâ fiduciâ vana esse legati verba reputaret ; sive quòd in barbaro pectore , plùs reverentia religionum quàm periculi æstimatio, valuisset : reliquam noctem securus in templo inter sacra exegit. At ubi albescente die, hostilia signa, explicatâ per Poklonnam montem acie , muris imminere ; totâ urbe visum, conclamatumque est : tùm Demetrius, velut veterno excusso ,

*Ipsis feriis  
Paschali-  
bus exerci-  
tum Mo-  
scue admo-  
ves.*

cusso , animum & consilia in omnem partem raptare : jubere , & mox imperia mutare. Sed jam agendi momenta urgebant, cùm Olgerdi celeritas moram non ferret. Subitæ obsidioni ferendæ , urbs non erat ; commeatu non instructa , agresti plebe ( quæ ad sacra confluerat ) ipsa sibi gravis : sed neque in ea multitudo tantum juvenutis erat , ut in apertum contra armatos , atque ad pugnam comparatos , educi sine temeritate posset. Omnia itaque in desperationem , desperatio in preces cecidit : missi supplices legati qui offerrent amicitiam , pacemque postularent. Olgerdus quoque , non ita secundis initiis animum permiserat : ut secutorum eventum metu , non fluctuaret. *Cogitabat , hostilibus terris se cinctum undique , à suis avulsum. Quid si , Demetrio pugnam detrectante , bellum protrahi necesse foret ? unde commeatus inter hostes ? nunc facilem victoriam videri ; cùm hostis in trepidatione esset ; sed longè faciliorem pacem : Paulò post belli quidem gerendi rationem fore ancipitem , pacis autem incundæ nullam : cùm concurrente undequaque ad*  
Regiam

*Mofebus  
supplicat  
Olgerdo.*

Regiam milite , urbem inter & castra medius clauderetur. Ad victoriam & gloriam satis sibi jam esse ; quòd peteretur , ut parceret : datâ pace , quidquid armis querendum erat , obtineri posse. Ita cùm Moschus, subita, nimiùm metuit ; Litvanus secutura, maturè præcavet: non magno negotio convenerunt in fædus ; his conditionibus. Olgerdus præcipuis amicorum ac equitum comitatus , urbem tanquam amicus ingrederetur : tanquam victor , hastam portis arcis illideret. Litvania fines, Mozaiscum usque, & ad Vgram fluvium proferrentur. Militi, stipendium ; Duci, impensa belli ; à Demetrio annumerarentur. Inter utrumque populum, aterna fœdera jurejurando stabilirentur. Cum in eas condiciones ; Demetrius Princeps , Antistes sacrorum, vulgè Metropolita , Senatus , ac præcipui Bojarorum jurassent : Olgerdus Moscuam eodem die ingressus, hastam regiæ illisit, & Duci ad ipsas aras hac planè militari formâ salutato ( *Intelligis jam Demetri , quis nostrum gerendis bellis maturius consurgat* ) ovum Paschale obtulit. Mos enim vetustus Russis , inter ferias Paschales , ovum variis coloribus

*Conditiones  
fœderis in-  
ter Mo-  
schum &  
Olgerdum.*

*Olgerdus  
Moscuam  
urbem in-  
trat : ha-  
stam portæ  
arcis infi-  
git.*

loribus illitum , per amicitiae officium offerre. Olgerdus verò , quanquam Ethnico ritu publicè operaretur : tamen , quòd nuper in gratiam Vlianæ conjugis Vitepscorum ducis , Christianis sacris se initiari permisisset ; Rufforum ritum non averfabatur : quibus etiam templa duo , Vitepsci excitaverat. Ejusdem animi argumentum dedit , cùm per idem tempus illatam Christianis Sacerdotibus cædem , insigniter ultus est. Palatinus Vilnenfis Petrus Gastoldus , ductâ in conjugium ex nobilissima inter Polonos Buczaciorum domo , virgine , palam ad Christianos Romano ritu transierat : atque tum privatae pietatis causâ , tum etiam ad vulgandum inter gentiles suos Christi nomen , Ordinis sancti Francisci Religiosos Vilnam evocatos in ea area collocarat , quam nunc Sacellum S. Crucis *An. 1333.* occupat. Inde illi in facram messem intenti , securiùs contra Ethnicas superstitiones agebant Gastoldi patrocinio. Vir enim primæ per Litvaniam auctoritatis atque potentiae erat : & Olgerdo absente Reipu- *Martyrum Fratrum Ordinis S. Francisci Vilnae.*

P p blicæ

blicæ pro Principe præerat. Quamdiu ille præsens Vilnæ agebat, religionis Christianæ præconibus constitit in integro sua securitas; at per ejus absentiam (Tykocinum fortè in Podlachiam seu Subsylvaniam abiverat) plebs à quopiam concitata acriter in eos defæviit. Pars, numero septem, è domo violentè in forum protracti, præcisis cervicibus inter plebis convitia sanguine suo Litvanas terras Christo initiarunt: pars alia, alii septem, in verticem montis, vulgo Lysagora dicti, raptati, crucibus alligati, atque per abrupta montis in præterfluentem Vilnam deturbati. Sacra cæforum corpora à Gastoldo conquisita, in eâdem areâ, è quâ Christum prædicaverant, sepulta sunt. Reversus ab Moschovitica expeditione Olgerdus, seu quoddam facinus per se atrox id exigeret; seu quoddam proniore jam quàm ante affectu in Christianos esset; seu Gastoldo agente, in capita tumultus, quæstionem institui jussit. Quæsitum; atque quingenti omnino è Magistratu populoque Vilnensi capite plexi sunt.

*Vilnenses  
cives ob ne-  
caros Chri-  
stianæ reli-  
gionis præ-  
cones ple-  
buntur.*

sunt. Lege insuper cautum, uti posthac Christianis suas religiones promoventibus securitas publicè, privatimque esset. Novam itaque virorum religionum ejusdem Ordinis coloniam Gastoldus Vilnam evocat, & sedem ad paludem Vinkram designat, ibidemque B. Virginis templum dedicat. Rigatus prædecessorum sanguine ager, inter successorum curas protulit magnos pietatis proventus, quibus in hunc diem fruimur. Proximis annis & foris quietem intercessisse ab armis, & domi nihil momenti actum, ipsum Scriptorum silentium testatur. Mors Vankonis seu Venceslai Ducis Mazoviæ, (qui sororem Olgerdi in connubio habuerat) subsecuta, quietem rupit. Et affinitatum & fæderum jura, morte Principis terminata rati, magno exercitu Litvani Mazoviam in Novembri pervastarunt: aderat vastatoribus ipse Olgerdus, cum aliis fratribus: memoratur mille ducentos captivos esse eductos. Neque minorem ipsi cladem domi acceperunt à Germanis. Marchio Brandenburgicus cum Co-

An. 1336.

*Crucigeris  
Punie ar-  
cem oppu-  
gnant in  
Litvania.*

mitibus Namenſi & Hennebergenſi atque Crucigeris Equitibus , magnis copiis, poſt vaſtata obvia, arcem Pullen ſeu rectius Punie, obſedit. Quatuor illic bellatorum milia erant, qui ad primum de hoſte nuncium cum univerſâ familiâ è finitimis agris ed convolaverant. Fatigarunt diu hoſtem, non pro mænibus modò pugnando , ſed apertis etiam portis erumpere in oppugnantes non infeliciter auſi. Cæſis tamen multis, pluribus vulneratis ; cum deſenſorum numero , defendendæ quoque arcis ſpes , imminui cæpit : præſertim quòd laxati variè, quâ cuniculis , quâ arietibus muri , parum præſidii jam haberent. Conſilium itaque deſperatione plenum aggrediuntur : ne hoſti cedant , arma in ſuos atque ſeiſſos vertunt. Comportatâ ingenti ſtruve, quidquid rapere hoſtis poſſet , in ignem congerunt. Vxores , prolem, & quidquid imbellis aut ſexûs, aut ætatis , cædunt, atque in flammâs conjiciunt. Vbi ita ſuis parentaſſent , ſeiſſos Præfecto arcis jugulandos præbent , qui deinde ultimus ipſe ferro ſponte



sponte incumberet. Memorabile certe facinus, si in virtutis materiam incidisset! sed *hæc est incultarum mentium infelicitas, quòd ingentes animos ac vires, in vitia & desperationem consumant.* Dum ita illi furunt: muros defensoribus destitutos Germani subeunt; irrumpunt, Tragædiæ finem abrumpunt. Pauci jam supererant: sed hi quoque eâdem obstinatione, quâ à Præfecto expectabant mortem, inter hostem quærere; ruerre in confertos. Vix aliqui potuere vivi accipi: omnes cæsi. Eversa funditus arce, per circumjacentes agros populabundæ legiones in Prussiam reductæ. Olgerdus quamquam eâ vice insigne damnum à Prussis accepisset: tamen à Prussica expeditione abstinuit, & in Mazoviam circa medium Octobrem movit. Consilii ejus ratio, sub silentio mansit. Expeditionem verò infelicem eventus reddidit. Nam cum captis Pultoviâ & Ciechanoviâ Civitatibus, vastatisque earum territoriis, ingentia spolia reducerent, & securiùs non ex disciplina militari agerent: à Nobilitate Mazoviâ ad

*Lituanorum desperationem fortitudo.*

*An. 1337.*

*Litvani à Mazovitis profligati.*

Narviam profligati sunt. Pauci nando effugerunt , quibus potior ratio vitæ quàm prædæ fuit : at qui præda onusti , in paludosas ejus fluvii ripas , sese injecerunt ; ibidem, hausti paludibus, interierunt. Elapso  
*An. 1339.* inter otium anno sequente , sub initia deinde tertii , Magister Livoniæ Samogitiam iteratâ irruptione vexavit : Theodoricus verò ab Aldenburg Magister Prussiæ, cum Germanicis copiis , quas Comes Palatinus Rheni , ceterique Imperii Principes secum adduxerant , in Litvaniam irrupit. Velona inprimis arx Nemeno imminens , magna contentione oppugnata est. Habebat in præsidio Litvanos Samogitasque manu & consilio viros : horum fortitudine atque constantia hostis coactus, post amissos aut vulneratos audaciores , rem infectam deferre. Fortasse etiam externus miles ad hyberna assuetus , in campo sævientem hyemem pati nesciebat. Per æstatem majoribus copiis ingressi Prussi , ingentia damna Litvaniæ ac Samogitiæ intulerunt : vastati agri , captivi magno numero abducti. In  
 reditu

reditu ne paterent expediti passus, quos  
 silenti agmine transgressi Prussiam repenti-  
 nis incursionibus Litvani ac Samogitæ ve-  
 xabant, triplici fossâ & vallo, immissisque  
 in fossas aquis permunierunt. Per idem  
 ferè tempus inter Regem Casimirum Se-  
 natumque Polonum de successore in pu-  
 blicis Regni Comitibus agebatur. Sunt qui  
 memorant Constantinum Coriatovicium  
 Podoliæ Ducem, Olgerdi nepotem, com-  
 muni Regis Senatusque consilio ad eum  
 honorem vocatum fuisse. Venerat ille Cra-  
 coviam: sed quòd Ruthena sacra deferere,  
 atque ad Latina transire etiam regni causâ  
 nollet, spe successionis dejectus est. Neque  
 multò post reversus in Podoliam è vitâ ex-  
 cessit. Mortuo fratri successit, annitente  
 Olgerdo, Dux Novogrodensis Theodorus  
 Coriatovicus: hic, cùm novis provinciis  
 auctus, vetera Magni Litvaniæ Ducis im-  
 peria cæpisset aspernari, omnibus ditioni-  
 bus exutus est. Olgerdus ipse rebellem  
 bello petiit. Theodoro absente (nam im-  
 positis validis Valachorum præfidiis, ipse  
 ad

*Constanti-  
 nus Coria-  
 tovicus  
 nepos Ol-  
 gerdi ad  
 Regnum  
 Poloniæ in-  
 vitatur.*

*Olgerdus  
 nepotem re-  
 bellem, ar-  
 mis compe-  
 scit.*

ad Hungariæ Regem cum omni pecunia atque auro , auxiliorum causâ Podoliâ abiverat ) neque cum copiis reditum maturante , præcipuis arcibus Braslavia , Smotryca , Sokolco , Skåla , Kameneco , Czerwonogrodeco, quâ aperta vi, quâ celeritate potitus, universæ Podoliæ in formam Provinciæ redactæ Palatinum imposuit Gastoldum. Valachos milites universos ferro delevit : Nieftacum , qui pro Theodoro Podoliam gubernabat , Cameneci captum Vilnam remisit. Novos deinde per Russiam motus aperuit , mors Boleslai Mazoviæ Ducis , nuper veneno à Russis sublatus : qui partem Russiæ Haliciam inter & Leopolim interjacentem , maternâ hæreditate ad se devolutam , impotentissimè administrabat. Legitimus illi hæres solus erat Casimirus Rex Poloniæ. Huic itaque jus suum in Russiam, armis vindicaturus, cum Litvanis priùs bellum , omninè necessarium videbatur. Nam & Lubartus Leopoli , & Kieystutus magnis per Russiam possessionibus, fratres Olgerdi ; & Georgius Narimunto-

*An. 1340.  
Occasio  
controversiarum de  
Russia inter  
Polonos  
& Litvanos.*

muntovicius, eorundem Nepos, Krzemienicio imperabat. Vitandum tamen erat omnino Litvanum bellum Polono; ne pluribus simul impedimentis involutus, cum universa simul belli moles incumberet, sub onere fatisceret. *Magna enim, rectius per partes administrantur; quæ in unum congesta, omnem curam & vires superant.* Casimiri itaque prudentiâ res ita temperata est: ut cum Litvano æquis conditionibus fœdera pactus, in reliquam Russiam arma verterit, eamque spoliatam ac subjectam arcibus excisis, pretiosiore supellectili evecta, Poloniæ adjunxerit: incolas Polonis deinceps legibus vivere, jusserit. Verum non diu inquietum Kieystuti ingenium pacem tulit. Exeunte ejusdem anni æstate in Septembri (ignotum quâ causa) Mazoviam hostili agmine ingressus, universa provinciâ peragrata, ingentes prædas impunè abegit. Major longè vastitas Prussiæ illata est, altero abhinc anno copias universas è do- An. 1342. mestico externoque milite comparatas, è Prussia eduxerat, Rudolphus Dux Saxoniae

Qq

Ordi-

*Prussia à  
Lituanis  
vastatur.*

Ordinis Magister contra Polonos & Pomeranos, quibus Marchiam novam adimere conabatur. Litvani cum Samogitis eam occasionem rei gerendæ, sive sua sponte & antiquarum injuriarum memoriâ incitati, sive à Polonis exciti, arripiunt. Tumultuariè non tam militem quàm prædatorem legunt, & nudatam omni præsidio Prussiam pluribus simul locis invadunt. *Tantum momenti est, agentem inter duos hostes, non attendere quid ab alio pati possis, cum in unum intentus es!* Vastatâ atque in cineres ferè redacta universa Prussia: coloni pænè omnes excisi. Certè tanta ea strages fuit, ut Rudolphus ab sua expeditione reversus, ex solo insolitæ calamitatis conspectu, etiam ad dolorem obstupuerit; sensibus & ratione, atque aded ipsa paulò post vitâ amissis. Successor autem ejus Henricus Dusemer universam propè Europam ad bellum sollicitare est coactus. Clemens ipse, Sextus eo nomine Romanus Pontifex, singulos Christianorum Principum literis suis ad arma evocabat. Merentibus stipendia  
contra

*Christianorum  
Principum  
contra Lituanos  
expeditio.*

contra Litvanos & Samogitas ii favores Divini promittebantur, quos consequi mos est, peregrinos : qui suscepto voto, sepulchrum Christi Hierosolymis ; aut D. Iacobi Compostellæ ; aut certè Apostolorum limina, Romæ ; religiosè invifunt. Excivit cohortatio Pontificia non gregarium modò militem, sed ipsos Principes cum ingentibus popularium copiis. Aderant Hungari, cum Ludovico Rege ; Bohemi cum Ioanne Rege ; Moravi cum Marchione Moraviæ Carolo, Ioannis Regis filio, postea Romano Imperatore. Aderant Germani cum Brandeburgico Marchione, Comite de Halles, pluribusque Imperii Principibus. Aderant Danica auxilia, cum veteranis belli Ducibus. Henricus Magister Prusfiæ, & Burchardus Horem Livoniæ, cum sui Ordinis Equitibus & Prusso ac Livonico milite. Flos planè Militiæ Europæ in armis erat ; neque aliud spirabat, nedum loquebatur, quàm excidium Litvaniæ. Iam fama tantæ expeditionis in Litvaniem penetrarat. Plerisque extrema metuere. Ol-

Qq 2 gerdus

*Olgerdi &  
Kieystuti in  
subitu per-  
iculo inge-  
nium.*

gerdus & Kieystutus (qui *generosis mos est*)  
neque omninò desperare neque nimium fidere : il-  
lud omni modo agere , quâ arte vires hos-  
tium perfringi , atque in caput authorum  
verti possent. Legunt inprimis ipsi quoque  
expeditos, è veteranis, exercitûs ; Kieystu-  
tus per Samogitiam, Subsylvaniam, & Tro-  
centis Palatinatûs territoria: Olgerdus per  
ulteriorem Litvaniam atque Russiam. Ar-  
ces finitimas commeatû , milite, præfectis  
bello probatis , instruunt : imbellem om-  
nem ætatem, ac sexum vel in ulteriora Lit-  
vaniaë , vel in profundiores sylvas, & inac-  
cessa paludibus loca cum universa re fami-  
liari amovent. Tùm injectis ignibus, quid-  
quid agrorum Prussiaë adjacebat , ad plura  
milliaria flammis absumunt. Ipsi diviso bi-  
fariam exercitu , in diversa intenti expe-  
ctant, ut hostis Litvaniam ingrediatur. Ut  
*An. 1343.* primum à speculatoribus nunciatum est  
Christianum militem fines Prussiaë trans-  
gressos Litvaniam intrasse : Olgerdus ab  
unâ parte Livoniam , ab alterâ Kieystutus  
Prussiam milite ac præfidiis vacuas , inva-  
dunt:



dunt : Ignari Christiani quid domi ageretur , castra securè per hosticum promovere ; & aliquot dierum itinere progressis , hostem nullibi occurrissè ; mirari. Quærendum tamen omnes decernunt : proditum spondent , cùm intima rimari senserit. At neque pugnandi neque sæviendi copia dabatur ; cum nullibi signa hostilia , nullibi coloni , agrestiumve vici comparerent. Mox etiam commeatus deficere ; quem aliarum regionum more ex hostico speraverant. inde partim inediâ , partim ciborum insolentiâ morbi ac lues vulgari ; & mox funera jumentorum ac virorum. Ita Principes à cogitatione belli ad jurgia & contumelias versi , auctorem belli execrari : Magistrum Prussiæ prope ut proditorem tractare. Denique amissa exercitûs magna parte , projectisque passim impedimentis , è Litvania abitum , fugâ nihilo meliorem , maturare. At Olgerdus interea Livoniam Derpatum usque & Ozelam Insulam pervagatus : latè ferro & igni grassabatur. Kieystutus verò Sambiam nuper bello in-

*Expeditionis Germanorum in Litvaniem eventus infelix.*

tactam aggressus, Regiomonto exciso, pluribusque arcibus ac oppidis vastatis, ingentem prædam vitato hostilium signorum occurſu eduxit. Atque is tanta mole apparato bello exitus fuit : documentum posteris , *bella sæpè fortunatius ingenio, quàm virium magnitudine geri.* Proximus annus in

An. 1345. ocio abiit : sequentis verò deinde anni hyems plus terroris , quàm damni intulit. Henricus Magister , cum reliquis externorum auxiliis , & Marchione Flandriæ , Samogitiam invaserat : verùm irritò conatu ea expeditio cessit ; tum , quòd agrestes maturè se ad præsidia recepissent ; tum , quòd per Martium varia aura , modò nudâ glacie, modò nimis aquis itinera reddidisset impedita. Itaque expeditione in aliud tempus rejectâ ; tunc quidem inglorii, prædaque vacui, domum redierunt Prussi : Cæ-

*Litvania  
vastata,  
Olgerdus  
profligatus.*

An. 1346. terùm sequente anno , cum quadraginta millibus Litvaniam ingressi, vastitatem latè per Samogitiam circumtulerunt. Quarto Nonas Februarii populabundis castra Olgerdus objecit , magnoque animo hostem invasit.

invasit. Pugnatum acriter solido die : sub noctem tandem Litvani fusi, campo & castris exuti. Olgerdus cum neque animum apud turbatos reficere, neque aciem pugnamque inter fugientes restituere posset, post tentatas omnes Imperatoris militisque boni artes, cum Samogitis & Polocensi milite, sub signis, servatisque Ordinibus Velonam se recepit. Cæsa, ea vice, decem Litvanorum millia. Quamquam verò neque Prussis incruentam victoriam fuisse, auctores memorent : Magister nihilominus monumentum gratæ erga superos voluntatis Regiomonti dedicavit, cænobiū Sacrarum Virginum, quod deinceps *Lebe-  
meinck* vulgus nominavit. Partem aliquam injuriæ reposuit hostibus Olgerdus : nam eodem anno cum illi nihil à victis hostile timent ; in Sambiam irrupit, & ultra reliqua damna, ferro ac igni illata, aliquot millia captivorum eduxit. Mors Magistri Prus-  
fiæ subsecuta, aliquid respirii attulit : dice-  
res, mare placatum, ad tempus posuisse fluctus ; ut repentinæ tempestati fraudu-  
lentè

An. 1347.

lentè præluderet : ita post breve ocium ,  
dato novo successore Henrico de Kniprod  
pertinaciter deinceps ab utraque parte  
*An. 1348.* mutuæ clades frequentatæ. Prima novo  
Magistratui auspicia Henricus , à Litvana  
expeditione dedit. Contractis initio Ia-  
nuarii copiis agros Pastrimani territorii la-  
tè populatus , atque ut à quibusdam nota-  
*Novum Prussie*  
*Magister*  
*vastat Lit-*  
*vaniam.*  
tur Trocos usque progressus , priùs indè  
militem cum præda eduxit , quàm Litva-  
nus auxilia laborantibus expedivisset. Ra-  
pto nihilominus qui poterat milite Olger-  
dus , cum Kieystuto , ejusque filio Patrico  
hostem abeuntem magnis itineribus asse-  
qui conatur : quem intra Litvaniam non  
adeptus , speculatores dimittit , nunciatu-  
ros quid rerum apud hostem ageretur. Vbi  
intellectum est , divisâ præda , solutisque  
castris , militem universum dilapsum esse :  
*Vastatur*  
*vicissim*  
*Prussia à*  
*Litvanis ,*  
*& Russis.*  
tum summâ celeritate , pænè vestigiis vi-  
ctorum recentibus hærendo , Prussiam in-  
vasit. Iam direptis aliquot territoriis onu-  
stus prædâ & captivis militem impunè ex  
hostili provinciâ deducebat : cùm Smo-  
lensciæ

lensciæ Dux nova auxilia ab ulteriore Russia ducens, supervenit. Hic quoque ad vastandam Prussiam ire iussus, primo quidem impetu circa Labioviam non exiguam stragem ferro & igni latissimè edidit: tandem cum Præfectus Labioviæ armatum militem abeunti objecisset; minoribus licet copiis fusus; & prædam & victoriam in manibus hostium deferuit. Plus nocuit temerè fugientibus fuga, quàm pugna: major enim pars copiarum cum ipso Duce vorticibus fluvii, in quem se temerè proicerant, hausta interiit. Eodem anno fædera inter Eduardum Angliæ & Philippum Galliæ Reges constituta, ingentem belli tempestatem in Litvaniam & Samogitiam effuderunt. Præcipuus enim ex utrisque castris miles, ad sacrum contra Ethnicos bellum, in Prussiam evocatus, ad quadraginta millia virorum ascenderat. Tanto exercitu Magister Henricus, Kieystuti ditiones aggressus territoria aliqua ferè ex-

*An. 1349.  
Litvani à  
Prussis pro-  
sigati.*

cidio delevit. Abeuntem cum 9 Kal. Febr. affecutus esset Kieystutus; ingenti animi

R r ferociâ

ferociâ totoque impetu in extremam aciem irruit. Vbi à repentino tumultu res ad justum prælium devenit, acriter utrinque pugnatum est. Ceciderunt è Prussis præcipui Gerardus de Stegin Præfectus (vulgò Contor) Gedanensis, sex Ordinis fratres, & quinquaginta è primariis equitibus: gregarii militis peditis ac equitis magna pars desiderata est. Victoriâ tamen illi obtinuerunt. Levis enim Russorum ac Litvanorum equitatus gravem ferro Germanum militem diu non poterat sustinere: amissis in campo octodecim suorum millibus reliqui in fugam se conjecerunt. Afflictam eo inauspicato eventu rem Litvanam, gravio-rem reddidit novum eodem anno à Polo-  
no bellum. Casimirus Rex Poloniae attritas Prussica clade vires Litvanorum nactus, Lubarto & Kieystuto in Russia ditiones, armis extorsit. Occasio belli, prætextus hæreditatis in eas Provincias, quas antè bello à Gedimino & Olgerdo occupatas Litvani ut sui juris possidebant. Adempra est Litvaniæ Volynia, Pödolia cum Bel-  
zenfi

*Bellum Po-  
lonum in  
Russia con-  
tra Litva-  
nos.*

zenſi & Breſtianenſi Palatinatu : ejeſtis  
 undique Litvanis, præſidia & Præfecti Po-  
 loni impoſiti. Litvani quamquam graviffi-  
 mo cum Crucigeris bello implicati tene-  
 rentur ; magis tamen Ruſſiam per Polonos  
 ereptam , quàm cætera à Crucigeris illata  
 damna ſentire. Vt primum lues , quæ per *An. 1350.*  
 duos ferè annos Poloniam fædè vexavit , *Poloniam*  
 mitigari cæpit. infeſtis ſignis in Sendomi- *Litviani*  
 riæ Palatinatum irrumpunt, fuſiſque Polo- *vallant, Vo-*  
 nis , qui populationes armis ſiſtere conati *lyniam re-*  
 fuerant , latiffimè ferro & igni fæviunt.  
 Converſis inde in Ruſſiam armis, eodem  
 impetu, arces & civitates nuper ſibi detra-  
 ctas, quâ vi, quâ deditiõne recuperant. So-  
 la Leopoliſ intentata : quòd & novis mu-  
 ris, & præſidio firmiſſimo, difficilem oſten-  
 deret oppugnationem : omnis tamen cir-  
 cumjacens ora, ferro & igni vaſtata eſt : Ex  
 iis deinde, quas receperunt, arcibus, finiti-  
 mi Polonorum agri continuis populationi-  
 bus infeſtabantur. Caſimirus Rex, etſi poſt *An. 1351.*  
 nuperam de Litvanis victoriã, à militari-  
 bus ſtudiis totum ſe ad voluptatum curam

R 1 2

trans-

*Poloni Vo-*  
*lynia par-*  
*tem recupe-*  
*rant, fufis*  
*Litvanis.*

transtulerat : urgente tamen per iterata  
damna hoste , resumpsit veterem animum  
& arma. Accessit ad belli societatem Lu-  
dovicus Hungariæ Rex nepos Casimiri;  
nuper regno Poloniæ successor designatus;  
quo nomine etiam omne suum in Russiam  
jus Casimiro atque Polonis transcripserat.  
Ab eo enim tempore, quo Hungariæ Prin-  
ceps Colomanus Haliciæ & Volodimiræ  
regnauerat , Russiæ finitimæ Dominos se  
Hungari ferebant : quamquam pridem non  
possessione modò ejus omni , verùm ipsâ  
spe depulsi. Vastavit eâ expeditione Casi-  
mirus Volodimirienfes agros, & caput Re-  
gionis Volodimiriam oppugnatione cepit.  
Pugnatum etiam est cum legione Litvano-  
rum unâ, quæ in castra regia inciderat : fusi  
Litvani atque Dux ipse Kieystutus vivus  
in potestatem hostium venit. Eodem bello  
Volodimiræ obsessus Lubartus, manus Po-  
lonorum insigni audaciâ unius militis eva-  
sit. Bogdanus de Iwanice dicebatur : hic  
profundâ nocte castra Polonorum ingres-  
sus , atque universa ad plenæ Lunæ radios  
ex or-



ex ordine speculatus, Principem de omnibus instructo modum viamque periculi evitandi aperuit. Auctus ob id meritum à Principe possessionibus, novoque stemmate, nobili *Ivvanieciorum* familiæ initium dedit. Kieystutus verò apud victores honestè atque regiè habitus, cum spem Christianæ religionis à se suscipiendæ fecisset, mitiùs à custodibus sub quorum curâ agebat, observari cæpit. Inde eludendæ diligentia custodum occasionem nactus, per tenebras è carcere elapsus, atque ad suos incolumis delatus, mox copias cum Lubarto fratre in regiæ Russiæ agros ducit.

*Kieystutus è Polono carcere elapsus Volodimiriam Polonis eripit.*

Occupatâ, vix sentiente Polonorum præsidio, Volodimiria, populationes Haliciam usque, atque adeo ad ipsos Hungariæ & Valachiæ fines extendit. Reversus in Litvaniam ex Russia novam contra Polonos instaurat expeditionem. Sendomiriæ vastatione Zawichuostum usque pertigit. Resumebantur deinde insperatæ hinc inde irruptiones; consilia Polonorum, viamque, monstrantibus quibusdam è nobilitate Po-

*An. 1352.*

*Proditor sua proditione perditur.*

lona , proditoribus. Nomen uni Petrus Pfonca , alteri Otho Czecharowicz : quorum in Patriam impietas , ipsos sceleris olim patronos , tandem vindices habuit. Nam Iagelo , deinde Rex Poloniæ renunciatus , utriusque bona fisco Regio addixit. Intima Poloniæ insperato insultu aggredi animus Litvanis erat : sed Vistula fluvius ejus regionis princeps , alveo satis lato ac profundo , ne ea consilia in eventum deducerentur , obfistebat. Præmittitur itaque Pfonca , qui , securiùs inter suos , sine fraudis suspicione , vadum pertentet. Facit ille impigrè imperata , & quà vadoso alveo ferebatur Vistula , præfixis virgultis designat : eodem paulò post , piscatores fortè delati , quid virgulta supernatantia aquis designent , mirari ; simulque aliquid subesse fraudis non ex vano suspicati , virgulta iis locis extracta , quà vorticosior alveus summo impetu gyra bat aquas , disponunt. Obscurâ jam nocte Litvana castra ad fluvium pervenerant. Ductori vadum ostendenti creditum ; & ab audacioribus profectio temere

merè inchoata : at cum passim è primis ordinibus milites vorticibus abriperentur, qui extra periculum adhuc erant, proditos se clamare ; & Ducum fidem obtestari. Proditionem & ipsi Duces metuere : ubi verò profunditas fluvii explorata fuisset, Psonca tanquam proditor militari impetu ad ipsam ripam miserè truncatur. Atque, *ut in adversis, semper ad pejora judicanda pronior animus est* ; majores insidias non vulgus tantum, sed & Duces vereri : quare extemplò eâdem nocte castra inde retrò mota sunt. Olgerdus verò adjunctis Tartarorum copiis Podoliam universam, quæ Polono suberat, latissimè populatus, prædam omnem sine periculo, cum nuspian hostis occurrisset, eduxit. Induciæ deinde Polonum

An. 1353.

inter ac Litvanum subsecutæ : & Olgerdus quidem, ac Kieystutus, initum fædus constanter coluerunt : fortasse non tam patetorum religione, quàm Prusici belli cogitatione. Lubartus autem contra omnem fæderum fidem, cum Volynio & Litvano exercitu, Haliciam in Iulio invasit : occu-

Lubartus  
Dux Volynie  
Haliciam  
invasit.

patâ

patâ ex insperato civitate, plurimos civium ac exterorum, qui nundinarum occasione magno numero confluerant, cecidit: ædibus spoliatis flammis subjecit, viciniam universam latè vastavit. Repetiit rursus circa Non. Sept. irruptionem, & Zawichuostum populabundis legionibus progressus, priùs cum prædâ militem, ex hostili provinciâ deduxit: quam Poloni ad arma concurrissent. Non absimili eventu, sed meliore causâ, Olgerdus cum Kieystuto fratre & Patrico nepote, ex Resselienfi in Prussia territorio, prædas egerunt: quo successu irritatus miles, & ad interiora Prussiæ ductus, liberiùs ferro & igne latè bachatus est. Idem annus insignis est celebri naturæ prodigio. Præter morem ejus oræ, Martium totum, Aprilem, Majum, ingentes æstus tenuerant. Exeunte verò Maio tanta subsécuta est aëris vicissitudo, ut quæ inter intensa frigora nives ceciderant, ad duos cubitos altæ fuerint. Desperare agrestes: & fruges, cum planè flos pullaret, frigore adustas, nivibus enectas, & sex

*Fertilia  
insperata.*

sex dierum spatio insepultas, aspicientes, laborem ac sementem, spem ipsam perditam deplorare. At longè aliter res habuit. Dissolutis sensim calore nivibus, tanta fertilitas successit; ut nunquam maiores ex agris coloni proventus collegerint. Solæ eæ periere fruges, quas servare conati sunt aliqui, excussis intempestive nivibus.

Sequenti anno instaurata in Prussiam expeditio, nemine hostium, aperto campo, occurrere auso. Ingens enim in Litvanis ca-

*An. 1354.  
Prussia à  
Lituanis,  
Samogitia  
à Prussis  
vastatur.*

stris erat multitudo: Prussis verò nulla exterorum ad manum auxilia. De munitioribus igitur tantum locis se tueri Crucigeri contenti, colonorum cædes, & prædiorum flagrantium fumum ex arcibus mæsti spectabant: Litvanis ferrum & ignem per agros latè circumferentibus, & peragratâ Sambiâ, ultra Regiomontum milliaria quindecim Vartembergum usque progressis.

Refudit vicem deinde Henricus Magister; cùm non minorem cladem Samogitiæ intulit: universo Ducatu vastato, exustis pagis, inhabili ad laborem ætate cæsâ,

*An. 1355.*

S f ingenti

ingenti copiâ prædæ, & captivis promiscuæ conditionis eductis. Non paucis tamen captivorum nihil sperantibus libertatem fortuitus casus dedit. Nam eo die quo victores Prussi Ragnetam accessere, Magister ab equo lapsus brachium dextrum fregit; eademque nocte concepto fortè igne, arx funditus conflagravit. Inter hunc tumultum captivi Samogitæ elapsi, & carceri, & potestati hostium se eripuerunt. Vltus est eam cladem Olgerdus exeunte proximi anni Ianuario: ingenti exercitu hostilem provinciam ingressus, in diversa simul loca partitus legiones, totam ferè Prussiam, simul cædibus & flammis involvit; Magistro & Crucigeris in aciem prodire non audentibus. Fama ejus cladis Europam, ac præcipuè Germaniam pervagata, magnos in Christianorum animis motus concitavit. Ex Anglia, Gallia, Moravia, Bohemia, Franconia, Suevia, atque adeo totâ Germania, magno numero juvenus sponte nomina dare, vix expectare Ducum evocationem. Magister quanquam ex numero

An. 1356.

Prussiam

Olgerdum

vastat: unde

de occasio

Europæis

arma sum-

monds contra

Litvanos.

pero casu corpore æger, confluentibus nihilominus undique Christianorum auxiliis animo erectior; castris sui loco præficit Sigfridum à Davelt Mareschalcum Prussiæ, atque in Litvaniam dimittit. Ingressis hostibus Litvaniæ fines, nulla castra, nullus miles objectus est. Cladem igitur Litvaniæ & Samogitiæ illatam inde pronum est æstimare; quod totam illam ferociam è tot gentibus collatam, in agros, pagos, & agrestes, effundere hostis sit coactus; nemine ad pugnam occurrente. Aliquot deinde annorum quies undique intercessit: quam inde cum Polonis fædus mutuum conservabat; inde cum Prussis ipsa necessitas exigebat, tam Prussis quàm Litvanis per mutuas clades exhaustis. Tandem Lu-

*An. 1360.*

*Marchio  
Brandenburgicus  
Samogitiam va-  
stat.*

dovaldici Brandenburgici Marchionis (filius is erat Ludovici Cæsaris) cum delecto milite in Prussiam adventus Crucigeris ad resummendas Litvaniæ vastationes animos addidit. Repetitæ ter eo anno per Samogitiam & Litvaniam populationes tam graves fuerunt, ut incolis ac pagis omninò excisis,

S f 2

deserta

deserta territoria memoriam stragis acceptæ diu conservarint. Auxit magnitudinem victoriæ, captus ultimâ expeditione Kieystutus. Hic ut erat *ferociore ingenio*, in

*Kieystutus  
in prælio à  
Prussis se-  
mel iterum-  
que capitur.*

*periculis magis audax, quàm cautus*, abeuntes prædatores cum suis affecutus, atque signa ingenti animo conferre ausus, cum rem audaciùs urget, cinctus undique legionibus Germanicis, vivus in potestatem hostium venit: paulò post captivorum Christianorum magno numero Crucigeris vicissim misso, suis liber redditus. Prussi his victoriis elati omnino fortunam urgere insequentem annum decernunt, spe aut occupandæ, aut excindendæ frequentatis cladi-

*An. 1361.*

bibus Litvaniæ. Externis domesticisque copiis pro Magistro præficitur Henricus Crumfelt Magnus ordinis præfectus: hic in Subsylvaniam armis Prussorum nondum tentatam exercitum ducit. Vbi cum ob nimias ex assiduïs pluviis itineris difficultates res ex animi sententia non cederent, ne tanta expeditio nullo eventu abiret, castra in Litvaniam transtulit. Non diu Litvani  
passi



passi Germanos impunè vagari , Ducibus Olgerdo , Kieystuto & Patrico castra ipsa hostium insperato impetu invadunt. Tenuit plures horas atrox & in utramque partem dubium prælium : tandem Germani & armorum genere & loci opportunitate ( è castris enim benè munitis pugnant ) superiores Litvanis , victoriam quoque extorserunt. Kieystutus non consilio modò , sed manu & gladio fluctuantes ordines restituere conatus , cùm validè gladium in fortissimum quemque hostium vibrat , ab Henrico Heckerbeg Equite aurato , hastâ à latere impactâ equo dejectus , atque mox concurrentium multitudine cinctus in potestatem hostium venit. Ad- *Filius in parentem pietas, & militum in Ducem,* verterat periculum patris , filius Patricus : itaque velut æstro percitus , ( quâ erat animi generositate , & in patrem pietate ) in confertos hostium ordines equum agit , laboranti opem laturus parenti : verùm cùm cæco Marte viam sibi gladio ad parentem aperit , pænè ejusdem fortunæ comes factus est ; ab Henrico Heberg Crucigero ,

hastili equo dejectus. Gerebat seriò rem  
 gladio pedes , sed multitudine jam oppri-  
 mebatur ; cùm cohortes aliquot Litvano-  
 rum cuneo factò hostem submovent, & as-  
 sertum libertati Principem , è pugna loco  
 servatis ordinibus asportant. At Kieystu-  
 tus grande reliquæ prædæ coronamentum,  
 Mariæburgum abductus , carenis compe-  
 dibusque oneratus , in carcerem detrudi-  
 tur. Duos tantum dies eam calamitatem  
 tulit. Nam Litvani cujusdam (qui sacris  
 Christianis initiatus ibidem liberè agebat )  
 commiseratione , tum instrumenta effrin-  
 gendo carceri, tum vestem ad morem Cru-  
 cigerorum comparatam regendæ fraudi,  
 tum equum & reliqua fugæ necessaria na-  
 ctus, clarissimo die è carcere & arce profu-  
 git. Ita certè memoratur fraus scitè admi-  
 nistrata ; ut transeuntem equitem per ar-  
 cem ac civitatem , tanquam unum quem-  
 piam è Crucigeris ipsi Crucigeri saluta-  
 rent. Ante vesperum ad sylvas delatus, ut  
 insequentium sagacitatem eluderet, dimis-  
 so equo , in locum paludosum se abdedit ;  
 ibique

*Kieystuti  
 carcer , &  
 fuga.*

ibique triduo latuit : nocturnis deinde itineribus , per densissimas sylvas atque paludes frequentes , syderum tantum ductum secutus , totus lacer , luto oblitus atque adeo , semianimis in Mazoviam evasit. Ibi à filia sua Danuta , Ianussii Ducis Mazoviæ conjuge agnitus , liberaliter habitus , recreatus medicinis , equis ac comitatu instructus , in Litvaniam rediit , magno fratrum Principum , totiusque gentis gaudio. Vbi Litvaniam attigit , simul respirare aurâ patriâ , simul bellum contra Prussos animo vindictæ cupido , maturare : lecto quamprimum exercitu Prussiam ipse invasit. Castrum D. Ioannis vi cepit : cæso præsidio ac thesauris expilatis munitionem solo æquavit. Inde ferro & igne latissimè sæviens Gedanum usque pertigit , & arce per vim potitus , cæteris cæsis Præfectum loci Equitem nobilissimum Ioannem Colinum cum aliis Crucigeris in captivitatem abduxit. Tandem rectà ad possessiones ejus Crucigeri , à quo nupero prælio equo excussus fuerat , militem populabundum ducit ;

*Kieyskius in Mazoviam evadit , inde in Litvaniam reversus , bellum Prussis inferre : rursusque capitur.*

cit ; arcem dictam Keckerbeg expugnat, spoliat, ædificia simul cum captis militibus subjectâ flammâ absumit. Iam Kieystutus ex conscientiâ sumptæ vindictæ gaudio plenus , onustum spoliis militem deducebat è Prussiâ : cum Præfecti, Bartensteinianus & Rastembergenfis abeuntem armatâ acie affecuti, extremos summâ vi adoriuntur. Pugnatum utrinque acriter : Ducis tandem ipsius infelix casus , & animos & victoriam Litvanis perdidit. Excussus equo , à Verno de Vindeken Kieystutus, ( cum occiso hostis equo ) fortiter pedes pediti instat , à Præfecto Nießoviae gravi vulnere debilitatus , in potestatem Præfecti Bartensteiniani venit. Capto Duce, reliquus miles suâ sponte fugam arripuit. Tertia hæc Kieystuto apud Prussos captivitas fuit , non multò longior , quàm priores. Brevi enim è carceribus per aliquam fraudem elapsus in Litvaniam evasit incolomis : relictâ inter hostes suspicionum materiâ, cum plerique fugam ejus non tam negligentiam, quàm favore aliquorum, accidisse

disse criminarentur. A privatis, eâ de re, sermonibus sensim ad dissidia publica gradus fiebat. Magister, ne ipso *ocio gliscens dissensio*, vires *sumeret*; expeditionem bellicam omnibus imperat. Erant illi præter ordinariorum legionum exercitum, auxiliares copiae à Bohemis, Anglis, Danis, Germanis conflatae. Cum utroque igitur exercitu ineunte vere in Litvaniam movit. Primus belli impetus in Caunam effusus: ingenti apparatu, ac pertinaci operâ, arx oppugnabatur: præsertim, ubi Olgerdus, qui solvendæ obsidioni cum exercitu advenerat, infectis rebus repulsus est. Tandem post diuturnam oppugnationem ipso Sabbatho quod feriis Paschalibus proximum est, subruto cuniculis muro, atque injecto ædificiis igne, pertinax propugnatorum studium Prussi perfregerunt, atque arce sunt potiti. Amiserunt quidem non paucos, quos oppugnationi succedentes, murus cuniculis loco ejectus, obtrivit: at longè major apud Litvanos clades. Tria milia delecti militis in præsidio fuerant, quo-

An. 1362.

*Cauna oppugnatur à Crucigeris & diruitur.*

T t rum

rum indignam inter flammæ flagrantis arcis mortem, nunc etiam vulgaribus næniis populus decantat. Soli è nobilioribus triginta sex, cum Voydato Kieystuti filio, vivi ab hoste capti. Subsequens dies ob festi solennis religionem, quiete cultus est: at tertio die quidquid munimenti speciem inter rudera exustæ arcis adhuc referebat, funditus sublatum; reliquæ murorum dirutæ, aggeres disjecti, fossæ exæquatæ. Eodem progressu Pistena & Vielona excisæ, illa metu suorum deserta, hæc quatuor dierum oppugnatione capta. Hoste in Prussiam reverso validius malum, fames; miserrimè universam Litvaniam peragravit: sive quòd communis, ejus anni, ista fuerit tempestas, ut quæ etiam Poloniam & Russiam involverit, sive quòd inter continuas hostium incursationes, vel metu vel inopiâ colonorum, omnis agricultura jaceret projecta. Nihilo mitiorem fortunam sequentis anni Ianuarius attulit. Magister Prussorum cum auxiliariis Bavarorum Comitæ Volfangi & Livonicorum Crucigerorum

*Fames in  
Litvania.*

gerorum copiis; ferro & igni universam Litvaniam latissimè vastavit; Eyragoliano, Panreimano, & Lambimensi territoriis in Samogitia excidio deleris. Deductâ feliciter omni prædâ atque captivis; iterum Mareschalcus Prussiæ Schindekop infestis signis in Litvaniam rediit; & Grodnam obsedit; verùm cum insultus ejus aliquot, Patricus qui arcis præerat fortiter rejecisset; Prussus deserto arcis oppugnandæ consilio, ad agrorum vastationem militem dimisit. Variavit deinceps fortuna, & paribus ferè cladibus, mutuæ utrinque agrorum vastationes institutæ. Illa tamen cura maximè coquebat Litvanum: quòd excisis arcibus, sensim agri colonis destituerentur; atque adedò, hostis arma, interioribus Litvaniæ, admoveret. Quare & hosti morando, & colonis inter subita pericula recipiendis, munitiones reficere omni studio contendebat: jam enim timebatur ne belli sedes paulò post non modò in ulteriorem Litvaniam, sed in ipsam Russiam promoveretur. Neque minùs hostis incumbibat;

*An. 1363.  
Prussorum  
expeditiones in Litvaniam, & Samogitiam.*

*An. 1364.*

T t 2

ne quæ

ne quæ de novo , per vastatas nuper provincias , arcium obstacula exædificarentur. Ragnetanus imprimis Præfectus , operas ruditer ac tumultuariè Caunæ munitiorem maturantes disjecit, & arcis inchoatæ opus disturbavit. Magister deinde Prussiæ Pistoriam, fugâ præfidiariorum proditam, cepit & exussit : Velonam quoque suis rudibus recenter inædificatam , licet acriter à Gastoldo defenderetur , congesta arentis materiæ strue, & subjecto igne, sub mænia quo ventus flammam impellebat eam promovendo succendit , & expugnavit. Præfidiariorum plurimi ignibus perierunt. Præfectus præsidii Gastoldus , cum vivus hostibus cessisset orta concertatione de jure captivi , inter manus victorum oppressus est. Quamprimum hostis Litvaniâ excessit, Kieystutus occultis callibus consequitur, & Prussiæ infesta signa infert. Vastatum Iuriemburgum, copia ingens captivorum prædæque variæ , nemine amisso abacta. Deinde contra Marefchalcum Prussiæ copias duxit ; qui rursus per Samogitiam

*Kieystuti  
pro Patriâ  
gesta.*



tiam vagatus, prædam indè collectam exercitu bifariam diviso deducebat. Extremum imprimis agmen, & cohortes ad impedimentorum præsidia relictas, adortus, hostem cecidit, prædam recepit: inde contra ipsum exercitus robur magnis itineribus cum victore milite properabat. Verùm Prussi extremi agminis clade consternati citato agmine in Prussiam abiverant, multâ *An. 1365.* prædâ, quæ fugam onerabat sparsim per viam desertâ. Quievit aliquantisper Kieystutus: mox insperatus Angerborgum obsedit, expugnavitque: indè per vicinos agros prædas egit. Prussi Duce Sambienfium judiciorum præside, cùm abeuntem Kieystutum assequi non potuissent, Eyragoliæ territorium vicissim vastarunt. Pari eventu cùm deinceps Olgerdus & Alexander Koriatovicus divisis copiis simul pluribus locis Prussiam vastassent, atque Tibzâ & Ragnetâ præcipuis arcibus, pluribusque oppidis excisis, octingentos captivos eduxissent; mutud Litvaniam latissimè populatus est Magister Prussiæ. Inter similem

An. 1366.

*Casimirus  
Rex Poloniae  
Litvanis  
Russiam  
eripit.*

planè mutuarum incurſionum viciffitudinem, ſequens quoque annus tranſmiſſus. Magiſter Pruſſiæ exterorum auctus ſubſidiis; Litvaniam ſædè afflixit: Kieyſtutus verò abeuntem tacitè ſecutus, circa Inſterburgum erupit: arcem pænè cepit, civitatem flammis abſumpſit, territoria Vilavienſe & Tapiavenſe ſolo æquavit. Ipſe arcis Præfectus amiſſo oppido ægrè arcem & vitam periculo eripuit. Vt Litvanis ad repentinās haſcè irruptiones via deinceps præcluderetur, Caunam inter & Iuriemburgum, arcem Chriſtimemelum excitari & Nemeni ripas ponte jungi imperant Pruſſi. Conabatur Kieyſtutus operas diſturbare; ſed à præſidiario milite bis rejeſtus, tandem quievit. Eòdem anno Caſimirus Poloniae Rex naſtus bello Pruſſico implicatos Litvanos, Ruſſiæ poſſeſſione eoſdem exuit; Lubarto Theodoro Olgerdi fratre, è Volyniâ ejeſto. Quanquam enim & Belzenſem Ducatum ſub Georgio Narimuntovicio intactum reliquerit; & Podoliae Duci Alexandro Narimuntovicio attribuerit

tribuerit Volyniam : utrumque tamen ita præstitit ; ut supremum jus in Russiam penes Regem Poloniæ esset , arces, civitates, præsidia penes Poloni nominis præfectos. Sive hac Polonorum injuriâ irritati Litvani , sive quòd cladem nova Crucigerorum incursione quinque districtibus illatam Episcopi Plocensis consiliis fama inter populum vulgata attribueret, Mazoviam prædis agendis apertam , Duce Kieystuto invasere. Pultovia ditionis Pontificiæ oppidum præcipuum , primo impetu captum : arx ; exusti oppidi ruderibus, undique cincta ; cùm & ipsa ignem concepisset , & præsidium vim flammæ non ferret , expugnata : ditio universa, latissimè populabundo militi, in prædam cessit. Plura molientem Kieystutum ab ulteriore Polonici belli curâ , retraxit, domestici atque ipsis cervicibus imminenti hostis , metus. Prussi enim cum jam vastitas sola & solitudo per propinquiores Prussiæ agros superesset, sedem belli in ipsa Litvania firmare contendebant. Ad Nemenum fluvium pænè sub  
conspe-

*An. 1367.**Pultovia à  
Litvanis  
exiit.*

*Crucigeri  
in Litva-  
nia arcem  
conduunt.*

conspectu Caunæ locum capiunt : atque continuo sex mensium labore egregiè permuniunt. Arx hæc nova ad unum milliare Cauna diffita *Gottesverderum* nuncupata est. Imposito præsidio valido cum reliquis copiis populatum ipse Magister Henricus ivit. reversus inde in Prussiam Schindecopio Mareschalco novis copiis præfecto, curam dat, instaurandæ in Litvaniam expeditionis : tum, ut novæ arcis præsidio esset ; tum, ut hostem, excisis ejus ditionibus longiùs submoveret. Sed Schindecopio adveniente, ne vestigia nuperæ arcis jam erant. Olgerdus enim & Kieystutus, veluti frenum è propinquo Litvaniæ injectum, extrema etiam contentione excutiendum rati, cùm junctis viribus in quinque integras hebdomadas oppugnationem pertinaciter produxissent, tandem vi captram, funditus omnino sustulerunt. Dolo- re itaque & indignatione plenus Schindecopius, Beieris castello copias admovet, & paulò post eodem potitur. Kieystutus, seu quodd paucas in expedito cohortes haberet, seu

*Olgerdus  
arcem  
Prussorum  
diruit.*

ret, seu aliâ ex causa, minari potiùs arma,  
 ac ostentare; quàm signa inferre. Legatis  
 missis, castellum captum sibi restitui po-  
 stulat; ni id fiat, atrocia in præsidium mi-  
 natur. Vana nimis legatio risum aliis;  
 Schindecopio, etiam indignationem, mo-  
 vit. Facturum se, respondet, ut Kieystu-  
 tum mox eximat, oppugnandi castelli ne-  
 cessitate; & tam atrocia in captorum præ-  
 fidiariorum capita, decernendi: simulque *Atrox*  
 spectantibus legatis, nonigentos Litvano- *Prussorum*  
 rum milites captos, arci includi jubet, & *facinus.*  
 ignem subijci. Fractus tantâ ferocia, ad in-  
 faniam irati Prussi, Kieystutus; lentiùs age-  
 re, & colloquium de fædere postulare.  
 Congressi amicè initio, illud tantum è Re-  
 publica statuère; ut utrinque captivi per-  
 mutati, suis & libertati redderentur: dein-  
 de mox, oleum igni affusum à Kieystuto;  
 cum is intempestivè comminatus fuisset,  
 sequenti anno se Prussiam visitaturum. Ut  
 enim hisce terriculamentis, ferro non ver-  
 bis, responderetur: jussu Magistri, bis in  
 Litvaniam, hoc ipso anno Mareschalcus ir-  
 V u                   rupit;

rupit ; atque utraque expeditione non le-  
*An. 1370.* vem cladem intulit. Hæc maximè Kiey-  
 stutum urgebant : ut bellum , nuper inter  
 minas temerè promissum , maturaret. Ne-  
 que pati potuit , diuturniorem moram ;  
 quàm quæ satis erat expeditioni , majore  
 mole apparandæ. Contra expectantem è  
*Kieystutum* condicto hostem ituro, valentioribus viri-  
*Prussiam* bus erat opus : itaque non suis modò fra-  
*vastat.* ternisque Olgerdi è Litvania , Samogitiâ,  
 & Rusliâ contractis copiis , sed Scythicis  
 etiam auxiliis evocatis, rem aggrediebatur.  
 Vbi coivere in castra legiones : diviso bifa-  
 riam exercitu, Sambia populationibus ele-  
 cta. Vastatis per universam provinciam la-  
 tè agris , è populatione miles Otelzbergo  
 arci admotus : locus vi expugnatus, mænia  
 funditus diruta. Promotis indè castris sub  
 Roudinum , pars lentæ oppugnationi de-  
 signata , reliqua totius exercitûs moles in  
 circumjacentem quaquaversus viciniam ef-  
 fusa, latissimè stragem ferro & igne propa-  
 gavit. Neque prius in castra reditum,quàm  
 fama ingentes Prussorum copias jam ad-  
 ventare

ventare vulgasset. Nam ultra veteranas Crucigerorum & stipendiariorum exter-  
 norumque auxiliorum legiones ; universa  
 juventute quæ per oppida & agros bello  
 inveniretur apta , arma capere jussa ingens  
 omnino exercitus conflatus fuerat. Iam *Pugna Lit-*  
 Litvani signa domum converterant : cum *vanorum*  
 Henricus universis simul copiis ingruit ab- *cum Cruci-*  
 euntibus. Atrox planè prælium erat : com-  
 paratis enim utrinque animis , in pugnam  
 ruebatur : Quamquam verò Litvanis mille  
 jam suorum in acie cecidissent : tamen quia  
 à Crucigeris quoque ( præter promiscua  
 capita) viginti sex nobiles ordinis equites,  
 ipseque belli Dux, Magister Ordinis, Hen-  
 ricus occubuerunt : exæquatis damnis in  
 meridiem usque fortuna neutrò inclina-  
 bat. Sperari fortasse poterat victoria , sed  
 Kieystutus ac Olgerdus dubiæ spei parum  
 fidere : magis timere , ne sui multitudine  
 armorumque genere inferiores cùm ( viri-  
 bus ipsâ pugna fatigatis ) sensim remittunt  
 audaciam, tandem in fugam effunderentur.  
 Quare dùm integer animus cuique, signum  
 V u 2 receptui

receptui per universam aciem cani jubent: servatis signis ac ordinibus, omnes campo excederent & impedimenta in proximam sylvam submota sequerentur. Hostis potius campo & victoriæ quanquam satis cruentæ opinione lætus, substitit neque enim absque Duce, progredi ulterius audebat. Litvanus verò victoriæ fructum prædam omnem, salvo milite domum securè deportavit. Reverso in Litvaniam Kieystuto, & connubialibus cum Biruta Vestali conviviiis militarium laborum reliquias detergenti non diuturna quies. Leopoldus enim Austriorum Dux, magnum interea militem in Prussiam adduxerat: his copiis Crucigeri Samogitiam adorti; quadridariam diviso exercitu, universam provinciam vastarunt. Cæsis bello & labori ineptis; reliqui, cum cæterâ omnis generis prædâ, ingenti numero in servitutem ducebantur: citiusque hæc peracta, quàm Kieystutus cum milite advolasset. Quare cum abeuntium agmen assequi non potuisset populabundas cohortes in hostiles agros

*Leopo'dus  
Austriacus  
Crucigeris  
contra Lit-  
vanos sup-  
petias ferr.*



agros effudit. Magnam cladem repentinus ille impetus Prussiae intulit : territorium integrum excisum ; caput territorii Gozenlanken arx expugnata atque everfa. Excedentem è Prussia Litvanum , iisdem fere vestigiis secutus Insterburgi Præfectus , Vigandus Beldenstein , expedito milite plurimos pagos hæcenus belli mala inexpertos spoliavit , cæsisque agrestibus aut captis exussit. Fervebant mutuæ in agros incursationes : cum per idem tempus mortuo Poloniae Rege Casimiro recuperandæ Wolyniæ spes ad novum bellum Litvanos avertit. Occupatis illis Prussico bello ut ante memoravi Casimirus Wolyniam detraxerat ; atque ejecto indè Lubarto-Olgerdi fratre , Alexandro Koriatovicio certis legibus attribuerat. Eo itaque nunc totis simul viribus itum. Aberat fortè tum Alexander , & Cracoviæ apud Polonos agebat ; pro absente principe , præerat Wolodimiræ Petrus Turski Eques Polonus : erat arcis , contra longiorem obfidionem sufficiens commeatus ; sed præ-

*Litvanorum in Russia contra Polonos bellum.*

fecto , contra solam armorum ostentationem, non satis animi ; desperatione suppetiarum , vitam suorum & fortunas pactus, obsidionis tædia , maturâ deditio-  
 ne redemit. Lubartus sine prælio , ac pænè per otium potitus erepto sibi nuper patrimonio , vetustiore ligneam arcem munitio-  
 nibus variis ac præsidio forti communivit; aliam è cocto lapide, jussu Casimiri magnis sumptibus per duos annos exædificatam, funditus dirui jussit. Indè junctis viribus in Poloniam legiones ductæ: & Lublinensis Sendomiriensisque Provinciæ latissimis populationibus exhaustæ. Ad ipsum Calvum vulgè montem , pervetusto S. Crucis templo , magnisque religionibus claro, insignem penetratum est : non profana modo , sed & sacra omnia violata ; altaribus magnifica piorum donaria detracta. Ab-  
 euntibus cum opulentâ prædâ, res non admiratione magis , quàm memoratu , digna contigit. Currus, quo inter reliquam prædam, Crucis illius è qua DEUS Homo pependerat, pars , aureæ thecæ inclusa vehabatur:

*Polonia à  
Lituanis  
vastatur.*

*Prodigium  
admiran-  
dum.*

batur : cùm planè limites Poloni transcen-  
dendi essent, atque in Litvaniam transeun-  
dum ; ita repentè hæsit : ut nulla vi admo-  
ta, aut multiplicatis jumentis, loco dimo-  
veri potuerit. Imò lues etiã repentina  
vulgari cæperat, pecudes inter ac milites  
eos, qui fortè currum attigissent. Insolens  
prodigium, cùm aliquamdiu attonitos con-  
siliique inopes Duces belli tenuisset ; con-  
sultus Sacerdos, respondit : Superos pla-  
cari non posse ; nisi sacra illa præda, suo  
loco ex fide restitueretur. Delectus quam-  
primum è captivis Eques Polonus Choro-  
bala ; atque in patriam prodigiosum præ-  
dæ genus reportare jussus ; ubi ille castris  
excessit ; prodigia cessarunt. Præda reli-  
qua ingens, milesque meliore successu do-  
mum deductus. Indè rursus ad solitas cum  
Prussis concertationes reditum : sed nihil  
ferè aliquot annorum expeditionibus ad  
memoriam gestum : repentinis tantum po-  
pulationibus plerumque agri & agrestes  
vexabantur : rarò arces aliquæ, insperato  
impetu, interceptæ, atque everfæ. Exæqua-  
bantur

*An. 1371.**An. 1372.*

bantur ferè mutuo damna : nam Kieystuto præcipuè intendente , hostis impunè non poterat grassari ; sed quæcunque per Litvaniam edidisset , paria illis , domi suæ , pati , coge batur. Assuetudine continuâ , propè sensum incommodorum amiserant : ita factum , ut Litvani eò promptiùs belli Polonici consilia susceperint ; quò minus periculi inter mutuas vexationes metuebant à Prussis. Cupido prædæ , bello occasionem dedit : muliebre in Polonia regimen , & spem & auspicatos successus adjecit. Nam pro Ludovico Hungaro absente , mater ejus Elizabetha inter gravem annis ætatem , morum judicii que levitate celebris , Rempublicam administrabat. Circumferebatur inter Polonos fama , non tam certò aliquo nuncio sparsa , quàm inter prudentiorum conjecturas enata , Litvanos contemptu muliebris fortunæ summâ vi in ditiones Polonas bellum instruere. Monita à Senatu Regina , ut maturè provideret , ne quid Respublica detrimenti acciperet , muliebri jactantia respondisse fertur. *Filio suo imperante*

An. 1376.

*Litvani  
Poloniam  
adoriuntur.*

*rante vanum Polonorum timorem esse : sufficere illis solam nominis ejus famam , ad extorquenda è manibus quorumque finitimorum , ne dum barbara gentis , arma.* Interea Litvani non procul Lublinensibus agris , validissimo è Litvanis , Samogitis , Russis , Wolyniis , exercitu recenso ; repentè in Poloniam , Octobre exeunte sunt effusi. Aderant exercitui præsentes Olgerdus ipse , Kieystutus , Iagiello , Vitoldus , Lubartus Theodorus , & Georgius Narimuntovicius , Duces : Ita Lublinensis , Sendomiriensisque Palatinatus , Podgoria universa , magnaue Cracoviensium agrorum pars , & quidquid Sanum inter & Vistulam interjacet , divisis copiis uno velut impetu oppressum est. Incredibili celeritate quaquaversum populabundæ legiones volitabant : pauci Polonorum inter subita pericula ad arces vel alteram Vistulæ ripam evaserunt : plurimi aut domi securi occupati , aut in fuga incauti intercepti. Clades ingens vix explicari potest. Integris enim decem hebdomadis , in templa , ædes , agros , igne ; in colonos ac in-

X x

colas

colas ferro sævitum est. Elizabetha verò, inter sumptuosa convivia, musicosque concentus, vix audiebat tam deplorati Reipublicæ statûs rumorem. Cùm satietas ipsa populandi ac prædæ, finem prædando imposuisset; nullusque in campo hostis compareret: onustus spoliis Litvanus, integris signis domum rediit. At non minorem domi stragem à Prussis editam reperit. Nam Vinricus Prussiæ Magister, nudatam præfidiis Samogitiam nactus, sex integra territoria depopulatus est. Revocatas à populatione agrorum cohortes Caunæ admovebat: sed cùm tentata oppugnatio irrito conatu cederet; fortissimis quibusque sub muro amissis, desperatione victoriæ oppugnationem reliquit; prædamque, quam patentibus ad injuriam locis collegerat, in Prussiam eduxit. Inde rursus cum decem millium milite Mareschalcus Prussiæ in Litvaniam expeditus ad Niemeni ripas longissimè ferro & igne grassatus, ingentem prædam abegit. Ludovicus Rex, ubi cladis per Litvanos illatæ rumor in Hungariam

*Litvania à  
Crucigeris  
vastata.*

*An. 1377.*

gariam pervenit , quamprimum inde in Poloniam , compendioſo per Sanocenſes montes itinere , movit. Ad Sendomiriam (quo viritim ad arma evocatus Equeſtris ordo convenerat) recenſo milite , partitus eſt exercitum : alios Duce Sandivojo de Sulin ad Chelmenſem oppugnationem deſtinavit ; ipſe verò , Hungaros & Cracoviſem, Sendomiriſemque nobilitatem, ad Belzam duxit. Sandivojus felici ſucceſſu uſus brevi Litvanos univerſâ Chelmenſi poſſeſſione ejecit: Chelmia caput regionis, Grabovia , Horodla , Sewoloſa , arces captae. Regi ad Belzam diuturnior oppugnationis fuit. At Georgio Narimuntowicio harum ditionum Duci res interea planè deſperata. Neque enim fortunæ ejus tanto bello ſuſtinendo pares erant : auxilia verò à patruis , Litvaniæ Ducibus , in Pruſſiam intentis , ſperare non poterat , aut valida, aut in tempore affutura. Kieyſtutus ſolus, ut erat verſatili ingenio , atque ad omnem fortunam formatus, remedium rebus pænè projectis invenit. Nam amici titulo ad Re-

*Polonorum  
contra Lit-  
vanos ex-  
peditio.*

*Kieyſtuti  
pro patria  
artes.*

gia castra admissus , nuper hostis & incen-  
tor bellorum , jam pacis orator , & arbiter  
fæderum , periculofissimi belli cursum sti-  
tit : pacto fædere his conditionibus. ut  
*Kieystutus ad suos reversus Polonos , qui per Lit-*  
*vaniam captivi haberentur , liberos dimitteret ;*  
*Georgius Belzam Regi traderet ; reliqua retineret.*  
Traditâ statim Belzâ Georgius Regi con-  
ciliatus, cùm fidem suam ei obligasset, non  
solùm ditionem amissam Belzamque rece-  
pit , sed etiam Lubaczoviâ à Rege auctus  
est. *Tantum valent etiam inter gladios, furem-*  
*que Martem , pacis artes :* quamquam matu-  
rando cum Litvanis fæderi , non leve mo-  
mentum attulit, orta per eos dies in castris  
regiis Polonos inter & Hungaros, conten-  
tio : quæ ne ad apertum prælium deduce-  
retur , missio militis inter necessaria reme-  
dia erat. Compositis ad eum modum ex  
voto rebus in Russia , securiùs injurias su-  
periore anno acceptas , Litvani de Prussis  
vindicare tæperunt. Prælusit aliis Kieystu-  
ti filius Vitoldus, juvenis manu consilioque  
promptus , bellandi avidus. Hic suis au-  
spiciis

*Vitoldi ex-*  
*peditiones*  
*in Prus-*  
*siam.*



spiciis Prussiam in Iulio aggressus, Insterburgum arcem solo æquavit: inde Taploviam usque populationibus progressus, militem cum præda felicissimè reduxit. Fili-<sup>Kieystuti</sup>um paulò post secutus, Kieystutus pa-<sup>stratagem.</sup>rens. Hic pro suo more, ingenio magis, quàm impetu, tractare arma solitus, exercitum per confinia Mazoviæ in eam Prussiae oram duxit, quæ à Litvanis maximè aver-  
 sa; ut longior à periculo videbatur, ita minùs sollicitè communita erat. Circa Dzialdoviam & Nidburgum securos periculi Prussos subitâ clade obruit. Repetita est rursus paulò post expeditio, sed majore mole junctisque in commune cum Olgerdo viribus trifariam divisus exercitus, eodem simul tempore Velavienses, Salovienses atque Insterburgenses agros latissimè vastavit. Neque Prussi interea quieverunt. Post Bielscum in Subsylvania validis copiis aliquandiu irritò conatu oppugnatum, universam eam provinciam populati sunt: inde per ipsam Litvaniam ac Samogitiam præda deducebatur; institu-

*Prussi in  
Litvania  
cæsi.*

tis , ex itinere , per propinqua vastationibus. Nemo aperto campo signa furentibus opponere ausus est: paucorum tamen consilio , per insidias insigniter hostis attritus. Succisis enim inter silvas (quæ Prussis eundum erat) arboribus , congestisque truncis , illac tantum patentes transitus relictifuerant , quæ occultatæ de industria fossæ, maximè impediabant. Cum itaque in eum locum ventum esset , coorti è silvis Litvani , magno tumultu speciem potius prælii, quàm prælium inchoant. Ita hostes insidiarum ignari, cum in apertos transitus impetu feruntur , in latentes fossas impulsif, partem præcipuam exercitûs , cum Ducibus amiserunt : reliqui desertâ prædâ , per tutiora eluctati, incolumes evaserunt. Meliore deinde successu ternas in Litvaniam excursiones Prussi eodem anno instaurarunt. Iniquior longè fuit Litvanis sequens

*An. 1378.* annus. Godefridus de Linda Prussiæ Marchalcus , è cujus familia in hunc usque diem etiamnum in Prussia & urbe Gedanensi supersunt posterif, duodecim millium exercitu

exercitu igne ac ferro, Trocos usque ac Vilnam penetravit : ab ulteriore populatione, non armis, sed Kieystuti consiliis fæderumque promissione averfus. Similem cladem Samogitia tulit : ubi à Ragnerano Præfecto Cunone de Hartenstein, sex integra territoria miserrimè pervastata sunt. Eadem sors Vilnam ipsam, caput gentis involvit. Exeunte Iulio quintis castris ingentem exercitum Godefridus Vilnæ ipsi insperatò admovit : non miles, non consilium Litvaniis in promptu erat. Itaque Kieystutus unius diei fædus rogare : interrim hostium Ducem ita versare, ut ab incendendæ urbis consilio dimoveret. Promiserat Godefridus : sed militis furor non patiens victoriæ spem, aut eripi, aut differri ; contra imperata Ducis, intra ipsum fæderis diurni tempus, flammæ urbi subiecit. Pars magna urbanarum ædium ignibus absumpta : reliqua civium studio ægrè servata. Difficiliorem deinde arcium oppugnationem hostis reperit : quare non ultra diem ad eas moratus, in Prussiam castra movit.

*Vilna à  
Prussis  
exusta.*

*Vitoldi  
stratagemata.*

movit. Abeunti illi, si non victoriam, certe victoriæ sensum, Vitoldus insigni ingenio extorsit. Cum quingentis expeditorum Equitum, quos rapere inter subita poterat, citato agmine hostem prævertit: impedimenta commeatumque omnem inter silvas nuper relictum invadit, occupat: provide summa celeritate, ne quâ transiendum hosti omnino foret, pabulum aliquod per vicinos agros haberi posset. Demum fatiscentes ac pænè enectos sex dierum inediâ, & itineris laborem, per intervalla inter impeditos transitus, fatigat, carpitque. Ita hostis inter continuas suorum fame ac ferro pereuntium clades, ægrè eluctatus; nihil ferè domum de nupero successu reportavit: victoriæ præteritæ memoriam, præsentis mæroris sensu, obtundente. Quid proximis deinde annis actum sit, nihil consignatum reperio: sive scriptorum incuriâ; sive etiam quod utrinque interea ab armis temperatum esset. Illud solum ad memoriam proditur. Quo tempore ab acerrimo hostium Litvania liberata est:

ta est : eodem maximum suorum Principem atque antiquis heroibus ex merito comparandum amisit. Eodem enim anno *An. 1381.* in Prussia Henricus de Kniprod Magister, *Olgerdus* & Olgerdus in Litvania M. Lit. Dux fati *motum.* concesserunt. Numerosa erat Olgerdo masculula proles ; sed ante omnes Iagelo in amoribus : eum itaque sibi successorem designavit. Tantum verò valuit iudicium morituri Principis : ut inter tot æmulos nemo ante Iagelonem , Principatum ambire ausus fuerit. Vix concordiam ex æquo æstimes ; si æmulorum numerum iniveris. Sex ipsi Olgerdo filii, ex Vlianâ Vitepscenſium Duce suscepti : Volodimirus Kijovienſium Dux : è quo deinde genitus Olelko seu Alexander , Slucenſium Ducum familiam inchoavit. Ioannes Zedzevitus Podoliæ *Fili Olgerdi.* Dux. Simon Linguienejus seu Languinus Mscislavienſium Dux. Andreas Wigundus à quo Trubecenſibus Ducibus genus est. Constantinus Dux Czernikoviæ , è quo deinde Czartorienſium Duces prodire. Theodorus Lubartus Sanguszkorum pater.

Yy                      rens,

rens, à quo Kovelscii & Koszyrscii Duces. Quinque alii (præter Iagelonem) suscepti è Mariâ, Twerensis Ducis filia: Skirgello, Swidrigelo, Korybutus, à quo genus ducunt Zbarascii & Wisniewiecii Duces: Demetrius Korëciorum Ducum parens: Vigundus, qui susceptis, ritu Rutheno, Christianis sacris, Basilius dictus fuerat: & paulò post Alexander, cùm ad Romanos transfuisset; Severiæ ac Kiernoviæ Dux. Kieystuto quoque erant filii sex Vitoldus, Patricus, Totivilus seu Theophilus, Sigifsdus seu Sigismundus, Andreas Woydatus, aliàs Harbatus; Dougothus: omnes armis exercitati, gestisque feliciter in bello rebus celebres. Nihil tamen movere fratres: quamquam omnes ad imperium dignitate pares: plerique ætatis præjudicio propiores. Nihil patruus ipse Kieystutus, qui ut ereptum olim Iawnuto principatum sponte Olgerdo cesserat; ita eodem è vivis excedente, in se familiamque suam transferre non injuria posse videri poterat; præsertim quòd continuis expeditionibus, tantum

tum ipse pro Republica egisset, quantum nemo alius. Sed maluit, dare amoris fraterno; ut sub nepote Principe privatus viveret; quam meritis suis; ut Principatum, suæ domui, quæreret. Dignus maximè vel eo nomine principatu; quod eum aliis non illibenter concedere sciret; quo solus dignus, meritorum præjudicio, æstimabatur.

## L I B E R I X,

*De rebus Litvanorum Rempubicam administrante Iagelone Vladislao.*

**P**ersolutis patrio ritu, vetereque formâ Olgerdo justis, universi Ordines, ipso Kieystuto auctore, plenis comitiis Iagelonem Magnum Litvaniæ Ducem renunciarunt. Non facile discreveris, plusne valuerit ad concordiam, reverentia defuncti Principis, qui inter moriendum jus succedendi Iageloni consignarat: an exemplum Kieystuti, qui & Reipublicæ causâ & privati in fratrem amoris officio, ad omnem Iageloni subjectionem præstandam

*Kieystuti  
erga Iagelonem  
benevolentia.*

Y y 2

aliis

aliis præibat. Magnum hoc & temperati in egregiæ fortunæ occasione animi, & constantis in cultu amicitiae argumentum: sed cæteri illud secuti, quàm libenter jurejurando fidem Principi novo obstrinxerunt, tam inconstanter eandem coluerunt. *Tantum interest quo quis animo ad concordiam & obedientiam accedat. Inconstans enim agendi propositum plerumque est, quod ad aliena tantum imitationis speciem, non ex destinata propria mentis virtute suscipitur.* Cæteri itaque pro oblata rei propriæ opportunitate, ad rebellionem suâ sponte desciverunt: Kieystutus, fraudulentis ambitiosique hominis artibus, pænè eversus, nonnisi tum arma sumpsit, cum sumere coactus est. Woidilo, homo nascenti sorte infimâ, ingenio vaser ac promptus, à pistrino (ubi pistoriam aliquamdiu eum exercuisse ferunt) ad cubiculum Principis & summos favores magistratusque Olgerdo imperante pervenerat: post Lidensem præfecturam administratam, ultimis ejus annis supremus arcanorum consiliorum præses creatus. Apud Iagelonem, iisdem artibus,

Woidilonis  
contra  
Kieystutum  
factiones.



artibus, non retinuit modò fortunæ locum, sed etiam altiùs extulit : sororem enim Principis Mariam , defuncto Davide Duce priore marito viduam, in conjugium accepit. Hoc verò tantum Domûs sanguinisque sui probrum Kieystutus palam ægrè ferre: atque eò apertiùs liberiusque factum damnare ; quòd ætate, auctoritate, & potentiâ grandis, pænè parentis locum obtineret apud nepotem , tum propinquitatis jure, tum Principatus non averſi beneficio, ſibi obligatum. At Woidilo *inde fortuna ſua in ſummo ſtanti , magis timere : Æſtimare ſecum, quàm inſtabiles juvenum amicitia : quàm prorum mobili Principis animo , ſi patruſ auctoritate pulſari inciperet, ſibi non conſtare.* Quia verò ad vim par non erat , fraudibus res ſuas firmare , Kieystutum penitus convellere. Criminabatur maximè : *Kieystuti filiorumque ejus amicitiam , nihil ultra externam ſpeciem habere: Principatu tamdiu eos carere poſſe, quamdiu ejus invadendi facultas non ſuppeteret : intentos interea eſſe in omnem Jagelloniſ opprimendi occaſionem.* Neque difficile fuit ſiniſtris ſermonibus apud

cupidum dominandi juvenem, si non fidem, saltem suspicionem reperire. *Facilis est enim inter Principes de aequalibus suspicio: quos regnare posse advertunt, cupere præsumunt.* Nutantem jam suspicionibus Principem, facilius deinde in odium armorumque cogitationem impulit. Secretis consiliis Kieystuti cum prole cædes decernitur: Voidiloni tanquam fidissimo hostium indici præmium, ditiones oppressorum promittuntur. Differre nihilominus tantisper apertum bellum placuit, donec Crucigeri Equites per Prussiam, & Livoniam ad societatem armorum pertraherentur. Occultissime inter Iagelonem & Prussos fœdera conscribebantur, Voidilone administro: cum Augustini Sudsteinii Ostrodomensis Præfecti indicio, res ad Kieystutum emanavit. Nam quòd nuper Danutam ejus filiam, Ianussio Masoviæ Duci nupturam, Christiano more è sacro fonte levasset, pro initæ necessitudinis ratione, amicum periculi imminuentis admonuit. Trocis tunc agebat Kieystutus. Ad insperati nuncii fulmen,

vix

*Conspiratio  
Iagelonis  
contra  
Kieystu-  
tum, ejus-  
que do-  
mum.*

vix ipse sibi credere ; inter tot tantaque sua benè merita , potuisse tantum scelus animo nepotis concipi , nedum destinari. Tum in furias contra confiliorum moderatorem versus , extrema Voidiloni minari. Mox seu alia de causa , seu quodd ipse natu jam magnus , sui loco juvenem bello acerrimum in hæc concertationes immittere mallet ; filium Vitoldum Grodnâ evocat : questusque multa , infidias ex ordine aperit : urget in Iagelonem , cui tam parum esset sanguinem suum vilissimi hominis connubio nuper polluisse ; ut etiam eundem augendæ nefariæ dominationi , hostium armis propinare non vereretur. Vitoldus ut erat amicissimo semper in Iagelonem animo , nihil horum in mentem demittere : connubium Mariæ sororis cum Voidilone excusare : fœdera cum Crucigeris & infidias negare ; omni demum conatu parentis affectus componere. Illud potius ipse suspicari , parentique persuadere ; non à Iagelone , sed ab hostibus fraudem timendam. *Hostiles nimirum hæc , ajebat , artes esse ;*

*CURARE*

*Kieystui  
consilia, post  
intellectam  
Iagelonis  
conspiratio-  
nem.*

*Vitoldi  
Kieystui  
de constan-  
tia singula-  
ris in cole-  
do Iagelone.*

*curare ut quorum concordia formidabilis esset , eos  
sinistris rumoribus inter se committerent , & tandem  
mutuis cladibus attritos , facilius ipsi opprimerent.*

Kieystutus sive persuaderi reverà sibi passus , sive ( quod verò propius ) omnem suspicionem se deponere , in speciem testatus , Vitoldum Grodnam ac Drohicinum dimisit. Verebatur enim fortè ne præsens , pro eo , quem constantissimè in Iagelonem retinebat , affectu , obstacula consiliis suis opponeret. Ipse verò Trocis in omnem partem intendebat : ne quà subito tempestas in incautum ingrueret. Pauci dies intercessere , cùm non dubia proditionis argumenta emerferunt. Andreas Voidatus Kieystuti junior filius Polociæ præerat. Huic Iagelo nullo jure Præfecturam abrogat ; & Skirgeloni attribuit. Polocenses Voidati factionem secuti , bello novæ mutationi obfistunt : submittitur itaque Skirgeloni exercitus , qui rebellem populum armis ad officium cogat : accessere Livonienfium equitum auxilia , è nuperi fæderis conditionibus promissa. Dum hæc ad Polociam

*Voidati  
Kieystuti-  
da cum  
Skirgelone  
bellum.*

lociam aguntur : apud Kieystutum antiquæ suspiciones indubitatæ signis confirmabantur. *Videbat enim Voydato præfecturam eripi , non alio crimine , quàm quòd filius suus esset : bello contra se movendo Iageloni non deesse animum , sed occasionem tantùm quærì ; hanc quoque non ampliùs expectandam , si parens filii causam tuendam susciperet : denique nova ibi fœdera necessariò debere intercedere , ubi Crucigeri nuper jurati hostes veteribus odiis temperatis , jam pro Litvanic arma ferrent ; & animis oppositi , iisdem castris se contineri pati possent .* His momentis impulsus Kieystutus jam non timere tantùm suo capiti , sed etiam audacioribus consiliis providere. *Faciliùs quippè domestica insidia audendo opprimuntur ; quàm metuendo evitantur .* Magno itaque silentio militem qui ad destinata sufficeret recenset. Trècentos è Samogitis Equites ( quos fidissimos atque ad ardua suscipienda exequendaque imperia idoneos probaverat ) Vilnam ire jubet : atque per variorum negotiorum speciem , in diversa hospitia sparsos , ita ad condictum diem agendi mandata expectare , ne qua

*Kieystutum  
Vilnam occupat , Iagelonem caput , Voydilonem ple-*  
*Elit.*

Z z

suspi-

fuspiciandi occasio præberetur. Sexcentos deinde pedites plaustris, fæno aliisque id generis rebus onustis occultatos, intra mænia immittit. Denique omnibus ad subitam vim ex ordine comparatis, ipse cum delecta mille equitum manu citato agmine advolat: dato armorum signo reliqui ex insidiis repentè coorti ad Ducem concurrunt: arces occupantur, cingitur armata regia, Iagelo cum parente Vlianâ & sorore sua Maria in potestatem redigitur: urbi arcibusque præsidia imponuntur. Firmatis rebus eodem ipso die Voidilonem (totius hujus scenæ auctorem) in furcam agi victor jussit. *Ita nulla incertior fortuna est, majoribusque ruinis obnoxia, quam qua repentinis augmentis ad summum evecta, per fraudes aut continuatur, aut ad altiora intemperanter urgetur. Ex altissimo monte (undè, in subjectam urbem, undequaque expeditus patet aspectus) malè tractatæ fortunæ pæna, eversæ exemplum, Voidilo de patibulo spectaculum exhibuit. Cum deinde ad arcana consilia vestiganda, scripturæ per ocium studiosè*

diosè excuterentur, productæ sunt literæ, manu signisque factionum communitæ; quibus pãcta nuper cum Crucigeris contra Kieystutum fœdera continebantur. His vulgatis, audax atque primâ specie atrox Kieystuti factum, levius inter populares audire cæpit; & animi à commiseratione Iagelonis, in odia verti. *Tam leves sunt vulgò affectus, & exiguis momentis mutabiles! Facile enim deponuntur, qua impetu, non ratione assumentur.* At Vitoldo inter tanta offensio-

num argumenta, constabat vetus in Iagelonem amicitia. Celerrimis nunciis facti totam seriem à parente edoctus, cùm Vilnam Grodnâ advolasset, inter filii, fratrisque amicissimi affectus, vix verba, nedum consilia reperiebat. Parenti gratulabatur palàm deprehensas oppressasque hostium artes: & ipsâ gratulatione violari amicitie sacra, apud se dolebat, cùm amicum Iagelonem hostium nomini accensere cogetur. Susciperet negotium agendi pro amico, sub alieno arbitrio incertam vitæ spem, inter publicas custodias, trahente: sed de-

*Vitoldi  
Kieystuti-  
de constans  
erga Iagelo-  
nem ani-  
mus, paren-  
tem ad mi-  
tiora confi-  
lia fleclit.*

bita in patrem pietas lædi videbatur. Exprobrabat enim parens , quòd cùm nuper consiliorum initia à se indicari audisset , inconsultæ amicitiae specie occæcatus , apertum sui paternique capitis discrimen , aut non vidisset , aut non curasset : eumque ut fratrem & amicum colere non cessasset , qui professis insidiis hostem se fecisset. Vitoldus non veritatem rei in dubium revocare , non fæditatem criminis destinati elevare : neque tamen Iagelonem odisse poterat. Igitur facinus quidem execrari , sed omnem invidiam in Voidilonem congregare : tum ipsâ sumptæ de Voidilone vindictæ laude atque exaggeratione , parentis affectus temperare ; tandem sensim rem deducere ad memoriam Olgerdi : quâ ubi emollitum Kieystuto animum advertit , juvenilem pro Iagelone levitatem prætendere ; suas etiam preces interponere. Hâc ratione Kieystutus ad mitiora consilia flexus , Iageloni vitam donavit : è paterna hæreditate Krevenssem Ducatum , è Materna Vitepsciam attribuit ; pecuniâ omni thesauroque

*Iagelo è custodia liberatus Kre-  
vum aman-  
datur.*



roque amplissimo quem in arce Vilnensi occupaverat, penitus abstinuit: Principatu solo mulctatum, privatum agere iussit. Inde ad Reipublicæ in se translatae curas versus, inprimis ne quæ novorum motuum materies Vilnæ relinqueretur, Vitoldo commisit, ut Iagelonem cum parente ejus Vliana, cæterisque suis, Krevum deduceret. Præstitum id à Vitoldo, magnâ & amicitiae & honoris in afflictum Principem significatione. Deinde ad exercitum missi, qui sui Principis nomine à Polociæ oppugnatione discedere juberent. Paruit miles magistratui militari. At Skirgailo Dux graviora veritus, cum auxiliaribus copiis vitatâ Litvaniâ in Livoniam abiit. Mox in Severiam ducendus erat ipsi Kieystuto exercitus. Nam alter ejus nepos Demetrius Korybutus, cùm nuper Iageloni rebellasset; non modò nullum Magni Litvaniæ Ducis in Severiam jus agnoscere volebat: verùm etiam novorum in Litvania inter Principes diffidiorum opportunitate usus, aliquot finitimas arces armis occupaverat.

*Occasione belli Severiensis lecto milite, Vilnam & Principatum Kieystuto eripit.*

Contra illum Kieystutus maturè movit. Ne verò se absente turbarum aliquid enasceret, Iageloni quoque quantocius suos Vitepscentes sub signa cogere, & in castra properare mandarat: ita enim putabat fore ut per speciem necessariorum auxiliorum à Litvania eductus, à novandarum rerum spe averteretur. Verùm Iagelo lætus datam sibi scribendi militis copiam; aliquantùm versùs Severiam cum exercitu progressus, repentè iter flexit, & magnâ celeritate Vilnam contendit: ubi Hawnulonis arci Præfecti, & urbani Magistratûs proditione, noctu intra mœnia receptus, arces occupavit, Kieystutiani præsidii partem cecidit, partem in vincula conjecit. Potitus eo modo Vilnâ, legatos in Prusiam atque Livoniam ad petenda auxilia dimisit; ipse relicto in urbe valido suorum præsidio, recreatum auctumque militem contra Vitoldum Trocos duxit. At jam Vitoldus de tota re ab amicis monitus, cum Birutâ novercâ, Grodnam se receperat. Urgebat tamen oppugnationem Trocorum

*Trocos expugnât.*

corum Iagelo : neque diu Trocenses vim tulere ; desperatis auxiliis , cum civitate , arcibus , & fortunis in Iagelonis partes concesserunt. Vbi ea Kieystuto ex ordine *Kieystuto contra Iagelonem ducit, Trocos obsidet.* sunt nunciata , relictis Russorum legionibus qui aut Novogrodiaë obsidendæ infisterent, aut finitima ab infestationibus Koributi tuerentur : ipse magnis itineribus in Samogitiam regressus , lecto tumultuariè milite Viliam transgreditur , castra sua Vitoldo , qui jam Grodnenses sub signis habebat , conjungit. Quia verò per legatos auxilia à Ianussio Masoviaë Duce affine suo nuper poposcerat , eaque in dies ventura expectabantur, noluit exiguis copiis, rectà contra Iagelonem ductis , ante adventum auxiliorum in extremam dimicationem summam rei deducere. Ne tamen armatis, quos habebat, torpentibus inter ocia agendi tempus laberetur, Trocorum oppugnationem orsus est. Paucis diebus continuatâ obsidione , arcta undique res , ad alia consilia coëgit. Inde enim significabatur, Ianussium non modò auxilia denegasse ; verùm

verùm etiam violandorum impunè fæderum opportunitate arreptâ, novum bellum per Subsylvanam ditionem circumferre. Et jam Drohicinum, Mielnicum, Surasum, Kamienecum subitâ incurfione occupasse. Inde Iagelonem Livonicis ac Prussicis auxiliis auctum, jam Vilnâ castra movisse. Perspectum erat Kieystuto, quàm ingentes hosti essent copiæ: quantum ipsi & armorum genere, & numero militum, inferiores. Attamen seu causæ æquitate securus: seu quòd in fuga parum præsidii, plurimum turpitudinis veteranus miles & Imperator videret, ingentes vir spiritus contra Iagelonem duxit, castraque castris aperto campo objecit. Constituerant instructæ ad prælium utrinque acies apparebat Kieystutianos obstinato in pugnam & mortem, gradu pergere; atque adeò solâ pænè desperatione agi; hinc Iagelo, quanquam de suorum victoriâ non dubitaret, ingentem tamen cladem animo præcipere: quare fraudes priùs experiri apud sinceras mentes, quàm arma contra exercitum bello militem

*Iagelo ante  
pugnam,  
fraudibus  
contra  
Kieystutum  
agit.*

militem maluit. Vitoldum per internuncios aggreditur. *Obtestatur, ut obfirmatum pugnandi ardorem, mitioribus consiliis, ipse paterque suus restinguerent.* *Meminissent non hostiles, sed fraternas ex adverso acies stare. Non pugnam modò, sed victoriam ipsam, toti deinde posteritati detestandam, se penitus execrari. Nam cuicunque tandem ex Superùm sententiâ sit destinata: neutri tamen aliter cessura esse, quàm per tot parricidia, fraternasque cades.* *Horrere se tantum scelus: atque ideo quantivis propriis dispendiis, concordiam sine sanguine malle.* Interponeret se modò Vitoldus arbitrum, facile ab eo, inter Kieystutum & Iagelonem, pacem aquâ possessionum partitione stabiliri posse. Non difficilem Vitoldi animum ad ea consilia reperit Iagelonis legatio, utpotè nondum de integro aversum, & è vetere studio non parùm retinentem: tamen quia inter tot violatæ fidei argumenta difficile erat nihil suspicionis in animum transmittere, armato fidere non plenè audebat. Missus itaque Skirgaylo Iagelonis frater, qui commeaturis inter exercitus pacis stabi-  
liendæ causâ, ac inprimis Vitoldo, jurisju-  
A a a randi

randi interpositis religionibus , coram profe & Iagelone securitatem sponderet. Diu de paciscendi fæderis rationibus , stante interim in armis exercitu , inter Duces Iagelonem ac Vitoldum actum est : verùm quòd nihil stabile decerni posset absente Kieystuto , ipsum, ut adesset, invitare placuit. Fidem itaque suam rursùs Iagelo iuramento obligat : Kieystutus post multam tergiversationem , Skirgaylone sanctè coram omnia tuta promittente , ac Vitoldo suadente, tandem Iagelonem accessit. Negotium totum , magis fortè destinato consilio , quàm decernendarum rerum difficultate, in vesperum extractum est. Tum primùm Iagelo vultu ad gratulationem speratæ pacis in speciem composito ; subjicit. *Paucis quidem jam horis ad rem totam absolvendam opus esse : sed ab ingruente nocte , illas haud permitti. Quare quæ consilio superessent , commodiùs in crastinum diem differenda. Quoniam verò de plerisque jam convenissent , non esse necesse , tam incommodâ statione non necessariam sibi molestiam accersere : venirent potiùs Vilnam ; noctem ad curanda*

*Kieystutus  
dolo ad ca-  
stra Iagelo-  
nis allectus,  
Vilnam de-  
ducitur.*

*randa corpora asciperent ; Et sociali cana , futuro faderi preluderent ; cras negotio supremum finem addituri.* Sensere Kieystutus Vitoldusque, & pauci qui aderant è proceribus comites, quòd res spectaret : quid, ultra illa verba, Iagelonis animus agigaret, planum erat: sed jam inconsulta temeritas, quâ se illis infidiis induerant, damnari tantum poterat, non corrigi. Verbo etiam de violata jurisjurandi fide queri ausi non sunt; ne scilicet jurgio, apertæ vi initium darent: ubi ipsi à suis avulsi inter medias hostium legiones, nihil manu tentare possent. Dissimulato itaque timore Kieystutus, quia repudiare absque periculo non poterat, Vilnam profectus est: exercitibus in castra quietè concedentibus, quòd utrique putarent, Duces suos confectis ex voto rebus, fœdera communis hospitii religione auspiciari. At nunquam periculo res vacat, cum ipsa belli capita, solius fidei datæ acceptæque confidentiâ, armato se hosti credunt. Difficilis enim animo ac vix aliqua ibi fidei constantia, ubi quidvis cum hoste patrandi opportunitas, manu tenetur. Eâdem

A a a 2

nocte

*Kieystutus  
& Vitoldus  
Vilnæ jussu  
Iagelonis  
comprehen-  
duntur.*

nocte Iagelo proculcatis amicitiaë, sanguinis, jurisjurandi, hospitii juribus Kieystutum ac Vitoldum comprehendi jubet; atque illum avehi Krevum, hunc Vilnæ in custodiam conjici. Ita Heros ille tot casibus medios inter hostes superior, consilio Vlysses, manu Achilles Litvaniæ, nepotis scelere domi interiit: quintâ nocte submissis à Iagelone sicariis (præcipui erant ex illis qui cubiculi Principis officiis præerant, Proxa, Bilgenus, Kiszyc, aliique) in carcere Krevenfi strangulatus est. Parentavit patruo, regiâ pompâ Skirgaylo Vilnæ in campo Swintoroha. At Iageloni efferatior in vindictam animus nondum refederat. Vidimundum primarum in Samogitia opum senem, Birutæ Kieystutianæ uxoris parentem, in rotam agi jussit: bona ejus conjugi affinibusque adempta Montivido attribuit. Solus supererat Vitoldus, ad quem velut aggere objecto, effusus vindictæ imperus aliquantum hæsit. Obstitit enim tum veteris consuetudinis recordatio, tum novorum studiorum conscientia,

*Kieystutus  
Krevi  
stranguatur: Vidimundus in  
rotam agitur: Vitoldus in car-  
cerem com-  
pingitur.*



scientia, ne gravius aliquid in eum repentè decerneret. Sensim itaque adolescebat conceptum facinus : hinc tempus datum Vitoldo ad meliorem fortunam servando. Vilnâ ille Krevum honorificè deductus, regio cultu quoad alia habebatur , nisi quoddâ arctissimâ custodiâ servaretur ; quæ nemini suorum conspectum, nedum colloquium permittebat. Sola conjunx Anna , fortunam viri spontè secuta , cum duabus puellis liberè admittebatur. Atque hoc ipsum fatis fuit ad libertatem Vitoldi : ita *sapè minimis momentis fata consistunt*. Vigiliis enim quispiam admonet Annam , Vitoldo certam cædem imminere : addit sceleris administratos à Iagelone destinatos jam Krevum advenisse. Aperit illa rem totam marito , simulque suadet ut assumpto unius è puellis habitu , elusis vigilibus , se hosti & certæ cladi eripiat : amicorum curâ omnia ad fugam comparata haberi. Successit feliciter muliebre consilium ; mentito sub vesperum habitu vigilias Vitoldus superavit, atque inter tenebras è muris demissus, con-

*Vitoldus  
in signi con-  
jugis inge-  
nio è carce-  
re Crevensi  
liberatur.*

*In Mazo-  
viam, dein-  
de in Prus-  
siam eva-  
dit.*

scenso equo in Mazoviam evasit. Acceptus ibi à Ianussio Duce uxoris Annæ parente humaniter, assignatisque possessionibus adjutus ; citò seu alia quavis de causa ; seu quòd Litvanis incurfionibus ea regio infecta esset ; seu magis quòd bellum animo vir acerrimus voveret , eoque respiceret unde majora præsidia sperare poterat ; ad Conradum Zelnerum Prussiæ Magistrum abiit. Duriorum se primo congressu Zelnerus prætulit , causatus , non voluntate , sed necessitate amicitiam Equitum Prussiæ , à Vitoldo quæri. Illud æquius tergiversationi suæ obtendisset ; quòd priora sibi cum Iagelone fœdera contra Kieystutum ejusque familiam intercederent : verùm homo Litvaniæ inhians , parum pensi habebat , cujus fœdera ambiret , cujusve rejiceret ; modò , nunc illum , deinde alium , auxiliis firmando , mutua Litvanorum odia , in ipsius Litvaniæ excidium aleret , armaretque. Atque ea causa est cur non diu severiorem illam personam tulerit : mox enim promissis auxiliis , Vitoldo Mariæburgi fedem

dem designavit : præsertim cùm è Samo-  
 gitia illaque Litvaniæ parte quæ Kieystu-  
 tiani juris erat, præcipui ad Vitoldum com- *An. 1383.*  
 mearent, qui oblatis suis opibus bellum in  
 Iagelonem accendebant. Iagelo defunctus,  
 ut rebatur, domestico periculo, vires con-  
 vertit ad externum hostem submovendum  
 è Subsylvania : quam Ianuffius Mazoviæ *Iagelo Sub-*  
 Dux, inter civilia Principum Litvaniæ dif- *sylvaniam*  
 fidia, Litvanis nuper ademerat. Drohiczy- *a Mazovi-*  
 no inprimis exercitus admotus, oppugna- *tis recupe-*  
 tionem virtute præfidiariorum valde diffi- *rat.*  
 cilem habuit : præsertim cum Saszynus  
 Curia Ducis Magister, per media obsiden-  
 tium castra viam sibi fortiter aperuisset, &  
 centum equitibus quâ hastis quâ balistis  
 minoribus armatis comitatus, in arcem pe-  
 netrasset. Per prodicionem deinde aliquo-  
 rum Russorum per loca aliquot simul ædi-  
 ficiis accensis, cùm inde conceptus ignis  
 grassaretur, inde Litvanus muris acriter in-  
 staret ; vir fortissimus, quodd simul utrique  
 malo non sufficeret, arcem semiuistam Iage-  
 loni deditit. Paucis post diebus Surazum  
 deditio-

*Vitoldus  
cum Prussis  
& Samogit-  
is Litva-  
niam inva-  
dit, Trocos  
occupat.*

deditione, Mielnicum inopinato insultu receptum. Kamienecia octo dierum obfisione hosti extorta. Vindicatâ prosperè Subsylvania, domum major cura avocabat. Vitoldus enim cum Samogitis constanter factionem suam secutis, & Magister Prussiæ cum suis in viscera ipsa Litvaniæ ferro grassabantur. Vastatione agrorum Trocos usque pertigerant: cesseratque illis oppidum cum bina arce: sed ad famam redeuntis cum victore exercitu Iagelonis, citato agmine è Litvania excesserunt, arcibus duntaxat valido Germanorum præsidio, comteatuque abundè firmatis. Quia tamen, quâ nuper ruinis patetectæ fuerant munitiones, tam properè non potuerant refici: non diu sufficere præfidiarii loco retinendo, atque oppugnationi sustinendæ: præsertim cum non die aut nocte unquam insultus remitterent Litvani. Pacti itaque libertatem fortunarumque exportationem Germani oppidum Iageloni dediderunt. Interea Samogitæ communi gentis consilio, partes Vitoldi

*Iagelo Vitoldianos  
Trocos ejicit, cum Vitoldo paciscitur.*

toldi tuendas suscipiunt. Iusta hæc omnino metuendi causa erat, ne si plures provinciæ id exemplum sequerentur, civili concerratione omnia Crucigerorum armis per Litvaniam, nuda apertaue proderentur. Præcipuas itaque artes ad conciliandum Vitoldum intendere visum est: missi occultè impigri viri, *qui misericordiâ civium, caterisque studiis sollicitarent animum, necdum sui patriæque oblitum: promitterent ab Iagelone cuncta, qua prætereundum esset, atque adeo qua infami apud hostes exilio & incerta eorum fidei antepondere meritò deberet.* Successit auspiciatò negotium. Vitoldus clam è Prussia abiit; acceptaque quam ex pacto cesserat Iagelo, possessione Grodnæ, Volkonisci, Brestia, priorem amicitiam constanter resumpsit: tantaque deinceps subsecuta est studiorum atque consiliorum conjunctio, ut ne nuncium quidem, extra patriæ fines, inscio Iagelone Vitoldus destinare fuerit solitus: Iagelo verò arcendi hujus belli necessitate liber, alterius inferendi curas suscepit. Contra Ianussum imprimis Mazovia Du-

Ar. 1384.

B b b

cem

*Jage'onis in  
Mazoviam  
& Polo-  
niam expe-  
ditio.*

cem exercitum duxit: vastatis quæ inju-  
riæ per Mazoviam patebant, populabun-  
das legiones in Sedomiriam Polonorum  
provinciam transtulit: Belli quidem hujus  
Polonici Cromerus non meminit: ne ta-  
men quispiam meritò desideraret, quod à  
pluribus Russis consignatum reperio; no-  
luit noster Strycovius lectorem ea igno-  
rare, quæ illi seu errore, seu rei gestæ noti-  
tiâ in suos commentarios retulere. Quàm  
latè præterfluente Vistula vastatio arceri  
non potuit, ferro ac igni absumpta cuncta:  
miles ab effusa populatione cum præda ad  
Zawichwostum in castra convenire jussus:  
Arx eò loci erat ab adversa Vistulæ ripa, in  
quam terrore vastitatis plerique nobiles è  
propioribus agris liberos fortunasque com-  
portarant: rati hostem fluvii transitum ne-  
quaquam attentaturum. Nam neque al-  
veus, aquis per eos dies auctis, erat vado-  
sus: neque ullæ in promptu aut naves, aut  
rates transportando militi, idoneæ. Omnis  
tamen difficultas Radivili Equestris turmæ  
Præfecti audaci consilio cessit: hærentibus  
enim

*Radivili  
in Zawich-  
wosti expu-  
gnatione so-  
lertia.*

enim in expediendo consilio ceteris , ille circumductâ circa sinistram manum equi caudâ , equum in flumen præcipitem agit, suosque idem facere jubet. Horum exemplo totis castris , non expectato Ducum imperio , tumultuariè in flumen properatum : satisque feliciter in adversam ripam pars insidentes equis , pars de caudâ vel jubâ penduli, evaserunt. Defunctis eo periculo , majus oppugnandæ arcis ratio negotium objecit : cùm nihil præter equos, & arma aperto tantùm campo idonea, haberent. Hic quoque ingenio, prompto ad subita , Radivilus usus , singulos milites è vicinis sepibus ac tectis , quantum ferre possent , ligna comportare jubet ; tum congestas ingentes strues sensim in fossam promoveri : exæquatâ fossâ , tantâ deinde copiâ, fustes in adversa mœnia contorsere; ut fama obtinuerit, arcem baculorum conjectu insculptam fuisse: propius tamen verò, quod pauci tradiderunt, observato vento subjectum esse ignem conjectis in fossam lignis ; tum serpente secundùm ven-

tum flammâ , mænia arcemque universam incendio periisse : paucis per flammam dilapsis , qui captivitatem morti prætulere. Inde latissimè per minorem Poloniam vastas circumlata est : nonnisi ad Vislicam & Calvummontem populabundæ legiones prædationem stiterunt. Hæc clades eo major fuit, quò liberius Litvani arma circumferebant , domesticis Polonorum diffidiis, securitatem hosti facientibus. Mortuo enim Ludovico Rege , diversa pro novo Rege studia, præcipuos in Republica Principes , non contentionibus modò , sed & bellis exercebant. Inter opimam ex Polonia prædam, solis Russis ( Polonarum enim rerum scriptores non memorant ) auctoribus accepimus spoliato Calvimontis templo, Crucis, in qua humani generis pretium Christus olim pependerit , partem religiose ac magnificè eò loci asservatam Dowoynæ obtigisse. Vilnam deinde cum triumpho regressis , ingentem cladem inter confertam plebem ( si quis temerè sarcinas , quibus sacra illa præda habebatur, attigisset )

*Dowoyna  
Litvano  
transcendi  
in Polo-  
niam occa-  
sio.*



tigisset) grassari cæpisse. Denique cum nobilis puella, illustri in Polonia domo (de Habdank) orta, inter cæteros nuper captivos abducta, cælestis spiritûs secundum quietem visi monitu, causam cladis edocuiisset: & Crucem illam, & puellam muneribus honoratam Iagelone jubente, à Dowoyna in Poloniam reductam esse. Qui, quòd nuper captivam fæminam honestissimè habuisset, à parentibus, ipsaque puellâ magnarum opum unica hærede, in matrimonium invitatus; susceptis Christianis sacris in Polonia mansit: auctus est ibi novo stemmate; quod Dubno, vulgari vocabulo dicimus, cruce ad memoriâ rei actæ servandam, insigne. Per idem tempus Hungari, quòd de possessionibus per Pokuciam cæteramque Russiam sibi nuper attributis, à morte Ludovici Regis, non levem cum Polonis concertationem metuerent: acceptâ ingenti pecuniâ Oleskum, Kremenecum, Horodlum, Lopatinum, Swiatinum, Lubarto Iagelonis patruo, (qui tunc pro Litvaniæ Principe, Luceo-

*Hungari  
arces ali-  
quas in  
Russiâ Lit-  
vano ven-  
dunt.*

riæ, Volodimiria, atque per universam Volyniam imperabat) vendiderunt. In Polonia interea civilium bellorum, mutuarumque vastationum tædio, factionibus de pertinacia remittentibus, animi in concordiam ab interregno coivere. Tandem Hedvigis Ludovici Regis natu minor filia, communi voluntate Regina renunciata est, atque excluso Sigismundo Brandeburgico, quem Elizabetha Regina mater administratorem Regni destinaverat, atque pars Regem Poloniæ nuper dixerat, Cracoviæ solenni ritu per Bodzentam Archiepiscopum Gnesnensem inaugurata; Regni per se administrandi suscepit curam: donec de sponso Rege, è Reipublicæ bono, ordinum consiliis provideretur. Vulgata ejus rei apud finitimos Principes fama, Iagelonem ad ambiendum eas nuptias permovit. Legatio honorificentissima in Poloniam decreta: capita legationis Skirgelo, & Vigungundus Basilius seu ut alii volunt, Borysus, fratres Principis, cum Haunulone Vilnensi Gubernatore: addita munera Reginae ac

Proce-

An. 1385.

*Iagelo nuptias Hedvigis Polonorum Reginae ambit.*

Proceribus, permunica. Conditiones quibus matrimonium poscebatur, præcipuæ erant. Jagelonem matre Christiana genitum, neque mediocriter in eam religionem semper propensum; cum universis sua gentis ordinibus, sacra Christiana Romano ritu suscepturum: quicquid in Russia, vel Podlachia, per Lituanos Polonis hæctenus creptum esset, Polona ditioni consignaturum: captivos, quicumque è Polonis vel Russis haberentur, absque pretio liberos dimissurum: Magnum Litvania Principatum, cum universis Litvani juris provinciis, Reipublica Polona aeterno fœdere conjuncturum: quicquid in thesauris haberet, in Polonia Regni commoda cumulanda expensurum: atque inprimis omne consilium ac opem collaturum ad Silesiam, Pomeraniam, Prussiamque recuperandam. Eò gratiora hæc proceribus Polonis acciderunt, quia & minùs expectata, & in rem Polonam non parum conferentia: quare legatio æquissimis auribus accepta est; visumque omnibus, studiosè allaborandum esse, ne qua firmandæ, per conjunctionem validæ gentis, Reipublicæ occasio impediretur. Reginæ tamen (ut ferè faminis privati

amores

*Legatio Jagelonis Polonis gratia, non Reginæ.*

*amores ante publica commoda sunt*) alienior erat ab his consiliis atque Iagelone (cujus formâ aliquantùm offendebatur) animus; præfertim quoddam alteri à teneris obnoxius. Infantem enim illam, ac propè in cunis, parens Ludovicus Guilhelmo Austriæ Duci desponderat, ducentorum millium vadiumonio adjecto. Legatis Iagelonis, ejus quoque pecuniæ annumerandæ debitum, in Principem suum transcribentibus, cùm Regina nihilò propensiores se ferret, Reginæ matris per legatos sententia quæsitæ est, quid super eâ re censeret: lubens illa permisit, uti Poloni, quod è Republica fore videretur, decernerent. Quare permotopriùs Reginæ in eandem sententiam animo, *pietatis præcipuè (quod maximum in teneras mentes telum est) prætextu*; ne scilicet tantæ gentis ad Christum accessioni obfirmatis in Austriacum amoribus obstaret: frequenti Senatu, Reginæ matrimonium Iageloni promissum est; simulque Legati in Litvaniem missi, Volodko de Ogrodzieniec, Christinus de Ostrow, Petrus Szafraniec de

*Legati ex  
Polonia ad  
Iagelonem.*

de Luczyce, Hincza de Rogowo. Cùm negotium Iagielonium hinc inde per legatos agitur; Vilhelmus Austrius seu occultis nunciis evocatus, seu quodd aliàs propensio-  
 rem in se Reginae animum cognitum haberet, Cracoviam splendido comitatu advenit. Exclusus quidem ille fuerat arcis ingressu, Dobieslai de Kurozwak Castellani Cracoviensis curâ: sed quodd è propinquo suis rebus intenderet, parvo negotio priora Procerum consilia pæne expugnavit. *Agendis enim rebus, vis quædam potior, ac* Procerum  
*momentum, ex præsentia accedit: at qua per inter-* atque Reginae am-  
*nuncios quantum vis impigros geruntur, plerumque* mihi, rursus à Iagelone eveni-  
*nequeunt, ita administrari; ut non aliquantum* tur.  
*langueant.* Itaque frequentiore colloquio, conviviiisque hilarioribus, à Regina ad Cænobium D. Francisci adhibitus Austrius; de ejus in se affectu jam certus, reliquæ Curiae animos humanitate ac liberalitate sollicitare ausus est: tantumque jam illis artibus profecerat, ut & ipse intra arcem versari, regiaque pro hospitio uti permitteretur; & plerique mutatâ mente, standum

C c c

esse

*Rumor de  
adventu  
Iagelonis  
connubium  
cum An-  
striaco di-  
sturbat.*

esse veteribus Ludovici Parentis pactis non obscure sentirent. Certè nisi maturè venientis magno apparatu ad nuptias Iagelonis rumor vulgatus, consiliorum feriem interturbasset, matrimonium inter Hedvigim & Guilhel mum haud invitis Proceribus constitisset. Verùm hi, ad eum rumorem, repentè præsentium oblivisci, in consultæ mutationis pænientiâ, etiam vehementiùs cum Guilhelmo agere. Nam & arce ejectus est: & clausis portis ab Regina conspectu arcebatur. Ægerrimè id ferebat Regina: & quodd magis mirere, propriis manibus vim claustris parabat: ausura certò supra sexum ac majestatem aliquid, nisi Demetrius Gorayski Regni ærario Præfectus impotentes fæminæ impetus prudentibus consiliis composuisset. Guilhelmus verò plura veritus, spontè Cracoviâ clam se proripuit, multa supellectile inter tumultuarium abitum relictâ. Paucis post diebus Iagelo, Litvaniæ Proceribus, ac præsertim suæ stirpis Principibus comitatus, ad aliquot milliaria Cracoviensi

*An. 1386.*

viensi Palatino Spitkone Melstinski , cum  
 delectâ Equitum manu , obviam honoris  
 causâ progresso, Cracoviam magnifico spe-  
 ctaculo , pridie Id. Febr. invecus est. Eo-  
 dem die Reginam ipse coram salutavit:  
 postero, per Skirgelonem & Vitoldum fra-  
 tres , amplissima munera obrulit. xvj de-  
 inde Kal. Mart. qui D. Valentino sacer est,  
 à Bodzenta Archiep. Gnesnensi Christia-  
 nis sacris initiatus , Vladislai nomen acce-  
 pit. Alii quoque Duces ( qui Christiana sa-  
 cra nondum susceperant ) cum religioni-  
 bus, nomina mutarunt. Vigundus cum Vi-  
 toldo Alexandri , Skirgailo & Korigailo  
 Casimiri , Swidrigailo Boleslaus , Dougo-  
 thus Georgius, dicti. Successerunt connu-  
 bialia Regum fœdera ; quibus ritè pera-  
 ctis , cum pro Iagelone Alexander Vitol-  
 dus , Michael Iawnutides , & Theodorus  
 Lubartus Sanguszko , Reginae ac Polonæ  
 Reipublicæ spondidissent ; fore ut singu-  
 la, quæ per Legatos nuper essent promissa,  
 ex fide ac ordine præstarentur : solennibus  
 cæremoniis ; Iagelo Rex Poloniæ inaugu-

*Iagelo Cra-  
 coviam ve-  
 nit, bap-  
 tizatus, coron-  
 atus.*

ratus est. Tum singuli Litvani Proceres, suo ac Provinciarum quibus præerant, nomine, Regi Reginæque fidem jurejurando obligarunt; atque ea conventa & pacta, ut æternum rata inconcussaue manerent, tabulis publicis, caverunt. Cùm ea maximè Cracoviæ omnes agunt, cladis insperatæ nuncius publicæ hilaritatis fortunam evertit. Conradus Zelnerus, nuper amicè à Regibus ad Connubialia sacra invitatus, partitus bifariam exercitum in Litvaniam simul & Samogitiam irruptionem fecerat: neque levis erat aut trepidatio, aut vastitas; utroque malo crescente ex absentia Ducum. Ab alia parte Andreas Vigundus Trubecensium Dux, Jagelonis frater, Dnam transgressus ditiones Litvanas infesto milite populabatur. Puer ille admodum ad Christiana Græci ritus sacra accesserat: hinc, aliisque dotibus, ante alios fratres, Russis gratior, universam propè Russiam vehementer jam ante in se inclinaverat. Russicis itaque opibus fidens, cùm absentibus aliis occupandi Principatus spem,

imma-

*Bellum in  
Litvania  
cum rebellis  
Jagelonis  
fratre An-  
drea Vi-  
gundo.*



immaturiùs in animum admisisset pertracto in Societatem belli Henrico Livoniæ Magistro, factaque à Conrado Zelnero Prussicorum auxiliorum spe, audacior, arma per proximam Dunæ oram circumferebat: Lukomlâ, validâ satis arce, per cruentam oppugnationem, potius; propinquiora loca non magno negotio occuparat; Druiâ, Drissâ, atque Polociâ prope sponte ditionem facientibus. Sub idem tempus planè (ut dubium omne absit, rem totam compositis consiliis actam esse) Suentoslaus Smolenscensium Dux Vitepsciam, inde Orszâm aggressus, cùm civitates ipsas expugnare non potuisset, Tyrannorum magis instituto, quàm militari more, exquisitâ per agros crudelitate sæviit. Nam captos promiscuè aut in pagos compingi, & flammis subjectis exuri jubebat, aut levatis in altum ædificiis, ordine longo eos substernere, atque in jacentium colla, levata onera dimittere. Celeribus ista nunciis Cracoviam allata, Litvanos quamprimùm contra hostem ire compulerunt: dati à

C c c 3 Rege

*Skirgailo &  
Vito dus  
bello in Lit-  
vania præ-  
ficiuntur,*

Rege qui summæ rei præessent Casimirus Skirgailo , & Alexander Vitoldus ; Duces in rebus subitis experti : raptis, quæ eo tumultu poterant, copiis (quibus non exigua Polonorum Volonum manus sponte accesserat) acceleratum agmen in extremam Litvaniæ oram , ut abeunti cum præda Conrado , via interciperetur : sed jam is non satis aperto fidens , in tutiora maturè, cum prædâ , abierat. Quare toto robore contra Vigundum itum est. Lukomla imprimis arx pertinaci oppugnatione recepta est : excisisque, quæ ibi Russorum ac Livonum manserant , præfidiis ; quo deinde exercitus ducendus foret, non nihil sententiis variabatur. Ad Polociam propior hostis erat : sed ad Mscislaviam gravior , & crudelitate & viribus. Iam enim Suentolaus ab Orszana agrorum vastatione Mscislaviam ingressus , caput Provinciæ civitatem , magnâ fuorum , sed nec minore mœnium strage pænè ad extrema compulerat : vix aliquam moram res pati poterat ; cessuram hosti urbem certò ferebant exploratores,

tores, nisi subsidia in tempore adessent. Lukomlæ ergo valido præsidio relicto, sepositâ tantisper Polociæ curâ, rectâ miles <sup>Suentoslaum Smolenscensium Ducem profligant.</sup> contra Suentoslaum ductus: ita patientibus inter ruinas mænibus, aperta que per cuniculos civitate, jam pænè absoluta expugnatio omitti debuit, & universa moles belli in venientem exercitum verti. Quâ latius excurrebant planiores campi instructâ acie, magno impetu in venientes Litvanos Suentoslaus incurrit: primi congressus ferociam, nihilo remissior, cum totæ acies coivere, pugna excepit. Dispar nihilominus pugnandi causa, ut dispares animos faciebat, ita disparem pro æquitate eventum attulit. Turbari primùm apud Russos mediæ, aciei ordines: quos, reficere Suentoslaus conatus, cum audaciùs hostibus adequirit, à Litvano equite lanceâ medio pectore confossus, interiit. A cæde Ducis, tota acies in fugam, quâ propiores sylvæ erant, effusa est. Castra, ab hostibus deserta, victoribus cessere: Georgius quoque filius Suentoslai, post acerrimam circa  
se edi-

*Polociam  
recipiunt,  
Vigundum  
capiunt.*

se editam pugnam, faucius in potestatem venit: restitutus deinde paterno Principatui, cum prius in fide ac obedientia Iagelonis, Magnorumque Litvaniæ Ducum semper futurum jurejurando se obstrinxisset. Victoriâ eâ potitis, vix aliquid negotii in recipienda Polocia repertum: expugnata urbs: de rebellibus, qui autores facinoris aliis fuerant, pænæ sumptæ: Andreas Vigundus Dux & fax-ejus belli, captivus ad Iagelonem missus; universa Russia pacata. Ne tamen quid rursus ab ea parte barbarum cieretur; Boleslaus Swidrigailo, cum mediocri præsidio Polociæ mansit: reliquo exercitu dimisso, Vitoldus Grodnam, Skirgelo Trocos, Mscislaviam Simon Linguen, in Severiam Demetrius Korybutus rediere. Ejus belli curâ liber Iagelo, Vigundo fratre captivo ad Checinenfis arcis carcerem relegato, firmandis Polonicis rebus, per varias interregni vices non parum concussis, neque adhuc quietis, impensius se commodavit: tum ut initio Regni, incolis se quàm maximè probaret, tum ut se-

ut sequens annus expeditior sibi relinqueretur, ad Christianam religionem studiofius totâ Litvaniâ propagandam. Itaque composita ad leges per Poloniam tranquillitate, primis mensibus hybernis Vilnam cum Regina venit. Aderant comites Regi è Polono Senatu, Archiepiscopus Gnesnensis Bodzenta, Ioannes Episcopus Cracoviensis, Ianussius & Semovitus Mazoviæ, Conradus Olefnicensium Duces, Palatinus Posnaniensis, Bartholomæus de Wiszemborg, Christinus de Kozieglowy Sadecensis, Nicolaus Ossolinski Villicësis Castellani. Cancellarius Regni Zaklikus de Miedzygorze, Procancellarius Nicolaus Moskorowski, & Supremus Camerae præfectus Spitko de Tarnow. Post peracta hospitalia festa, genti universæ ad initium verni per quadraginta dies jejunii comitia indicta. Frequentes ordines convenere atque inprimis Principes Regii sanguinis. Statutum ibi est uti superstitiosus plurium Deorum cultus totâ Litvaniâ, cæterisque Litvani juris provinciis, penitus eliminaretur: & Christiano ritu unum Supremum Numen ab

*Tagelo è Polonia in Litvaniam venit.*

*Comitiis indictis, auferit superstiosum plurimum Deorum cultum.*

D d d

omni-

*Episcopatum Vil-  
nensem cum  
a'is Eccle-  
siis erigit.*

omnibus deinceps adoraretur. Legem eam primi sunt executi, qui ex Equestri Ordine Comitibus interfuerunt. Christiano instituto sacris aquis abluti: tum in area arcis infimæ, quo loco, Perkunas vulgò, Fulminum præses perpetuo igne curabatur, templum D. Stanislai titulo per Archiepiscopum Bodzentam dicatum est: à Iagelone amplissimi census Episcopo Vilnensi, cæterisque Sacerdotibus ejus Collegii, vulgò Canonicis attributi. Episcopus renunciatus est Andreas Vasillo nuper reginæ à sacris confessionibus, vir nobili in Polonia Iastrzebeciorum genere ortus, religiosam inter Franciscanos vitam professus. Minora deinde sacerdotia per proxima loca Vilkomeriæ, Niemenczynæ, Missogolæ, Miednicis, Krevi, Obolciis, & Hayni erecta: templa hæc, Regina quoque magnificis donariis & pretiosa suppellectile cumulavit. Iisdem comitiis lege cautum est ne Russi, matrimonio Catholicis prius jungerentur, quàm ritus Græcos deseruissent: fortassis quòd eo tempore Russi à Romano Pontifi-

Pontifice , Græcorum defectionem secuti, abhorrerent. Additum magnâ piæ in Christianam religionem propensionis significatione, uti possessiones Ecclesiarum ab omni pensione, oneribusque fiscalibus aut militaribus immunes perpetuè essent : nullumque jus ipse Princeps , nedum cæteri profani magistratus in capita, aut bona Ecclesiæ , haberet. In singula hæc , ordinibus consentientibus, Skirgelo Trocensis , Volodimirus Kijovienfis , Korybutus Novogrodensis, Vitoldus Grodnensis Duces vice omnium subscripsere. His ex ordine constitutis Dobrogostus Posnaniensis Episcopus Romam ad Urbanum I V profectus est, qui pro Rege, (ex vetere Christianorum Regum instituto ) supremam in Christi Vicario potestatem recognosceret, atque ea quæ in Litvania in rem Christianam acta essent , partim nunciaret , partim rata pro summa autoritate haberi , impetraret. Dimissâ deinde in Poloniam cum Polonis Proceribus Reginâ ; ipse rudibus ad Christiana sacra adducendis omni stu-

*Posnaniensem Episcopum Romanam mittit.*

*Agrestes ad  
sacra Chri-  
stiana in-  
ducit.*

dio incubuit. Difficilem admodum hunc laborem inprimis expertus est: *nihil quippe durius in humanis, quam avitas religiones, quibus quisque innutritus sit, alieno jussu ejurare. Neque enim reverentia metusque Deorum ille, qui à tenero mentibus injectus, cum annis crescit, radibus animis vi solâ evelli potest.* Cùm tamen adverterent jubente Rege sacros ignes extinguere, aras atque adyta profanari, lucos fucidi, serpentes necari, atque omnia securè ac impunè perpetrari: tum vana esse, quæ hæcenus timuissent, suspicari; ac metu sensim imminuto, in Principum religiones spontè transire. Fortè cùm Sacerdos gente Bohemus, de nomine Hieronymus, simulacrum Dei Perkuni, securi demoliretur, incauto ictu pedem sibi graviter sauciaverat: itaque populus Numinis violati irâ hæc accidisse vociferari, religiones suas profanatas plorare: at cùm idem Hieronymus, ductâ super vulnus manu, Crucis sacræ effigiem designasset; verique Dei nomine invocato, sanum repentè pedem circumstantibus ostendisset: tum verò insolentis



lentis prodigii spectaculo attoniti, novæ religionis dignitatem suspicere, antiquæ vanitatem deridere. Accedebat quod Princeps ipse universam Litvaniam lustrans, non verecundaretur Christianam doctrinam ad frequentem plebem Litvano idiomate interpretari. Sacerdotes enim ejus linguæ satis periti ad manum haberi non poterant. Confluebat in dies populus; non humanitate solùm, sed & munificentiam Principis excitatus: nam quoddam rusticanae plebi, solius lineæ ac pelliceæ vestis hætenus usus fuisset, singulis verò qui sacro fonte abluerentur, lanea albi coloris attribueretur; magni concursus fiebant. Oportebat ad fluvii ripam constitutos, per cohortes recenseri, atque singulis cohortibus sua designando nomina, aquis aspergendo tingere. Triginta millia rusticanae ac oppidanæ plebis eâ expeditione, sacro fonte abluta esse memorantur: atque adeo in hanc diem fluvii, ad quorum ripas Christiana hæc expiatio peracta est, populari vocabulo vocantur Swienta: cui respondet latina vox

D d d 3

Sancta.

Sancta. Interea Vitepscii ac Polociæ aliquantum tumultuatum est: quòd excurrere Rex coactus, auctoribus capite mulctatis, morus eos brevi compescuit. Inde rursus Vilnam regressus, sororem suam Alexandram, Semovito Mazoviæ Duci in matrimonio collocavit: è quâ ille suscepit Cymbarcam, Ernesti deinde Archiducis Austriæ conjugem, Friderici tertii Romani Imperatoris matrem. Post nuptiarum solennia regio apparatu ibidem celebrata; quòd abirus in Poloniam maturandus sibi esset, præcipuis primorum consentientibus Casimirum Skirgelonem, sui loco Magnum Litvaniæ Ducem renunciavit, atque solitis ceremoniis inaugurari iussit: eâ nihilominus obstrictum conditione, ut Iageloni Regi supremum jus in Litvaniam remaneret. Rebus per Litvaniam in eum modum compositis, in Poloniam rediens, Volyniam ex itinere obiter lustravit: ubi quòd Cressao Curasvanscio Polono Præfecturam Luceoriæ contra Litvanorum sententiam consignasset; in odia suspicionesque Principum

*Casimirus  
Skirgelo  
Magnus  
Litvaniæ  
Dux re-  
nunciavit.*

pum Litvanorum incurrit; quæ cùm in aperta deinceps bella emerfissent, depositis tandem armis, frequentibus concertationibus diu jactata, nonnisi sub Sigismundo Augusto ex integro conquieverunt. Ius enim in aliquas Ruffiæ Provincias à Polonis Litvanisque prætenfum, utrosque diuturnâ lite exercuit. Quæ verò in eo negotio, aut adversis partium studiis agitata sunt, aut mutuo consensu sancita; in alterâ hiftoriæ hujus parte, temporum rationem fecutus indicabo: ita tamen, ut neque disputationem, neque sententiam super eâ remeam, ipse promam, qui historicum, non arbitrum, tantorum negotiorum ago. Illud inter comperta habendum. Quo tempore Iagelo ad Poloniæ regnum evectus est: præter Litvaniam, Samogitiam, Polesiam, Podlachiam, Vitepsciam, Polociam, Smolensciam, Mscislaviam, Magni Litvaniæ Ducis imperio subjectam: Severiam quoque universam, Kijoviam, Volyniam, partemque Podoliæ, Litvano paruisse.

*DE O regnorum omnium primo supremoque  
Gubernatori ac Domino, Honor & Gloria.*









